


中華文史叢書之卅四
餐菊軒鉛印本影印
王有立主編



據國立台灣大學
圖書館藏本影印

散木居奏稿

(全)

瑞洵撰

台灣華文書局印行

散木居奏稿

二十五卷



太歲在屠維單

閑餐菊軒校印

遼陽楊鍾義題

散木居奏稿叙

景蘇先生既逝之三年吉武重至燕都得先生所爲散木
居奏稿謀付剞劂屬楊君鑑資專任校勘六閱月成書凡
二十五卷吉武乃敬謹爲之叙先生以幹難世族起家詞
館自得講官忠規讜論銳意匡拂不得久居中籌邊扞圉
志不稍衰迄今披讀章疏得窺其蘊蓄之大凡吉武受教
有年平昔講論多及時事忠義憤發窮老彌堅嚮使敷歷
臺省與聞國論其表襮固不止此朝廷得剛明任事之大
臣左右啓納國勢當不致一蹶而不可復振柳文惠云爲
問經世心古人誰盡了徒令後人見其已陳之迹感慨流

連咨嗟歎息而不能已乃自古歎之矣當先生易簀之初
吉武適歸東京鑑資以通家子實朝夕省視見稿草散置
几案間歸白諸尊公雪橋先生雪橋先生謂此吉光片羽
皆關國故不可不亟與收拾因請諸病榻盡攜以歸吉武
先此既爲刻詩草遂不辭賡續爲之以竟先生之志先生
嘗語鑑資云蒙古擬改行省趙尙書爾巽發其端朝論多
韙其議先生審時地度利害毅然辨駁其奏草爲屬籍恆
鈞借錄久假不歸恆鈞亦即不祿遂無從蹤跡惜哉先生
甲午言兵事書吉武別有福本異日當編排別行洎上要
人筦北門時先生在邊見其行事非純臣嘗密疏彈劾摺

既留中稿草亦不復存留此吉武所聞於先生者是役梨棗之資家兄子威壹意玉成我師宮島詠士先生亦極力從與謂孺子可教惟是吉武年逾三十學業無所成就愧負師門赧顏曷極迴憶十年前立雪負牆誨我不倦吉武於行已應物間不致大踰繩準之外皆先生之賜也

昭和十四年秋九月鈴木吉武叙於別府九州大學溫泉治療研究所

天乞老人遺像

宮島秀科題



弘志寫



圖形麒麟世不遭
照影溪壑心
不競須眉惆悵
惟憂國之為病
光武褒節義而
東都之士氣一
振礪世磨鈍豈
不在人

楊鍾義謹贊



科布多參贊大臣瑞洵傳

遼陽楊鍾義撰

瑞洵字信夫號景蘇晚自號天乞居士博爾濟吉特氏元裔巴圖孟克大衍汗之後天命二年二世祖恩格德爾額駙尙和碩公主七年與公主來朝求居東京遂擢入滿洲隸正黃旗賜鐵券諡端順雍正朝追封三等公祖琦善世襲一等奉義侯累官文淵閣大學士諡文勤父恭鏜杭州將軍瑞洵年十七舉光緒元年鄉試戶部筆帖式十二年成進士朝考一等第一名改翰林院庶吉士十五年散館授職編修遷國子監司業性伉直饒幹略敢言事

二十年三月奏陳外省濫保積弊請 旨嚴禁以杜倖進
六月請清查民人冒入旗籍以別流品二十一年二月奏
各省請建專祠迹涉寬濫三月奏各項保舉人員請申明
定例二十二年二月奏各衙門保送滿御史請照漢御史
一體考試中日之役具疏痛劾樞要直聲震 朝右歷詹
事府中允庶子翰林院侍講學士侍讀學士日講起居注
官奏大員子弟失教妄爲請 飭嚴加約束二十四年七
月奏徧設報館實力勸辦奏南漕改折有益無損請 飭
妥議施行每年豫提折價於津通一帶購米以實倉庾竝
衛弁屯田裁併改由地方官徵租二十五年九月奏奉天

地方積弊太深亟宜整頓臚舉飭吏安民練兵清訟治盜
開礦培才籌防八條及團練辦法歷充 功臣館滿總纂
纂修 國史館協修 會典館漢文總校詳校丁酉科順
天鄉試同考官各省駐防繙譯鄉試閱卷大學堂文案處
總辦致祭科爾沁杜爾伯特土爾扈特與宗室盛昱他塔
拉志銳先後登 朝均以林牙著忠讜屢奏封章頗遭忌
華蓋者甘肅洮州人智略過人原名棍噶札拉參嗣入藏
名嘉穆巴圖多普同治間與俄戰於阿爾泰山有功錫胡
圖克圖名號西域人稱華蓋爲察罕格根丙戌留京師且
二年英人窺兩藏識者謂華蓋可以制之瑞洵與之知契

其爲人有肝膽留意人材類如此由侍講學士出爲科布多參贊大臣 召見時有向來敢言辦事公正才學都好之褒名雖超擢實疏之外也受事伊始即值二十六年妖民肇亂 廷寄詔旨率皆絕洋人練拳民心知其非不奉行用安撫政策壹以約束蒙古慰諭外人聯絡鄰境鞏固邊防爲主迄和議告成北路無賠償之案游牧晏然綏疆土遏禍萌有合於閫以外將軍主之之義在軍歷蒙年終頒賞福字黃辮大荷包小荷包銀鏤銀錢食物三十年奉 命往古城招致哈薩克索還阿勒台山經營年餘收回逃衆萬餘人借地亦歸還聲績甚著以經手事竣請解

任得 旨俞允三十一年因案中傷革職遣戍旋被錫恆
兩次奏參交刑部嚴訊奉 旨仍發往軍臺效力贖罪宣
統二年由察哈爾戍所 賜環甫年餘遭辛亥國變家產
亦蕩盡窮餓拂逆勵清修不懈時恭親王溥偉肅親王善
耆相率出京袁世凱患之欲招致使還遣人說令往緩頰
誘以多金正辭峻拒世凱稱帝立籌安會主者請爲會員
不可爲袁所深銜不顧也寄居淨業湖僧舍旦晚修白業
有常課自謂生平以言招尤爲訟過日記手自楷書祕不
示人飲酒微醉閒爲詩歌自遣義甯陳三立稱其清超絕
俗情款節槩可一二推而得之苦志竺行被濯風雅爲方

密之杜于皇一輩人門人鈴木吉武爲刻犬羊集一卷續一卷所著奏議一官一集都二十五卷大題曰散木居奏稿甲戌鈴木嘗爲像贊云嶽降神星應宿清世臣元天族人匡劉出頗牧久行邊終詔獄勞不償禍乃速荷戈還棊局覆松菊荒宗社屋束儒書不復讀歸三寶心西竺首陽薇北平鏃窮益堅但忍辱迄今歲七十六梵網經傳鐙錄戒行高絕貪欲是菩薩佛付屬貞所志老彌篤中湛湛外碌碌噫吁嚱天使獨乙亥鄉舉重逢開復原官 賞給士林雅望扁額丙子三月卒年七十有八

散木居奏稿總目

卷之一

司業集

卷之二

學士集

卷之三

荷戈集

卷之四

籌筆集

卷之五

籌筆集

卷之六

游刃集

卷之七

斂鋒集

卷之八

紆轡集

卷之九

旡藥集

卷之十

強行集

卷之十一

雷池集

卷之十二

壺廬集

卷之十三

勉力集

卷之十四

歲寒集

卷之十五

讓賢集

卷之十六

讓賢集

卷之十七

維谷集

卷之十八

棒喝集

卷之十九

造塔集

卷之二十

微管集

卷之二十一

彌節集

卷之二十二

西征集

卷之二十三

藏弓集

卷之二十四

棄肋集

卷之二十五

熱歇集

散木居奏稿卷之一

幹難 瑞洵

司業集 光緒甲午起

請 飭禁附保積弊摺

請 飭清查旗籍摺

查明捏飾請將保案撤銷摺

請 敕徐用儀明白回奏片

神機營當差司員可否酌定額缺由各該衙門保送片

濫保匪人請 敕部申明定例片

南漕改折摺

滿御史保送舊例請 敕部酌議變通摺

請 飭禁附保積弊摺

奏爲瀝陳外省附保積弊請

旨嚴禁以重明器而杜倖進恭摺仰祈

聖鑒事竊維文武官員著有勞績例得邀獎所以勸有功也有在事出力稍次不得列保者斷無未曾在事轉得列保者乃以臣所聞則大不然方各省之查辦保舉也工於謀幹者一得消息即生覬覦其不能直取者則懇顯宦至交轉相乞請當事者礙於情面亦遂曲徇其求私函朝達薦剡夕登請屬公行視同常例甚有此處出力方保過班而他省著績又請加銜者寒暑甫易官已三遷戶庭未離人且萬里已極鑽營之捷徑鬼蜮之狡謀已夫爵賞冒濫則真才扼腕僉壬微幸則志士灰心且封疆大吏恃賞罰以激厲人材先涉徇私何以服衆近年正途淹滯京秩尤艱或華顛而猶困曹郎或高第而久沈詞館而此附保者徒以一二有力者之推挽便可坐臻通顯頡頏清塗儻竟遂其貪饕假之權位不但有妨賢路並將貽害民生現當整飭官方嚴核保舉之時此種弊端或爲部臣之所不及料伏懇

嚴旨申諭各省督撫將軍都統及邊疆大臣遇有保案秉公覈辦不准仍前濫保以重名器而杜倖進其實在出力人員並當事先聲明勿許隨後補報以嚴稽核庶取巧者無敢生心任事者益思圖報似於吏治軍謀不無小補愚昧之見是否有當謹恭摺上陳伏祈

皇上聖鑒謹

奏

請飭清查旗籍摺

奏爲民人冒入旗籍宜亟清查以別流品而除宿弊恭摺具陳仰祈

聖鑒事竊恭查

會典事例雍正十三年奏准民人冒入旗籍者照過繼民人爲嗣例入於另記檔案內嗣後永不許民人冒入旗籍違者除本人治罪外報保之該管官一併交部議處等語厥後屢經奉

旨議行道光初年復經立限清查並定另冊章程

通飭遵辦當時查出官兵以民人而冒入旗籍者已有二千三四百員名之多俱蒙

寬免治罪另冊註明及身而止迄今又越多年成規漸邈奸僞日以滋厲清釐幾若不行議者至謂八旗官兵半係民人語雖近激非過論也查各旗丁冊原有編審之例本爲杜絕假冒今則廝輿之卒皆蝕錢糧勳舊之家亦多乞養叩以清語而不曉詢以姓氏而不知始猶竄名閑散漸至報捐送考矣初僅承嗣孤孀繼且廕官襲爵矣迨其一旦得志竟儼然以閥閱世家自託名種初不計識者之議其後也此種弊端外旗固所不免內務府利之所在蒙混尤多該管參佐管領各官視爲故常從不舉發致成積重難返之勢雖有稽察御史久等

濫竽各該都統及內務府大臣職務殷繁並皆未能兼顧旗務之壞殆已非一朝一夕之故矣近日革員慶寬一案積久始發其倖未敗露者尙未知有凡幾若不亟行清查任令良賤混淆驕亂旗族何以別流品而除宿弊合無請

旨飭下各旗都統內務府大臣確切查明據實具

奏各該冒入旗籍官兵如係自行呈首另冊註明其所得官職錢糧仍准存支及身而止曾經出兵立功者本身及子孫俱改入各該旗漢軍以示區別儻不自首經該管官查出或別經發覺即行斥革銷檔並查取道光元年都統英和等會議章程參酌辦理至積弊已久並非始自近年所有歷任都統內務府大臣以次該管各官應得處分仰懇

天恩概予免議以示激勵庶隱匿自少察治無難矣或謂旗務糾紛整頓不易欲期廓清鋼弊誠恐窒礙難行不知所窒礙者但不利於假旗人耳刪一間冗即少一冒支於

國家經費旗人生計均屬有益既有所見即當專達

上聞況以臣累世受

恩尤不敢曲徇時宜稍存欺飾區區愚誠伏乞

皇上聖鑒謹

奏

查明捏飾請將保案撤銷摺

奏爲查明捏飾請將保案

降旨撤銷以重功名而昭覈實恭摺仰祈

聖鑒事竊維軍營章奏飾勝諱敗沿習成風久邀

聖明洞鑒然未有如葉志超之軍報竟無一字之不虛者當該革員率軍內渡之時疊據電稱路遇日兵攔截皆經擊退先後殲斃五千餘人請將出力文武各員分別保獎等情並由北洋大臣李鴻章代爲電奏

朝廷閱勞將士甄敘有加且以該革員督師禦敵力挫凶鋒寵賜多珍備極優異在

聖主論功行賞一秉大公初不料外間之欺罔一至此也茲經宋慶查明覆奏欽奉

上諭葉志超自公州退回平壤並未接仗沿途所報戰狀盡係虛捏等因欽此

綸音宣示情僞昭然律以虛報戰功玩視軍務該革員固罪不容誅而僨軍將吏並邀謬舉共肆欺蒙其咎亦均無可免若於前次保案不行撤銷不惟名器私濫恐開輕爵之端且

恩章特沛中外共知垂之

國史傳之四方更奚足以重

詔令而厲天下萬世可否

降旨收回

成命並將葉志超所頒

賞件比照行間獲罪追奪封贈之例

飭令恭繳之處伏候

宸裁臣前於戰事初起敬陳管見即以明賞罰首瀆

天聽蓋以用兵之要全恃此以激厲士氣震懾人心功罪不明即已足以致敗紀綱虧替戰事愈益難平區區愚慮實在於此固非敢以操切之說進也是否有當恭摺具陳伏祈

聖鑒訓示施行謹

奏

請 敕徐用儀明白回奏片

再聞浙江京官上恭親王之書係出軍機大臣徐用儀授意先令呈遞封奏繼以樊恭煦等

不以爲然衆多引去餘十四人遂改爲上書該編修戴兆春陳昌紳等與徐用儀皆係同鄉往來狎熟主使本在意中而徐用儀權勢絕倫炙手可熱亦足能驅遣若輩聽其指揮本月初九日

皇上召見樊恭煦時李鴻藻長麟次第進

見樊恭煦尙在候傳徐用儀竟敢私過直廬責其不附和議該大臣近依

御闥渥荷

殊恩苟一意主和何不可自行陳奏而顧密屬同鄉於恭親王前肆爲矯誣煽惑

朝政殊非忠誠事

君之道應請

敕令徐用儀明白回奏及應如何

嚴斥之處出自

聖裁謹

奏

神機營當差司員可否酌定額缺由各衙門保送片

再海軍衙門現已遵議裁撤奉

旨俞允具仰

皇上循名責實之至意欽服莫名臣竊查該衙門當差各員自總辦以至委員人數實已甚夥濫竽所不待言茲以時勢所迫暫行議裁賢者固無怨尤其不肖者利祿薰心惟以有事爲榮一旦奪其美差豈復能安愚拙勢將別圖進取必欲得而甘心請託鑽營靡所不至向之借徑神機營以入海軍者轉復藉口於原衙門人員希冀回營討取生活斯固事理之必然者也現當海宇騷外患未艾整軍經武實繫要圖神機營治兵爲先訓練乃其本務至於在營文武各員僅供差遣何用廣事摻羅近年風氣所趨各部院精幹司員每於本職之外多兼別衙門差使以爲光寵而神機營例有保獎尤足欲動人心似聞踵趾相接頗有積薪之慨是非差立限斷殊無以防弊端而飭戎政可否倣照總理各國事務衙門考取章京成案酌定額缺由各衙門咨送人員認真考試隨時傳補以期整頓而免冗濫仰候

宸斷施行謹附片具

奏

濫保匪人請 敕部申明定例片

再濫保匪人例有常典近年各項明保密保人員冒叨寵榮猥雜不堪言狀刻章鋪敘動援以人事

君之義藉辭論薦汲引親知殆至劣蹟敗露褫革隨加而

國民受害已深懲創實嫌其晚方今時局孔艱需賢尤亟欲爲官方籌澄叙之道必先使臣工絕欺飾之私自非嚴加處分恐仍無以戒方來而垂厲禁合無請

旨敕下部臣申明定例通行中外並擬嗣後遇有此等情弊一經舉發即應由該部查取原保大臣職名具摺奏參

國法一伸積習自可稍挽矣管見附陳伏祈

聖鑒謹

奏

南漕改折摺

奏爲南漕改折利益甚多有裨時局籲懇

敕催疆臣迅速籌議及時試行以破積習而堅衆志恭摺上陳仰祈

聖鑒事竊南漕改折一事前奉

諭旨敕下兩江總督江蘇浙江各巡撫會同籌議聞督臣張之洞深悉利益決意請行大指以民間完本完折俱仍其舊由官全行折價解京爲主其與蘇撫往復籌商皆持此議乃撫臣趙舒翹電致戶部以開徵在即議尙未定是否照舊起運抑酌量先行折徵請部覈示經部復以照舊起運旋接張之洞來電力陳折漕之利極詭蘇電之非並縷述擬辦情形經部又以本年仍運本色明歲各漕或運或折由該督撫會籌具奏等語見覆詳繹部臣不輕立論之意固以茲事體大須候

聖裁未敢率憑臆斷亦實慮太倉儲峙非充支放或虞不繼近畿災荒屢告採買亦甚爲難而且動款購運皆須巨貲尤非一時能辦此所以遲迴審顧而不敢遽議更張也然以臣反復推求竊知其中情事萬無一可慮者請爲

皇上詳悉陳之

天庾正供歲有常數改折若行明年南漕不來而官俸甲米依舊開支有出款無入款倉場自形支絀辦理必費躊躇然官員兵丁領米能食者少糶變者多大約每石可賣銀一兩二三錢今擬官俸甲米除向領折色仍照向例辦理外其官俸應領五成本色甲米應領二斗本色者每石折放實銀二兩較之定價粳米每石一兩四錢開放二成實銀僅折銀四錢二

分者所得何止倍蓰且官兵可沾實惠無須領票轉賣米鋪一再折耗此弊之無可慮者也夫領折買食可以相安者仍恃歲有南糧百餘萬石爲之流通耳若市廛驟闕此米則米價雜糧自必一切騰踊似於民食有妨然去年順直歉收海氛不靖京城粟米麥豆每石貴至一倍有餘而商米包米每包向賣三兩數錢者不過略貴數錢至四兩而止民間多有改食麪爲食米者可見南米之來源源不絕官米既少商米自多一定之理今擬請於京師通州天津三處廣招商買給予護照令其購米販運免征關卡釐稅務合近年南漕米數四方商賈占望緩急輦穀所需多多益辦二百萬石米糧似尙無難招運况順直玉田豐潤等縣及奉天牛莊皆係產米之區不患無米更能於天津河間永平遵化四府州多水之區疏通溝洫營治稻田墾成萬頃即足當南漕之數計其所收亦足抵南糧之半億兆所託無虞乏食積粟苟多即奸商亦無能居奇抬價此又弊之無可慮者也運費所節僅就蘇甯兩屬計之常年可八十萬以抵採運經費不致不敷如是則南民所完之數即北人所得之數

國家無纖豪之損河海節齎送之勞漕弊亦不禁自除經國遠猷似在於此然使辦理周章易滋擾累臣亦不敢爲此紛更之請也查江蘇藩司所屬徵收情形雖有不同終是折多本少事固輕而易舉張之洞電致戶部辦法縷析條分實已得其要領議於民間向完本者絕

不強其完折照舊開徵並無關涉其收本解折與收折解折之價分爲兩種俱照市價而又略寬確係曲順民情全無窒礙至江甯藩司所屬州縣向來即係全完折色若將糧道所收折價解部尤爲直截了當更不費事夫以漕糧飛輓涉數千里艱阻擲數百萬帑項竭黎民之膏血招官吏之蠹蠹經旬累月始達京師其究竟乃歸於霉變而不可食爲售銀一兩之用今議全行改折一轉移間而重運可改輕齎省無算之虛糜除無窮之耗蝕通計蘇甯兩屬運需例給等項無庸開支所省業已不貲若白糧及浙江一律仿行兩湖全停採買以次擴充連類而及則挑河建閘修船簽軍諸費並可全減甚至漕運總督與所轄之糧道同知通判主簿閘官及三十四衛十四所諸官冗兵倉場侍郎暨坐糧廳監督以下各官皆可裁汰經費所省又何止五六百萬此則刪冗濫而歸大省杜紛擾而振宏綱於公有益亦復於民無害者也屬茲時事孔艱司農仰屋若使歲省千萬於度支不無裨補而歐洲各國見我果能自強亦當悚然改觀心存敬畏從此破除錮弊咸與維新將孱弱可化盛強貧窘可變殷實勃興之機捷於桴鼓此又理勢自然無待著蔡者也臣曾於四月初九日具陳時局孔艱摺內申明將來律例政事略爲修改一語即已微引其端近更參酌時勢諏訪人言南漕折徵實屬利

國利民百年不易之至計事關變法早辦一日即立湔漕務積年之弊亦兼慰天下望治之心若仍拘守成章竊恐難期整頓自強之事何日能行合無仰懇

敕催該督撫臣張之洞等和衷籌議迅速覆陳冀得早日舉行以收窮變通久之效臣爲補救時艱廓清宿弊起見是否有當恭摺上陳伏祈

皇上聖鑒施行謹

奏

滿御史保送舊例請 敕部酌議變通摺

奏爲滿御史保送舊例請

敕酌議變通倣照漢員一體考試以重言職恭摺具陳仰祈

聖鑒事竊查御史一官滿漢並設漢御史向以編檢及閣部正途人員保送滿御史則保送不論正途異途詳釋例意以滿員科甲出身較少故不必定用正途非謂此官爲無足重輕之官遂可以目不識丁者貿然踐其職也乃各衙門每遇保送之時多將明幹之員留署當差而以不甚得力者敷衍塞責以致濫竽備數倫類不齊怯懦者緘口結舌而不言狡詐者蕩檢踰閑而不恤甚至文義未諳體例不講偶有陳奏傳爲笑譚夫

朝廷耳目之司風憲紀綱之地即不望其貫通經史發爲讜言衡量古今裁成篤論亦當人
才略勝始入臺班文字較通纔塵

聖覽而顧使齷齪凡猥之輩皆得冒居持祿竊位於其間於
國家慎重言官之本意不相刺謬歟查漢御史保送後仍俟
欽派大臣考試滿員則不必考試而即與漢員同邀

記名恭讀同治二年

上諭漢員保送御史例須考試滿員則向不預考殊非慎簡言官之道以後保送滿洲御史
著即由各衙門堂官認真考試擇其通曉清漢文字品行端謹者出具切實考語保送候簡
以期臺諫得人力除積習欽此果使各堂官恪遵

功令考試綦嚴未始不可拔眞才而清言路乃近來考送一事率皆視若具文儘有未經考
試即行保送者不才謬舉泄沓如前二十年來未聞成效臣禱昧擬請

敕下吏部將滿御史保送舊例酌議變通仿照漢員一體請

簡大臣考試以昭覈實如蒙

俞允以後各衙門保送時應否稍增員數以備考選之處應請

敕部一併妥議臣亦知此事屢經臣工條奏均以格於成例未及准行第思時局艱難諫垣劇要用人得失關係匪輕似稍事變通不爲無益毫毫之愚謹繕摺具陳伏祈

皇上聖鑒謹

奏

散木居奏稿卷之一

門人鈴木吉武校字

散木居奏稿卷之二

幹難 瑞海

學士集 光緒己亥訖

南漕改折有益無損請 飭疆臣妥議摺

衛弁屯田裁撤歸併片

提價購米實倉片

幼尙書敬信片

瀝陳下情懇 恩賞假摺

叩謝 天恩摺

南漕改折有益無損請 飭疆臣妥議摺

奏爲南漕改折有益無損仍請

飭下疆臣妥議施行毋循故事以期漸除積弊裨佐時艱恭摺仰祈

聖鑒事竊臣伏惟人臣以身事主當時時存苟利

國家之念不可執偏私而誤公朝大臣奉上竭忠當事以和衷共濟爲心不可分畛域而

膠成見向來

朝廷有所敷施外省有所舉動往往言官以爲可行部議必與之扞格疆吏以爲可辦廷臣每斥其更張意見參差是非紛糾雖有良法美意一誤再誤支吾絆掣必至廢輟不行而後已此即在太平全盛晏安無事之時猶必牽率因循隱釀異時之患而況

國家多事之秋哉即如南漕改折一事張之洞在署兩江總督任內奉

旨籌議力請全改可謂公忠體

國獨任其難部臣明知公議所在人人以爲可行不能悍然而阻之也於是試爲游移兩可之辭得過且過之計藉端推諉展轉宕延並無一定切實辦法及臣續行條陳奉

旨交議聞初議亦謂可行已將具摺

奏准嗣以尙書敬信瞻徇迴護力持不可與同官意見不合仍復中止以欽奉

上諭謂應及時舉辦者而尙不能行

朝廷每有變法自強之端必且多方阻撓同歸於廢棄敗壞而不爲挽救以此歎易轍改絃之非易易也嗣張之洞於交卸回鄂時復以改折有利無弊專摺覆陳不知該部如何定議夫以

敕下兩江總督江蘇巡撫再行妥議請
旨施行勿以鋼習而志在苟安勿以內重而意存遷就俾多年積弊漸次可除或於時艱少
補萬一髦髦之愚是否有當謹具摺瀝陳伏祈
皇上聖鑒謹

奏

衛弁屯田裁撤歸併片

再臣正摺所請改折南漕如蒙

宸衷獨斷

特旨施行不特監兌押運各費可裁即倉漕糧衛等官並可酌汰每年約可省銀五六百萬兩米既改折州縣自無從浮收所存於民者其利尤大固非沾沾守舊一孔之見者所能知也此外尚有衛弁屯田一項再能裁撤歸併認真整頓改由地方官徵租計一歲所入又可收回中飽銀七八百萬之數理財大宗無逾於此如

聖明以爲可行臣當再詳悉具

奏謹先附陳大概情形伏祈

聖鑒謹

奏

南漕改折提價購米實倉片

再南漕既議改折則有漕省分均應一律辦理

京倉自難任其空虛應由戶部每年預提折價銀兩就近於津通一帶購買好米以一百萬石爲率逐年收放以實倉庾所有採運存儲一切事宜當留倉場侍郎一員督辦又漕米向有白糧一項上供

玉食自應循舊敬謹解京至王公及三品以上大員俸米應否酌定若干着爲定額統由各該省專員齎解抑或一律改折應請

勅下戶部一併覈議謹附片具陳伏祈

聖鑒謹

奏

劾尙書敬信片

再臣正繕摺間恭讀昨日

上諭知戶部主事吳錫騫條陳亦有請裁衛所之議並蒙

垂詢漕督一缺是否應裁著兩江總督江蘇巡撫一併議奏伏查臣於光緒二十一年十月間曾以南漕改折有裨時局具疏上陳業將倉漕糧衛等官可裁情形據實聲明蒙交戶部議奏當時若早準行此三年中當已節省千數百萬之欸徒以尙書敬信不悉外情

偏執私見不顧

公家之急不察庫帑之艱推諉宕延因循鋼弊並不殫心區畫及時試行遲至今日仍不能舍臣原議另籌辦法真可歎也懍懍下情理合附陳伏祈

聖鑒謹

奏

瀝陳下情懇 恩賞給假期摺

奏爲瀝陳下情籲懇

天恩賞給假期俾資料理一切請俟明正起程冀可努力邊陲專心圖報仰祈

聖鑒事竊臣前承

恩命賞給副都統銜作爲科布多參贊大臣續奉

批旨兼總理各國事務大臣銜旬月之間疊叨

殊遇至渥極優嗣謁軍機大臣大學士臣榮祿復蒙祇述

皇太后懿訓敬悉臣過蒙

天語褒嘉

慈懷體諒荷

聖恩之逾格值時事之多艱尤臣子竭誠效力之秋能勿感激馳驅亟圖報稱於萬一惟臣此次蒙

簡邊缺未能早日起程者一由於整裝之不易一由於清累之尤難加以嚴冬馳逐蒙情所憚亦有不得不量加體恤者緣臣雖係勲門世胄累代將相並無恆產積蓄先臣恭鏗歷任又多邊漠之區清操直節身後蕭條臣頻歲供職翰林惟仗典質借貸用資敷衍自以世受國恩幼承家訓清白自矢亦從不妄使一錢以致臣長年賠累積欠商家質庫暨親友銀項已在萬兩之外京師人情習於涼薄今見臣外任邊遠缺分皆來商索欠欸臣四處張羅迄無以應至馳驛赴任雖荷

恩施要不過僅資人馬之力究須寬備盤川至今亦未籌出又臣尙擬携眷兩子一女皆須隨任長途艱遠科地早寒均須多備皮衣舉凡製辦服用衣物以及跟役僕婦等安家治裝等項無不需費直已無從設措債累一日不了一日不能脫身衣裝一日不齊一日不能就道凡此種種艱窘皆足以亂心曲而阻行期日夜焦憂莫可名狀竊維臣以庸虛之質膺特達之知

擢自詞垣

授以邊寄臣竟不克迅速就道馳赴新任早慰

宸廑上賀

聖慈委寄之殷下辜邊氓仰望之切撫躬循省內疚殊深再四思維刻下口外早已大雪封山台站亦多遷徙禦冬即使臣勉強前往車馬烏拉需用較多當此墮指裂膚之時似亦難強令支應致失蒙心仍須在張家口駐候度歲則又不如稍緩行期猶得近侍闕廷少伸犬馬依戀之誠矣用是萬不得已據實上陳合無仰懇

天恩賞給臣假期兩箇月俾資料理一切一俟明正即當請

訓起程加站前進仍期於限內到任就此

賞假期內一則臣可將家務私事通盤料簡清楚無憂內顧從此即可努力邊陲專心辦事勉圖績效略副古人盡瘁之義不敢顧惜微軀無論年分久暫公事難易臣祇供

驅策決不稍有規避一則臣尚有籌備邊務請練蒙兵條陳擬俟呈請軍機大臣大學士臣

榮祿代

奏如奉

恩旨准辦則籲催餉欸籌定營章商調人員安設局處在在皆宜有所秉承臣並可在京與樞部諸臣面商布置請示機宜其重大之件仍當隨時

奏請

諭旨定奪臣不敢藉耽安逸至臣如蒙

賞假未到任以前應否請

派大員署理均出自

高厚鴻施臣以上所陳皆係實在情形惟以臣子苦衷上求諒於

君父冒瀆至此歉悚難安第

聖明既已特鑒愚誠而臣子何敢稍存欺罔臣粗明大義遇事直言豈移任邊方頓易初志躊躇往復與其沿襲舊套蹈捏飾之愆不如披瀝實陳受冒昧之罪謹將縷縷下情繕摺敬陳不勝感愧恐懼待

命之至再臣現在請假此後遇有應行

奏請之事仍擬隨時具摺請

旨自行呈遞合併聲明伏祈

皇太后

皇上聖鑒訓示謹

奏

叩謝 天恩摺

奏爲叩謝

天恩事臣昨日具摺瀝陳下情奉

上諭瑞洵著賞假兩箇月假滿即行起程欽此

鴻施逾格感激難名伏念臣冒昧陳情措辭失當正深惶懼乃荷

天恩寬恕不加嚴譴仍

賞假期並

命傳

旨申飭仰見

聖慈訓誡之中仍寓

成全之意臣跪聆之下悚愧尤殷臣惟有趕緊治裝俟有就緒即當跪請

宸訓迅速起程力贖愆尤勉圖報效冀稍仰副

高厚生成於萬一爲此具摺叩謝

皇太后

皇上天恩謹

奏

散木居奏稿卷之二

門人鈴木吉武校字

以荷戈集

信卿表弟属題

科布多奏稿



伯愚書

省庚子六月有伊
之行道出科城同住
旅邸特記



散木居奏稿卷之三

幹難 瑞洵

荷戈集 光緒庚子六月起八月訖

具報抵任接印日期叩謝 天恩摺

揀補筆帖式員缺摺

馳驛赴任台站支應情形暨科布多得雨片

請 頒御筆押封片

請 敕總理衙門頒發書圖片

請 敕部院各發則例各書片

更定補缺辦法片

台站遭灾亟籌賑濟以恤蒙古摺

請准撥款修理倉廩摺

餘糧收放仍循舊章辦理片

調補蒙古印務兩處承辦章京片

請補印務處幫辦章京片

到任盤查倉糧摺

盤查銀庫軍器庫片

接讀電 旨懇請回京報效摺

密奏擬調旗兵暨辦理蒙團請撥餉項片

籌辦蒙團請留大員相助摺

更正筆誤片

請領火藥辦理清野情形片

密奏遵 旨妥籌布置並陳管見摺

請挪借商款辦理蒙團暨擬招勇營片

邊防喫緊差委需人請添設額缺摺

辦理保甲情形片

大臣籌運糧石勞費太甚先行覆陳摺

請移駐古城督辦糧運片

密陳慮及敵人進兵情形片

保舉將才片

蒙團辦齊請撥專款摺

科布多辦團與烏里雅蘇台情形不同片

挑練蒙兵應支餉需情形片

密陳邊防喫重辦事爲難片

遴派籌防處委員及開支津貼各項片

遵查科布多礦務難舉請緩開辦摺

免繳勘合烏拉票糧單照驗各件片

請宥釋戍員榮和片

滿營兵額先期調補摺

嚴參革員請旨辦理摺

請將糧餉章京榮泰留營差委片

仍懇馳赴行在跪請聖安摺

籌辦防務大概並墊費各情片

具報抵任接印日期叩謝 天恩摺

奏爲恭報 臣抵任接印日期叩謝

天恩仰祈

聖鑒事竊 臣於光緒二十五年九月初七日奉

旨瑞洵著賞給副都統銜作爲科布多參贊大臣照例馳驛前往欽此嗣於是月二十八日又奉

恩旨瑞洵著兼總理各國事務大臣銜欽此當於光緒二十六年正月初六日請

訓仰蒙

召見

誨諭周詳

勛勉殷切跪聆之下欽感莫名

陛辭後遵即束裝啓程至張家口整理車輛添備行糧旋復進發風雪無阻四月二十九日至烏里雅蘇台晤將軍連順會商一切茲於五月二十一日馳抵科布多城六月初二日准

暫護參贊印務幫辦大臣祿祥將參贊大臣銀印一顆暨報匣令箭等件派委承辦印務章京主事職銜英秀齎交前來臣當即恭設香案望

闕叩頭謝

恩祇領任事伏維科布多爲朔漠巖疆錯列蒙旗表連哈部方域遼廓兵備空虛加以界接俄鄰交涉尤關緊要臣久叨侍從初領邊垂任鉅才輕懼難勝任惟有恪遵

宸訓任怨任勞將一切公事認真整頓並隨時與幫辦大臣祿祥妥慎籌商和衷共濟固不容過形操切亦不敢稍涉因循期仰酬

高厚鴻慈於萬一所有臣抵任接印日期並叩謝

天恩緣由理合恭摺具陳伏祈

皇太后

皇上聖鑒再臣因覈辦交代是以接印較遲合併聲明謹

奏

光緒二十六年七月十六日奉到回摺

硃批知道了欽此六月二十九日

摺補筆帖式員缺摺

奏爲摺補筆帖式員缺以資辦公恭摺仰祈

聖鑒事竊查科布多糧餉事務處筆帖式松祥前於查辦案內經烏里雅蘇台將軍連順奏參奉

上諭筆帖式松祥行賄招議著革職咨回原旗欽此所遺員缺亟宜揀員擬補惟臣瑞洵甫經受任於各衙門當差人員賢否尙未周知未便率擬出考當經商由臣祿祥秉公遴選查有補用驍騎校候補筆帖式春普通曉滿蒙差使勤奮堪以擬補如蒙

俞允應俟該員五年期滿如願就武回城後循例俟補驍騎校後以防禦補用先換頂戴其該員應找支銀糧俟奉

旨之日照例開支報部遇有差便給咨該員赴部帶領引

見至遞遺候補筆帖式一缺應由臣等揀員充補照例咨部所有揀員請補筆帖式緣由理合恭摺具陳伏祈

皇太后

皇上聖鑒謹

奏

光緒二十六年七月十六日奉到回摺

硃批著照所請該部知道欽此

馳驛赴任台站支應情形暨科布多得雨片

再臣瑞洵遵

旨馳驛赴任道經察哈爾烏里雅蘇台內外盟蒙古各台站烏拉支應無誤蒙情亦均安謐
迨入科布多境所屬阿勒噶拉圖至哈喇烏蘇七台臣就便留心察查該官兵等奉差馴謹
駝馬氈房等項均無缺乏青草自入四月始漸滋長臣每至一台必嚴禁差弁跟役索擾該
弁等尙知遵奉蒙情無所疑懼用得遄行無滯臣到科布多時正值地方苦旱經祿祥與臣
商酌於五月二十八日設壇三日虔誠祈禱仰托

聖主鴻福旋即渥沛甘霖農田游牧均獲霑足衆情歡抃差堪上慰

宸廑謹附片陳明伏祈

聖鑒謹

奏

硃批知道了欽此

請頒御筆押封片

再謹查科布多陳奏事件向用

內頒報匣馳遞奉有

御筆押封三分嗣經軍機處存留一分其臣衙門刻止敬存二分而奉

頒報匣則仍存四分近年科布多公事較繁均須隨時數

奏且臣瑞洵復有面奉

諭旨飭令詳察具奏各要件俟將情形體察明白即當分晰覆陳不敢延緩合無仰懇
天恩即予

賞頒押封二分臣等當敬謹祇領備用實深感荷謹附片陳請伏祈

聖鑒謹

奏

硃批著照所請欽此

請 敕總理衙門頒發書圖片

再辦理交涉自須熟悉約章成案然要非考覽於平時亦斷難取辦於臨事總理衙門排印洋務各書如公法約章之類皆所必需至中俄分界通商條款及新舊中俄連界地圖尤有關係均須各存一分以便稽考科布多僅有通商約章類纂一部此外皆無以致遇事無所折中動形棘手相應懇

恩敕下總理衙門將應用書圖飭檢齊全俟交科布多差弁承領齎回備用實於辦理洋務有裨除咨呈總理衙門查照外謹附片陳請伏祈

聖鑒謹

奏

硃批該衙門知道欽此

請 敕部院各發則例各書片

再臣衙門所存官書如則例章程之類僅有中樞政考及早年戶部則例此外概屬闕如以至遇事茫然無所查考頗覺掣肘查戶兵兩部續修則例及軍需則例理藩院續修則例均爲地方軍營辦事所必需臣等現擬遇有便員晉京即飭赴各衙門請領合無仰懇

天恩敕下該衙門將應用則例各書各發一部俟交該委員領齎回營以資遵守除分咨查

照外理合附片籲陳伏祈

聖鑒謹

奏

硃批該衙門知道欽此

更定補缺辦法片

再科布多糧餉處印務處辦理蒙古事務處暨續設稽察俄商局承辦章京幫辦章京之外均各設有筆帖式員缺遇有缺出向係於綏遠城滿營換防應升應補人員內酌量揀補在未補缺之先原可量材器使若既經補缺補何衙門之缺即應辦何衙門之事其才具有餘者或兼別衙門行走邊地軍營原無不可官缺固不容紊亂也乃臣等近日揀選擬補筆帖式松祥參革遺缺因未聲明缺分詳加察詢始知近年辦法奏補摺內多不聲明何處遺缺且往往補此衙門之缺轉調當別衙門之差如松祥當初所補係糧餉處之缺而奏補後又令在印務處當差顛倒錯亂紛然無主竟有問之本人亦但知爲筆帖式而不知爲何衙門之缺者雖係前大臣寶昌通融辦理但究嫌迹涉紛更自應即行改正擬請嗣後凡係揀補官缺均應奏明何衙門所出之缺以何項人員擬補不得稍涉籠統以昭核實而杜流弊至

另摺請補筆帖式原係松祥糧餉處之缺揀補之春普即應令歸糧餉處當差以後再有別項補缺即照此辦理臣瑞洵體察此處人情習於便安憚於振作公事廢弛銅弊因仍已成積重難返之勢若不破除情面隨事釐整以冀挽回科布多之事局將不可問臣瑞洵奉命整頓責無旁貸是以與臣祿祥商定此後無論大小事件均當切實辦理嫌怨所不敢避所有更定補缺辦法及臣等會商整頓緣由理合一併附陳伏祈

聖鑒訓示謹

奏

硃批知道了欽此

台站遭災亟籌賑濟以恤蒙古摺

奏爲台站遭災亟籌賑濟以恤蒙古而廣

皇仁恭摺仰祈

聖鑒事竊查科布多所屬扎哈沁二旗向例支應南八台差使西接新疆古城之漢三塘地方軍興之時轉運不誤每台人戶不多所領錢糧有限上年冬令風雪過大牲畜受傷甫及今春雪化草生又復亢旱無雨赤地千里草枯泉竭疊據該旗稟求賑濟前來臣等派員往

查屬實並細詢和碩貿易商人僉稱被災甚重牲畜倒斃疲瘦者不堪寓目查札哈沁八台接送新疆來往文報支應伊犁塔爾巴哈台

貢馬差使繁重既係被災屬實自應即時賑撫並令添補四項牲畜庶該旗養贍有賴兼可不誤台差惟是科布多庫存常年經費僅敷例支斷難挪借他用茲查倉儲糧石除正額應存之外尙爲有餘且臣等查閱舊卷戶部來文曾有令將餘糧變價抵餉之案彼時各旗無災既可變價抵餉今日各旗求賑即可變價救災況本年古城一帶雨澤稀少現在禁糧出境科布多向恃西路來糧來路既阻此間糧價遂亦大昂若將餘糧出糶變價既可免科商居奇之虞又可救蒙古被災之急實爲一舉兩得惟若俟

奏請

明旨再行辦理未免緩不濟急現擬將存儲年代稍遠之糧石出糶千石可得銀二千餘兩田臣等遴委妥員前往該旗分別被災輕重沿台散放務使實惠均霑以仰副

朝廷優恤蒙古之至意一俟放竣再行據實開單具

奏所有台站遭災亟籌賑濟緣由理合具摺馳陳伏乞

皇太后

皇上聖鑒謹

奏光緒二十六年閏八月初九日奉軍機處知會

旨該衙門知道七月二十四日旨

請准撥款修理倉廩摺

奏爲科布多倉廩年久失修情形較重籲懇

天恩准予撥款修理並擬添廩座以重積儲而備擴充恭摺仰祈

聖鑒事竊查科布多城倉共計十五廩每廩五間自光緒十年奏准由戶部撥款興修後迄今十六年之久因未籌辦歲修致多傾圯滲漏臣赴倉盤查時親見該倉椽望不全檁柱欹斜露明處所太多實屬難蔽雨雪並有數間全無地板尤虞潮溼殊非慎重積儲之道亟應趕緊繕修現飭蒙古事務處承辦章京英秀會同糧餉章京榮泰詳細查勘應修舊七廩共三十五間再添修三廩共十五間以備將來廣屯儲峙之用應需錢糧若干令即切實查估去後茲據該章京等稟稱遵帶匠役連日赴倉查勘估算除舊料尚有可用外樽節核計應需工料一切實銀五千八百七十六兩零並聲明儘此辦理不再續請估撥等情開具辦法清摺呈核前來查科布多地屬邊陲工料運價異常昂貴迥與內地不同今該章京等所估

銀數尙屬核實惟科城無款可籌而要工又不可緩再四籌思查有已革理藩院主事麟鎬有應交銀四千兩係奉

上諭飭交該旗追繳之款若以此項撥作修倉之用尙非無著合無仰懇

天恩俯准賞給俾濟工需並乞

敕下正藍旗蒙古都統嚴追該革員勒限措繳無任飾詞延宕臣等一面派員晉京赴正藍旗都統衙門領解回營應用尙欠銀一千八百七十六兩零即請動用餘糧變價抵補除咨明部旗查照外所有科布多倉敷請款修理並擬添敷座各緣由謹恭摺具陳伏祈

皇太后

皇上聖鑒謹

奏

同日奉軍機處知會奉

旨著照所請該衙門知道

餘糧收放仍循舊章辦理片

再科布多倉儲每年屯田收數在七千石上下每石向交餘糧六升統計一年除正額外可

收餘糧四百餘石除去烏里雅蘇台每年領去餘糧一百餘石外尙存三百石上下緣科布多所領經費毫無盈餘故數十年來凡歲修城垣廟宇以及貼餼

貢馬無不取給於此甚至隨時抖晾糧石僱用蒙人均係以此餘糧發給工資雖有屯田兵丁應當此差然每遇倉廩蒸鬱起火之時多在屯田播種收穫之際其勢斷難舍彼顧此歷任大臣皆以此公存餘糧辦此公事故科布多一城甚少因修工請款之案況所收正糧每年放項尙屬有盈無絀所餘之糧照例收倉年復一年存儲愈多不過積壓霉爛雖辦公偶一動用而積存仍復不少臣等此次

奏請變價千石賑濟札哈沁者職是故也自前大臣寶昌貪取一時之利舉十餘年所存一旦欲據爲己有奏明祇存四百餘石經臣祿祥參奏始經查悉實存糧數但自清查後糧石固不敢提用而辦公則已無項可指矣夫以本地餘款辦理本地公事各省皆是如此必爲朝廷所許但使不入私橐即不失以公濟公之意若必因噎廢食將致一籌莫展如遇歲修城垣廟宇一切工程及貼餼

貢馬均須逐項另行請款不僅煩瀆

聖聰司農恐亦不暇及此查烏里雅蘇台每年所領餘糧一百餘石前大臣寶昌奏請作正

開銷旋經烏里雅蘇台將軍奏明下情仍照歷年辦法已蒙

俞允嗣准戶部咨開科布多歷年收放糧石所加餘糧六升之數向不造入報銷冊內今既將放數造入開除項下亦應將收數造入新收項下出入方足相抵令將現存餘糧四百餘石作爲舊管以後按年收放照數出入等語自應照辦惟查餘糧放數不止烏城每年所領之一百餘石舉以上指稱各項皆所必需事悉因公勢難責以賠墊自須一一列入放數似屬徒添具文無裨實際且每年餘糧爲數無多又有各項待支初非該管人員入己臣等愚見百餘年舊章不必更改仍以循照辦理有益公務爲便臣等受

恩深重具有天良亦斷不任屬員蒙蔽自干咎戾所有科布多餘糧收放仍請循舊辦理下情理合附片陳明伏乞

聖鑒訓示謹

奏

旨該部知道

調補蒙古印務兩處承辦章京片

再辦理蒙古事務章京一缺承辦各部落蒙古暨各卡倫台站一切事件責任既重事務尤

繁非熟悉情形通曉滿蒙有守有爲之員難期措理裕如衆情允洽自革員麟鎬委充章京以來遇事紛擾百計婪索科布多所管各和碩本非富足自經麟鎬剝削生計益形枯窘且教誘蒙古請託鑽營習於行賄敗壞風氣尤爲可惡亟應設法挽回用心培養俾還渾樸之舊此缺自應仍請由外揀補以期得力查有現充印務處承辦章京主事職銜英秀明白老練滿蒙皆優在營二十餘年邊情極爲透徹遇事尙知持重擬請調補蒙古事務處章京以資整頓所遺印務處承辦章京查有該處幫辦章京主事職銜玉善心地尙好資序亦深堪以充補又蒙古事務處幫辦章京主事職銜全安請假回旗員缺亦難虛懸查有委署主事鍾祥人尙明晰才堪造就堪以充補如蒙

俞允該三員均俟年滿如願就武回城後仍如原保補用俟遇有差便即給咨該員等赴部帶領引

見其鍾祥所遺委署主事一缺應俟遴選得人再行請補又臣瑞洵到任未久仍由臣祿祥出考謹附片具陳伏乞

聖鑒謹

奏

旨著照所請該衙門知道

請補印務處幫辦章京片

再印務處幫辦章京玉善升補印務處承辦章京所遺幫辦章京主事職銜一缺查有補用防禦印務處筆帖式崇文公事明白人亦向上堪以充補應俟該員七年期滿如願就武回城後循例俟補防禦後以佐領補用先換頂戴俟遇有差便即給咨該員赴部帶領引見其所遺印務處筆帖式一缺應俟遴選得人再行請補爲此附片具陳伏乞

聖鑒再 臣瑞洵到任未久仍由 臣祿祥出考合併聲明謹
奏

旨著照所請該衙門知道

到任盤查倉糧摺

奏爲到任盤查倉糧恭摺具陳仰祈

聖鑒事竊 臣到任應行盤查倉糧查定邊左副將軍連順覆奏查辦寶昌等參案摺內聲明科城倉儲多年未經冊報光緒二十三年寶昌附奏倉存餘糧四百餘石數目是盈是絀應俟 臣到任覈辦交代再行清理等語自應遵照原奏辦理比經諭飭該管糧餉章京榮泰造

呈實在數目清冊以憑查奏毋稍蒙混去後嗣據該章京造冊請查前來臣當於六月二十二日率同司員赴倉認真盤查計自烏城派員清查截至光緒二十五年十二月止實存正餘糧石一萬五千二百三十五石除去本年春夏兩季支放應存正額無虧尙存餘糧一千餘石覈與將軍連順原查數目相符除飭該章京實心經理慎重收發暨咨戶部查照外所有臣盤查倉糧緣由理合繕摺具陳伏祈

皇太后

皇上聖鑒謹

奏

旨知道了

盤查銀庫軍器庫片

再臣到任應將庫存銀兩暨庫儲軍器盤查茲據糧餉章京榮泰印務章京玉善分造細冊請查前來臣率同司員前往逐細盤查所有庫存正款暨軍器各件均與冊造相符尙無虧短除飭該章京等認真經理並咨部查照外理合附陳伏祈

聖鑒謹

奏

知道了

接讀電 旨懇請回京報效摺

奏爲接讀電

旨擬請

恩准回

京勉圖報效恭摺仰祈

聖鑒事竊臣自接科布多參贊之任業已四旬有餘

邸鈔既不得見文報亦復罕通

京師消息毫無聞知遙企

闕廷彌殷瞻戀茲於七月初二日接准塔爾巴哈台參贊春滿來咨恭錄五月電

旨四道乃知中外開釁相見兵戎並悉變由拳民仇教俄以代剿爲辭各國風從洋兵續集礮台盡失畿輔戒嚴五內摧傷憂憤欲死現又荏苒月餘尙不知軍情何若臣身羈絕域心
系

朝廷自維雖乏才能惟此一片血誠期報

國恩而匡時局赴湯蹈火在所不辭惟是處茲裔塞瘠區無兵無餉徒喚奈何然遇君父之急自應奔赴以圖報效科布多雖爲邊要較之東三省尙爲外國緩圖擬請旨俯准臣回

京祇候

任使細流土壤稍補萬一此臣夙夜焦急禱祀以求者也所有接讀電

旨自請回

京報效下情不揣冒昧謹繕摺馳陳伏祈

皇太后

皇上聖鑒俯允施行不勝迫切待

命之至謹

奏

旨毋庸來京 七月二十四日

密奏擬調旗兵暨辦理蒙團請撥餉項片

再密陳者臣自聞洋人構衅中外交綏之耗當以兵端既啓邊境宜防科布多迤北一帶處處與俄界毘連亟應妥籌扼守節經密飭沿邊卡倫侍衛等嚴密偵探切實防範並於所屬各蒙古王公盟長札薩克等來謁時面諭簡練隊伍各爲守禦勿稍大意以重邊防惟科布多公事廢弛已久雖有卡倫額設官兵本屬有限早成具文至滿綠換防連官帶兵統共不過二百七十餘員名皆各有專差向無操演人數寥寥雖現已督飭練技尙不及北洋諸軍萬分之一毫不足恃此外蒙古各部落雖可挑拔兵丁奈餉械兩缺亦難空言選練更不能倉猝成軍竭蹶情形臣到任以來目擊心傷殊增浩歎此皆歷任大臣不肯認真辦事惟知因循敷衍致成今日局面憤懣何極即使臣殫竭血誠趕緊整頓已有不及之勢矣臣五中焦慮枕戈待旦恆至夜不成寐自念世受

國恩忝膺重寄儻使地方若有疏失何以仰副

委任臣旣具天良即不敢以無兵無餉藉辭諉卸自不能不於無可設法之中勉圖布置查科布多距新疆古城不過千數百里該處滿兵尙有數千餘人且離彼界尙遠官兵閒置非宜值此緩急之時該滿兵渥受

朝廷豢養深恩尤當奮圖報效若以暫行移駐科布多便可化無用爲有用且可仍帶原食

餉項不必另籌惟若俟

奏明奉

旨再辦實已緩不濟急事關大局不敢拘泥 臣現已咨商新疆撫 臣饒應祺切懇轉飭該城守尉挑撥精壯二千名迅派曾經戰陣之官弁管帶前來科布多由 臣酌量飭令分防要隘至該旗兵既經移戍營力較單應由該撫酌量地方情形增調漢隊填紮以新疆尙可就地募兵籌餉與科布多枯窘爲難情形不同也 臣非不知新疆界連英俄防務同形喫重無如科布多兵餉兩缺一時猝難籌備若不借助鄰封實屬難以自立況北路若將有警即古城亦難保無虞尤宜未雨綢繆並籌兼顧刻下強敵在邇大局甚危值此

主憂臣辱之時何可尙存此疆爾界之見允宜各據忠義共濟時艱然 臣借兵之舉不過暫顧眉急仍當自謀召募加意操練爲日後振奮自強之基合無請

旨迅飭撫 臣饒應祺不分畛域速行派撥兵隊前來科布多以資防守一俟邊務稍鬆即飭各回營旗若科布多再不增兵置戍赤手空拳 臣何能抵禦萬一有失 臣惟有一死塞責不能再報

國恩矣並求

昔フ月三ノナニ
准將所調官兵暫聽 臣節制調遣俾免呼應不靈至 臣現仍擬一面挑選蒙兵辦理團練不
得不量請欸項以資津貼而期飽騰惟有仰懇

天恩敕下戶部無論何欸即行撥給銀三十萬兩飛速轉電塔爾巴哈台知照科布多以便
迅派幹員馳赴請領解營濟用聊爲接濟邊事幸甚 臣幸甚口外人心浮動風謠易起 臣現
惟諄飭所屬處以鎮靜切戒張皇祇可暗中籌布不動聲色故現在北路雖風鶴時聞而尙
未十分震動請釋

慈厘所有擬調兵丁暨一面辦理蒙團請撥餉項緣由謹附片據實密陳伏祈

聖鑒訓示謹

奏

旨即著就地籌欸挑練蒙兵自固邊防咨商鄰省徒誤事機 七月二十四日

以上各摺件皆七月初六日拜發

籌辦蒙團請留大員相助摺

奏爲籌辦蒙團調隊防守請留大員相助以固邊圉恭摺仰祈

聖鑒事竊自中外開衅 臣等欽遵

諭旨布置防守所有辦團守卡請餉借兵諸事均已隨時馳奏惟臣瑞洵甫經到任情形未熟所有籌備各事宜深虞疏誤幸賴有調補索倫領隊大臣志銳赴任過此暫住相助爲理該大臣五月到科彼時即因札哈沁被災駝馬倒斃未能行走留滯至今臣瑞洵到任後與臣祿祥商定奏請籌款賑撫現始派人前往放賑設台又因中外舛啓臣等飭令各旗仿行清野之法期斷俄人來路蒙人皆遷避入山一時亦實難湊集該大臣祇得在此守候又值臣瑞洵憂勞多病不得不幫同辦理一切查該大臣久任烏里雅蘇台參贊官聲甚好三札兩盟蒙衆無不信服當此緩急需人之際若令幫同籌辦蒙團情形既熟呼應亦便況臣瑞洵曾經奏請咨調古城旗兵如果前來亦乏統率該大臣世受

國恩在任在科同一報效伊犁防營較多亦不少該大臣一人與其一時不能到任不如在此隨地效忠可否擬懇

天恩暫留該大臣幫辦團務並可由臣等咨調索倫防兵五百名自備駝馬趨程前來協同守禦以厚兵力索倫兵隊係該大臣專責必能助防得力一俟軍事大定再令馳赴任所臣等忝膺疆寄值此時艱集益維持何敢自恃以人事

君之義理所當爲故敢不避冒昧總期有益事機現在辦理蒙團得與該大臣悉心籌畫臣

等深資勦助所有請留大員幫辦團務緣由理合恭摺具陳伏祈

皇太后

皇上聖鑒俯允施行再臣等具陳摺件因報匣未回此次係用夾板由驛馳遞現在軍事甚迫似未便稍涉拘泥或致貽誤事機擬懇

天恩嗣後遇有陳奏事件如遇報匣未回即用夾板封遞以免遲延一俟軍事大定再行照舊專用報匣合併陳明謹

奏光緒二十六年閏八月初九日奉軍機處知會奉 旨著不准留七月二十八日 旨

更正筆誤片

再前因科布多倉廩亟須修理擬將革員麟鎬應交銀四千兩懇恩撥給俾濟工需請

敕該旗勒追措繳等情於七月初六日具摺馳陳在案惟查該革員麟鎬係鑲藍旗蒙古人繕摺誤爲正藍旗蒙古昨查該革員履歷始悉筆誤殊屬疏忽自應奏明更正至 臣等所請如蒙

俞允應再請

敕下鑲藍旗蒙古都統衙門嚴行追繳以便赴領解回應用除再咨部旗查照外所有更正筆誤緣由理合附片具陳伏祈

聖鑒謹

奏

該衙門知道

請領火藥辦理清野情形片

再現在辦理蒙古團練必須發給軍火科布多庫存火藥無多且早受潮過半不甚適用若由京部請領殊覺不及聞烏里雅蘇台存儲尙多臣等已派員持咨往領一萬觔備用至屢奉

諭旨嚴加防守斷其接濟查蒙地遼闊居人散處路路可通到處能掠雖經札飭亦屬具文惟有清野之法光緒二十一年玉門賊竄出關烏里雅蘇台於三札兩盟行之有效現在臣等業已倣照辦理派員前赴沿路各旗督令將四項牲畜收放僻路深山人戶亦隨之遠避況西北一帶本年亢旱異常如此挪移不啻赤地千里料其行軍當不出此團練之法亦與內地不同並無村鎮可守現惟每旗各辦一團除操演槍械外專令督催各旗人戶牲畜遠

避以補辦理清野委員之不及邊遠瘠區兵餉兩缺亦祇得如此布置藉固邊防所有請領火藥辦理清野各緣由理合附片具陳伏祈

聖鑒謹

奏

知道了

密奏遵

旨妥籌布置並陳管見摺

奏爲遵

旨妥籌布置並陳管見恭摺密陳仰祈

聖鑒事竊臣於光緒二十六年七月初六日申刻承准軍機大臣字寄六月十七日奉

上諭現在外國業已開衅西北邊界一帶均與俄人接壤亟應嚴加防守著饒應祺長庚春滿瑞洵等各就所轄地方妥籌布置總期聯絡一氣扼要嚴防以阻敵人進兵之路如能以精兵攻其後路藉資牽掣尤爲上策將此由六百里加緊各諭令知之欽此遵

旨寄信前來臣伏維時局軍情如此喫緊自應妥籌防守上慰

宸廑是以於七月初二日接准城來咨恭讀五月

電旨即以外畔既開邊防宜固已經密飭各卡倫侍衛隨時偵探馳報並咨商新疆撫臣選撥古城旗兵二千名前來助守仍一面辦理蒙團並懇

天恩飭部撥給餉項均於七月初六日附片密奏在案旋於初九日奉到督辦處札文知已奉

旨設立督辦處具見

朝廷慎重兵事至意臣敢不仰體

宵旰憂勤竭愚誠殫心規畫現已設立籌防處揀派人員專辦防守事宜暨一切摺報文件仍由臣督率並於所管卡倫八處加派弁兵嚴爲防探其歸烏里雅蘇台所轄卡倫亦經咨請該將軍派兵照辦以期聯絡蒙旗均已嚴飭禁僱牲畜不準攬載尙恐蒙古貪利陽奉陰違復又曉以恩義許給津貼臣仍當不時派人巡查總期斷絕接濟免滋他虞惟查俄人進兵捷徑當在恰克圖庫倫之間蓋俄人東悉畢里亞鐵路距恰克圖祇百餘里該處設有車棧其迤東之第二十六卡倫名齊克代距直隸多倫廳僅止六站道路平衍向無人煙逆料俄人若由北路進兵要以此二處最爲近便臣愚見此時庫倫實係兵衝最爲喫重似須特派知兵重臣多撥得力勁兵認真堵禦方爲上著至科布多邊界處處與俄毘連俄人疑

兵散隊四出游弋事必有之其大股正兵恐未必取道於此然臣職在守土亦應防其侵軼斷不敢恃其未來稍涉大意俟將蒙兵挑選精壯必即分撥各要隘嚴加防範惟當激勵衆心合成城之志爲固圉之謀縱兵餉兩缺情見勢絀臣止憑此一片血誠以忠義感動人心誓以死守絕不少有退縮或冀仰託

朝廷威福危疆可保無恙此臣夙夜焦急禱祀以求者也尙求我

皇太后

皇上俯察臣甫經到任爲難苦衷

垂念科布多空虛竭蹶與烏魯木齊伊犁塔爾巴哈台等處兵食均足情形不同

逾格施恩

飭督辦處統籌接濟以免貽誤戎機有礙邊局臣幸甚地方幸甚所有遵

旨妥籌布置各情形謹繕摺密陳是否有當伏祈

皇太后

皇上聖鑒訓示謹

奏

知道了仍著嚴防隨時具奏七月二十八日

請挪借商款辦理蒙團暨擬招勇營片

再臣瑞洵昨於七月初六日已將科布多無兵無餉暨擬就地辦理蒙古團練以圖自守各情附片密陳自應敬候

諭旨再爲遵辦惟馳遞摺報往返總在四十日內外刻下邊情喫緊實恐緩不濟急雖餉項缺乏亦不宜稍涉停待事關大局何敢拘牽臣現已向此處商鋪面議暫行挪借銀兩以資支放誠以蒙兵窮苦縱先不必給餉若干亦實無令其枵腹荷戈之理不能不量予津貼也又昨向新疆撫臣饒應祺借撥旗兵一節如該撫或不允行臣亦惟有於烏魯木齊古城一帶自行招募兩三營爲保衛地方之計即爲日後添練兵隊之漸亦擬借挪商款多固難籌三四萬金尙可辦到惟須臣予以印據許俟請欸一到即行撥還方可相信至臣面奉諭旨飭令體察情形籌辦練兵一節現值外患突起兵端已開不知

宵旰如何憂勞臣實不敢以之瑣瀆

聖聰請俟軍事大定當再詳悉覆陳此時權宜辦法一面選練蒙團一面略募漢隊先顧眉急似尙不至大費餉力重煩度支而於防務亦無虞偏廢總之辦事不宜鋪張亦不宜廢弛

若中外臣工早能激發天良肯於任事力維大局何至京師戒嚴如此之急臣既膺重寄即當首顧責成雖不能立功又豈可爲

國家貽患臣現在事事認真處處核實不過勉圖報稱盡職分所當爲其知者以爲效忠不知者以爲多事臣亦不暇顧及矣區區下情理合附片陳明伏祈

聖鑒訓示謹

奏

即著就餉辦防力求覈實無稍虛糜七月廿八日

以上各摺片皆七月十二日拜發

邊防喫緊差委需人請添設額缺摺

奏爲邊防喫緊差委需人援案請添額缺以資辦公恭摺仰祈

聖鑒事竊查科布多前因邊務較繁經前大臣清安等於光緒六年四月間專摺

奏請於額設各處章京筆帖式之外添設糧餉處幫辦章京一缺筆帖式一缺候補筆帖式

一缺印務處添設筆帖式一缺候補筆帖式一缺蒙古事務處添設幫辦章京一缺筆帖式

一缺候補筆帖式一缺以資辦公等因當經吏部議准覆奏奉

旨依議欽此欽遵嗣於光緒十一年間復經遵照部咨以軍務已鬆陸續

奏明裁撤在案 臣瑞洵到任以來體察此處公事較昔殷繁不啻倍蓰邊地本屬乏才軍營又當用武不但差遣缺人即遇辦理尋常公事亦復動形竭蹶左支右絀難期妥速況兼臣等現籌整頓尤虞寡助雖經 臣瑞洵遇事親裁

奏咨公牘皆自定稿然亦係擇其要端未能兼及瑣務且如遇查辦邊界地方及台卡事宜亦萬不能皆由 臣等自行前往矧值外衅既啓時局孔艱邊備軍籌尤宜隨時策畫不容疎懈凡此種種情形皆關緊要斷非添設額缺難資分任既有舊案可援又係暫設之舉實不得不權宜辦理茲擬除印務蒙古兩處業經續設幫辦章京無庸再議外應懇

天恩俯准仍將糧餉處添設幫辦章京一員正缺候缺筆帖式一員印務處添設正缺候缺筆帖式各一員蒙古事務處添設正缺候缺筆帖式各一員以資辦公如蒙

俞允仍於三處應升應補人員內遴選補充並當咨行綏遠城將軍將明年應行調補換防新兵先期揀選飭令早日來營俾期差委有人無虞廢弛至所添各員應支鹽菜等項查科布多加增一項尙有盈餘向係另外存儲歸入年底報銷之欸擬即由此項暫行墊發 臣等爲慎重邊防差委需人起見是否有當理合恭摺具陳伏祈

皇太后

皇上聖鑒訓示謹

奏 閏八月十三日接軍機處知會八月十五日旨著照所請該衙門知道 七月廿二日拜發
辦理保甲情形片

再科布多所屬雖多蒙古部落而附城內外哈夷纏回人類紛雜山西商賈又多托足於斯向未辦過保甲似於詰姦禁曉有所未盡且現值外夷構兵敵情叵測稽查奸細尤爲要務臣等現飭該管印務處章京等將所有戶口逐細編查按家填寫門牌註明姓名丁口數目以便察覈其蒙古各旗則飭速將丁戶造具清冊藉以挑選精壯總期奸宄不致溷跡庶免他虞所有辦理情形謹附片陳明伏祈

聖鑒訓示謹

奏

旨知道了

大臣籌運糧石勞費太甚先行覆陳摺

奏爲大臣籌運糧石體察情形勞費太甚先行據實覆陳恭摺仰祈

聖鑒事竊 臣瑞洵具奏到任日期摺件報匣於本年七月十六日遞回承准軍機大臣字寄
光緒二十六年七月初一日奉

上諭毓賢奏新疆甘肅倉存糧石甚多請飭運京以濟軍食端方奏撥款派員前往甯夏購
米並先請由甯夏倉廩提借備用各摺片用兵以足食爲先果能迅速運京接濟軍食自屬
目前至要之務惟道途遙遠全恃人力周轉總須不至貽累民間方爲妥善所有一切解運
等費亦須預爲籌計著永德等體察情形趕即會商切實妥籌迅速辦理端方所奏應取道
阿拉善部轉運之處該王向來急公即著該護撫咨明該王遵照妥速奮勉籌辦原摺片均
著分別鈔給閱看將此由六百里加緊各諭令知之欽此遵

旨寄信前來伏讀之下仰見

聖謨廣運籌備精詳曷勝欽佩鈔示山西撫臣毓賢摺片均已詳細閱悉值此時艱 臣具有
天良敢不竭力籌辦惟查毓賢原奏籌慮固爲公忠情形未免隔膜既欲責以辦理即不得
不詳細直陳且哈拉烏蘇搜吉東南各台皆係 臣所轄爲轉運必由之路鄂隆布拉克又接
古城漢三塘地方係通西路首站責任關重尤不能不審慎圖維期免貽誤查原奏謂古城
至張家口六千餘里每駝脚價二兩五錢一駝可運糧二石查由古城至科布多商家駝載

每隻脚價約五六兩由科布多至口約二十五兩無論載糧運貨歷來定價如此是一駝脚價非三十兩不可況遠道馱載取其輕便一駝祇馱二百觔新疆糧石較京斛倍蓰一石可三百餘觔運糧二石勢須三駝分載若僱三駝即需價九十兩而由新疆至古城由張家口至京運費尙不與焉再將解費算入大約運糧二石即費百金原奏謂由口至京四百餘里每石運價一兩自古城至口六千七八百里每石乃以二兩五錢該之未免懸殊太甚恐係覈算錯誤即以原價而論每糧二石分載三駝亦必須七兩五錢方能敷用又況以台站道里計之自古城至科布多實係一千三百六十里自科布多至口實係五千八百五十里已逾七千餘里之程原奏亦未覈實此情形隔膜運費懸殊者一也況近年蒙古牲畜不蕃駝戶稀少古城逕達山西包頭鎮本爲通商大路科布多在古城之北僱駝繞遠半不肯來本年札哈沁因旱成災沿路水草並缺亦難暢行無阻即使加價僱覓極力催辦轉運至口亦須仲冬此又緩不濟急者一也至於脚價一項每駝以三十兩計之如運萬石需駝五千即需銀十五萬兩亦祇可運一次再運即須另換駝隻調其勞逸如遇駝難僱覓尙恐不能如數運齊臣既經奉

旨飭籌敢不悉心策畫既濟軍食又圖報稱無如情見勢絀緩不濟急徒費鉅帑無益軍需

古云千里饋糧士有飢色況此萬里之外費十數萬金運此區區萬石之糧京師人海大兵雲集不過太倉一粟之微臣實未見其可也查近年新疆商賈流通自山西包頭達古城係屬通衢駝車絡繹臣愚見新疆存糧應於古城包頭兩處設局轉運半資民力發給津貼庶能陸續接濟且係腹地沿路應有營隊亦可照料蒙古地方遼闊現辦清野期斷俄人接濟益覺人戶稀少馱載糧石行此綿亘無垠之地無兵護送設遇敵兵散隊難免轉資寇糧此又不可不預爲慮及者也至台站例設駝隻爲數甚少前此西路用兵轉運軍械派令各盟協助始能勉強供應糧石需駝較多能藉資台力亦係實在情形可否請

飭督辦軍務處妥慎會商別籌辦法如果不嫌遲緩勢在必行邊徼瘠區無從籌費尙乞天恩飭部速撥專欸以濟要需每次運解局薪各費至少須二十萬兩臣再當竭力辦理爲細流土壤之助斷不敢憚苦繁難稍涉諉卸除一面咨商綏遠城將軍永德等切實妥籌外謹將籌運糧石勞費太甚情形先行恭摺據實覆陳是否有當伏乞

皇太后

皇上聖鑒訓示再此摺係奉

旨飭令臣商籌之件是以幫辦大臣祿祥未經列銜合併聲明謹

奏

旨前項起運倉米已有旨改解山西矣八月十五日

請移駐古城督辦糧運片

再臣正摺所陳運糧不易情形實因所費太多所運過少雖軍食所關甚急而帑項亦不可濫支非臣憚此煩勞故爲搪塞在喜事者必且一力擔承藉此爲報銷之地開保舉之門值此時艱苟有天良何忍出此然

京師根本籌備宜寬多盡一分人力即多濟一分軍需杯水車薪究有涓滴之益擬請

飭下督辦軍事諸臣通盤籌畫但能別籌辦法有裨軍食自當舍難就易如果勢必需此臣瑞洵必當竭盡血誠設法辦理運費必力求其省糧石惟不厭其多多方僱覓駝隻極力繞避敝路得運且運爲衆擎易舉之謀收得尺得寸之效若蒙議準一俟撥欸到營臣瑞洵即當移駐古城盡力督催辦理雖台路現在不易行走臣當酌帶數人隻身匹馬奮勉從事以期稍效微勞是否有當謹附片陳明伏乞

聖鑒訓示謹

奏

旨覽

密陳慮及敵人進兵情形片

再臣瑞洵前奏妥籌布置並陳管見一摺論及俄人北來當以恰克圖庫倫兩處爲最便捷之路請

派知兵重臣嚴守庫倫現聞天津地方有爲各國占踞之說如果屬實恐海口礮台亦難固守又聞各國均已調派水陸重兵必均取道於海外國用兵向來最爭先著力戒遲緩逆料俄兵如不由北路前來必將取道悉畢里亞鐵路直達東海之濱以戰艦運兵屯聚海參崴威海等處我無水師海上必任各國暢行無阻南路接濟直無妙法可斷兵貴神速此時似必須急攻天津驅之使去我能扼守斯爲上著若因其無甚蠢動稍涉輕忽各國軍隊到齊剿之恐不甚易此次軍事關繫安危較之甲午日本一國衆寡勢異倖勝恐不足恃全局必須統籌伏願

皇太后

皇上力誠統兵諸臣捏飾積習熟審機宜慎重出之則大局幸甚值此時艱臣苟有一知雖處邊隅未忍緘默謹將慮及敵人進兵情形附片具陳伏乞

聖鑒謹

奏

旨留中

保舉將才片

再現在外畔既開兵事方啓折衝禦侮亟須廣儲將才臣苟有所知不敢不專達

上聞冀副以人事

君之義茲查有前任伊犁鎮總兵王鳳鳴安徽人威重果敢韜略優嫻曩在卓勝軍頗著戰功嗣復統兵駐紮烏魯木齊瑪納斯晶河一帶地方軍律嚴整壁壘一新臣從前隨侍先臣恭鏗新疆任所深知其人又查有副將銜直隸補用參將丁春喜直隸人樸實勇往能耐苦勞歷在奉天吉林黑龍江帶隊著績甲午之役該員隨同將軍長順率皆身臨前敵未聞却步臣竊敬之臣去年八月十六日仰蒙

召見猥荷

垂問臣曾舉其人以上兩員皆屬有用之才現當時局多艱軍務喫緊如蒙

天恩加以任使俾統一軍當能奮力前驅臣可保其必不退縮聞王鳳鳴現在浙江臬司陳

澤霖防營丁春喜在奉天將軍增祺處差委合無請

旨敕下部臣行催該兩員迅速入都預備

召見其應如何

驅策之處伏候

聖裁謹此附片

奏保伏祈

聖鑒再 臣向來最惡濫舉之習從未保過一人茲因戎機緊要正在用人之際用敢上陳區區愚悃合併聲明謹

奏

旨留中

蒙團辦齊請撥專欸摺

奏爲蒙團現已辦齊籌墊添補馬匹軍械各項經費發給津貼籲懇

天恩敕部速撥專欸以濟軍需而固邊防恭摺仰祈

聖鑒事竊 臣瑞洵前於七月初六日具奏懇請回

京報效一摺附片密陳籌辦蒙團請撥部欵又於是月十二日具奏妥籌布置一具附摺片陳借墊津貼辦理清野各情形計當均邀

御覽查蒙團辦法與內地情形不同臣等前曾附陳令其每旗各辦一團平時操演槍箭一遇敵來即以此團之人保護一旗將人口牲畜氈房向內挪移使其野無所獲庶期可斷夷蹤現查科布多所屬共三十旗以杜爾伯特烏梁海二處最爲逼近俄壤烏闌古木布倫托海實當其衝其新土爾扈特和碩特額魯特明阿特札哈沁五處僅有七旗不連邊界而可扼要隘如洪果爾鄂隆烏闌大壩沙札蓋察罕淖爾等當年屯紮重兵之處則皆在額魯特札哈沁等旗地方雖非交戰兵衝實爲扼守退步臣等通飭各該處按旗分辦每旗一團以二百人爲率杜爾伯特左右兩翼共十六旗已選練三千二百名烏梁海左右兩翼共七旗已選練一千四百名新土爾扈特等共七旗已選練一千四百名統三十旗共得旗團六千名現據各旗呈報均已先後挑齊統令於八月初一日起算成軍軍火則一旗烏槍百桿弓箭百副復由城酌發刀矛但嫌爲數太少不能徧給至各團即以本旗盟長札薩克總管等暫統以俟悉心遴選再行

奏明派充并飭知如遇俄夷越界一面清野一面節節堅守總以洪果爾鄂隆烏闌大壩沙

旨選派札薩克圖汗兵丁二千名來科布多駐防回匪戶部咨行所定津貼每兵祇給三兩其帶隊各官弁自百兩至十餘兩數兩不等至軍火器械則由神機營撥運並派員弁前來教演計駐蒙兵二千每月發給六千五百兩聲明如有征調再當酌量增加現在各團辦齊亦與當年駐守無異自應照依前案發給兵數已足六千每月應發津貼銀一萬九千五百兩至帶隊官弁當年名目甚多故駐兵二千官弁薪公口分每月即須五百兩茲查團在各旗無庸許多官弁應請減去五百兩計須再給銀一千兩即可敷用共合每月需銀一萬九千兩又團既辦齊即當督飭練技并各旗添補馬匹器械經費每旗以五百兩計之三十旗

共應需銀一萬五千兩再併入一月津貼暨帶隊官弁薪公口分每月之一萬九千兩開辦之始一月內即需銀三萬四千兩此外尚有臣等飭令挑選杜爾伯特額魯特明阿特三旗精壯兵丁二千名聽候調遣尙未報齊將來到城尤須發給津貼其辦理蒙團添補馬械之三萬四千兩實屬刻不容緩臣等前曾奏懇

天恩准由臣等出用印據向商號借墊銀兩緣蒙情近年頗形艱苦又當用兵之時未便令其缺望且俄夷見聞較近尤難示以貧弱斟酌再三只得冒昧當由各商借籌銀三萬四千兩業飭交由各旗按團發給尙求

敕部速爲撥還以昭大信至臣瑞洵前陳密片曾有籲懇

敕下戶部撥銀請三十萬之請實因當時驟聞

京師戒嚴之耗方寸已亂且目擊嚴疆無備焦急萬分私心逆料部中必駭一半或多半不定不得不寬爲籌計以資敷衍暫顧眉急儻竟蒙

特恩全撥臣等即就此三十萬金將防務妥爲布置如餉力有餘並可添募漢勇所有軍裝軍械馬匹鍋帳營務文案支發各處薪公在在需費是所請三十萬兩合併則見其多分用尙形其少即以目下布置情形而論初辦一月之三萬四千兩嗣後每月之一萬九千兩如

前請餉銀三十萬兩業經奉部准撥自當就此款內撙節支用否則亦必須仰懇

天恩敕部撥給專款由臣等派員赴部併次請領方可不誤事機藉籌邊備至臣瑞洵面奉諭旨體察情形籌辦練兵原爲經久防邊之計刻因

宵旰焦勞未敢瑣瀆然臣瑞洵悉心默籌已有大概辦法因地制宜不外民蒙相間爲用將來挑選蒙古精壯即擬由此次團兵內拔尤充補是蒙團之練不惟暫時可固邊防已留將來練兵地步邊遠瘠區亦只得如此辦理上釋

宸廑下盡臣職而已合無仰懇

聖慈俯念邊要窮荒爲難之處

特恩允準敕撥餉項庶足以濟軍需而固邊防大局幸甚臣等幸甚如果前請三十萬餉銀得以陸續請領臣等自當竭力辦理既顧邊局兼圖久遠將漢隊次第招練總期實事求是力任其難以冀仰答

聖恩不敢稍負

委任所有蒙團現已辦齊請

旨撥款各情形理合恭摺詳悉馳陳並一面咨呈督辦軍務處查照是否有當伏祈

皇太后

皇上聖鑒

訓示遵行再蒙團尙須製辦號衣號帽氈房旗幟金鼓軍樂各項以及戰靴皮衣等件現飭該旗從省估計需項若干容再據實

奏報合併聲明謹

奏

硃批另有旨

光緒二十六年九月初七日承准

軍機大臣字寄光緒二十六年閏八月初三日奉

上諭瑞洵等奏蒙團辦齊請飭部速撥專款及將連順所辦蒙團停止並調練蒙兵應需月餉暨自陳才不勝任各摺片覽奏均悉從來辦理地方事件必須詳細籌畫經費有著方可舉行現在國事如此戶部支絀萬狀斷無鉅款可以撥給科布多防務事宜該大臣等但當視力所能爲悉心妥辦得寸得尺務求實際慎勿徒多紛擾也將此諭令知之欽此遵旨寄信前來

科布多辦團與烏里雅蘇台情形不同片

再臣等正繕摺間接准烏里雅蘇台將軍連順咨開該處現亦辦理蒙團行知前來至其如何辦法未經詳悉知照查辦團之法不外因地制宜烏里雅蘇台科布多雖云同屬邊陲情形迥異科布多所屬三十旗散漫無統地勢犬牙相錯非每旗各辦一團由臣等統爲稽查調度不能得力非如烏里雅蘇台三扎兩盟有正副盟長事權歸一且科布多蒙旗半皆窮苦又非三扎兩盟富足可比此次辦法幾乎半賑半團處此時艱臣等具有天良萬不容經手官弁任意開報總期事有實濟欸不虛糜特恐如蒙

交議諸臣未曾親歷邊疆必謂烏科事同一律所請當被斥駁則此蒙團必爲紙上空談虛應故事邊備稍疏萬一外患猝乘有礙大局臣等雖死不能塞責矣伏求聖明作主如謂邊塞寥遠無須如此布置則乞速降

綸音即行停止以免日久難於收束臣等爲難下情理合附片直陳伏祈

聖鑒訓示謹

奏

硃批覽

能保其必無所以臣等辦團不惜發給津貼籌墊各費者原以堅其依附之誠使之不能不爲我用若空諭以嚴斷接濟整隊守邊此猶官面文章非必能奉行維謹也內地商民每謂洋人尙不擾商特恐蒙人乘機爲亂保其財貨紛紛有遷避之謀臣等若任商賈遠遷此地直無人烟何以爲守聚之策再三開導諭以各旗辦蒙古團者以防俄也調蒙兵來科者以守城也蒙古旣已成隊守城斷無乘機擾商之舉唇焦舌敝近始安靜如常然俄情巨測果於卡倫之外時有散隊窺伺偵探情形似係俄人守邊之兵時出游弋自守兼擾我者臣等已飭辦各旗不可妄動靜以俟之彼若眞來仍用清野包抄之法此辦理蒙團安頓商民籌墊經費爲難之下情不敢據實陳明者也至臣等忝膺重同守危疆又復世受國恩曷敢規避然視手握重兵財力足以自給者籌布精嚴相去何啻霄壤晝夜祇懼靡有已時惟祈

聖慈垂諒而已所有邊防喫重辦事爲難才不勝任各緣由惟有附片密陳籲求訓誨臣等不勝悚惶迫切之至謹

奏

硃批覽

遴派籌防處委員及開支津貼各項片

再現因籌布邊防挑選蒙兵辦理團練責重務殷日不暇給當經設立籌防處遴員經理專辦防守一切事宜以昭慎重業於七月十二日遵籌布置摺內

奏明在案查科布多所設俄商局現因開衅無事其承辦章京穆騰武即委總辦籌防處事務而以糧餉印務蒙古三處章京榮泰王善英秀佐之蓋皆有分任之事必須會同辦理也該章京等均係滿蒙世僕渥受

國恩值此時艱義應報效已據聲稱不敢支薪水至筆帖式等差使清苦自應量加體恤計七員每員給予津貼六兩書識六名兵役二十各每名給予口分四兩其應需心紅紙張薪燭各費每月酌給銀二十四兩科布多尚有存候部撥扣減六分平一欸即於此項內暫行動支統俟軍事大定一併報部核銷除咨戶部查照外理合先行附片具陳伏祈

聖鑒謹

奏

硃批該部知道

遵查科布多礦務難舉請緩開辦摺

奏爲遵查科布多礦產不豐大工難舉擬請暫緩開辦據實覆陳恭摺仰祈

聖鑒事竊臣前於正月

陛辭時面奉

諭旨敕令到任後將科布多礦務認真籌辦據實奏聞欽此臣欽遵之下時刻在心值此時艱但能有利可興敢不竭力開辦惟到任以來訪悉科布多新舊礦產祇有三處一名胡圖斯拉在土爾扈特游牧一名都蘭哈喇一名寶爾吉均在扎哈沁游牧查胡圖斯拉傳聞最久現在金苗無都蘭哈喇向產鉛砂嘉慶年間即經封禁惟寶爾吉一礦產鉛兼可提銀已經新疆巡撫派員開採會同前參贊大臣寶昌奏明有案既係該撫主政臣即未便攙越此外徧查科布多所屬並無礦產伏思天地自然之利順勢取之自可廣開利源但值外患頻仍往往一經洋人遂致非徒無益查黑龍江漠河金廠開採有年獲利亦厚即係先臣恭鏜創辦臣隨任在彼於一切情形尙爲熟悉惟科布多與黑龍江情事迥殊集股則無商可招覓工則無人可僱若用機器必有洋人後患亦殊可慮現因庫倫開礦甫停蒙古復多疑懼如果查有美礦自須純用土法開採一切經費實屬不貲本重息微總覺害多利少第聞塔爾巴哈台前借阿爾泰山本係有名之區礦苗所在多有彼處距塔城較近內地民人亦多

本係科布多所轄烏梁海游牧地方將來如能遵

旨將該地索還或可勘察情形設法辦理所有臣遵查科布多礦產不豐大工難舉擬請暫緩開辦緣由理合繕摺據實覆陳伏祈

皇太后

皇上聖鑒訓示謹

奏

硃批著照所請該部知道

免繳勘合烏拉票糧單照驗各件片

再臣前在途次於四月十五日行至烏里雅蘇台所管之翁音台住宿夜臥看書忘未息燭以至不戒於火衾枕箱篋悉被焚如維時臣已經沈睡又加煙氣熏迷竟至不省人事因在蒙古包內並無窗櫺故人亦無由知覺次晨巡捕家人等因臣遲遲未起當進氈房催請驚悉烈焰猶然臣半身盡在火中趕即撲滅一面將臣救醒察檢裝盛公牘什物之小篋已化灰燼所幸臣仰託

聖主福庇身體尙屬無恙僅將髮辮燒落大半亦未延及蒙古包惟查臣原領戶部糧單照

驗兵部期票勘合理藩院烏拉票各件盡皆被燬不成片段將來回京無從繳銷合無仰懇
天恩俯念事出不意

敕下部院查照准予免繳出自

鴻慈至各台取具跟役人等並無需索甘結因另在他處尙皆完全應另行送部備查除分
咨各衙門查照外謹附片據實陳明伏祈

聖鑒訓示謹

奏

硃批該衙門知道

請宥釋戍員榮和片

再臣瑞洵接閱邸鈔伏讀本年六月初二日

上諭已革副都統壽長加恩著准其釋回欽此仰見

聖明垂念勲勞不忘忠裔至意查壽長與已革副都統榮和皆因營務不整爲御史黃桂鋆
奏參經李秉衡查明覆奏奉

旨懲處臣去年八月三十日具奏奉天積弊一摺曾於練兵條內論及並未專疏特効誠以

該革員等練兵無效自屬咎有應得但皆係勳臣後裔年力方強若使督率有人固非竟不可用故臣去秋仰蒙

召見並以此意面陳此臣憂

國憐才之苦心該革員等固不得而知也茲值時局多難用人之際壽長榮和同事獲咎榮和遣戍新疆現當邊防戒嚴如榮和者擬懇

天恩宥釋即交伊犁將軍長庚差遣俾其立功自贖以蓋前愆該革員世受

國恩自當感激圖報臣爲急切需人起見可否之處仍出自

逾格鴻慈不揣冒昧謹附片上陳伏祈

聖鑒訓示謹

奏

硃批著不准行

滿營兵額先期調補摺

奏爲滿營兵額擬請先期調補恭摺具陳仰祈

聖鑒事竊科布多滿營換防官兵每屆三年更換一次歷經循辦在案查上次調補官兵係

光緒二十四年十月到防本應扣至光緒二十七年十月期滿始行更換惟現因陞補章京筆帖式暨在防病故遣出缺額已至八名之多又值籌布邊防差遣需人實屬不敷委用若必按期調換未免懸缺待人自應稍事變通期於公事無誤查該滿兵等到防三月後向均作爲委署筆帖式與綠營換防兵丁專應差操者不同擬請

旨敕下綏遠城將軍作速揀選明白公事通曉清漢文義書寫端楷之兵八名造送履歷清冊照案飭令幫同押解科布多後批餉銀由驛前來其各兵到防三年例保應扣歸下屆再行辦理不得與現已到防之兵牽混除將開除官兵旗分銜名分咨查照外所有滿營兵額擬請先期調補緣由理合恭摺具陳伏祈

皇太后

皇上聖鑒訓示遵行謹

奏

硃批該衙門知道

嚴參革員請 旨辦理摺

奏爲革員贓款較多被控有案據實嚴參請

旨辦理恭摺仰祈

聖鑒事竊據管理東七台南八台札蘭章蓋等報稱前因辦理軍務文報已革蒙古事務處章京主事麟鎬有咨保翎支私給獎札索取部費情事現經理藩院咨駁懇請追還等情呈訴前來當即檢閱舊卷上年八月理藩院咨文早已到城前大臣寶昌壓攔未辦查革員麟鎬到科布多三年因寶昌信任太堅幾於無惡不作無案不貪即以咨保翎支一案而論明知必干駁斥該員輒辦蒙文咨部上既朦混長官下爲取信蒙古以爲索賄憑據種種貪欺大率類此外向有請領度牒一案向歸各盟自辦該員則任意包攬每旗勒派須足二百喇嘛方爲請領不足其數必以賄減各旗蒙人賣男賣女折馬折房者比比每度牒一張索費十兩共請六百五十張計索費銀六千五百兩而各旗賄減人數之贓尙不與焉其他如私放梅楞驗尸詐賄盜賣官廠駝馬皮張強索蒙古王公禮物又其小焉者也查科布多所屬各旗本不富庶時有偏災經麟鎬極力搜括元氣竟爲之大傷此次辦理蒙團所以籌墊經費亦係目覩情形不能不稍爲補救是該革員之各種奇貪賊私狼籍不惟壞寶昌之聲名實有害蒙古之生計且貽誤邊要大局實非淺鮮歷歷按之殊堪痛恨前經查辦請以革職不叙並僅追贓銀四千兩猶覺法輕情重不足示懲况現經控訴纍纍尤當爲之料理以伸

蒙人怨讟之氣謹將該革員贓私欸目開繕清單祇呈

御覽可否請

旨敕下鑲藍旗蒙古都統即將該革員麟鎬嚴行看管由臣等派員押解來科歸案辦理抑或請

敕該旗照臣等單開欸目按數追繳咨由臣等提解發還各旗以恤蒙累伏候

欽定所有革員贓欸較多被控有案據實嚴參緣由謹繕摺具陳伏祈

皇太后

皇上聖鑒訓示施行謹

奏

硃批該衙門知道單併發

謹將革員麟鎬贓私欸目敬繕清單祇呈

御覽

謹開

一蒙混咨保翎支私放獎札東七台八台共索銀四百一十兩

一請領各旗喇嘛度牒六百五十張共索銀六千五百兩

一請領度牒各旗賄減人數共索銀一千餘兩

一盜賣官存駝馬皮張共得二百兩

以上共合贓銀八千一百餘兩

請將糧餉章京榮泰留營差委片

再科布多糧餉章京委署主事翰林院筆帖式榮泰前因到差三年期滿呈經前大臣寶昌等奏請

敕部更換現該章京仍辦糧餉事務專候新任前來始能交卸至更替之員是否已經引見蒙

簡至今亦未接准部咨 臣瑞洵訪查該章京榮泰經管糧餉三年以來實係無過且繙譯尙爲熟悉前在翰林院筆帖式任內曾經掌院學士大學士徐桐等保列

京察一等引

見記名使其人稍有不稱徐桐主持公道辦事嚴覈亦決不肯輕登薦剡是其人之可用固非臣等之阿私也當此布置邊防急切需人之際合無仰懇

恩俯准留營差委以資臂助實於現在籌備邊務整頓地方不無裨益臣等爲辦事得人起見除咨吏部查照外爲此不揣冒昧附片籲陳是否可行伏祈

聖鑒訓示謹

奏

硃批著照所請該部知道

以上各摺片皆閏八月初三日奉硃批初四發回

以上摺片均八月初七日拜發

仍懇馳赴行在跪請 聖安摺

奏爲仍懇馳赴

行在跪請

聖安藉伸瞻戀微忱恭摺仰祈

聖鑒事竊臣前於本年七月初六日因洋人構衅

畿輔戒嚴當經具摺奏請回京報效迄四十餘日尙未奉到

批回正在疑慮之際忽見伊犁將軍長庚發遞

奏事夾板一副改由台站馳遞查閱傳單內開飭由台驛各站挨遞山西歸化廳探詢

駐蹕處所投交

行在兵部轉奏等因驟聞之餘驚憂罔措伏思

京師各軍拱衛森嚴王大臣籌策周密必能鞏固無虞今竟致

鑾乘西巡重煩

宸慮實出遠臣意料之外惟是

皇太后頤養方隆

皇上聖躬關係綦重尙求

珍衛少節憂勞上念

祖

宗垂佑之

靈下副薄海臣民之望臣瑞洵職司塞漠心在

闕廷依戀之忱實出至誠不能自己若非拘於官守早已星馳就道現計邊防要務均已遵
旨妥籌辦團練兵粗可就緒至借兵籲餉亦經具疏馳陳刻雖激情巨測軍務方殷而布置
已周守禦似無疏漏臣與幫辦祿祥遇事商確尙能和衷即使臣暫離數月該大臣亦能接

辦不致貽誤合無仰懇

天恩俯准 臣馳詣

行在少伸犬馬戀

主之私並 臣應辦各事亦得藉求

訓誨有所稟承如蒙

俞允 臣當由台站星夜馳抵綏遠一帶叩觀

天顏聽候

驅策實爲 臣欽企禱祀以求者也所有擬請馳赴

行在各緣由理合繕摺專差齎

奏伏祈

皇太后

皇上聖鑒

訓示遵行再 臣有所籌辦科布多防守事宜均於七月初六日十二日兩次奏報在案現均逾限報匣迄未遞回恐沿途有遺失情節容俟查明再行補繕馳遞合併陳明謹

奏光緒二十六年八月二十四日專弁齎遞

光緒二十六年十一月初八日弁旋回摺奉

硃批毋庸前來行在

九月初一日陝西渭南接
閏八月廿九日旨

籌備防務大概並墊費各情片

再此次軍事掣動全局凡屬臣民同深憂憤俄跨歐亞我尤腹背受敵雖漠北極邊防範難周亦不能不以全力相顧臣自奉嚴防

寄諭盡力圖維蒙團辦至六十千經費借籌數萬其他派兵放卡清野禦敵調蒙隊以固城借旗兵以協守請撥部款墊借商資均已具摺陳奏又值札哈沁亢旱成災哈薩克逃亡甚衆妥籌賑撫設法安插任重事繁日不暇給現幸粗有規模緩急似尚可恃惟商借古城旗兵請由部撥專餉奏摺

批諭全未奉到未免無所適從祇得竭盡心力設法維持應辦必辦但求有益事機未必盡合成例咨部文書想亦遺失將來部中如以未經立案相責尙求

聖明作主現在科布多商蒙安靖照常此則可上慰

宸廑請寬北

顧之慮者也惟是山西本年應解經費毫無到城信息本城每月支發既屬萬不可緩兼之團練防守經費需款甚鉅雖前奏由商借墊然爲時不能太久爲數不能太多此時宵旰焦勞焉敢再煩

聖慮再四思維惟新疆鄰省可以協濟該處藩庫尙有存儲擬請

旨准由臣等隨時咨商借用一俟軍事大定科城請有專款再行如數撥還一轉移間戶部既可省度支之煩邊要亦可無窘乏之慮於防務大有裨益所有籌辦防務大概並墊費借款各情形理合附片陳懇祈

聖恩俯允遵行再臣等接准烏里雅蘇台將軍連順來函據云七月所發報匣已由張家口駁回臣等所發各摺想亦一律延阻前會奉

旨整頓內地驛站今即廢弛不過邊遠陳奏事件不爲設法轉遞輒爲駁回管站官員實屬不知緩急應請

旨敕下該管各官切實查懲極力整頓以昭慎重合併附陳謹

奏

硃批著即咨商新疆巡撫暫行墊撥

昔フ月多利光ニ

散木居奏稿卷之三

門人鈴木吉武校字

筆集

庚子六月中外鮮啟奉

旨備選

信卿表弟筆集輯和靜鎮不獲奏咨兩

集皆自擬各予曾題前冊曰何文集今而行首途復臨
目如右

藝啟主人誌首月廿五日

科布多奏稿



散木居奏稿卷之四

韓難 瑞洵

籌筆集 光緒庚子閏八月起十一月訖

瀝陳未能就地籌款實在情形摺 附清單

揀員充補委署主事摺

擬定軍名暨現在籌防辦法片

照舊保護俄商不敢輕開邊衅片

擬裁蒙兵一半大概情形片

索倫領隊大臣由科起程赴任日期片

商定新疆撥兵五百名駐防沙紫蓋片

烏里雅蘇台撥給火藥觔數片

欽奉 寄諭謹遵辦理併陳下情摺

地方公事擬隨時妥辦暫緩具奏片

本年科屬蒙古各旗呈進博勒克擬請展緩摺

揀補印務蒙古兩處筆帖式摺

揀補新添糧餉處筆帖式摺

奉到 硃批日期並自請議處片

前報俄卡添來兵械現已撤回片

謹獻愚忱摺

循例查驗官廠擬籌整頓摺

前交新疆電奏暨先聲明遵 旨現辦裁留蒙兵片

奏事暫用夾板片

更正官兵治裝銀兩仍由房租項下動支片

附生崔象侯咨部留營仍應 奏明片

恭祝 萬壽並陳俄兵現已撤回電請代奏摺

遵 旨裁撤蒙兵所欠商款兵餉懇 敕部墊發摺

挑留蒙兵五百名分防各處片

預籌留兵餉項片

欽奉 寄諭瀝陳感悚下悃摺

科布多部院額缺章京筆帖式請 予例保摺

瀝陳未能就地籌款實在情形摺 附清單

奏爲瀝陳未能就地籌款實在情形恭摺仰祈

聖鑒事竊 臣等於本年閏八月初九日接奉軍機處交由山西大同縣加封遞回

安摺四件軍機大臣知會一封謹悉 臣等前於七月初六十二日兩次奏陳摺件均已仰邀

聖鑒其祿理蒙團請撥部餉一片奉

旨即著就地籌款挑練蒙兵自固邊防咨商鄰省徒誤事機欽此其借挪商款支放津貼一

片奉

旨即著就餉辦防力求核實無稍虛糜欽此欽遵知會前來跪讀之下欽感莫名伏維

鑒乘西巡 臣等不能躬事囊韉馳驅效力徒以邊庭瑣務上瀆

宸聰尙荷中途

批發俾有遵循倍深慙悚現在防守事宜但使力所能爲何敢再煩

聖慮無如邊遠瘠區兵餉兩闕早在

聖明洞鑒茲者事機湊迫無可如何若復隱忍不言既無術以竟前功復無策以收後效再四思維仍有不得不呼籲於

聖主之前者請爲我

皇太后

皇上縷細陳之查科布多孤懸西北本係邊區所轄蒙古各旗散處不整游牧富戶概無聞焉辦團練兵尙須籌給津貼如所謂捐輸報效辦法斷難責之窮蒙商民鋪戶不滿五十坐莊只有數家行夥居其大半春來秋去向無定蹤較之通都大邑一經勸諭動積巨款者實有霄壤之別此外零星小販復無稅釐可抽戍守弁兵專賴經費接濟一遇邊警所有蒙戶商民尙須極力設法禁阻安置否則早已星散便無人煙此等光景實不如內地一村一堡之熱鬧且現值用兵市面益形蕭索臣等此次辦團籌給津貼雖云責其防守實則安其游牧略示羈縻以維疆圉所謂自固邊防者祇有此法若欲取財商蒙藉爲練兵之資實在無法辦理此未能就地籌欸之實在情形也科布多經費一年僅止四萬九千餘兩本屬枯窘局面今奉

旨敕令就餉辦防力求核實臣等籌度再三值此時艱豈敢以虛糜粉飾藉圖私計況各省

招練各軍所報餉章勇數虛耗甚多頗有糜費至鉅萬者 臣等平時早已痛恨而深惜之焉
肯自甘尤效科布多除前借商款外並無防餉未能就欸圖維茲將歲入歲支各欸謹繕清
單祇呈

御覽自蒙

聖明鑒察此又本無防餉辦理竭蹶之實在情形也 臣等竊維治邊之道以安靜不擾爲先
科布多僻在偏隅果使烽燧不驚原可從容坐鎮不必另生枝節設法整頓致蒙多事之譏
無如兵端猝啓邊境戒嚴奉

旨籌防責成綦重而驚憂時局控揣敵情確有強弱之分虛實之異 臣等身膺疆寄即不能
殺敵立功亦何甘束手待斃當即挑選蒙兵費盡無窮氣力始克就緒該蒙兵迭經駁換現
已一律強壯槍箭技藝均本嫺熟故城守宴然邊卡安堵用使敵人泯窺伺之心游牧保安
全之業實係全賴蒙兵團練之力 臣等初以爲積衰難振竟不料尙能如此可見兵無強弱
視乎訓練如何天下固無不可用之兵也現計各旗團練兵丁六千另練守城護卡兵丁兩
千所需津貼銀兩本不爲多較之武衛諸軍以及內省各軍餉糈優厚何翅九牛一毛若彼
則協濟不遑此則艱若獨異恐非

朝廷體恤蒙古之本心現既奉

旨令臣等就地籌款又令就餉辦防

聖主區畫苦衷臣等具有天良豈不知仰體

憂勞勉圖辦理無如勢處萬難無從報

命而蒙兵既甚得力實未敢遽議撤防以致敵人乘虛而入然月需二萬數千金直是無從

羅掘借貸商款既不能多請撥專餉又未奉

准無米之炊難責巧婦況如臣等才力庸拙更覺智盡能索徒喚奈何刻下又不知軍務何

如洋人是否尙可就撫但現據卡倫侍衛馳報俄卡尙在陸續添兵運械不知是何用心臣

等處此爲難之時萬分棘手然仍不敢稍涉鬆勁只有照舊布置嚴加防守究應如何辦理

之處惟有仍求格外

天恩俯念窮邊窘迫勢處萬難

諭示機宜俾有稟承藉免貽誤實深感幸至臣等受恩深重奉

命守邊當此危時原應毀家紓難無如遭此大亂家產房地想皆化爲烏有亦屬報效無從

即使暫行借墊皆苦無法可施是以不揣冒昧據實直陳仰求

垂諒現在科布多轄境尙幸寸土未失較之內地總算安靜臣等不敢大意自當始終苦守竭力維持儻使獲保無恙是皆

聖主威福所致臣等不敢居功堪慰

慈廕所有未能就地籌款實在情形理合繕摺馳陳伏祈

皇太后

皇上聖鑒訓示無任悚惶迫切待

命之至再科布多並無勁兵止可固守不宜輕開戰衅合併聲明謹
奏

硃批另有旨光緒二十六年十月二十三日奉到

謹將科布多歲入歲出銀兩各數目繕具清單祇呈

御覽

計開

應收款項

一常年應收山西省協撥經費銀三萬三千三百三十三兩五錢

新添經費銀四千兩

加增銀一萬兩

直隸省添撥經費銀二千五百兩

應放款項

一參贊大臣一員應支一年本任養廉銀七百兩一年副都統銜俸廉隨甲共銀四百二十七兩

一幫辦大臣一員應支一年本任養廉銀五百二十兩一年副都統銜俸廉隨甲共銀四百二十七兩

一糧餉處印務處蒙古事務處章京三員幫辦章京二員每員應支一年鹽菜銀一百七十兩四錢五員共銀八百五十二兩

又每員應支一年加增銀一百二十兩五員共銀六百兩

一委署章京筆帖式一員應支一年鹽菜銀一百七十兩四錢

又支一年加增銀一百二十兩

一筆帖式二員每員應支一年鹽菜銀七十二兩二員共銀一百四十四兩

又每員應支一年加增銀四十八兩二員共銀九十六兩

查以上各員係屬舊設額缺至現請添設幫辦章京筆帖式各缺應支鹽菜加增等項尙未
算入合併聲明

一帶兵驍騎校一員應支一年鹽菜銀四十八兩又應支一年加增銀三十六兩

一額外驍騎枝二員每員應支一年鹽菜銀三十六兩二員共銀七十二兩

又每員應支一年加增銀三十六兩二員共銀七十二兩

一候補筆帖式三員委署筆帖式十二員共十五員每員應支一年鹽菜銀三十二兩四錢
十五員共銀四百八十六兩

又每員應支一年加增銀二十四兩十五員共銀三百六十兩

一霍呢邁拉扈卡倫侍衛一員應支一年鹽菜銀九十六兩

又應支一年減半糧折銀十八兩五錢八分五釐

一昌吉斯台卡倫侍衛一員應支一年鹽菜銀九十六兩

又應支一年減半糧折銀十三兩四錢二釐一俄商局章京一員應支一年鹽菜銀一百七
十兩四錢

又應支一年加增銀一百二十兩

一筆帖式二員每員應支一年鹽菜銀七十二兩二員共銀一百四十四兩

又每員應支一年加增銀四十八兩二員共銀九十六兩

又應支一年心紅紙張銀一百二十兩

又應支一年賃房銀一百九十二兩

又應支柴薪銀二十四兩

一字識四名通事二名巡邏兵十名共十六名每名應支一年口分銀四十八兩十六名共

口分銀七百六十八兩

一綠營屯田參將一員應支一年鹽菜銀八十四兩

又應支一年加增銀一百二十兩

一千總二員每員應支一年鹽菜銀三十二兩四錢二員共銀六十四兩八錢

又每員應支一年加增銀三十六兩二員共銀七十二兩

一把總六員每員應支一年鹽菜銀二十六兩四錢六員共銀一百五十八兩四錢

又每員應支一年加增銀二十四兩六員共銀一百四十四兩

一經制外委一員應支一年鹽菜銀十六兩八錢又應支一年加增銀二十四兩

一馬步兵二百二十四名每名應支一年鹽菜銀十兩八錢二百二十四名共銀二千四百十九兩二錢

又每名應支一年加增銀十八兩二百二十四名共銀四千三十二兩

一兵役二十二名每名應支一年鹽菜銀六兩二十二名共銀一百三十二兩

又每名應支一年加增銀六兩二十二名共銀一百三十二兩

一駐班處公一員協理台吉一員管旗章京一員聽差台吉二員嚮導兵二名牧廠協理台吉一員通共八員名應支一年鹽菜銀六百四十四兩四錢

又應支一年減半糧折銀六十一兩三錢六分二釐

一明阿特額魯特參領一員佐領一員大錢糧兵四十名小錢糧六十名通共官兵一百二員名應支一年鹽菜銀二千六百一兩六錢又應支一年減半糧折銀三百七十八兩九錢七釐

一喀爾喀屯田參領二員章京二員驍騎校三員兵二百五十名通共官兵二百五十七員名應支一年鹽菜銀三千十兩二錢

又應支一年減半糧折銀一千三百三十三兩四錢三分八釐

一牧廠管旗章京二員兵三十二名應支一年鹽菜銀九百五十二兩八錢

一二十四卡倫台吉三十員兵六百一十名通共官兵六百四十員名應支一年鹽菜羊價銀一萬三千八百六十兩

一哈喇烏蘇東十四台台吉二員兵一百六十名通共官兵一百六十二員名應支一年鹽菜羊價銀三千七十二兩

又應支一年減半糧折銀三百五十七兩二錢四分

一沙拉布拉克北八台參領一員兵四十四名共官兵四十五員名應支一年鹽菜羊價銀八百五十二兩

又應支一年減半糧折銀九十九兩六錢二分六釐

一搜吉南八台兵八十名應支一年羊價銀一千四百四十兩

又應支一年減半糧折銀一百六十五兩二錢一分

一官學生二十名應支一年紙筆銀一百二十兩支領一歲糧折銀八十二兩六錢

一烏梁海副都統一員散秩大臣二員總管四員共七員應支一年俸銀四百六十七兩五

錢二釐

一明阿特額魯特札哈沁總管三員每員應支一年俸銀六十五兩共銀一百九十五兩
一滿綠兩營兵共二百四十一名兵役二十二名每名應支領三箇月柴薪銀二兩四錢二百六十三名共銀六百三十一兩二錢

一屯田拔割田苗蒙古兵二百名每名賞一箇月鹽菜銀九錢二百名共銀一百八十兩

一採買代煙價銀二百五十三兩二錢

一採買農具價銀一百五十五兩一錢三分

一糧餉處印務處蒙古事務處三處每處應支一年心紅紙張銀一百二十兩三處共銀三百六十兩

查此係該三處辦公應用至參贊幫辦兩衙門月需摺奏心紅紙張各項皆係參贊等自行賠墊不在此列合併聲明

一東十四台應支一年羊價銀一百四十兩

一南八台應支一年羊價銀六十四兩

一北八台應支一年羊價銀三十二兩

一春秋二季祭祀羊價銀二十四兩

一春秋二季祭祀牛價銀八十兩

一衆安廟應支一年香燈銀一百二十兩

一看守人犯燈油銀一年共銀九兩五錢五分八釐

一綠營兵丁一年操賞銀三百兩

一每年十屯田秋成後賞綠營蒙古官兵銀二百七十餘兩

一每年添補耕牛四十四條每條價銀四兩共價銀一百七十六兩

查實在市價每條總須十三四兩此四兩係屬例價不敷採買合併聲明

一每年派往京城進馬東西兩口領餉辦茶以及各項差使弁兵應領製裝銀五百二十兩

一正月十五日六月二十六日兩次綠營蒙古兵射箭躡蹻賞項共銀一百八十餘兩

一每年十屯田修理河渠灌澆屯田除屯兵外每屯加添工銀五十餘兩共銀五百餘兩

一參贊幫辦遇有陞調回京約需車價銀五百八十餘兩

一糧餉章京三年期滿應領車價銀九十餘兩

一綏遠城換防滿兵三年期滿應領製裝銀一百七十餘兩

一俄商局修理毡房銀七十餘兩

以上四項共銀九百一十餘兩

查應需車價製裝修理氈房等項並非常年必需每年拉展約銀三百餘兩

一十屯交糧採買米麪修理毡厠約需銀五十餘兩

以上一年共應放銀四萬八千四百二十餘兩遇閏月應加放銀三千五百餘兩

查每遇閏月並無奏撥加給經費故每年經費雖有盈餘一千上下之譜而遇閏即須補放以致均勻攤算每年尙有不敷合併聲明以上一年連閏拉展共應放銀五萬一千九百二十餘兩

除放實不敷銀二千零八十餘兩

此外尙有活支雜支各項皆係隨時就事核定難以預估確數合併聲明

光緒二十六年十月二十三日承准

軍機大臣 字寄

科布多參贊大臣瑞洵祿祥光緒二十六年九月十七日奉

上諭瑞洵等奏邊餉難籌酌擬裁撤團兵開單呈覽各摺片現在餉需萬緊所有原練蒙團

六千著全行裁撤護城護卡兵二千著裁去一千五百名暫留五百名即著認真挑選分防各處查閱單開出入各款所稱餉項支絀尙屬實在情形著戶部於邊防經費項下撥給銀一萬兩交瑞洵等核實支用不得稍涉鋪張虛糜帑項爲要將此由五百里各諭令知之欽此遵 旨寄信前來

揀員充補委署主事摺

奏爲揀員充補委署主事恭摺仰祈

聖鑒事竊查科布多額設委署主事一員向於所屬正缺筆帖式內揀員充補查委署主事蒙古處筆帖式鍾祥前經

奏補蒙古處幫辦章京現已承准軍機處知會奉旨著照所請該衙門知道欽此所遺委署主事自應揀員充補茲查有四品頂戴補驍騎校後以防禦補用俄商局筆帖式文惠人尙樸實當差勤謹堪以充補如蒙

俞允應俟該員五年期滿如願就武回城後卽循向章以防禦遇缺即補並照主事職銜支給銀糧遇有差便再行給咨該員赴部帶領引

見至該員應找支銀糧應俟奉

旨之日再行照例開支報部所有揀充委署主事緣由理合繕摺具陳伏乞

皇太后

皇上聖鑒謹

奏請

旨

硃批著照所請該衙門知道

擬定軍名暨現在籌防辦法片

再查各省練兵皆有軍名臣等所請挑練蒙古團兵現已奉

旨敕辦應即取名以昭鄭重查科布多介居朔漠練兵義在自強擬即名爲朔強邊軍且查現在軍務未完敵情叵測昨據嗎呢圖噶圖拉幹卡倫侍衛常陞馳稟附近俄屬察罕珠蘇隆地方現來俄兵百餘名槍械七八車阿拉克伯克鄂博亦來俄兵百餘名車載軍火口糧甚多等情臣等雖早派兵放卡並調蒙兵前往助防尚不放心蓋彼即不來撲城邊界須防襲取刻已加委幹員再往確查如果情形喫緊臣瑞洵尙擬自行馳往該處督率防守蓋臣所慮者惟恐守卡官兵不諳事幾或致輕舉妄動稍一失宜邊衅即由此起非小失也臣愚

見與洋人交仗必能守而能戰能戰而後能和本非剿辦土匪可比萬萬不宜孟浪從事故
臣自奉安籌布置

寄諭仰體

聖意重在防守並未

責以戰事即與 臣祿祥悉心籌商處此無兵無餉之區直難議及打仗惟有處以鎮靜切忌
張皇禦侮而不招侮乃爲上策要在同心堅守加意嚴防以免敵人窺我虛實致滋後患並
將此意迭次密札蒙古各旗再三申戒練團自守各管各旗萬不准藉端生事竟與俄人尋
衅以杜猾夷報復來侵之計如能遵此辦理即與戰功無異且能固守保全地方尙比一味
浪戰失地損威勝強數倍所幸 臣瑞洵到任以來於蒙古加意聯絡格外體恤又與科布多
蒙古各旗多半同族該各旗頗知敬畏以故呼應能靈深資得力現在所轄地方照常靜謐
商蒙相安惟近聞新疆一帶逃難百姓太多幾於盈千累萬詢係直隸山東人居多此輩人
類混雜流離失所若地方官吏不早設法撫綏難免窮而生變科布多屬界緊與新疆毗連
時切隱憂 臣現擬選派所練蒙兵二三百名於交界處所扼要設防杜其來路免爲邊患一
面札飭札哈沁南八台管台官員一遇流民越境即爲阻回並可否請

旨敕下伊犁將軍長庚新疆巡撫饒應祺飭屬查明妥籌辦理之處伏候

宸裁 臣瑞洵受

恩深重夙蒙

知遇既有所見不敢不言亦曲突徙薪之微意也所有擬定軍名暨現在籌防辦法理合附片陳明仰慰

聖廑是否有當伏候

訓示謹

奏

硃批著即咨商長庚饒應祺妥籌辦理

照舊保護俄商不敢輕開邊衅片

再科布多毘連俄界向准通商在城貿易者計有五六家蒙古各旗居住者不下四五十家此次中外開衅科布多聞警之後謠言四啓人心浮動該俄商不免疑慮均欲奔回本國請兵前來護商 臣夙知外國向於僑寓中國商民每有齟齬輒有派兵護商之舉若任其辦理不早禁阻竟致發兵前來則彼聲勢較衆後患殆不可言比值俄商達魯噶呢喀賚阿薩諾

福由該國來科布多謁見臣當即面加開導諭以現雖兩國交兵事由拳匪而起我

國家與俄通好二百餘年諒不久必歸於和此處俄國商民既有地方官加意保護即萬不應再來兵隊各商人亦均不必回國仍在此安分貿易免啓蒙人之疑轉多不便等語該達魯噶甚爲感激已與該商務衙門寄信告知旋據駐劄庫倫匡索勒施什摩勒福專差來遞文書致謝並懇仍念和好有年加意保護臣業已覆文照准此臣近日辦理洋務之實在情形也惟此等辦法實因度勢量力不敢輕開邊衅且爲臣子者當爲

國家弭患分憂不當爲

國家惹禍生事區區之愚實在於此第恐局外不諒爲難苦衷專說假話講空理或於臣用意不能深知且謂臣畏蒞則以後辦事更形棘手相應據實直陳仰求

聖明垂察臣幸甚謹

奏

硃批知道了

擬裁蒙兵一半大概情形片

再科布多地介西北邊陲向與內地聲氣不甚聯屬近自外人開衅宣南道梗文報至今不

通刻下不知近畿軍情若何側聞已蒙

特派大學士李鴻章辦理撫局不知確否臣愚見前奉軍機大臣

寄諭令臣於所轄地方妥籌布置原因戰衅已開邊界毘連不得不嚴加防範現如果欲議款則軍務較鬆戰守各軍自當亟籌減竈科布多挑選團練蒙兵月費津貼款項尙無著落僅仗借貸商款及動用庫存平餘各項雜款爲數不過二萬金上下業已搜羅一空實無別法可以支撐局面現若全行裁撤恐有疏虞照舊演練又無接濟籌慮已窮萬分憂灼萬不得已只有減半留半辦法擬將原練團兵六千裁去三千護城護卡兵兩千裁去一千諭以將來餉足再行多練以資調劑而備緩急現存共止四千名不過勉強分布聊壯聲威而已至已裁之兵四千止給八月閏八月兩箇月津貼現已飭知各旗截至閏八月底止遵照裁撤該蒙兵多在本旗駐防即無所謂資遣餉項即請不必發給以節糜費此係恐勞

聖慮先陳大概擬辦情形容再詳細具

奏臣瑞洵謹附片具陳伏祈

聖鑒訓示謹

奏

硃批覽

索倫領隊大臣由科起程赴任日期片

再臣等前奏請留伊犁索倫領隊大臣志銳幫辦團務一摺承准軍機處八月初七日知會奉

旨著不准留欽此查臣等前者實因籌防緊要助理需人適值該大臣赴任伊犁道經此地是以商同奏請茲奉

嚴諭臣等深悔冒昧愧悚交并當即恭錄咨行該大臣欽遵且查現在南八台業於賑撫之後安設復舊並已催令該大臣速赴調任現據覆稱定於閏八月二十一起程相應附片陳明伏祈

聖鑒謹

奏

硃批知道了

商定新疆撥兵五百名駐防沙紫蓋片

再前因邊防喫緊科布多並無兵隊情形可慮當以新疆相離較近曾經咨商該撫饒應祺

借撥旗兵助防附片陳明在案茲奉

批旨咨商鄰省徒誤事機欽此查此件已與該撫商定擬挑精壯兵丁五百名駐防南八台之沙紫蓋地方期與科布多聲勢聯絡惟新疆向恃各省協餉現聞多半停解深虞軍餉不繼難資得力不敢指準臣等惟當精練蒙兵自固邊防即應遵旨不再咨商合理附片陳明伏祈

聖鑒謹

奏 硃批知道了

烏里雅蘇台撥給火藥觔數片

再前因辦理蒙團必須發給軍火科布多存儲火藥無多擬向烏里雅蘇台咨領一萬觔濟用當於七月十二日附片陳明即經派委筆帖式文惠帶領兵丁前往請領旋准將軍連順等咨覆以該城火藥現亦無多無憑照且值舉辦防務需用同殷僅爲勻給一千觔茲據該委員領解到營當飭儲庫隨時發給各團操用至科布多舊存火藥雖經受潮現已揀派通曉製造之弁兵設法收拾加工浸曬近日操演即令裝槍試放均已可用除咨部查照外理合附片陳明伏祈

聖鑒謹

奏

硃批知道了

以上摺片光緒二十六年閏八月二十一日拜發九月十七日到陝十月二十三日奉到

欽奉 寄諭謹遵辦理併陳下情摺

奏爲欽奉

寄諭謹遵辦理並陳下情恭摺仰祈

聖鑒事竊臣等於本年九月初七日承准軍機大臣字寄光緒二十六年閏八月初三日奉上諭瑞洵等奏蒙團辦齊請飭部速撥專款及將連順所辦蒙團停止並調練蒙兵應需月餉暨自陳才不勝任各摺片覽奏均悉從來辦理地方事件必須詳細籌畫經費有著方可舉行現在國事如此戶部支絀萬狀斷無鉅款可以撥給科布多防務事宜該大臣等但當視力所能爲悉心妥辦得寸得尺務求實際慎勿徒多紛擾也將此諭令知之欽此遵

旨寄信前來仰見

聖主遠慮深思明見萬里

殷殷誥誡感悚莫名伏思臣等前因欽奉

諭旨以中外開衅令於所轄地方妥籌布置扼要嚴防欽遵之下比值夷氛正肆邊境戒嚴既無可用之兵又乏別練之隊台卡城防空虛可慮只得挑選蒙兵辦理團練以圖自守當經具摺馳

奏奉

旨允准欽遵在案彼時軍情正在喫緊萬難稍涉濡緩臣等豈不知餉源無出籌畫爲難然防務緊要關係全局又與辦理尋常公事不同不得不借墊商貲先顧眉急若必俟款項有著方可舉行則蒙古不團必散俄夷不防必來卽邊疆且不守必失亡羊始議補牢而引狼早已入室

京畿之事前鑒匪遙臣等身任地方何敢出此故一聞亂耗即將防守事宜速爲籌布任事似乎太勇然與其受冒昧之咎不敢任貽誤之愆蓋冒昧止過在一身貽誤則有礙大局也近月以來煞費心力始將科布多保守無恙商蒙照常安輯是整頓之說猶屬空談防守之嚴是爲實效此可見信於

君父而不必斤斤表白者也至請撥蒙團經費一節亦以旣用其力即不能不恤其身逆料王大臣籌策公忠不能膜置邊要於不顧必可騰挪耗費之餉以濟邊軍之需且滿蒙旗兵

初與勇營無異勇丁口糧不能短欠豈滿蒙旗兵本是世僕又素安分轉不能稍給津貼以示體恤竊恐有失人心臣等忝膺邊寄即此不能取信於蒙古亦慮無顏以對各旗況當拜發請餉摺件時尚不知

鑾乘西巡確信若早得京師知照臣等奔問不遑尙安肯以邊庭瑣務上瀆

宸聰故自八月中秋以後接到綏遠城將軍永德來文始知

聖駕已幸山西臣等當卽具摺跪請

聖安臣瑞洵並請馳赴

行在專弁齎遞此外未敢瀆

奏臣等懇懇愚忠當蒙

鑒諒至臣等辦理乖方竟以恐多紛擾上塵

聖慮惶悚尤深查臣等自奉籌防

諭旨悉心妥商卽以兵備太單敵情叵測總以鎮靜不擾爲主不令俄人窺我虛實且稍涉紛亂則蒙古以及商民必啓猜疑臣等一言一動均爲觀聽所繫不止辦事宜加慎重已也現在地方幸獲保全尙能仰副

聖意而於俄商曲加保護尤見臣等弭患苦心若以臣等夙願所存惟以殺敵爲志然時勢所迫無可如何在

朝廷方悔兵禍豈臣子敢挑畔端故且忍之須臾不敢稍形激烈恐爲壽山之續上負委任茲蒙

嚴旨以紛擾切戒臣等自當始終遵奉永作官箴惟請將連順所辦蒙團停止一節查臣等前於具報蒙團辦齊摺內附片奏稱科布多與烏里雅蘇台情形不同慮及如蒙交議被駁致疏邊備臣等耽罪不起是以叩求

聖明作主如謂邊塞寥遠無須如此布置則乞

速降綸音即行停止以免日久難於收束臣等係指請停科布多團練而言原片內未將科布多三字詳細聲叙殊屬疎漏即此可見臣等才力不及思慮未能周到雖以臣瑞洵年志方強值此時艱守此危地存亡呼吸亦實覺重任難勝現在大局未定軍務未完臣瑞洵受國厚恩義無退避然邊疆重要辦事爲難整飭未能敷衍不可又夙性戇直不合時宜深恐致誤邊事有忝職守總求

天恩以地方爲重

另簡賢能前來接替臣瑞洵仍當馳詣

行在勉圖報效俾免臣債事辜

恩尤臣瑞洵瞻戀

闕廷私衷盼禱者也總之既蒙

訓誡此後遇事自當格外謹慎請

旨辦理萬不敢再爲多事並當倍加鎮定以期仰慰

宸廑所有欽奉

寄諭謹遵辦理並陳下情緣由理合繕摺覆陳伏乞

皇太后

皇上聖鑒

訓示謹

奏

硃批知道了即著將地方應辦事宜認真整頓仍毋事紛擾爲要光緒廿六年十一月廿二日奉到
地方公事擬隨時妥辦暫緩具奏片

再臣等前於八月初七日與蒙團辦齊摺同日拜發請暫緩開辦礦務暨嚴參革員麟鎬並請調補兵額共三摺又請留糧餉章京榮泰差委請將戍員榮和開釋暨臣瑞洵免繳糧單照驗各件共三片均未奉到軍機大臣知會諭旨不知是否已邀

御覽臣等原不敢再爲瀆請惟所奏多係地方應辦事件無論

准駁必以欽奉

諭旨臣等方有遵循而跪請

聖安之摺亦未奉

批回區區戀

主之誠尤難少釋查臣等忝膺邊寄爲一方表率蕃夷視聽所繫且慮此風一播必疑大臣已爲

朝廷所棄將無奏事之權竊恐諸部解體敵益以生心而屬員弁兵亦皆無能約束似屬稍有關係臣等愚昧敢求

聖慈仍賜分別

訓示無任感盼至此後地方公事即由臣等隨時斟酌妥辦擬請暫緩具

奏以免瑣瀆

聖聰俟軍務大定再爲照舊辦理是否有當謹附片冒昧具陳不勝待罪之至謹

奏請

旨

硃批另有旨

本年科屬蒙古各旗呈進博勒克擬請展緩摺

奏爲科布多所屬蒙古各旗本年應行晉

京呈遞

博勒克懇籲

天恩准其展緩以示體恤而資維繫恭摺仰祈

聖鑒事竊查向來每屆冬令科布多所屬杜爾伯特新土爾扈特和碩特札哈沁各旗汗王

貝勒貝子公札薩克台吉等均應派員晉

京跪請

聖安並呈遞

博勒克就便請領俸銀俸緞節經循辦有年現值匪教搆難

聖駕巡幸山西

京師已爲外人占踞未經收回據各旗呈請指示遵辦前來臣等伏維撫局急切難定軍務尙未解嚴自難指令晉

京惟若令該蒙古改赴山西

行在又慮人地生疏諸多窒礙非所以昭誠敬即俸銀俸緞亦恐此次未能依期照發諒戶部理藩院自當

奏請展緩臣等公同商酌該蒙古各旗本年應行派員晉

京呈遞

博勒克一節合無仰懇

天恩准其展緩一俟事局大定再照舊章辦理其應領俸銀俸緞亦應令將來晉

京補領以示

聖朝優恤蒙古之至意如蒙

俞允應擬奉到

諭旨當由臣等恭錄轉飭欽遵臣等爲維繫蒙心起見是否有當未敢擅專理合繕摺馳陳
伏祈

皇太后

皇上聖鑒訓示謹

奏

硃批著照所請該衙門知道光緒二十六年十二月初五日奉到

揀補印務蒙古兩處筆帖式摺

奏爲揀補筆帖式員缺以資辦公恭摺仰祈

聖鑒事竊查科布多印務處筆帖式崇文委署主事蒙古處筆帖式鍾祥均已奉

旨准補本衙門主事職銜幫辦章京該二員所遺員缺自應揀員充補其印務處筆帖式一
缺查有委署筆帖式清林謹飭不浮兼通滿漢堪以擬補其蒙古處筆帖式一缺查有委署
筆帖式錫齡阿文理明通人亦體面堪以擬補如蒙

俞允應俟該員等五年期滿如願就武回城後循例俟補驍騎校後以防禦補用先換頂戴

其該員等應找支銀糧俟奉

旨之日例照開支報部遇有差便先行給咨該員等赴部帶領引

見所有揀員請補筆帖式緣由理合繕摺具陳伏祈

皇太后

皇上聖鑒謹

奏請

旨

硃批著照所請該部知道

揀補新添糧餉處筆帖式摺

奏爲揀補添設筆帖式員缺以資辦公恭摺仰祈

聖鑒事竊查前因邊防喫緊差委需人經 臣等援案

奏請添設額缺現已承准軍機處知會奉

旨著照所請該衙門知道欽此查科布多現在辦理邊防添練蒙兵糧餉收支事尤繁劇自應先將添設該處筆帖式一缺揀員擬補以資分任茲查有補驍騎校後以防禦補用先換

頂戴候補筆帖式景善資勞較深當差勤苦堪以擬補查該員前因經理台站軍務文報出力於光緒二十四年間保有防禦補用升階奉部議准此次擬補員缺如蒙下闕

奉到 硃批日期並自請處分片

再 臣等前因八月初七日具

奏各事僅止辦理蒙團防守事宜各摺片於九月初七日奉到閏八月初三日軍機大臣字寄

上諭一道其餘各件均未奉到

批旨 臣等不勝盼切當於九月十一日附片陳明嗣經遲至九月十七日始據哈喇烏蘇台送到閏八月初四日軍機處交由山西巡撫轉遞

批回

安摺奏摺各件計四十三日始到查軍機處於閏八月初三日先將

廷寄交遞初四日即將各摺交遞並未耽延不解途中何以竟至遲逾十日現既欽奉

批旨不但遇事有所遵循 臣等依戀之誠亦可少紓准駁各件具仰

聖心權度至公至平曷勝欽佩此後 臣等益當各勤職守力顧邊防期副

朝廷善後圖強之至意至 臣等前次片奏委因疑慮交縈又以過蒙

優眷自當遇事直陳而殊不覺其冒昧也至今思之歉悚萬分查前片係臣瑞洵主稿應懇

天恩將 臣瑞洵

量予處分庶稍釋隱微之疚實感

生成之德謹將奉到

硃批日期及感悚下情附片具陳伏祈

聖鑒訓示謹

奏

硃批瑞洵著交部議處

前報俄卡添來兵械現已撤回片

再前據瑪呢圖噶圖拉幹卡倫侍衛常陞報稱俄添卡兵運械各情曾於閏八月二十一日
附片陳明並擬情形喫緊 臣瑞洵尙應馳往督防旋於九月十五日據該卡倫侍衛常陞並
偵探委員會稟稱前報察罕珠蘇隆及阿拉克伯克地方添來俄兵現均陸續撤回等語 臣
伏維夷情叵測邊地空虛仍應嚴加防範前練蒙兵因餉需無著業經裁撤一半兵力已嫌

單薄未便損之又損惟俄兵既已撤回臣即不必前去仍在科布多彈壓撫綏遙制一切理合附片具陳伏祈

聖鑒謹

奏

硃批知道了

以上各摺片皆光緒二十六年九月二十四日拜發十月二十四日到陝十二月初五日奉到

謹獻愚忱摺

奏爲遵

旨謹獻愚忱恭摺敬陳仰祈

聖鑒事竊臣於九月初十日伏讀七月二十八日

上諭自來圖治之原必以明日達聰爲要此次內訌外侮倉猝交乘頻年所全力經營者毀諸一旦是知禍患之伏於隱微爲朕所不及覺察者多矣懲前毖後能不寒心自今以往凡有奏事之責者於朕躬之過誤政事之闕失民生之休戚務當隨時獻替直陳母隱等因欽此竊謂爲政在人古今通義得其人則治不得其人則亂成敗之幾捷於桴鼓而樞密清嚴封疆重要尤爲衆情所瞻矚庶政之綱維此次大局貽誤執咎者自無可辭臣遠在邊垂於

用兵原委未能深悉固未便以臆度之詞輒行論列第重以

詔書廣納諄切疇咨臣世受

國恩值此時會艱難亦不敢苟安緘默惟臣愚見

求言罪已固屬

人主美德要亦貴有

納諫之眞誠

省躬之實意此後維持危局旋轉

天心諒

皇上必能容忍以圖恢復交儆以

敕臣工就其禍變之由來以爲挽回之致力必不以數行

諭旨畢乃事也顧臣禱昧所尤惓惓不忘而欲進之

皇上者惟在

深宮孝養之大端伏維

皇太后自垂簾聽政以來憂勤惕厲實未嘗一日得享太平之樂

聖德之仁明懿美蓋從古所未有亦薄海所同欽現因中外搆兵以致

鸞輿西幸

避狄居岐不遑暇逸焦勞可知臣自聞

車駕之播遷實已心神之飛越奔問之義時切臣衷願以職守攸羈未敢貿然就道前請馳
詣

行在一摺已奉

硃批毋庸前來欽此臣伏願我

皇上近侍

慈顏益隆孝養凡百庶事更宜秉

命而行承

歡彌篤雖

天子之孝固與臣庶不同然值此

國家多事重勞

宵旰之時舉凡

問

安視

膳晨昏定省當更有曲慰

慈心而副天下臣民之望者益知

頤養

璇宮即以常蒙

福蔭所謂和氣致祥

重闈篤慶亦足以彈壓戎釁毗益時艱矣臣懇款愚忱未能面

奏謹恭摺敬陳伏祈

皇太后

皇上聖鑒謹

奏 光緒二十七年二月初五日奉軍機處知會

旨留中欽此二十六年十二月廿三日知會

循例查驗官廠擬籌整頓摺

奏爲循例查驗官廠牲畜擬籌整頓恭摺仰祈

聖鑒事竊查舊章臣到任除盤查倉庫外尙應將吐們圖官廠牲畜查明具

奏近年以來因塔爾巴哈台馬匹牛隻早停調取哈薩克交馬之例亦不照行情事與從前迥異管理官廠蒙古官員亦即視爲具文以致牧務漸就廢弛殊失當初立法之意臣到任時正值中外交綏籌布邊防軍書旁午實已兼顧不及未能往查茲因邊務較鬆臣即於十一月十七日帶領蒙古事務處承辦章京英秀前往該廠查得現存駝六百五十五隻馬二百四十九匹牛隻無存覈與節年冊報尙屬相符惟查口外地方牧放爲蒙古命脈所繫古今籌邊之臣無不以考收興屯爲經久至計臣愚見科布多官廠事宜尙應設法整頓容臣與幫辦大臣祿祥妥籌辦法督飭該章京盡力爲之所有查驗官廠現存牲畜數目暨擬籌整頓緣由理合繕摺具陳伏祈

皇太后

皇上聖鑒謹

奏 光緒二十七年二月初五日遞回奉

硃批知道了

前交新疆電奏暨先聲明遵 旨現辦裁留蒙兵片

再 臣瑞洵前聞

鑾輿於閏八月初八日

巡幸陝西當於九月二十九日密具電

奏跪請

聖安並陳邊防嚴備情形請由軍機大臣代

奏等因緣科布多並不通電即派妥弁馳赴新疆省城交該官電局總辦委員即爲電寄西
安

行在軍機處嗣據該局員覆稟遵於十月初九日敬謹發寄計當早呈

御覽至九月十七日

寄諭已於十月二十三日奉到裁留蒙兵事宜謹即恪遵

諭旨辦理刻已辦有眉目容即詳悉繕摺

奏陳合先附片聲明伏祈

聖鑒謹

奏

硃批知道了

奏事暫用夾板片

再臣等七月初六日八月初七日兩次拜發摺件均用報匣交由台站馳遞現已先後奉到諭旨其報匣未蒙遞回查臣衙門雖尙存有報匣兩分而前請

御押尙未奉到無從封發此後凡有應奏摺件自可暫用夾板鈐用印花封遞一俟事局大定再請頒發

御押報匣以規舊制理合附片陳明伏祈

聖鑒謹

奏

硃批知道了

更正官兵治裝銀兩仍由房租項下動支片

再查科布多每於派委員弁兵丁出外差遣均經放給治裝銀兩每官九兩六錢每兵六兩四錢向於房租項下動支曾經

奏明在案 臣等前瀝陳邊餉難籌摺內將每年出入欸目開單呈

覽因統核一年實在放項致將此項治裝銀兩一併列入雖云核實究與奏案不符應將此項更正仍照舊章動用房租另欸造報爲此附片具陳伏祈

聖鑒敕部查照謹

奏

硃批該部知道

附生崔象侯咨部留營仍應 奏明片

再科布多地屬邊陲人才罕到而整頓公事籌備邊防亦復均需指臂 臣瑞洵正月

陛辭曾蒙

訓示可以調員到任以來體察情形誠如

聖諭必須有人差委惟現值軍務未竣內地道梗調員誠恐未必能來且苟非其人眞能作事相知有素 臣亦不敢濫舉茲查 臣由京起身時曾約直隸昌黎縣附生崔象侯同來任所幫理文案要件前已隨抵科布多 臣詳加察看復量派差使以資考驗前者哈札沁賑撫事宜即委該附生往辦竟能一塵不染使

朝廷實惠及於窮蒙委緣該附生甫離學舍未沾官場習氣故也查該附生讀書本色操行篤實加以歷練可資任使臣前已將其咨明吏部留營差委現在參贊衙門文案處當差並委籌防處辦事該附生尙無官階本可不必具

奏惟事關留營仍應據實陳明伏祈

聖鑒懇

恩俯准謹

奏

硃批知道了

恭祝 萬壽並陳俄兵現在撤回電請代奏摺

陝西省軍機大臣鈞鑒側聞

聖駕巡幸西安不勝敬系祈代恭祝

皇太后萬壽天喜跪請

聖安邊防嚴備亦未開釁前奏卡倫添來俄兵現已撤回瑞洵受

恩深重自當力任艱難保固疆圉請寬

慈廕伏祈代奏科布多參贊大臣瑞洵九月三十日電

遵 旨裁撤蒙兵所欠商款兵餉懇 敕部墊發摺

奏爲遵

旨裁撤蒙兵具報用過薪費津貼等項經費不敷仍借商款墊給並欠發兵餉數目籲懇
天恩敕由戶部先行墊發銀十數萬兩即由山西河南兩省舊欠科布多經費項下提還歸
款以資清理而恤邊艱暨蒙

恩敕部撥給銀一萬兩謹擬樽節支用專供要需俾重帑項恭摺覆陳仰祈

聖鑒事竊本年十月二十三日承准軍機大臣字寄光緒二十六年九月十七日奉

上諭瑞洵等奏邊餉難籌酌擬裁撤團兵開單呈覽各摺片現在餉需萬緊所有原練蒙團
六千著全行裁撤護城護卡兵二千著裁撤一千五百名暫留五百名即著認真挑選分防
各處查閱單開出入各款所稱餉項支絀尙屬實在情形著戶部於邊防經費項下撥給銀
一萬兩交瑞洵等核實支用不得稍涉鋪張虛糜帑項爲要將此由五百里各諭令知之欽
此遵

旨寄信前來仰見

聖主體恤邊艱

明見萬里跪讀之下欽感曷任查臣等前因軍務較鬆餉需無著酌擬將原練蒙團暨護城護卡各兵八千名裁撤一半先將大概擬辦情形於閏八月二十一日附片

奏明拜摺後當即悉心斟酌分札各旗遵照並將留防四千名駐紮處所管帶銜名詳慎酌定正在繕摺具陳間適欽奉

寄諭前因

垂示機宜至明且切臣等頓覺有所遵循應即遵

旨辦理查該蒙古官兵月需薪費津貼各項自八月起至九月止尙均賴有借挪之款按月核發惟十月分實因籌措爲難尙在懸欠刻雖蒙

恩撥給萬金但此款係當餉項萬艱時

特予勻撥臣等自當核實支用不敢輕易挪動致負

聖慈且派員赴領解到亦復需時臣等再四籌商該蒙古官兵欠領十月分餉項只好許俟將來有款再行補發但使不至脫空無妨稍稽時日現已據委員分赴各旗商量覆稟該官兵等尙肯遵從幸無間言刻已將

敕裁團兵護城護卡兵復共裁去三千五百名均截至十月底止算清口糧一律裁撤仍遵旨暫留五百名分防各處已於另片附陳此遵裁蒙兵辦理情形也查原練蒙兵八千名應需津貼銀數暨帶隊官弁薪公口分均係查照光緒六年戶部會同神機營奏定章程開支計初辦一月薪餉一萬九千兩並各旗添補馬匹器械經費每旗酌發五百兩計三十旗發過一萬五千兩共用銀三萬四千兩又守城護卡兵二千月需津貼銀八千兩官弁薪費銀五百兩統共一月用銀四萬二千五百兩又添設籌防處暨加派弁兵前往卡倫八處偵探分駐東七台南八台督催轉遞新疆各處及本城軍務摺奏文報以及一切有關防務雜支各款每月支銀五百餘兩計除初辦一月用銀四萬三千餘兩外次月即減用銀二萬八千餘兩旋經臣等附奏請將蒙兵酌裁茲奉

諭旨敕將原練團兵全行裁撤護城護卡兵裁去一千五百名所欠該蒙古官兵十月月薪費津貼各項應俟請款解到再爲找發統計此次辦理邊防挑練蒙兵據籌防處會同糧餉處核算清楚共實用銀九萬五千八百六十兩零除奏明動支庫存平餘各項銀二萬兩續又動支舊經費銀一萬二千三百餘兩外餘皆陸續借貸商款支給計先已奏明借過商款銀三萬四千兩後又借用商款銀一萬六千兩至十月分應給該官兵薪費津貼各項一萬

三千五百餘兩則不能再借竟致欠發矣查所欠商欸均係西商暨京莊分認挪湊經已發給印據許俟餉到即還萬難久爲延欠以致失信商民其欠發官兵餉項亦是暫時支吾終須設法籌給好在爲數不過十萬尙不爲多即以山西一省言之截至光緒十三年舊欠烏里雅蘇台科布多經費已積至三十萬兩係經前撫奏請停解奉

旨行令體察情形設法籌撥之欸旋據該前撫剛毅酌定自光緒十四年起按年撥還科布多銀二千五百兩計須六十餘年始可解清從來無此辦法實屬意存膜視而台費軍餉該省尙欠銀三萬四千兩河南省亦欠台費軍餉銀五萬七千兩統計三項已在二十萬兩以外若使各該省顧全大局源源接濟雖邊荒枯窘尙不至如此爲難現值時事孔艱庫儲奇絀可以想見此項借墊商欸欠發兵餉自可仍由山西河南兩省提撥欠餉庶事理順而籌措非難出納之權操之該省恐將有所藉口不肯竭力勻撥仍是有名無實臣等悉心商酌惟有暫請由戶部墊撥銀十數萬兩先應科布多之急仍請

旨敕部即由山西河南兩省分別舊欠多寡令迅籌借還部庫如此一轉移間不過暫時挪墊於度支毫無所損而科布多即可藉資周轉不至貽累商蒙似屬情理兼盡便宜可行合無仰懇

天恩俯念辦防有效用帑無浮借貸欠發各欸爲數不多

特准所請

敕下戶部暫行墊撥銀十數萬兩即由山西河南兩省舊欠科布多經費項下酌量提還部庫俾資清理而恤邊艱出自

逾格鴻慈如蒙

俞允並請

敕下戶部迅速咨照臣等以便派員請領趕解回營濟用實深感幸所有遵

旨裁撤蒙兵具報用過薪費津貼等項數目暨經費不敷仍借商欸墊給並欠發兵餉懇恩敕部墊撥各緣由理合繕摺馳陳伏祈

皇太后

皇上聖鑒訓示施行謹

奏 光緒二十七年二月初五日遞回奉

硃批戶部議奏

挑留蒙兵五百名分防各處片

再遵

旨挑選蒙兵五百名已經認真遴拔保留杜爾伯特三百名擬以二百名駐紮烏闌古木委左翼正盟長札薩克固山貝子察克都爾札布管帶以一百名調駐科布多城爲巡徼之用稍壯聲威委副將軍達賚汗噶勒章那木濟勒分帶又留烏梁海兩翼二百名駐紮布倫托海委左翼散秩大臣額爾克舒諾分帶馬匹器械均尙強壯整齊飭令該汗王大臣等認真防守邊界彈壓地方惟現值嚴冬風雪凜烈應每兵賞給皮衣一件以資禦寒第查市價羊皮祆一件總需銀六兩零按照辦過成案未免浮多而非此數又不能購現在餉需支絀當由臣等斟酌每兵擬即賞銀二兩令其自行製買庶於恤兵之中仍寓節帑之意動支銀兩應請歸於防案作正開銷爲此附片具陳伏祈

聖鑒敕部查照謹

奏

硃批該部知道

預籌留兵餉項片

再挑留蒙兵五百名分防處所已於另片陳明查此項官兵月需薪費津貼各項按照光緒

六年駐練蒙兵成案樽節核計一月所需已在二千兩以外一年額餉至少須有二萬五千兩方足以供支放現雖蒙

恩敕撥銀一萬兩即使全充兵餉亦不過將敷五月之需仍應預爲籌計以免臨渴掘井查臣等前奏嚴參革員麟鎬請追贓欸除應交之四千兩擬請撥作修倉之用業蒙恩旨允准其續請追繳之八千餘兩奉

硃批該衙門知道單併發欽此臣等再三商酌若能將此前後兩欸銀一萬二千餘兩全數追出似於科布多不無小補且以該革員在科布多所婪之財仍令還諸科布多亦屬名正言順並非臣等辦事過於刻核也第恐該革員近在京師挾其多金或將大施手眼賄通官吏並不認真勒追必又成紙上談兵之公事可否再懇

天恩特降

嚴旨敕令鑲藍旗蒙古都統衙門嚴行追繳俾濟急需出自

鴻慈謹附片再陳伏祈

聖鑒謹

奏

硃批該衙門知道

欽奉 寄諭瀝陳感悚下悃摺

奏爲欽奉

寄諭瀝陳感悚下悃恭摺仰祈

聖鑒事竊於本年十一月二十二日承准軍機大臣字寄光緒二十六年十月十二日奉

上諭瑞洵等八月初七日所發摺片單共十二件於閏八月初三日奏到當將辦理蒙團一

事寄諭該參贊等遵照其摺件均經批諭於初四日由太原發驛遞回軍機處辦理事件從

無積壓之弊該參贊甫於接奉寄諭之後不加詳察輒疑遞到摺片一概壓擱實屬不知大

體以上各摺片究竟曾否收到著即具明所奏至具稱地方公事暫緩具奏等語該參贊等

身膺邊寄於應奏事件自應照常辦理豈能概不具奏所請尤屬非是著傳旨申飭仍懷遵

前旨隨時穩慎辦理毋再誤會爲要將此諭令知之欽此遵

旨寄信前來跪誦再三感激零涕查臣等於八月初七日具奏摺片各件已於九月十七日

奉到

硃批業於九月二十四日附片陳明臣瑞洵並自請議處計當早蒙

宸鑒伏思臣等前因欽奉

寄諭未曾奉到

批回摺件當日時艱忘其迂謬一時誤會以爲

行在政務殷繁

宵旰憂勞或係軍機大臣於各處尋常奏事摺件暫請停辦又因臣瑞洵自八月間聞警以來驚憂成疾並聞

聖駕播遷焦灼萬分五中焚擣終日徬徨不知所措彼時忽明忽昧言動恆至顛倒錯誤故於瀝陳下情摺片竟至措辭失當直至十月初間臣瑞洵心中方漸明白始悟前言冒昧不但上負

聖主亦無以對軍機大臣愧悔萬分茲奉

訓示各節乃荷

逾格體諒不加嚴譴並蒙

傳旨申飭備荷

聖恩寬大

特予優容且於

訓敕之中仍示

保全之意臣等具有天良伏讀

訓辭能不知感知奮益圖報稱於萬一謹當於地方應辦事宜恪遵節次

諭旨認真整頓穩慎辦理期慰

聖廑至口外地方事雜言厯凡有措施尤貴體察情形不動聲色隨宜籌布公事雖應整飭而舊章若無窒礙實亦不宜輕事紛更致涉煩擾

聖諭一再申儆洵已

明見萬里之外臣等更覺欽服無量此後辦事自應奉爲規戒總須按部就班務求實際仍時存綏靖邊圉保愛蒙民之心弊則去其太甚事必求其可行不敢粉飾鋪張貽誤邊要以冀無負

聖慈諄諄誥誥之至意謹將欽奉

寄諭感悚下悃繕摺覆陳伏祈

皇太后

皇上聖鑒

訓示謹

奏 光緒二十七年二月初五日遞回奉

硃批知道了

科布多部院額缺章京筆帖式請 予例保摺

奏爲科布多部院額設章京筆帖式等員差使勞苦籲懇

天恩俯准援案按照邊省軍營勞績一律擇尤保獎並定年限員數以杜冒濫俾勵羣才而裨邊務恭摺仰祈

聖鑒事竊前因科布多滿綠兩營官弁兵丁戍防年滿出力擇尤請保擬將滿營三年班滿候補筆帖式委署筆帖式委驍騎校等請以本城驍騎校補用綠營五年班滿官弁酌保升階加銜等項其兵丁等酌給六七品頂戴功牌等因經前參贊大臣沙克都林札布等奏奉兵部議准遵辦嗣復經該大臣以科布多三部院額缺章京筆帖式等遠戍寒邊十餘年之久始能遞升章京差使艱苦升途壅滯承辦公事倍著勤勞其候補官弁已奉准保該章京等實缺人員轉不能仰邀獎敘未免向隅奏懇

天恩請照尋常勞績酌保

敕部議奏旋經兵部議覆以該大臣前既請規舊制今復列保覈與原奏不符奏駁咨行復在案臣等查科布多近年員少務殷迥與從前人浮於事不同糧餉處綜覈錢糧印務處司理文案已屬紛繁而尤以蒙古事務處承辦章京職事爲最劇要所管蒙古各旗並台站卡倫之外更有哈薩克部衆其與俄屬哈薩克常有交涉控案膠葛難理故非熟悉情形者不能勝任至額缺筆帖式等在候補時差使尙輕迨經補缺即有辦事責成其差使亦增益矣故前大臣洞悉此情只以前請酌保滿綠兩營班滿官弁摺內未同列請又未將規復舊制緣由詳細聲明在部臣考覈從嚴自不能不行議駁實則該大臣所稱辦理規制事宜係指從前辦理軍務並籌防剿調兵撥餉添用文武員弁各事皆係照軍需辦法至光緒十二年間裁兵節餉清理銷案一切便照舊章辦理而言臣等詳閱舊牘知其所謂規制者如此並非指額缺章京等向無保獎而言也且查烏里雅蘇台科布多兩城早年滿綠兩營換防初無保獎之章烏城請保始於前將軍杜嘎爾科布多前大臣沙克都林札布踵而行之皆得被蒙

渥恩即部臣持議亦頗鑒及邊遠浩寒意存寬大不但該官弁等感激報效即臣等忝膺邊

寄亦無非仰藉

朝廷德意得以鼓勵人才誠以用人之道全在信賞必罰嚴其責備即不得不厚其體恤也
臣瑞洵到任半年有餘隨時體察與臣祿祥力籌整頓期副

委任尙未大滋實越者實亦甚賴該部院章京筆帖式等勸勤之力所尤難者臣瑞洵下車
之始適奉中外開衅籌布邊防之

諭維時人心浮動勢將瓦解兵單餉闕備禦全無蒙古離其游牧商賈停其貿遷土匪莠民
又多乘機蠢動戰守兩無所恃當經臣等一面妥籌布置挑練蒙兵以助士卒之氣一面諄
切曉諭以安商蒙之心復深恐各和碩或於俄商頓生侮虐致滋弊端又經臣等不避嫌怨
出示加札嚴飭照常保護內謀防守外示霸糜並奏設籌防處飭將蒙團練兵督促辦齊分
派駐紮嚴密防維衆心遂克大定該章京等隨同籌辦寢處不遑或稽查保甲或整飭台站
或分赴蒙旗督催清野簡校團兵或隨辦城防管帶營弁撈捕賊匪口外天氣早寒奔奏馳
驅飲冰履雪未敢稍耽安逸即有一事之誤一念之差臣瑞洵必即加以責斥不少寬假該
章京等尙能見諒愚誠無復怨望尤臣等所不安於心者也覆查辦理邊防省分本有保案
第值大局如此若非他處辦有成案臣等亦不敢冒昧瀆請爲天下先惟臣等平心商酌該

章京等實屬多年出力例保似不可無且與滿緣兩營候補官并准獎之案比較亦未免稍欠公允並查糧餉處承辦章京與蒙古處承辦章京本皆京缺現糧餉章京尙由京

簡三年期滿例得奏保班階花樣蒙古處章京舊例原與糧餉章京一樣因近年多由綏遠城換防人員揀補並未聲請保獎以致遺漏伏思臣等世受

國恩身膺重任不避艱險分所應爲至該員等職分尙微竟能趨事赴功不辭勞瘁若不量加鼓勵實無以酬勤勞而勸來者况年來科布多事艱餉絀每屆換防綏遠城兵丁多不肯來若不懸獎以招恐再過數年將至無人應調合無仰懇

天恩逾格將科布多部院章京筆帖式等

恩沛鴻施俯准援案保獎以昭激勸實於安邊勵材不無裨益如蒙

俞允應俟該員五年期滿如願就武回城後仍照原保以防禦補用先換頂戴其該員應找支銀糧俟奉

旨之日照例開支報部遇有差便行給資該員赴部帶領引

見至遞遺候補筆帖式一缺應由臣等揀員充補照例咨部所有揀員充補添設筆帖式員缺緣由理合繕摺具陳伏祈

皇太后

皇上聖鑒訓示謹

奏

硃批著照所請該部知道

散木居奏稿卷之四

門人鈴木吉武校字

散木居奏稿卷之五

幹難 瑞洵

籌筆集 光緒庚子十二月

敬捐款項建修廟宇豫祝 萬壽摺

邊城需餉萬緊懇 敕催山西仍舊籌撥摺

請 敕整頓台站摺

整頓商人貿易驗票章程摺

請撤銷筆帖式春普保案片

查驗官廠片

採買耕牛請免照例價片

設立籌邊文案處片

請將代放烏里雅蘇台台站卡倫餉項 敕由該城自行籌放摺 附清單

請將見辦撫局 敕由軍機處知會片

敬捐款項建修廟宇豫祝 萬壽摺

奏爲敬捐欸項建修廟宇豫祝

萬壽謹擬全工告成籲懇

天恩賞賜廟名藉抒臣悃而順羣情恭摺仰祈

聖鑒事竊查科布多爲西北巖鎮而制度簡略城垣衙署僅具規模除衆安寺係乾隆年間
敕建此外別無大昭其列在典禮者亦多闕如

萬壽宮並未興修尤不足以隆體制臣瑞洵詳加訪察城南門外舊有廟基該處山水朝拱
地勢宏敞實擅形勝當與臣祿祥熟商伏念臣等渥受

厚恩毫無報稱今值時局孔棘

鑾駕西巡臣等未能從事櫜鞬馳驅效力揆之臣職竊有未安謹擬於此建修廟宇鳩工庀
材不日經營宏規大啓將來招集刺麻恭誦

皇經豫祝

皇太后七旬萬壽以爲祝

釐祈

福之所即恭逢

萬壽聖節及元旦長至令節臣等並可率領蒙古王公等在此行禮稍抒臣子愛敬之誠藉慰蕃夷觀瞻之願實屬吉祥美事惟科布多近年籌款維艱必須臣等首先提倡已由臣瑞洵先捐廉銀二千兩臣祿祥捐廉銀四百兩作爲報效以資表率滿綠兩營官弁各有捐貲蒙古各旗及商民等亦多樂輸現已可期集腋查此工從本年七月間諏吉開工至九月底暫行停止工程已得大半明年冬間約可報竣其廟中應購經卷各件及香燈供品茶麪銀兩應由臣等隨時籌辦此不過臣等區區懇款效壤流之助展嵩祝之忱且係捐貲報效不請官款即督修各員亦係分所應爲擬請將來工竣當將蒙古各旗滿綠兩營及商民等捐貲數目統繕清單祇呈

御覽不敢稍涉鋪張辦報銷請議叙惟臣等私衷籲請祇俟全工告成仰懇

天恩准照科布多阿爾泰山承化寺成案

寵錫嘉名感戴

慈施永無涯量爲此恭摺敬陳伏祈

皇太后

皇上聖鑒訓示不勝榮幸欽企之至謹

奏 光緒二十六年十二月初五日拜發

二十七年二月二十四日遞回奉

硃批知道了 正月初三日此用賀摺寫

邊城需餉萬緊懇 敕催山西仍舊籌撥摺

奏爲邊城需餉萬緊協解難期籲懇

天恩敕催山西巡撫仍舊迅予籌撥以支危局而防患萌繕摺馳陳仰祈

聖鑒事竊科布多歲需經費全仗山西協撥前於瀝陳邊餉難籌摺內業將出入欸項繕單

祇呈

御覽支絀情狀早在

聖慈洞鑒之中無須再爲瀆

奏惟查本年該省應協經費前一半銀二萬四千九百兩零業經解到其後一半銀二萬四千九百兩零據領餉催餉員弁先後飛稟據稱毫無撥解之信恐不可靠等語臣等日前又接烏里雅蘇台軍幕函告山西省有將應解京協各餉暫行停解之說不知科布多經費是否並在

奏停之數第思臣等所管滿綠兩營官弁兵丁以及蒙古台站卡倫暨屯田要需並一切例支之項向賴經費解到按時開放刻下時日已逾無項支發該官兵等計口授食嗷嗷待哺不啻嬰兒失乳危迫萬分且台站係屬邊郵卡倫緊鄰外界無一不關緊要茲若以有著之款竟致變爲無著當茲邊防喫緊餉需匱乏士卒飢潰實在意中況科布多久爲著名奇冷之區現當嚴冬凜烈該滿蒙漢各弁兵等冒風履雪不懈操防日覩情形艱辛亦復可閔並且科布多偏近彼疆目下和局尙無成議俄卡毘連時虞窺伺消息易通儻此窘迫瘠苦不能自守之情一經宣播非特易滋邊患益將招侮強鄰臣等忝膺闔寄值此時艱焦灼萬分無以爲計兼之本年兵禍蔓延市廛減色貨畜滯銷商賈亦極空乏無能多爲通挪現臣等悉心商酌只好擇其最要最苦者如屯田差操弁兵官弁應支鹽菜仍當設法籌放一半已擬再行借墊爲數萬不能多不過三數千兩之譜稍資津貼其餘台卡要需之類實皆力有未逮矣萬不得已惟有仰懇

天恩速降

諭旨敕催山西巡撫轉飭藩司仍將科布多應得本年後一半經費迅速籌撥以資接濟實感

鴻慈逾格至山西本年苦旱徭役繁興拮据本係實情臣等亦知諒及但科布多窮邊苦寒餉數原屬有限早成枯窘局面且出入欸項又皆鍼孔相符毫無贖餘若欲另辦一事即苦無資擴充本非經久之道然若並此不給則萬里邊疆滿城兵卒將有坐困之虞臣等現在通盤籌畫撙節估計年例額支究竟應有餉項若干方足敷衍籌備邊務要端尙須另請欸項若干始能舉辦俟得實在確數當再具摺馳陳籲求

高厚總之欲將地方應辦事宜擇要舉行斷非財力不辦至目前科布多需餉萬緊事關大局恐以停緩貽誤自應叩求

敕由山西仍舊籌撥暫顧燃眉之急所有懇請

敕催經費各緣由謹由驛五百里馳陳伏祈

皇太后

皇上聖鑒

訓示施行謹

奏 光緒二十六年十二月十九日拜發

二十七年正月十六日奉

硃批戶部速議具奏 二月二十九日遞回

請 敕整頓台站摺

奏爲蒙古台站漸形懈弛亟應趕緊整頓以重郵傳免誤事機繕摺具陳仰祈

聖鑒事竊查口外設立蒙古台站專爲接遞烏里雅蘇台科布多庫倫各城往來摺報公文暨轉運軍火餉項各差至摺報尤當迅速馳遞不容刻延庶不失當初設台本意乃今年自外人開衅以來管台蒙員怠惰因循毫無經理致台務漸就懈弛查從前科布多拜發摺件無論冬夏由京遞回不過二十餘日接遞尙爲迅速近則每每遲逾即如臣等昨於九月十一日拜發

奏事摺件係

行在軍機處於十月十二日交由陝西巡撫衙門加封發驛遞回是月二十二日即到直隸萬全縣驛而遲至十一月二十二日臣等始行接到查自陝西省城至張家口二千餘里十日即能遞到然覈與軍機處批明五百里字樣已屬遲延乃張家口至科布多係四千九百餘里竟至行走三十日稽覈里數日期是蒙古台站耽誤無疑惟查科布多遠在極邊與俄接壤自內地辦理軍務邊防戒嚴聲氣又復隔闕一切籌畫布置多須請

旨遵行全賴各台迅遞刻下撫局尚未告成設有

特旨敕交緊要事件若任各台耽延必致貽誤邊事揆時度勢不能不酌加整頓總期早奉
綸音早得一日遵守除科布多屬各台應由臣等嚴飭整頓外相應請

旨敕下烏里雅蘇台將軍大臣察哈爾都統即將所屬各台認真整頓或稍加津貼或量許
獎勵務使摺報公文隨到隨遞毋得積壓如果稍有耽閣即行從嚴懲辦似此稍加振作或
不致貽誤事機臣等爲慎重郵傳起見是否有當謹繕摺具陳伏祈

皇太后

皇上聖鑒

訓示謹

奏 光緒二十六年十二月十九日拜發

二十七年二月二十九日遞回奉

硃批著兵部迅飭該管將軍都統認真整頓以重郵政 正月十七日

整頓商人貿易驗票章程摺

奏爲整頓商民貿易驗票章程以申邊禁而杜弊端繕摺具陳仰祈

聖鑒事竊查理藩院則例開商人出外貿易由察哈爾都統綏遠城將軍多倫諾爾同知衙門領取部票該衙門給發部票時將該商姓名及貨物數目所往地方起程日期另繕清單黏貼票尾鈐印發給一面知照所往地方大臣不准聽其指稱未及領取部票由別衙門領用路引爲憑違者查出照無部票例治罪其商人部票著該地方大臣查驗存案務於一年內勒限催回免其在外逗留生事等語查科布多近年以來貿易商人凡請領部票前來者雖經該管衙門照例開列該商姓名領票若干貨數若干黏單票尾知照臣等衙門存案備查惟領票前來貿易各商多有不入科布多城呈驗部票竟自匿票潛往所屬各和碩貿易即間有前來驗票者亦僅爲坐商其行商迄無一人呈驗漫無稽覈任其越界漁利盤剝蒙古殊屬不合自非重申例禁設法釐整不可正在核辦間適准綏遠城將軍永德咨開據本處商民稟因現在京路不通無從請領部票商民以出藩貿易爲生請以上年餘剩部票鈐蓋將軍印信發給出藩貿易暫行權變辦理自係實情應即照准擬將本處餘剩部票鈐蓋印信發給後有不敷暫由本處發給將軍印票飭交該商持往貿易隨回隨繳等因咨請查照前來查該將軍變通辦法雖爲恤商起見惟於該商匿票繞越諸弊尙未議及臣等忝膺邊寄期於地方有益自應先將積弊剔除所謂去其害馬也若僅申明定例不過出示曉諭

仍屬具文臣等悉心參酌擬請嗣後凡有請領部票前來科布多貿易商人呈請查驗即由參贊衙門於該票加蓋印花再行發交該商承領以備回繳稽查庶足以遏私販之來源杜一切之弊竇即與例意亦屬符合如蒙

俞允應請

旨敕下綏遠城將軍轉飭所屬即行曉示該商遵照嗣後凡來科布多貿易務於到時遵例將票先行呈驗以便由參贊衙門加蓋印花以嚴稽覈如仍前私行貿易定當照例辦理枷筈遞籍貨物一半入官其該商回繳部票時如無科布多參贊衙門印花即係隱漏應將該商量加懲辦以儆巧偽臣等爲申邊禁杜弊端起見是否有當謹繕摺具陳伏祈

皇太后

皇上聖鑒訓示再現既據綏遠城將軍咨會變通辦法自可暫行照辦仍由臣等咨行該將軍轉飭該商於所發之票呈驗時仍需加蓋科布多參贊衙門印花以免兩歧合併聲明謹奏 光緒二十六年十二月十九日拜發

二十七年二月二十九日遞回奉

硃批該衙門議奏 正月十七日

請撤銷筆帖式春普保案片

再查補驍騎校後以防禦即補先換頂戴糧餉處筆帖式春普從前差使尙勤自補缺後志氣頗懈嗜酒廢公且於言動亦多放縱現當整頓之際未便稍事姑息致滋效尤相應請旨將該筆帖式春普前請年滿回城補驍騎校後以防禦即補先換頂戴保案即予撤銷仍留營效力以觀後效爲此附片

奏參伏祈

聖鑒訓示謹

奏 光緒二十六年十二月十九日拜發

二十七年二月二十九日遞回奉

硃批著照所請該部知道 正月十七日

查驗官廠片

再查科布多官廠牧放牛馬駝隻三項牲畜前遵部議整頓馬政章程飭令該管員弁認真經理秋季派員稽查年底奏報一次節經循辦在案本年八月間業經派員查驗該廠舊存馬一百十三匹新收由烏里雅蘇台解到馬二百匹共馬三百十三匹舊存駝七百七

十四隻牛隻無存除動用並例倒外實尙存馬二百五十八匹駝六百七十七隻尙無缺額情弊逐一烙印仍飭該管協理台吉等妥爲牧放以備應用現屆年底理合

奏報伏祈

聖鑒謹

奏 光緒二十六年十二月十九日拜發

二十七年二月二十九日遞回奉

硃批兵部知道 正月十七日

採買耕牛請免照例價片

再屯田應用耕牛按現在市價至省需銀十二兩而例定價止四兩實屬採辦維艱查從前各任皆按十二兩開銷屢經戶部斥駁自是無敢再言牛事者故前大臣寶昌任此三年從無奏咨添買耕牛之案實則恐誤屯田光緒二十四年間確係照市價購買五十二隻該價已於糧餉處墊給仍亦未敢報部現在十屯牛隻不敷耕作必須再添百隻據總管十屯事務換防參將祥祐稟請核辦前來臣等查屯田關係軍食多資牛力必須足數係屬實在情形自應准其添購惟若必以例價相繩不但無人敢于承辦即使責該參將以賠墊似亦非

政體所宜更恐別滋弊端且臣等稔知巡撫袁世凱等所統武衛軍購買戰馬皆蒙
特恩免照例價實用實銷況此邊城瘠苦之區更非內地軍營可比早在

聖慈體恤之中合無仰懇

天恩准將科布多採買耕牛按照市價據實開報並將寶昌任內墊款一併作正開銷庶從
此購辦既易管屯員弁無所畏難耕穫更期得力但使每年糧石溢收則利益自在其中矣
臣等愚見未知是否謹附片上陳伏祈

聖鑒再十屯牛隻節年例倒之數總未造報已飭該參將詳加覈算稟明咨部辦理合併聲
明謹

奏 光緒二十六年十二月十九日拜發

二十七年二月二十九日遞回奉

硃批戶部議奏正月十七日

設立籌邊文案處片

再現因辦公事須防漏洩已於臣瑞洵署內設立籌邊文案處遴委妥實人員經理凡遇
重大事件文牘均由臣隨時核示擬辦期昭慎密至例行公事仍由各該衙門照舊辦理相

應附片陳明伏祈

聖鑒謹

奏 光緒二十六年十二月十九日拜發

二十七年二月二十九日遞回奉

硃批知道了正月十七日

請將代放烏里雅蘇台台站卡倫餉項 敕由該城自行籌放摺

奏爲經費不繼支款暫停所有代放烏里雅蘇台所管台站卡倫蒙古官兵餉銀委屬力難兼顧瀝陳實在情形籲懇

天恩俯准敕由該管將軍自行籌辦冀免貽誤而紓餉力恭摺仰祈

聖鑒事竊查烏里雅蘇台所管索果克等十六卡倫台吉兵丁暨布古圖等七台台吉兵丁每年應支銀糧及卡倫春夏二季糧折煙茶等項向由科布多代放於倉庫項下動支節經循辦在案惟現在科布多庫儲虛竭本年山西應解後一半經費又未能按期報撥滿綠兩營官弁兵丁嗷嗷待哺窮困不堪言狀屯田台卡要需及一切例支悉皆無項可指商鋪挪墊已窮且前欠未還亦難多借艱窘情形臣等仰屋空嗟實苦點金乏術昨於十二月十九

日業經拜摺具陳查此項烏里雅蘇台所管卡倫台站應支銀糧原應歸該城自行覈辦乃前將軍等當日定議考覈權衡仍歸烏里雅蘇台主持銀糧支放則委科布多辦理意在自節餉項並未統籌全局本不得事理之平殊欠公允然同爲

國家地方公事又何畛域之分如果科布多庫款充盈臣等亦絕不存推諉無如刻下局面已實自顧不暇萬無餘力他及且台站係屬邊郵卡倫多連俄界在在喫重又深恐以餉需頓乏或致疎虞轉眼來春即屆請領之期臣等竟不知如何支應興言及此焦灼萬分再四籌維該台卡應支糧石及茶煙各項尙可由臣等設法照舊籌放然山西省應協甄茶亦迄未能辦解即此已形喫力至所需餉項爲數一萬三千餘兩實係無從籌措謹將代放該台站卡倫蒙古官兵銀糧各項數目敬繕清單祇呈

御覽合無仰懇

天恩俯念科布多經費不繼窮迫萬艱

准將代放烏里雅蘇台所管台卡餉銀等項暫歸該城自行籌放以免貽誤而紓餉力出自鴻慈逾格如仍應由科布多代放則此項關係緊要萬難停緩惟求

特敕戶部迅即撥給銀兩以濟急需伏候

聖裁值此時艱苟非勢到萬難臣等亦不敢冒昧瀆奏不勝憂慮迫切待命之至爲此繕摺據實馳陳伏祈

皇太后

皇上聖鑒訓示遵行謹

奏 光緒二十六年十二月二十九日拜發

二十七年正月二十七日奉

硃批戶部議奏單併發欽此接軍機處五月十八日知會

謹將每年代放烏里雅蘇台所管卡倫蒙古官兵銀糧茶煙暨台站蒙古官兵銀糧數目敬繕清單祇呈

御覽

計開

索果克卡倫圖薩拉克齊一員台吉一員兵五十名

噶魯圖卡倫台吉一員兵四十名

哈克淖爾卡倫台吉一員兵四十名

達爾沁圖卡倫台吉一員兵四十名

烏魯圖淖爾卡倫圖薩拉克齊一員台吉一員兵三十名

罕達蓋圖卡倫圖薩拉克齊一員台吉一員兵三十名

哈韜烏里雅蘇台卡倫台吉一員兵三十名

鄂勒克鄂博卡倫台吉一員兵三十名

奇格爾素特依卡倫台吉一員兵三十名

博托果尼和壘卡倫台吉一員兵三十名

伯羅依奇格圖卡倫台吉一員兵三十名

鄂爾濟呼布拉克卡倫台吉一員兵三十名

奇奇爾噶那卡倫台吉一員兵三十名

津吉里克卡倫台吉一員兵三十名

薩木噶勒卡倫台吉一員兵三十名

額爾遜卡倫圖薩拉克齊一員台吉一員兵三十名

以上十六卡倫共設圖薩拉克齊台吉二十員兵五百三十名通共一年應放鹽菜銀一萬

一千四百六十兩

應放糧五百五十四石二斗三升二合

應放茶一千九十五塊

應放煙三千三百四十包

阿勒達勒台管台台吉一員蒙古字識一名兵十一名

博勒霍台兵十一名

呼都克烏蘭台兵十一名

依克哲斯台兵十一名

巴噶哲斯台兵十一名

珠勒庫珠台兵十一名

布古圖台水手四名兵十一名

以上七台共設台吉一員兵八十二名通共一年應放鹽菜糧折銀一千七百五十七兩八

錢六分五釐

應放糧七十四石三斗三升一合六勺

應放羊價銀七十兩

以上代放卡倫台站餉項共應需銀一萬三千二百八十七兩八錢六分

請將見辦撫局 敕由軍機處知會片

再科布多地介西北邊陲與內地聲氣不甚聯屬向來邸報均不能應期遞到自臣到任後始經函商新疆撫臣饒應祺屬飭官電局按月彙寄京報然已必須四十餘日始克接讀而於現在辦理撫局有無成議仍無由而知查科布多毘連俄界邊防關重若洋人尙可就款則防務自當較鬆倘竟要求太甚萬難允從則一切備禦仍須妥爲布置自難懈弛然西北口外兵備久虛毫無可恃與俄交涉僅仗筆舌臣到邊不及一年已經唇焦管禿其中爲難不敢瀆

奏臣愚擬刻下各國如已退兵撫議有成擬懇

聖慈敕令軍機大臣將現在情形擇要知會俾臣等有所秉承似於邊務有裨愚昧之見是
否可行伏祈

聖鑒謹

奏 光緒二十六年十二月二十九日拜發

二十七年正月二十七日奉

硃批依議欽此五月十八日軍機處知會六月二十四日接到

散木居奏稿卷之五

門人鈴木吉武校字

散木居奏

散木居奏稿卷之六

幹難 瑞洵

游刃集 光緒辛丑正月 起三月 訖

山西應協官茶遲無報解請 旨敕催摺

續調滿兵三名請由綏遠揀派片

覆陳科布多應辦事宜請 旨遵行摺

再行密陳實在下情片 未用

札哈沁振濟辦竣動用欸目開單具報懇免造銷摺

崇凌請卹片

揀補額外驍騎校摺

調取駝隻摺

具報十屯分數並官弁兵丁獎賞開單奏明摺

請加撥經費片

酌擬綠營換防全數換官減數換兵摺

散木居奏稿卷之六

游刃集

一 卷 菊 軒

請除換防積弊片

故貝子請 賞祭摺

防兵更換管帶片

敬抒管見摺

大學堂不宜開辦片

山西應協官茶遲無報解請 旨敕催摺

奏爲山西省應行採辦官茶遲無報解擬懇

天恩敕催該省照章協濟以顧要需繕摺具陳仰祈

聖鑒事竊查科布多蒙蕃錯處賞賚多用甄茶每屆五年循案咨行山西巡撫飭屬採辦一次即由該省動欸造銷辦理有年查前大臣寶昌等因採辦屆期業於光緒二十五年三月間

奏奉

批旨當經咨行山西巡撫飭屬照章採辦甄茶八千塊趕即運儲歸綏道庫並經該前大臣等派員前往領取迄今將及二年並無協解消息而本城應放衆安廟及屯田卡倫各項蒙

兵支項並綠營賞需每歲所用甄茶總在三千餘塊按季發放刻難容緩並查口外風俗甄茶乃蒙古性命功同五穀一經欠缺不啻斷炊又兼軍興以來庫款萬分支絀科布多常年經費業經山西巡撫錫良奏請暫行停解本城去年後一半經費即已逾期未撥應放各項現皆無法籌措窮邊缺餉情形已屬可危儻使此項官茶再延時日或亦一律停辦則各處蒙古官兵無茶可放益不聊生科布多又無從籌欸自購惟有仰懇天恩俯念邊域瘠苦需茶孔殷請

旨敕下山西巡撫趕緊飭屬採辦甄茶八千塊迅即運至歸綏道庫以便本處委員領取速解來營以濟要需而支危局 臣等爲體恤蒙艱保全地方起見所有山西省應行採辦官茶遲無報解擬請仍由該省照章協濟緣由是否有當謹繕摺馳陳伏祈

皇太后

皇上聖鑒訓示謹

奏 光緒二十七年正月十五日拜發

本年三月二十一日遞回奉

硃批著岑春煊飭屬趕緊採辦報解欽此 二月十三日

續調滿兵三名請由綏遠揀派片

再科布多滿營換防官兵每屆三年由綏遠城更換一次節經循辦在案查此項官兵前因升補章京筆帖式暨請假咨回等項遣出缺額八名因值籌布邊防需人急切經臣等於光緒二十六年八月初七日專摺

奏請先期由綏遠城調補業經奉

旨允准欽遵在案現又出有新補筆帖式遣出三額並應

奏明調補伏查科布多額設滿營換防官兵僅止十七名之數除去先後所遺缺額十一名現在祇餘六名實屬事繁人少不敷差委且現值整頓一切相需尤殷相應請

旨敕下綏遠城將軍再行揀選明白公事通曉滿蒙文義書寫端楷之兵三名並照章另派換防帶兵驍騎校一員與前次調補之兵八名一併造具履歷清冊飭交該換防驍騎校管帶迅速由驛前來其該各兵到防三年例保應扣歸下屆另行辦理除將開除官兵旗分銜名咨行綏遠城將軍查照並咨部外所有續調防兵暨帶兵驍騎校緣由理合附片具陳伏祈

聖鑒訓示施行謹

奏 光緒二十七年正月十五日拜發

本年三月二十一日遞回奉

硃批著奎成照章派撥前往欽此 二月十三日

覆陳科布多應辦事宜請 旨遵行摺

奏爲遵查科布多應辦事宜據實覆陳請

旨遵行恭摺仰祈

聖鑒事竊 臣奉

命出鎮邊疆自維才力庸虛驟膺艱鉅夙夜戰兢深以不克勝任爲懼上年正月

陛辭之時荷蒙

懿旨以地方緊要時事艱難令將練兵墾田開鑛三端任勞任怨認真辦理其餘應辦事宜均須體察情形隨時奏明等諭嗣於上年十一月二十二日接到遞回滙陳下情之摺又奉硃批即著將地方應辦事宜認真整頓之

旨仰承

訓諭欽悚難名伏維 臣去夏六月接任即因開辟邊

旨備邊日不暇給僅將鑛務情形繕摺敬陳未遑他及近復詳加體察反復籌商確見練兵墾田二端誠爲邊防最大之政其次則畜牧亦屬要圖均宜加意經營及時興舉而目下亟應籌畫布置不容延緩者尤在索歸烏梁海借地仍還原旗並安插蒙古哈薩克一事其中緩急機宜實爲邊疆大局所係略陳梗概伏候

聖裁科布多近二十年民夷錯處良莠混淆蒙古性懦而近愚哈薩克勢衆而多悍俄之恣橫更不待言而竄匪莠民又每狡焉思逞且遇有命盜案件哈夷惟欲私結若必以法律相繩即聚衆恃強抗不遵斷蓋深窺底蘊知無兵力以制之也兼之壤接新疆本獮匪出沒之地往年綏來之變覆轍方遘更復時虞蠢動儻或倉卒有警軍隊毫無不能彈壓其患何堪設想至地方敷衍難恃自宜妥爲置防即俄人要約雖堅究應暗爲設備綜計數者縱使損之又損亦必須添練蒙漢勁旅千餘人方敷鎮撫之用勇營尤不可無此兵必須練不能不預爲陳明者也科布多屬地不乏膏腴旣欲爲邊地策治安必先爲士卒謀生聚恭讀康熙乾隆年間

諭旨屢於科布多可墾之處

申命再三邊地可耕早垂

聖訓況臣前奉

諭旨諄諄以墾田爲必辦之事尤難置爲緩圖且烏闌古木布倫托海察罕淖爾布拉罕河青格里河額爾濟斯河等處又皆有舊跡可尋徒以剏辦需費甚鉅蒙古又無力自謀墾種以致天地自然之利莫開其源現值外患頻乘我不自籌恐彼族將攘臂而爭妄思侵佔轉致難於拒絕此田必須墾亦宜預爲陳明者也口外之地畜牧爲蒙古命脈駝馬牛羊皆所必需雖舊章有調取駝牛之例哈薩克有交馬之條今時事迴殊並難規復僅此數百駝馬即支差尙有不敷何能望其蕃衍今欲整理和碩旣非富足捐輸勢不克行自不能不資購買然亦必須仿照伊犁孳生廠辦法方有利益故將軍長庚曾因試辦專疏請撥屯牧經費今已卓著成效此畜牧必須講求亦宜預爲陳明者也至所屬哈薩克自歸科布多以來統計三四千戶查奏案約二萬餘名口迄今四出爲患尙未安置妥地暫令雜居於烏梁海游牧已非舊制前曾奉

旨准其收撫即應早籌完策哈夷性多疑慮旋聚旋潰且攘竊成風漫無約束往往百十成羣聯鑣疾走殺掠人畜常啓爭端官法竟不能制苟非擇地安插徐施教養並濟恩威終慮野性難馴萬非久安之道然欲爲哈夷謀綏輯則阿爾泰山地方即未便任令塔爾巴台久

假不歸今若再任藉延不即索取哈固未爲如願蒙亦豈能甘心喧賓奪主之嫌積久必成仇隙此借地必須索還亦宜預爲陳明者也現值大亂甫定正懲前愆後力圖振作之時且科布多切接俄疆見聞較近若於應辦事宜仍事因循毫無進步不惟重貽邊患實足見笑強鄰況地方廢弛太深已有江河日下之勢成法自須維繫積習尤必埽除惟此四者事端繁要措置維艱苟非

聖明主持部臣協力臣駑鈍斷難興廢舉墜宏此遠謨謹先體察情形據實覆奏應否設法釐章妥慎擬辦之處惟有籲懇

聖慈特賜

宸斷俾有遵循祇俟欽奉

俞旨當再由臣詳悉斟酌逐漸整理縱須稍資財力亦當勉體時艱總期於

國計邊籌兼權並顧仰副

深宮圖強之意少贖臣貽誤之愆所有違查科布多應辦事宜請

旨遵行緣由是否有當謹繕摺據實覆陳伏祈

皇太后

皇上聖鑒

訓示謹

奏 光緒二十七年二月初三日拜發

光緒二十八年二月初八日遞回奉

硃批所陳各節著即妥籌經費再行次第舉辦以收實效欽此 十二月初六日

本日

貴大臣具奏摺件係二月間拜發何以遲至本月始到相應知會

貴大臣查明咨覆可也爲此知會 十二月初六日

札哈沁振濟辦竣動用款目開單具報懇免造銷摺

奏爲札哈沁台站振濟並添補駝馬辦理完竣謹將動用款項繕單具陳籲懇

天恩准免造冊報銷以歸簡易恭摺仰祈

聖鑒事竊前因札哈沁疊報被災駝馬牛羊倒斃殆甚無力支應台差請籌振濟等情前大臣寶昌未及覈辦移交前來臣等派查屬實當於光緒二十六年七月初六日具摺奏明籌款振濟並添補牲畜以保台站嗣承准軍機大臣知會奉

旨該衙門知道欽此臣等拜摺後當即揀派候補筆帖式景善附生崔象侯帶領通事官兵輕騎減從並發給該委員通事官兵等盤費前往札哈沁沿台查明辦理不准擾累並因酌恤銀兩又恐蒙古隨手妄用改撥放給羊隻較有實際計每官兵均分給乳羊七隻俾資養贍家口復經按台添給駝五隻馬十匹以供差徭計自去年七月十二日辦起至八月二十九日一律辦竣該台站官員兵丁均霑實惠無不感頌

皇仁歡聲雷動據該委員取具各台領結暨該總管等印文呈報至三項牲畜係由科布多城市採買均飭勉照例價開銷且較之光緒十年撫恤蒙哈准銷成案採買價值均有減少尙屬覈實統計振濟台站放給羊隻暨該八台買補駝馬價值並委員官兵等應支盤費實共用銀二千六百四十一兩一錢二分查此款前已奏請動支餘糧千石變價計得銀二千五百兩尙不敷銀一百四十一兩一錢二分已由糧餉處扣平項下提撥發給茲將動用欸目謹繕清單祇呈

御覽仰懇

敕部查照備案事關藩部用款無多應乞

天恩邀免造冊報銷除咨部外爲此繕摺具陳伏祈

皇太后

皇上聖鑒訓示謹

奏 光緒二十七年二月初八日拜發

本年四月十一日遞回奉

硃批著照所請戶部知道單併發欽此 三月初六日

謹將賑濟南八台札哈沁蒙古官兵採買牲畜暨委員官兵盤費動用銀兩繕具清單敬呈御覽

計開

一收由科布多倉儲提用年遠餘糧一千石按照例價變賣銀二千五百兩

一支由科布多街市購買騾駝四十隻每隻價銀三十四兩二錢共銀一千三百六十八兩

一支由科布多街市購買騾馬八十匹每匹價銀七兩五錢三分共銀六百二兩四錢

一支由科布多街市購買乳羊五百六十隻每隻價銀一兩一錢共銀六百十六兩

以上購買三項牲畜共需用價銀二千五百八十六兩四錢

一放搜吉台騾駝五隻騾馬十匹委章蓋一員兵九名每員名乳羊七隻

一放察罕佈爾噶蘇台驕駝五隻驕馬十匹委章蓋一員兵九名每員名乳羊七隻

一放達布索圖淖爾台驕駝五隻驕馬十匹委章蓋一員兵九名每員名乳羊七隻

一放那林博勒齊爾台驕駝五隻驕馬十匹委章蓋一員兵九名每員名乳羊七隻

二放依什根托羅蓋台驕駝五隻驕馬十匹委章蓋一員兵九名每員名乳羊七隻

一放札哈布拉克台驕駝五隻驕馬十匹委章蓋一員兵九名每員名乳羊七隻

一放錫博圖台驕駝五隻驕馬十匹委章蓋一員兵九名每員名乳羊七隻

一放鄂隆佈拉克台驕駝五隻驕馬十匹委章蓋一員兵九名每員名乳羊七隻

以上八台共放給驕駝四十隻驕馬八十匹乳羊五百六十隻

一支委員二員每員月給盤費銀六兩由七月十二日起至八月二十九日止計一箇月十

八日共銀十九兩二錢

一支通事一名月給盤費銀三兩由七月十二日起至八月二十九日止計一箇月十八日

共銀四兩八錢

一支隨帶差遣兵八名每名月給盤費銀二兩四錢由七月十二日起至八月二十九日止

計一箇月十八日共銀三十兩七錢二分

以上放給各台官兵三項牲畜採買價值暨委員官兵盤費共合用銀二千六百四十一兩一錢二分除將倉糧一千石變價銀二千五百兩動用外尚不敷銀一百四十一兩一錢二分已由科布多糧餉處扣平項下提補合併聲明

崇凌請卹片

再辦理軍務防務積勞身故人員例准給卹茲查有補用驍騎校額外驍騎校崇凌自去夏布置邊防即委該員在籌防處充辦事官並因試行清野之法派員分查又委該員赴烏梁海一路閱視維時正當八月雨雪載塗罔辭寒苦以致感疾回營遽歿該員人極樸實殊堪憫惜查烏里雅蘇台科布多辦事向均按照軍營規制現在尚未撤防相應請旨將該驍騎校崇凌照軍營積勞病故例

交部議卹出自

天恩理合附片陳請伏祈

聖鑒謹

奏 光緒二十七年二月初八日拜發

本年四月十一日遞回奉

硃批著照所請該部知道欽此 三月初六日

揀補額外驍騎校摺

奏爲揀補額外驍騎校員缺仰祈

聖鑒事竊查科布多戍防滿營設有額外驍騎校二缺遇有缺出向由臣等揀員充補茲查額外驍騎校崇淩據報病故所遺之缺查有委署筆帖式錫麟圖繙譯通曉當差克勤堪以擬補如蒙

俞允應俟該員三年期滿回綏遠城後以驍騎校補用其應找支銀糧俟以奉

旨之日開支仍遇有差便給咨該員赴部引

見爲此謹

奏 光緒二十七年二月初八日拜發

本年四月十一日遞回奉

硃批著照所請該部知道欽此 三月初六日

調取駝隻摺

奏爲科布多官廠駝隻不敷應用援案請由烏里雅蘇台調取以供要需恭摺具陳仰祈

聖鑒事竊臣等前據駐班處公銜三等台吉色呼甯等呈據管理官廠協理台吉沙克都爾札布申稱官廠存駝爲數現本無多且差務繁重並無緩歇更兼迭次因災報倒甚多不敷應差等情祈請轉呈覈辦前來查該廠牧放駝隻每年春夏採運木植修造農具兼運秋冬屯田收糧暨赴古城採買官兵糧糈並備補立各項例倒之用據稱不敷應差係屬實在情形向章科布多官廠駝隻每遇不敷使用應由臣等咨商烏里雅蘇台將軍由所屬孳生羣內調取節經辦理在案現因科布多整理一切差務倍增若必往返咨商誠恐緩不濟急有誤要需自應先行具奏除仍一面咨明烏里雅蘇台將軍查照外應懇

天恩敕下烏里雅蘇台將軍即由所屬孳生羣內飭令揀撥口輕臃壯駟駝二百隻派員護送前來以資應用理合繕摺具陳伏祈

皇太后

皇上聖鑒謹

奏 光緒二十七年二月初八日拜發

本年四月十一日遞回奉

硃批該衙門知道欽此 三月初六日

具報十屯分數並官弁兵丁獎賞開單摺

奏爲具報屯田收穫糧石分數照章請將該管官員兵丁分別給予獎賞繕單

奏陳仰祈

聖鑒事竊查科布多光緒二十六年所種屯田十分共收三色糧六千三百三十一石五斗
臣等當派筆帖式景善會同統轄屯田參將世襲騎都尉祥祐等將所收糧石內揀擇乾潔
三色糧七百石收入屯倉以爲今年籽種其餘糧石均運交城倉收納查例載種地官兵各
視其收穫糧石分數量加鼓勵等語此次該屯田總管專管千總把總蒙古總管專管參領
驍騎校委章京及綠營蒙古兵丁應得議敘賞項據屯田參將世襲騎都尉祥祐呈請覈辦
前來臣等覆覈無異應懇

天恩將該屯田參將祥祐交部照例議敘其官弁兵丁謹繕清單恭摺具陳伏祈

皇太后

皇上聖鑒敕部覈覆施行謹

奏 光緒二十七年三月初十日拜發

本年五月十五日遞回奉

硃批該部知道單併發欽此 四月初十日

謹將光緒二十六年十屯收成分數暨官弁兵丁應給議敘賞項敬繕清單祇呈
御覽

計開

發領籽種小麥三百八十石

今收小麥四千七百八十三石五斗

發領籽種青稞二百五十石

今收青稞九百一十五石

發領籽種大麥七十石

今收大麥六百三十三石

查每歲十屯地內例應動用籽種糧七百石

上年連籽種共收穫三色糧六千三百三十一石五斗

統計收成分數在九分零四毫五絲今將所收三色糧石仍照舊例存留籽種七百石收入
屯倉外其餘糧五千六百三十一石五斗均收入城倉訖

統轄屯田直隸昌平營參將世襲騎都尉祥祐總管屯田宣化鎮屬多倫協中營千總傅鎮海總管屯田宣化鎮標右營把總盧慶雲

以上三員均係屯田員弁統計十屯收成分數在九分零四毫五絲均應交部議敘

專管二三四屯宣化鎮屬張家口營膳房堡把總趙金鼇所管四屯拉展收穫糧石在七分九釐四毫二絲零應毋庸議敘

專管五六七屯宣化鎮標城守營把總李明所管三屯拉展收穫糧石在九分四釐一毫八絲零應交部議敘

專管八九十屯宣化鎮屬張家口營洗馬林堡把總丁喜所管三屯拉展收穫糧石在十分零二釐四毫應交部議敘

總管頭二三四五屯委署蒙古參領阿畢爾米特所管五屯拉展收穫糧石在八分三釐九毫八絲零應毋庸給賞

總管六七八九十屯委署蒙古參領圖佈敦所管五屯拉展收穫糧石在九分六釐九毫一絲零應給二等賞小彭緞一疋

專管頭二屯委署蒙古驍騎校察杭班第所管兩屯拉展收穫糧石在九分五釐九毫九絲

零應給二等賞小彭緞一疋

專管三四屯委署蒙古驍騎校濟克札布所管兩屯拉展收穫糧石在六分二釐八毫五絲
零應卅庸給賞

專管五六屯委署蒙古章京圖們額爾哲依所管兩屯拉展收穫糧石在九分六釐二毫四
絲零應給二等賞小彭緞一疋

專管七八屯委署蒙古章京那木濟勒多爾濟所管兩屯拉展收穫糧石在九分八釐零三
絲零應給二等賞小彭緞一疋

專管九十屯委署蒙古驍騎校札木色楞所管兩屯拉展收穫糧石在九分九釐一毫應給
二等賞小彭緞一疋

收穫糧石在十分十一分以上二五八十屯綠營兵三十二名每名應給頭等賞銀一兩五
錢蒙古兵一百名每名應給頭等賞茶二塊煙二包

收穫糧石在九分以上六七九屯綠營兵二十四名每名應給二等賞銀一兩蒙古兵七十
五名每名應給二等賞茶一塊煙二包

以上共賞銀七十二兩除扣二成銀十四兩四錢外實賞銀五十七兩六錢

共賞小彭緞五疋每疋折布八疋每布一疋折銀三錢三分共合銀十三兩二錢除扣一成銀二兩六錢四分外實賞銀十兩五錢六分

共賞銀二百七十五塊

共賞煙三百五十包

請加撥經費片

再臣等前因山西省將經費停解餉源頓涸邊事可危因知烏里雅蘇台將軍連順等有奏請改撥之議即經咨商併奏旋准覆稱於二月二十六日附片代陳懇

恩敕部另爲籌撥有著的欸並鈔錄片稿咨會前來據原奏所稱科布多常年經費僅言大數五萬餘兩茲查每年山西省應協常額經費銀三萬三千三百三十三兩零續添經費銀四千兩加增鹽菜銀一萬兩又該省分還舊欠銀二千五百兩直隸省應協經費銀二千五百兩統共銀五萬二千三百三十三兩零而山西還欠之銀係應帶歸商墊及台費欠欸隨入隨出向不作別項開支近年間亦挪用然一年止應算有經費四萬九千八百三十三兩零而已此外再無別省協濟統計每年應放額支各項共需銀數實已極力撙節而遇閏月應加放銀三千五百餘兩又並無奉撥加給閏欸尙須騰挪墊補覈計一年連閏拉展共需

銀五萬一千九百餘兩已不敷銀二千零八十餘兩且去秋籌布邊防以差委乏人復經奏添糧餉處幫辦章京一缺糧餉印務蒙古三處筆帖式各一缺此四員一年又需加放鹽菜加增銀六百五十兩零即又增支銀六百五十兩零所入者止此四萬九千八百餘兩之數所出者乃在五萬二千五百餘兩之數實在不敷銀二千七百餘兩此外尚有雜支活支各項則應就事覈定難以預知確數計再得銀四千兩即可敷衍而向遇另案籌辦之事均係另撥部欸如從前駐練蒙兵辦理安撫蒙哈事宜修理城垣倉庫工程或二三十萬或七八萬或數千兩不等皆不與焉此蓋

朝廷衡量重輕經權互用既嚴定額餉以節帑復寬籌用欸以治邊一歸覈實兩無偏廢今者就事論事自不敢於常年餉項遽請多加而此蒂欠區區數千實不能不呼籲

聖明量求增益可否仰懇

天恩再於每年加撥銀四千兩俾資補苴刻計將軍連順等代陳

奏片已邀

御覽應請

敕下戶部將臣等此次所請一併覈議具

奏出自

逾格慈施再直隸去年欠解銀二千五百兩與今年應解銀二千五百兩均難指準應否照協抑應另撥亦應請由部覈定臣等爲急切需餉以支邊局起見是否可行謹附片詳陳伏祈

聖鑒謹

奏 光緒二十七年三月初十日拜發

本年五月十五日遞回奉

硃批戶部議奏欽此 四月初十日

酌擬綠營換防全數換官減數換兵摺

奏爲綠營官兵戍防班滿照案全數換官減數換兵循章先期

奏陳仰祈

聖鑒事竊查科布多額定綠營戍守換防屯田官十員兵二百二十四名向由直隸總督山西巡撫分別揀派每屆五年班滿官弁全數更換兵則酌留一半教引新換兵丁屯田以期得力其餘一半仍由該省更換疊經

奏辦在案茲據管帶換防兵丁屯田參將世襲騎都尉祥祐呈稱科布多換防官兵向係於五年期滿時兵丁換半留半官弁全數遣回更換前於光緒十七年班滿經前大臣沙克都林札布等奏請變通辦理官弁仍舊全行更換兵丁暫留一班俟下屆再行更換一再奏陳奉

旨交部議奏嗣經兵部覆准奏奉

諭旨依議欽此迨光緒二十二年班滿復經前大臣魁福等奏請遵照烏里雅蘇台奏准成案官弁全換兵丁按一半之半更換等因奏咨辦理亦在案茲查現在換防官兵自光緒二十三年十一月十五日到防之日起連閏扣至光緒二十八年九月十五日係屆五年班滿應如何更換之處先期呈請核

奏前來臣等伏查該弁兵等遠戍寒邊備嘗艱苦祇以積習頹惰驟難轉移自經臣等隨時整飭屯田差操不容懈弛去夏遵

旨辦理邊防該弁兵奉委分駐台卡偵探並演練槍械較前漸資得力若撤換一半即應遣回一百一十二名遽易新兵又須從新教練誠恐徒滋勞費無裨操防且每換一班往來萬程人數較多台站支應亦極喫力似可通融辦理第若竟行停換又與向例不符惟有仍照

上屆兵丁更換一半之半辦法酌換兵五十六名其屯田官十員仍舊全換似尙輕而易舉且於舊章亦無偏廢合無請

旨俯准照辦實於邊防台站均屬有益無損如蒙

俞允當由臣等咨行直隸總督山西巡撫遵照辦理並造具應換官兵銜名清冊分咨查照理合繕摺陳請是否有當伏祈

皇太后

皇上聖鑒訓示再向遇辦理換防往返咨會路逾萬里且屢煩文牘及至官兵到防總在一年有餘必須先期

奏請合併聲明謹

奏 光緒二十七年三月初十日拜發

本年五月十五日遞回奉

硃批著照所請該部知道欽此 四月初十日

請除換防積弊片

再科布多換防戍守綠營官兵每屆五年向由直隸宣化山西大同兩鎮查照咨文按額挑

補交換防參將游擊督率千總把總管帶來防惟歷次換防兵冊均由千總等造呈其宣化大同兩鎮印冊咨到太遲其中百弊叢生有已派來防不願遠戍倩人代替者有未派來防而願到戍買缺充補者均出千總等任意抽換非其宗族即其親故大都莊農小賈無賴流民以致到防後一經考驗技藝營規毫不知曉似此有名無實殊失戍守本意更安望其馴習紀律毗益操防耶此種情形經前烏里雅蘇台將軍崇歡奏明在案科布多如出一轍相應請

旨敕下直隸總督山西巡撫轉飭宣化大同兩鎮嗣後科布多再屆換防應先由該鎮認真挑選不得假手營弁一經定妥即先造具名冊飛咨臣等查照以備防兵到戍即憑該鎮之冊點驗收伍如此略加釐整或可稍杜假冒冀收實兵之用儻該鎮依前疏懈任憑管帶防兵之千把等舞弊仍以衰劣充數臣等即當按名駁回如情形較甚並當據實奏明辦理決不稍涉瞻徇如蒙

聖明以爲可行伏候

命下臣等應即欽遵此次即如此辦理臣等係爲剔積弊以求實際起見除分咨外理合附片直陳伏祈

聖鑒訓示施行謹

奏 光緒二十七年三月初十日拜發

本年五月十五日遞回奉

硃批著照所請欽此 四月初十日

故貝子請 賞祭摺

奏爲

奏請事竊據杜爾伯特左翼暫護盟長印務協理台吉達勒錦呈報本部落正盟長札薩克固山貝子察克都爾札布於光緒二十六年十一月二十七日因病出缺等情呈報前來臣等恭查道光二十八年間接准理藩院咨開嗣後土爾扈特杜爾伯特霍碩特汗親王郡王貝勒貝子病故照依新定條例由各該城具

奏就近著大臣一員帶領章京等前往奠祭等因在案今杜爾伯特左翼盟長札薩克固山貝子察克都爾札布病故自應遵照由臣瑞洵帶領章京一員前往致祭所有應需羊酒價銀照例由科布多公項動用彙咨戶部覈銷應請

敕下理藩院轉咨內閣即行撰擬滿洲蒙古祭文一分由驛頒發前來以便遵照辦理爲此

繕摺具陳伏祈

皇太后

皇上聖鑒謹

奏 光緒二十七年十月初十日拜發

本年五月十五日遞回奉

硃批該衙門知道欽此 四月初十日

防兵更換管帶片

再查管帶防兵駐紮烏蘭古木杜爾伯特左翼正盟長固山貝子察克都爾札布現報病故
管帶一差自應另委查有杜爾伯特札薩克多羅郡王圖柯莫勒堪以接帶又察克都爾札
布所遺正盟長一缺尤關緊要已飭杜爾伯特左翼副將軍達賚汗噶勒章那木濟勒暫行
署理仍俟揀選妥協再行請

簡查該汗前派分帶防兵駐守科布多茲既委署盟長事務應飭回旗辦事另檄杜爾伯特
札薩克鎮國公多諾魯布前來接帶均責成嚴緝賊匪彈壓地方用期靜謐除咨部院查照
外謹附片陳明伏祈

聖鑒謹

奏 光緒二十七年三月初十日拜發

本年五月十五日遞回奉

硃批該衙門知道欽此 四月初十日

敬抒管見摺

奏爲敬抒管見披瀝直陳仰祈

聖鑒事竊臣於本年二月十一日奉到新疆轉遞軍機處要電祇讀光緒二十六年十二月初十日

上諭自播遷以來

皇太后宵旰焦勞朕尤痛自刻責深念近數十年積習相仍因循粉飾以致成此大衅現正議和一切政事尤須切實整頓以期漸圖富強

懿訓以爲取外國之長乃可補中國之短懲前事之失乃可作後事之師著軍機大臣大學士六部九卿出使各國大臣各省督撫各就現在情形參酌中西政要各抒所見通限兩箇月詳悉條議以聞再由朕上稟

慈謨斟酌盡善切實施行等因欽此仰見

深宮憂勤惕厲一意振興 臣寄重籌邊心殷報

國處班超之地位未建厥功乏汲黯之忠誠徒師其戇茲荷

廣咨下問察納邇言 臣昔叨詞職會侍

講筵值此時艱曷敢尙安緘默竊維政事之得失爲

國家興替所關人心之公私與天下安危相感伏見近年以來

聖明在廷而權要黨局已成時勢咎徵早伏幹事初無識力挾私逞臆偏激適以誤

國家居心本鮮公忠濟惡工讒昏愎因而亂天下附和傳染靡焉從風羣策羣力共欺

朝廷以助成此非常之災不治之症 臣每一念及未嘗不太息痛恨於主謀諸臣也今者大

局甫定欲圖挽回要宜先識其受病之原然後始施方劑否則藥雖偶效而疾難遽瘳非上

醫也

命議諸條事關重大諒中外諸 臣自有嘉謨茲就 臣愚慮所及確知其有礙整頓者約有四
端臚陳

乙覽一日繆見閉關絕使既不能行互市通商早成規局且中國邊海要地或借或讓多爲

外人佔居是交涉不容再不講求矣而今之士大夫仍諱言洋務壹安蒙昧殊不知外國之政藝仍我

朝廷往昔之遺規雖彼服色不同而其富國強兵之術睦鄰固圉之方未嘗不堪擇取若必虛矯頑固徒執攘夷之高論詡禦敵之勝籌何以朝日之役與去年之戰我皆未能獲勝而彼乃益稱雄此中究竟不待智者而知此次大變即壞於十數王大臣狃於成見誤國殃民致茲鉅創再不改悔終難久安此謬見宜化一日空理趨驚虛名久成痼習主戰爲君子主和爲小人此本千百年來迂腐不通誤人家國之談眞忠愛者必能揆時度勢斷不恃血氣之勇視

朝廷如孤注輕於一擲而貽

宗社無窮之隱憂故大學士曾國藩當同治年間辦天津教案力持不可開衅實蓋臣謀國之忠當諒其心而不能訾其過往事蓋可徵也今之言戰者懵然於外交無論已且有稍悉情勢者明知不敵姑爲大言以欺世特殉清議以盜名每謂中華廣土衆民區區島夷殲可一鼓庸詎知兵家者言知己知彼百戰百克縱我不知彼亦當知我之可恃與不可恃今乃不自度量輕談兵事毆不練之卒妄與強國爭鋒輒云洋人必須打而將卒懦弱不知也戰

事不應和而

社稷顛危不顧也弄兵輦轂喋血京師卒使

兩宮出狩

九廟震驚闐闐成墟衣冠填壑縱

聖恩寬大未盡誅夷彼首禍助虐諸臣清夜捫心其將何以自處乎講空理而貽實害至於如此臣早年亦執偏論近則多更世變深悟其非此空理宜戒一日訛言禮義不饗何恤人言而今之肯任事能極諫者則不能不費躊躇多瞻顧蠹弊所在官府吏胥窟穴其中黨堅勢固偶遇有心人建議革除其作弊者則恐敗露而包庇必力而護弊者且肆謠誣而傾陷旋加蜚語中傷深於矛戟騰章交劾迅若雷霆或罪以亂政或毀其更章甚且誣爲勾私指稱通賄憑空結撰衆口鑠金遂使忠槩苦忱轉無以求諒於

君父即有一二敢言之士亦惟隱情惜己自效寒蟬坐令因循敷衍之積成風氣此尤世道之憂

朝廷所宜留神省察而懸爲厲禁者也此訛言宜懲一日流弊中國之弊莫甚於此時矣陷溺已深牢不可破有一事即有一弊欲興利恒致弊生馴至利未見而弊先滋甚且止見弊

而不見利舉良法美意悉皆告亡於無形而認真除弊者乃以投鼠生嫌枉被紛更之謗因仍故步舞弄如初臣深惜之即以條奏而言

朝廷息兵悔禍

詔求直言何等真切而大臣仍不言使小臣言小臣率草茅新進諳諫未深更無貫中外達經權之真學識不過撫拾浮辭釣取虛譽或妄肆抨彈或巧爲嘗試甚或滿懷私曲僞託義憤以沽直聲一意熱中實熟揣摩以干當路席珍求聘情見乎辭古今上書挾策者流強半如此此弊不杜將羣言競進真僞雜投恐康梁邪說漸且麤入其中其害將中於人心風俗而不可救藥此固言路一端而凡事大都類此斯即偏於謬見惑於空理淆於訛言而日積月累醞釀以成之者也此流弊宜防以上四者皆人心之大患政事之酷毒亦即天下國家致敗之由召亂之本使不爬羅摭剔極力禁除就令

敕議諸政一一舉行恐仍不免搖撼阻撓有妨致治用敢籲請

宸衷獨斷可否先於此四者特降

諭旨宣示中外

通飭嚴懲既往以戒方來伏候

聖裁 臣亦知此言一出必將不利於人口然苟利

國家死生以之身名又何足慮 臣既有所見不敢不言亦不忍不言是用繕摺披瀝直陳伏祈

皇太后

皇上聖鑒訓示無任激切憂憤之至謹

奏 光緒二十七年三月初十日拜發

本年五月十五日奉

旨留中欽此 四月初十日

大學堂不宜開辦片

再 臣又有陳者前奉

上諭敕令中外大臣參酌中西政要條議應因應革事宜誠屬強

國之轉機濟時之勝算

慈意至明至決曷勝欽悚惟 臣愚見歐美諸邦無不右武故於訓練兵士殫誠竭慮考究必精日新月異不僅以火器爭雄我於此時懲前毖後取彼之所長以補我之不及則詰戎實

爲先急而緊要關鍵武備學堂不能不開宜先於天津原有學堂量加宏擴規模視諸京師大學堂其文學堂似可暫緩並舉人才雖在學校但吾華讀書之子敦實行者少競浮僞者多且每溺名利之私近年乃有謀叛爲盜者可爲歎恨講西學者亦未受其益先中其毒議院公司民權學會之說幾於萬喙一音意似舍中學西斷非如此不可竟將中華之經常政教一筆抹倒此所謂邪說詖行禍世誣民之甚者也往者京師開辦大學堂非不法良意美無如總署當日公事多由張蔭桓主稿其奏定規章聞即出自梁逆啓超之手譏逆又得辦理繹書之事因即得以乘間抵隙故章程內竟有將四書諸經加以編輯之條臣深以爲憂當卽繕具封奏瀝陳四書諸經宜遵

列聖欽定萬萬不應刪纂比時臣已經管學大臣尙書孫家鼐奏調到堂商量學務旋屬臣代辦開辦學堂大概情形疏稿適孫家鼐亦欲執奏此節意見相合臣遂不必獨奏卽於條目內力言四書諸經之不應由梁啓超纂輯並將總署原章量加改定臚列上達得旨允行原奏具在可覆按也脫使當時竟聽其所爲早已謬種流傳禍延天下矣然卽此始謀不臧故舉辦逾年毫無毗益祇以臣經孫家鼐復行奏明派充文案總辦專司公牘不管學課臣卽亦未便冒昧陳奏旋奉

旨出使還京即拜出鎮科布多之

命故臣於大學堂之事未能匡救萬一至今思之輒增媿歎查外國辦事重在核實徇情較少故流弊亦輕我則每辦一事先滋百弊局外者妄肆阻撓局中者復工排擠均之有敗事無成事同歸貽誤即以大學堂論之總辦始用張元濟繼用黃紹箕旋用李盛鐸終用余誠格紛紛紜紜莫能折衷彼亦一是非此亦一是非開學兩三年費財百餘萬未見培出一才練成一藝就臣所知者在學之官附學之生康梁之屬尙不乏人似此顯耗巨帑隱壞人才臣期期知其不可恐外國文武學堂不如是也臣禱昧竊以爲京師大學堂似可不開如仍欲舉辦其前章亦宜屏棄不行另當妥擬管學大臣亦必須眞得學通中外識達經權者委而任之方可期興學育才漸臻成效京外大臣中如張之洞者庶爲近之以上所陳雖屬既往之事要皆當時實在情形初無一字虛飾臣不言恐無人知亦無人肯言尤慮此次欽奉特旨有取於西政西學而亟思所以變通取法必有以仍開京師大學堂請者恐蹈從前覆轍不可不慎用敢不揣冒昧附驛馳陳伏祈

聖鑒謹

奏 光緒二十七年三月初十日拜發

本年五月十五日奉

旨留中欽此 四月初十日

散木居奏稿卷之六

門人鈴木吉武校字

散木居奏稿卷之七

幹難 瑞洵

斂鋒集 光緒辛丑四月起六月訖

納楚克多爾濟承襲貝子摺

奏摺久未遞回請 旨敕查摺

雲秀補糧餉幫辦章京片

揀補明阿特總管片

商情窘迫已極懇仍 敕部從減墊撥摺

密陳俄情片

蒙兵餉章片

亟盼部撥片

遵照部議查明節年倒牛數日仍請照章按照市價買補摺

具報屯田播種日期開單呈 覽摺

會查都蘭哈喇並無私挖摺

新疆撫藩接濟邊餉力全大局派員赴領片

昂吉斯台卡倫侍衛報滿請獎並懇留三年摺

科布多並無應鈔路鑛事件片

馳報科布多幫辦大臣出缺請 旨簡放摺

請動欸購藥設局調醫以備施診並 准綏遠添傳駝隻片

納楚克多爾濟承襲貝子摺

奏爲請

旨事竊 臣等前據杜爾伯特左翼札薩克固山貝子旗協理台吉等呈報正盟長札薩克固山貝子察克都爾札布於光緒二十六年十一月二十七日因病出缺所遺札薩克固山貝子之爵請以伊長子預保應封二等台吉納楚克多爾濟承襲並將原領襲爵

誥勅一分一併呈送查覈具

奏前來 臣等當即調取已故固山貝子之長子二等台吉納楚克多爾濟來科布多驗看茲查得該台吉納楚克多爾濟現年四十三歲老成練達熟悉旗務既係預保應將察克都爾札布所出札薩克固山貝子之爵籲懇

天恩即以二等台吉納楚克多爾濟承襲如蒙

俞允該台吉尙係生身應俟身熟進

京年班時再爲送院補行帶領引

見可否之處伏乞

皇太后

皇上聖鑒

訓示遵行再原領襲爵

誥勅一分向應咨送理藩院覈辦容俟

回鑾再行補送又科布多近年辦理承襲均奉

特旨允准未由理藩院覈議因仍照常辦理合併聲明謹

奏 光緒二十七年四月二十一日拜發

本年六月二十四日遞回奉

硃批著照所請該衙門知道欽此 五月十九日

奏摺久未遞回請 旨敕查摺

奏爲奏摺時日久逾未經遞回恐有遺失情節請

旨敕查恭摺仰祈

聖鑒事竊自去秋

聖駕駐蹕西安 臣等凡有奏陳摺件均係拜發後即由所管東十四台按台齎遞經烏里雅蘇台抵察哈爾察罕拖羅蓋台移交直隸萬全縣驛站轉遞西安

行在發回亦由此路迨本年正月以後連接屢次回摺均係改由甘肅新疆驛站移交科布多南八台遞來雖屬稍遲尙幸無大耽誤惟查 臣等去年十二月二十九日曾經具奏經費不繼請將代放烏里雅蘇台卡餉項暫由該管將軍自行覈辦期免貽誤一摺復於今年正月十五日又具奏山西採辦甄茶遲無報解請

旨敕催一摺俱仍交由東十四台馳遞乃正月十五日拜發之摺已於三月二十一日經陝西巡撫加封由甘肅新疆遞回而去年十二月二十九日在先拜發之摺今已延逾至百餘日之久竟尙未據遞到公文絡繹獨無此摺 臣等不勝詫異伏思北路係屬軍營摺報攸關邊要自當倍加慎重豈容稍有疏虞且於三月二十七日已經接到行在戶部咨行遵議此摺奏稿知已遞到奉

旨交議自係早經發回惟由陝西巡撫衙門加封飭遞是否遞至直隸萬全縣驛由察哈爾台站遞來抑仍改由甘肅新疆遞來殊難懸揣事關重大自應確查況已欽奉

硃批尙應恭繳尤不當任其遺失臣等所屬東南兩路台站業飭挨查均據呈覆並未奉到除烏里雅蘇台將軍察哈爾都統已由臣等咨請飭查外其內地各省相應請

旨敕下直隸山西陝西陝甘新疆各督撫一體分別嚴飭有驛官吏確切詳查務得實際咨行查照如果查有情弊即由該督撫

奏明辦理其前奏摺件計係一摺一片已邀

聖鑒應否由軍機處將所奉

批旨敬謹鈔示以便臣等欽遵辦理伏候

聖裁臣等不敢擅請所有奏摺時日久逾未經遞回恐有遺失情節請

旨敕查各緣由理合繕摺馳陳伏乞

皇太后

皇上聖鑒

訓示施行謹

奏 光緒二十七年四月二十一日拜發

本年六月二十四日遞回奉

硃批著兵部飭查知照欽此 五月十九日

雲秀補糧餉幫辦章京片

再新添糧餉處幫辦章京一缺查有俄商局筆帖式雲秀文義明晰綜覈用心已令署理無誤堪以請補此項添缺與額設無異應請一體

賞給主事職銜照支銀糧如蒙

俞允該員七年期滿如願就武請俟回綏遠城補防禦後以佐領補用先換頂戴仍俟事局大定再行送部引

見其所遺俄商局筆帖式一缺容另揀員請補爲此附片具陳伏祈

聖鑒謹

奏 光緒二十七年四月二十一日拜發

本年六月二十四日遞回奉

硃批該衙門知道欽此 五月十九日

揀補明阿特總管片

再查科布多所屬明阿特總管奇莫特多爾濟據報病故業已咨明理藩院在案所遺總管員缺查有該旗印務參領達什哲克博現年三十八歲在參領任內行走十年人去得辦事公平堪以補授如蒙

俞允實於旗務有裨至所遺參領佐領驍騎校各缺應由臣等另行揀員遞補照例咨報理藩院查照伏祈

聖鑒謹

奏 光緒二十七年四月二十一日拜發

本年六月二十四日遞回奉

硃批著照所請該衙門知道欽此 五月十九日

商情窘迫已極懇仍 敕部從減墊撥摺

奏爲商情窘迫已極關繫邊局亟須官爲維持欠欸實難久延晉豫籌解不足濟急再懇天恩仍敕戶部暫將此項從減墊撥以昭大信而顧地方瀝陳實在情形恭摺仰祈聖鑒事竊臣等接准

行在戶部來咨內開遵議 臣等前奏裁撤蒙兵具報用過薪費津貼銀兩懇

敕戶部先行墊發銀十數萬兩俾資清理一摺議以山西河南兩省積欠科城餉銀爲數甚

鉅應請

敕下各巡撫設法籌款陸續起解俾該城得以歸還商欠不致久延至請由部庫墊撥之處

應毋庸議等因二月初二日具奏奉

旨依議欽此鈔錄原奏行令欽遵辦理到城 臣等再三紬繹具見部臣籌畫苦心惟該省財力已殫一時無由設措窮塞商貲亦盡百計難可支吾區區爲難苦衷仍有不能不據實上陳瀝情呼籲者伏念時事多虞理財尤亟凡爲臣僕自應共體時艱豈宜但顧一隅置天下大局於度外無如 臣等所處之地瘠苦迥殊內省所辦之事艱難復異平時近自兵燹以還市廛生意銳減牲畜鬻聚歸化城一帶不能進京他物又未能出口銷路大滯商蒙羣呼賠累去秋奉

旨布置邊防情事岌岌萬衆託命休戚相關比時傾囊倒困以供地方之用者原非商所樂爲委因 臣等苦口勸導極言利害該商等亦慮洋兵一至地方必遭蹂躪即不殺害亦必勒索備禦萬不可緩復諒及 臣瑞洵下車之後與民更始於籌防竭力辦理經權互用或可恃

以保全財命故得各出貲財以紓急難地方倖獲無虞是蓋有至誠相感者自非勢迫刑驅所克臻此也且北路爲防戍軍營口外向稱烏里雅蘇台爲前營科布多爲後營所有商賈生意皆係隨營買賣全仗銀茶交易脈絡貫通曩日餉多頗增富庶近年餉少即見蕭條而自去年兩年爲尤甚蓋緣餉源頓涸商人重利驟失所望其在京在晉之聯號並化爲烏有用是益貧益窘刻下街市鋪家大半閉歇蒙漢官兵賒借概不能行日用食物益以居奇昂貴官窮民困蒙瘡商疲體察情形純是暮氣太重再不速謀拯濟將必日形衰敗尙復成何景象故臣等輒謂外侮猶無足慮內憂實甚可危也況去年所欠商欸亦不盡現銀茶布牲畜隨在勻借抵用積累而成五萬之數商力已幾竭矣所冀有欸即還尙不至重滋虧累一旦停緩以待將來即不啻遏其生機誰不惶懼目前旣先滋疑慮日後更難望通挪此商欠必須及時歸還實在情形也部臣議令晉豫兩省設法籌欸亦自煞費躊躇非不代謀周至即臣等前請由部墊發亦擬由該省提還豈臣等可施之部臣者部臣即不可責以照辦乎惟內外情勢懸殊辦法亦大分難易在戶部職掌天下財賦綜覈出納本有權衡若使先代該省墊撥續令該省解還時日縱或有逾欸項斷非無著至臣等乃一邊吏耳專恃內省協濟日懸空釜待人而炊時時須仰封疆之鼻息安有權力聳動督撫要其必成即去年山西

暫將經費停解臣等即束手無策止有具摺請催幸蒙

朝廷厚恩部臣曲諒深知邊遠之難特予代墊然此所墊乃去年常額一半經費皆有例支而且待支固不能挪移分毫以還商欠也竊維晉省藩庫之虛災區之廣開捐辦振諸費圖維新餉尙不能謀舊欠更不能顧並聞豫省亦有偏災是該二省不能迅速籌解以應科布多之急者勢使然也倘仍守株以待深恐畫餅不克充飢近日疊據各商稟懇雖經臣等與之商量酌擬起利冀可緩期奈該商等惟求措還不敢領息情詞迫切查去年辦理防務借資商力本當有以酬勞重以萬里邊荒轉輸匪易每逢闕乏即賴通融臣等此次初舉商債即已失信從茲呼應不靈於辦公亦多窒礙臣等夙夜焦慮往復確商值茲軍用空虛實已窮於爲計查前請十數萬兩原爲既清欠欸兼備籌邊用項且供留兵餉需今者實偏處此縱不敢固執前議亦實仍不得不借重司農但求得半之數能以稍爲清理暫恤商蒙之艱即以保全非淺合無再懇

聖慈敕下戶部將科布多辦防欠借商欸銀五萬兩暨欠發兵餉銀一萬三千五百餘兩仍准先行墊撥俾不至貽累商蒙而地方即霑利益核計爲數已減籌策當不甚難惟求

天恩體諒而已臣等待罪危疆持籌無術目擊窘迫情形深慮敷衍因循釀成邊患貽誤大

局負咎更重用敢不揣冒昧披瀝繕摺

奏陳不勝惶悚待

命之至伏祈

皇太后

皇上聖鑒

訓示謹

奏 光緒二十七年四月二十一日拜發

本年六月二十四日遞回奉

硃批戶部議奏片併發欽此五月十九日

密陳俄情片

再昨據瑪呢圖噶圖勒幹卡倫侍衛常陞呈報阿拉克別克鄂博駐紮守邊俄羅斯托莫占在彼蓋房居住以來已十餘年今又有西邊俄人圖克達爾前來欲蓋新房正在修理地址運致木石飛報前來臣等查阿拉克別克河本係中俄兩國定界地方前數屆查牌博時俄人即已越界造屋並屢商劃定界址經一再派員往勘因俄人狡賴迄未辦有頭緒當初卡

倫侍衛既未呈報前大臣等亦未查奏因循至今早成反客爲主之勢臣等前以今年六月又屆會查牌博之期慮及俄人必將議及界務臣等不敢隱匿當於正月二十四日業將詳細情形咨呈

行在總理衙門查照覈示辦法並由臣瑞洵附寄一函商請一切尙未奉到覆文現在俄人竟又大興土木加意經營其心殊屬叵測似此得步進步何所底止該處距科布多城二十餘站臣等聞報之下深以鞭長莫及爲憂總因兵備太虛無從鎮攝欲收建威銷萌之效必須未雨綢繆故臣瑞洵於二月初三日具

奏略陳科布多應辦事宜摺於遵

旨覆奏練兵條內聲稱地方敷衍難恃必須妥爲置防俄人要約雖堅究應暗爲設備之語實以因循粉飾終難自存時勢日艱萬不能不籌振作固非臣急功近名迫欲多事也此摺已專弁齎

奏敬俟

回鑾後即可遞呈如果能邀

特旨俞允尙可勉強圖布置稍資補救儻若又被部駁則直無法可施矣至現據該侍衛呈報

俄人舉動事關邊界得失何敢置之不問業已飛文密飭該侍衛再行查明如果確在中國界內當設法與之理論阻止然空言無補該卡又止十兵久爲俄所輕視亦恐難杜狡謀若過於忍讓又慮深滋邊患臣等於洋務閱歷尙淺究應如何辦理之處惟求訓示遵行至阿拉克別克河界務如何辦法亦當由總理衙門迅覆臣俾有遵循期免貽誤是否之處謹據實密陳伏候

聖裁謹

奏 光緒二十七年四月二十一日拜發

本年六月二十四日遞回奉

硃批著再查探實情相機妥慎因應欽此 五月十九日

蒙兵餉章片

再現留蒙兵五百名係遵

旨於護城護卡兵內挑選杜爾伯特三百名因烏梁海人較勇敢布倫托海亦宜置防復於該部落內挑選二百名即駐該處其杜爾伯特之三百名分駐烏蘭古木科布多城前已附陳在案至營制餉章係按從前科布多駐練蒙兵成案並參仿伊犁章程烏蘭古木布倫托

海科布多城三處之兵各派參領一員爲營總又於每百名分左右兩隊每隊派帶隊章京一員隊官一員筆齊業齊一員漢字識一名通事一名復每處設官醫生一名獸醫一名均歸各管帶部勒約束該官兵操練巡防並隨時護送洋商倍形勞苦除管帶薪費無庸議增外均將官兵於月支口分外按照舊案校核差操分別獎賞每官月加二兩每兵月加一兩至該官兵騎操馬匹多係自行牧放應毋庸再給乾銀以節糜費應支糧餉津賞仍自光緒二十六年八月初一日起算至該兵係屬馬隊五百名向應委管帶二員茲分紮三處不得不多添一員計管帶三員每員月支薪水銀三十六兩心紅銀五兩紫炭銀十兩現大局漸定疊奉保護洋人

諭旨倍極嚴切科布多所屬蒙古部落共三十旗俄商較多正資彈壓照料尙慮地廣兵稀未能周密一時恐難裁撤合將支發餉章緣由附片陳明伏祈

聖鑒敕部查照立案謹

奏 光緒二十七年四月二十一日拜發

本年六月二十四日遞回奉

硃批該部知道欽此 五月十九日

亟盼部撥片

再接准

行在戶部咨行議覆臣等去年十二月二十九日具奏代放烏里雅蘇台卡餉項科布多力難兼顧請暫由該管將軍自行籌辦一摺奏稿內稱該處同處邊疆自宜兼籌並顧仍令臣等照章辦理不准稍有推諉等語既奉部臣嚴駁自當無論如何爲難勉力支應曷敢再瀆惟臣等委曲下情仍有必須陳明者查去年科布多光景竭蹶萬分即臣等應支廉俸亦皆墊入實是自顧不暇萬無餘力他及台站卡倫應放餉項必須實有現銀斷非空言所能了事是以據實奏請該城自辦係爲恐致貽誤起見亦因去年烏里雅蘇台尙奉戶部於山西籌備餉需項下撥給有著之欸五萬兩聞在常額經費之外與科布多辦防並未奉部撥給有著之欸者難易大有不同若非九月奉

旨特敕撥銀一萬兩科布多幾無可指之項又知烏城辦防僅以蒙兵二千備調二百護城用欸原屬無多計將台卡餉項暫歸該城自放亦非無欸支發至去年山西欠解科布多後半經費雖經戶部代墊然仍是去年額餉一俟領到尙應將去年欠發餉欸一律補給而所云台卡餉需則係今年應放之欸雖經戶部責令照章辦理但無米爲炊究難保無貽誤惟

盼臣等另摺所陳由部酌量墊撥俾還商欠之請能邀部臣體察邊艱肯照接濟烏城之案並准撥發則臣等尚可於清還該商後續議挪借以爲騰展敷衍之計蓋俗語有云好借好還再借不難亦實情也至部臣關懷大局慮及故分畛域有意推諉則臣等斷斷不敢出此所有科布多刻下尙無指項與烏城情形不同亟盼部撥各緣由理合附陳伏祈

聖鑒訓示謹

奏 光緒二十七年四月二十一日拜發

本年六月二十四日遞回奉

硃批覽欽此 五月十九日

遵照部議查明節年倒牛數目仍請照章按照市價買補摺

奏爲遵照部議查明屯田耕牛節年例倒數目詳晰覆陳並經查出按照市價購買疊奉戶部

奏准有案臣等前奏本及詳覈緣由恭摺仰祈

聖鑒事竊於本年三月二十七日接奉

行在戶部咨行議奏臣等前奏屯田耕牛請照市價採買實用實銷等因一片原奏內稱查

例載採買牲畜牛每隻銷銀四兩四錢科布多屯田耕牛每年十分內准報倒斃八釐均有定例可循自應照例辦理並令將節年報倒數目查核明確詳晰奏覆再行覈辦等語自爲恪循例章慎重欸項起見當飭糧餉章京榮泰管屯換防參將祥祐一併詳查具報茲據稟覆前來臣等覆加查覈科布多屯田耕牛每屯額定五十六隻十屯共五百六十隻按十分每年應報倒八釐共四十四隻溯維科布多置屯之始皆係

特發鉅帑督以重臣牛籽農器悉從寬備嗣定牛隻由塔爾巴哈台調取後因塔城失陷無從撥用至同治八年前大臣奎昌始奏請由庫存餉內每年撥銀三百兩爲買補之需奉

旨允准而自同治九年起至光緒三年止奎昌保英任內陸續買補倒牛均已每隻按市價銀十二兩戶部均有奏案可稽查屯田耕牛例倒及採買現既經部臣申明舊例自當遵照辦理惟查臣等前次片奏例價不敷屢經部駁各情係僅據管屯參將所稟且衆口一辭故舉以入

告未及詳查舊卷此次奉到部咨行令確查詳奏臣等遵即飭查因該章京參將仍未能確切查明復經臣等檢齊牛事所有戶部來文及各前任奏咨稿件悉心查閱始知照例採買與逾額報倒係屬判然兩事前大臣清安任內光緒七九十一三年報倒六百十三隻沙克

敕下科布多參贊大臣及管屯各官照例分賠等語兩奏均奉旨依議欽此夫部臣原奏一則曰按照市價尙係因時變通一則曰按照市價撙節買補是部臣於邊城瘠苦情形早已加以體諒至該參將祥祐自管理屯務以來已閱四年因誤會部咨以爲牛價必須按照四兩零恐干賠累故節年所報倒斃辦理極爲小心而自光緒二十三年起即未照額補足其是年一年實共倒牛一百一十五隻係歸前屯田遊擊松恩任

內除逾額多倒七十一隻已據分賠其例額應補之牛既未買補又值光緒二十四年正月二月續倒二十三隻是以前大臣寶昌查係前後應補六十七隻即於是年三月購買五十二隻光緒二十四年三月至年底又倒二十隻光緒二十五年一年共倒三十四隻光緒二十六年一年共倒六十六隻除去逾額之二十二隻應歸賠補統計光緒二十三年起至光緒二十六年止此四年共實倒一百六十五隻寶昌先已買補五十二隻實尙應補一百一十三隻此臣等前奏所以有請添百隻之請也在臣等所請仍是以添爲補合計尙不足額然今年如能少倒尙可少補於欸項即可節省總之成例不能不守然亦不能太拘如例倒四十四隻若值不遭災疫則倒斃自少即當按實數開除買補似可不必故爲捏飾多造虛數以足例額也且由塔調取之例既已不能復舊則自行講買亦不妨隨時斟酌即例文於四兩四錢下尙有但各省情形不同應各按時值撙節辦理之語可以見矣至耕牛爲農日所需其用甚廣其值亦昂臣等嘗詢之農人云買牛一隻多需三十餘兩少亦二十餘兩至四五兩則牛犢耳難以用之耕田此固各省皆然若科布多之十二兩能購一隻尙因爲成案所縛牽就少報實則去年市價每隻非十四五兩不可早年尤無定衡且臣等前赴該屯親見牛隻皆極茁壯若在內地必值二三十兩而欲繩以老年初定之例價則誠如

上諭嘉慶道光以來豈盡雍正乾隆之舊此時勢不同早在

聖鑒中也查該參將赴武夫不明例案其情尙有可原且未逾額領價於帑項不敢濫支其誤稟之處即請免議至牛事原委既經查明臣等已將戶部從前兩次奏咨各稿照鈔隨報咨部查覈應仍仰懇

天恩俯念採買例價實難遵辦

准照戶部奏准成案辦理實於農工有裨但時值無定物力日艱恐後來援案漸加亦非節用之道並請即以十二兩作爲定價不准再有加增以示限制而昭覈實至寶昌任內買補墊款六百二十四兩茲既查明准案應即歸入常年報銷檮昧之見是否有當理合繕摺覆

陳伏祈

皇太后

皇上聖鑒訓示再口外天氣雖寒而向於小滿以前已須播種牛隻實係不敷若必拘候部示再購恐誤農期只得權宜辦理已飭先買六十隻仍照市價餘俟奉到部示再行添補合併聲明謹

奏 光緒二十七年四月二十一日拜發

本年六月二十四日遞回奉

硃批戶部知道欽此 五月十九日

具報屯田播種日期開單呈 覽摺

奏爲十屯播種完竣繕單

奏報仰祈

聖鑒事竊照科布多屯田向於每年春雪消化地氣開通始行播種前於芒種前後飭令管屯官弁將倉存籽種大麥小麥青稞七百石提出陸續布種並先疏導河渠俾資灌溉茲據報於四月二十一日一律完竣至臣瑞洵面奉

諭旨敕令體察情形籌辦開墾事宜查科布多不乏膏腴早年墾地較廣不止十屯舊迹尙堪覆按似不宜聽其久荒祇以蒙古無力自種若全由官辦一切牛具工賃需款甚鉅已由臣瑞洵於略陳科布多應辦事宜摺內聲明請

旨將來如應議行自須妥籌撙節辦法合將十屯播種動用籽糧數目謹繕清單祇呈御覽伏祈

皇太后

皇上聖鑒謹

奏 光緒二十七年五月十九日拜發

本年七月三十日遞回奉

硃批知道了欽此 六月十九日

謹將十屯播種動用籽糧數目繕具清單祇呈

御覽

計開

小麥三百八十石

種地五十二頃七十七畝七分七釐

大麥七十石

種地十一頃六十六畝六分六釐

青稞二百五十石

種地四十一頃六十六畝六分六釐

十屯通共種地一百六頃十一畝九釐

會奏都蘭哈喇並無私挖摺

奏爲循章派查都蘭哈喇地方並無偷挖鉛砂情形恭摺具報仰祈

聖鑒事竊查札哈沁部落都蘭哈喇地方舊有鉛鑛久經封禁向由科布多新疆兩處各派官兵於每年三月十五日前往該處會查有無私挖前因新疆巡撫饒應祺前參贊大臣寶昌會

奏開辦札哈沁寶爾吉鉛鑛遂將會查都蘭哈喇挖鉛一節停辦迨去年六月臣瑞洵接任查悉都蘭哈喇寶爾吉係屬兩處禁弛本不相涉當復札飭札哈沁總管等仍循舊章隨時巡查以重邊禁在案本年三月適屆會查之期當經預咨該撫饒應祺照章辦理旋據巴里坤鎮總兵接奉該撫照會已經揀派委員臣等亦即派委筆帖式錫齡阿帶領兵丁馳往都蘭哈喇地方於三月十五日會同巡查茲據該員等稟稱查得該處並無偷挖鉛砂情形取具該總管等印結稟請覈

奏前來除飭札哈沁總管等隨時稽查外理合繕摺具報伏祈

皇太后

皇上聖鑒謹

奏 光緒二十七年五月十九日拜發

本年七月三十日遞回奉

硃批知道了欽此 六月十九日

新疆撫藩接濟邊餉力全大局派員赴領片

再前因籌布邊防需款急切曾經奏奉

批旨著即咨商新疆巡撫暫行墊撥欽此當於今春正月恭錄咨行撫臣饒應祺欽遵辦理近接該撫咨覆以科布多同處邊防稔知危迫實情已商同藩司文光於無可設法之中勉強湊湘平銀二萬兩暫應急需並函屬臣以科布多籌辦一切應可自行請欸

朝廷俯察邊艱當必仰邀

恩准若恃新疆借墊難爲後繼等語情辭懇至自屬推誠之論臣等現已遴派委署主事文憲帶領蒙漢官兵前往該省請領解回應用查去秋奉

旨令臣妥籌布置聯絡一氣扼要嚴防臣遵即咨會饒應祺等一體遵辦因科布多接近新疆防務尤資商權自是該撫於臣書牘常通消息無滯且深諒臣爲難公事多所關照臣甚德之茲復撥節欸項接濟邊需尤徵力維大局不分畛域藩司文光當時艱帑絀之際並能

誼篤恤鄰不稍諉卸均於科布多裨益匪淺臣等籌邊竭蹶慚荷尤深理合專達

上聞伏祈

聖鑒至此欸一俟解到應歸入防案支用擬將欠借商欸暨蒙兵欠餉酌量分還補放謹

奏
光緒二十七年五月十九日拜發

本年七月二十日遞回奉

硃批知道了欽此
六月十九日

昌吉斯台卡倫侍衛報滿請獎並懇留三年摺

奏爲卡倫侍衛報滿照章請獎並懇援案再留三年以示鼓勵而資熟手恭摺仰祈

聖鑒事竊查科布多所屬卡倫侍衛三年期滿例得

奏請獎敘如果得力並准

奏留三年均經奏奉

俞旨欽遵有案茲據昌吉斯台卡倫侍衛英絨稟稱竊職係正黃旗滿洲五甲喇祥存佐領

下人由三等侍衛於光緒二十四年六月十八日經侍衛處

奏明派往科布多昌吉斯台卡倫遵於是年九月初一日自京起程十一月十一日馳抵昌

吉斯特卡倫卽於是日接受圖記計自任事之日起算至光緒二十七年十一月十一日係屆三年期滿理合遵章先期豫報伏候

奏明更換等情稟請覈辦前來查該卡倫侍衛管理昌吉斯台烏遜胡濟爾圖胡木蘇託羅蓋霍通淖爾四卡均接強鄰有防守邊界牌博之責稽查彈壓胥關緊要且遇俄人往來並須照約保護去秋邊防戒嚴卡座益形喫重時虞侵軼該侍衛英紱駐守以來尙稱得力不無微勞足錄擬乞

天恩將該侍衛英紱

賞給三品頂戴以示鼓勵惟現在大局未定照章派換恐尙不無窒礙查光緒九年前瑪呢圖噶圖勒幹卡倫侍衛富保曾經期滿奏留奉

旨俞允臣等公同商酌合無仰懇

聖慈准將該卡倫侍衛英紱再留三年俾收駕輕就熟之效出自

逾格鴻施謹繕摺陳請伏祈

皇太后

皇上聖鑒訓示謹

奏 光緒二十七年五月十九日拜發

本年七月三十日遞回奉

硃批著照所請該衙門知道欽此 六月十九日

科布多並無應鈔路鑛事件片

再承准管理總理各國事務衙門慶親王奕劻咨開京城上年猝遭兵燹鐵路鑛務總局檔案全行遺失行令將有關路鑛來往奏咨文件以及表譜合同一律補送以憑覈辦等因查科布多所屬各蒙古部落僅許俄人通商向無興造鐵路之事至鑛務祇有札哈沁寶爾吉鉛鑛一處係歸新疆開辦現亦據該撫奏停惟聞烏梁海游牧阿勒泰山鑛苗不乏俄人素所豔稱阿勒泰蒙古譯言金也故阿勒泰山古名金山該處早經借與塔爾巴哈台尙未交還臣瑞洵曾於上年八月間具奏遵查科布多鑛產不豐擬請緩辦摺內附陳阿勒泰山將來如能遵

旨索還或可勘察情形設法辦理欽奉

批旨著照所請該衙門知道欽此現在科布多並無應行鈔錄鐵路鑛務事件自可不必補送除咨呈總理衙門查照外爲此附片謹

奏 光緒二十七年五月十九日拜發

本年七月三十日遞回奉

硃批該部知道欽此 六月十九日

馳報科布多幫辦大臣出缺請 旨簡放摺

奏爲科布多幫辦大臣因病出缺請

旨簡放以重職守繕摺馳陳仰祈

聖鑒事竊於本年六月十二日據幫辦大臣祿祥之子閑散福勒洪阿遣丁呈報伊父祿祥於去年十月即患痰症入夏又加股足浮腫痰喘大作醫藥無效延至六月十二日子刻出缺呈請具

奏前來臣伏查該故大臣祿祥患病半年終致奄逝邊缺清苦家計蕭條殊堪憫惻尙幸該眷屬均隨任所臣當經派委章京等幫同該家屬將其身後事宜妥爲料理復查該故大臣持躬謹飭辦事老成臣遇事與之權商毫無掣肘方冀長資臂助竟不料其一病不起伏維朝廷體念邊臣優逾常格可否將該故大臣祿祥

賞給卹典之處出自

天恩非臣所敢擅請所遺員缺職司幫辦應請

迅賜簡放該故大臣譚語昏迷並未據交有遺摺所有幫辦大臣出缺請
簡各緣由理合繕摺馳陳伏祈

皇太后

皇上聖鑒謹

奏 光緒二十七年六月十四日具奏

七月初十日奉

硃批另有旨欽此

散木居奏稿卷之七

門人鈴木吉武校字

散木居奏稿卷之八

幹難 瑞洵

紆轡集 光緒辛丑十月

謝抵銷處分摺

糧餉章京報滿已越年餘亟須新任接替請飭吏部照例辦理摺

期滿糧餉章京照例出考保奏片

更正筆誤片

派員致祭片

奏保卡倫侍衛常陞三年期滿懇予恩施並再留三年摺

裁撤籌防處片

裁撤駐卡偵探片

裁撤駐台片

滿員保獎摺

滿兵留駐片

並無吏役片

俄官到科照約款待支應片

欠餉無著懇 恩體恤敕部核示摺

餉項支絀現在情形片 以上初八日拜發

請 簡杜爾伯特左翼正盟長摺

代 奏杜爾伯特固山貝子納楚克多爾濟叩謝 天恩摺

揀補俄商局筆帖式摺

奏調綏遠城換防新兵到科片

請假兩月片 以上二十八日拜發

謝抵銷處分摺

奏爲叩謝

天恩仰祈

聖鑒事竊臣前因陳奏失辭自行檢舉奉

硃批瑞洵著交部議處欽此現准兵部咨開 臣應得處分經部 臣議以罰俸六箇月奏奉

硃批准其抵銷欽此恭錄咨行欽遵到城臣當即恭設香案叩頭謝

恩伏念臣待罪邊垂毫無績效猥慚愚戇屢荷

優容每思稱職之未能愈覺受

恩之難報茲復幸逢

寬政

特宥前愆循省五中倍增感悚臣惟有堅持初節益竭愚誠將邊防洋務及地方一應事宜實力講求悉心籌辦不敢稍涉疏懈冀仰答

高厚生成於萬一理合繕摺叩謝

天恩伏祈

皇太后

皇上聖鑒謹

奏 光緒二十七年十月初八日拜發

本年十二月十一日遞回奉

硃示知道了欽此 十一月初八日

糧餉章京報滿已越年餘亟須新任接替請 飭吏部照例辦理摺

奏爲科布多糧餉章京報滿已越年餘亟須新任接替請

旨敕部照例辦理恭摺仰祈

聖鑒事竊據辦理糧餉事務章京委署主事翰林院筆帖式榮泰稟稱竊榮泰係由

記名理事同知翰林院筆帖式於光緒二十二年九月初四日經吏部帶領引

見奉

旨科布多糧餉章京著榮泰去欽此當於二十三年四月二十日馳抵科布多接受關防任

事嗣於二十四年三月蒙前大臣寶昌祿祥因榮泰清釐欠餉出力附片

奏保請以理事同知班先帶領引

見先換同知頂戴奉

硃批著照所請該部知道欽此計自到差連閏扣算至二十六年三月二十日係屆三年期

滿當經前大臣寶昌具摺奏請

敕部照例更換欽奉

硃批該部知道欽此適因軍務猝興吏部未即覈辦旋於二十六年八月間又蒙

奏請留營差委奉

硃批著照所請該部知道欽此伏查現在和局已定糧餉章京自應仍請照例更換擬懇准予奏催等情前來臣查現任糧餉章京委署主事翰林院筆帖式榮泰去年三月二十日即已三年屆滿業經前大臣寶昌等奏請更換旋值軍事猝啓吏部未及覈辦迨臣到任復因布置邊防需人亟切附片

奏請將該員榮泰留營差委欽奉

硃批著照所請該部知道欽此臣初意原以邊地乏員藉資指臂其報滿一節既經前大臣出奏臣卽未便辦理兩歧是以將其留營而未請留差也茲者欵議已定大局敕平

聖駕

回鑾庶政就理竊計部院各署公事自必率由舊章所有科布多糧餉章京一差相應請旨敕下吏部照例辦理所有糧餉章京亟須新任接替請
敕照例辦理緣由理合具摺馳陳伏祈

皇太后

皇上聖鑒謹

奏 光緒二十七年十月初八日拜發

本年十二月十一日遞回奉

硃批該部知道欽此 十一月初八日

期滿糧餉章京照例出考保奏片

再查定例科布多辦理糧餉事務章京三年期滿如果得力應由參贊大臣等奏保歸於奉旨卽用班內升用其所遺差缺另請更換俟交替後再將年滿之員給咨回

京補行引

見節經循辦在案查該章京榮泰報滿時正值前大臣寶昌奉

旨開缺查辦故於

奏請更換摺內未便出考臣覆查該糧餉章京

記名班先理事同知委署主事翰林院筆帖式榮泰供差勤慎人尙老成經管糧餉已逾四年毫無貽誤自應俟新任章京到差交替後卽由臣給咨該員赴部引

見恭候

恩施惟該員現因留於科布多差委一時尙難遽令離營若必俟引

見後始得升用轉致久虛獎敘查前任糧餉章京委署主事奎烜卽在留差期內經吏部於奉

旨後將其升補

盛京戶部主事有案今該員榮泰事同一律應懇

天恩敕部查照辦理出自

鴻慈逾格除咨吏部查照外理合附片陳請伏祈

聖鑒訓示謹

奏 光緒二十七年十月初八日拜發

本年十二月十一日遞回奉

硃批該部知道欽此 十一月初八日

更正筆誤片

再臣三月間覆奏查明屯田耕牛節年例倒數目並經查出按照市價購買疊奉戶部奏准有案一摺內云買牛一隻多需三十餘兩少亦二十餘兩至十餘兩則牛犢耳難以用之耕田等語查十餘兩則牛犢耳句臣底稿係四五兩原指例價而言繕寫竟誤四五爲十餘以

致前後牴牾臣接奉回摺始經看出相應

奏明更正除咨戶部查照外爲此謹

奏 光緒二十七年十月初八日拜發

本年十二月十二日遞回奉

硃批戶部知道欽此 十一月初八日

派員致祭片

再據杜爾伯特右翼盟長親王索特納木札木柴呈報本部落副盟長札薩克多羅貝勒圖們濟爾噶勒之祖母喇什棟嚕布於本年五月十七日病故等情呈報前來臣查理藩院則例內開貝勒貝子公夫人等身故交該處將軍大臣派員暨駐劄司員等就近前往致祭羊酒價銀於該處公項下動用徑報戶部覈銷又貝勒貝子公夫人均無祭文等語今杜爾伯特右翼副盟長札薩克多羅貝勒圖們濟爾噶勒之祖母喇什棟嚕布病故查係貝勒夫人自應由臣就近派員前往致祭無庸請

頒祭文其應需羊酒價銀動支科布多公項咨報戶部覈銷爲此附片謹

奏 光緒二十七年十月初八日拜發

本年十二月十一日遞回奉

硃批知道了欽此 十一月初八日

奏保卡倫侍衛常陞三年期滿懇予 恩施並再留三年摺

奏爲卡倫侍衛報滿照章請獎並懇再留三年以示鼓勵而資諳練繕摺具陳仰祈

聖鑒事竊查科布多所屬卡倫侍衛三年期滿例得

奏請獎敘如果得力並准

奏留三年均經奏奉

俞旨欽遵在案茲據管理瑪呢圖噶圖勒幹卡倫侍衛常陞呈稱竊職係鑲黃旗滿洲五甲喇隆秀佐領下人由空花翎護軍校經侍衛處具

奏派往科布多駐守瑪呢圖噶圖勒幹卡倫光緒二十五年正月十九日抵卡接收圖記任事連閏扣至光緒二十七年十二月十九日係屆三年期滿理合遵章先期豫報伏候

奏明更換等情呈請覈辦前來查該侍衛管理瑪呢圖噶圖勒幹即阿拉克別克與阿克塔斯金森阿什齊塔木塔克薩斯諸卡接近強隣有防守邊界牌博之責稽查維護均關緊要去年軍務猝興俄於阿拉克別克河屯兵運械咄咄逼人該侍衛擋拄其間尙知事關大局

未貽口實其三年以來所管卡座亦均無事洵屬有勞可錄相應仰懇

天恩將該侍衛常陞請以副護軍參領補用先換頂戴以示鼓勵其更換一節本應照辦惟查昌吉斯台卡倫侍衛英紱三年班滿前經臣

奏請再留三年已奉

批旨俯允該侍衛常陞較英紱尤爲得力合無籲求

聖慈准將該侍衛常陞並留三年益資諳練出自

逾格鴻施謹繕摺

奏請是否有當伏祈

皇太后

皇上聖鑒訓示謹

奏 光緒二十七年十月初八日拜發

本年十二月十日遞回奉

硃批著照所請該衙門知道欽此 十一月初八日

裁撤籌防處片

再前因遵

旨備邊於去年七月十二日奏明設立籌防處遴委總辦會辦筆帖式等員辦理防守事宜嗣因蒙兵雖經減撤軍務並未解嚴該處尙有應辦之事且月需無幾是以暫留茲查欵議告成邊防稍緩當於五月底將籌防處裁撤惟科布多切近彼疆防維難弛臣仍當隨時戒備不敢大意所有裁撤籌防處緣由理合附陳伏祈

聖鑒謹

奏 光緒二十七年十月初八日拜發

本年十二月十一日遞回奉

硃批知道了欽此 十一月初八日

裁撤駐卡偵探片

再科布多所管昌吉斯台瑪呢圖噶圖勒幹等八卡倫均與俄界毗連前因遵

旨備邊復奉

諭令臣確探嚴防隨時具奏先已選派所練蒙兵前往扼紮以助聲勢復遴委弁兵字識共十六名分駐各卡嚴密偵探遇有俄人舉動立時馳報業於去年七月十二日遵籌布置摺

內陳明在案一年以來幸無貽誤此項坐探弁兵駐卡寒苦因每名月加津貼銀四兩從去年六月起支現在欸議告成邊烽漸息已將該弁兵於本年五月底悉行撤回津貼亦即停給爲此附片謹

奏 光緒二十七年十月初八日拜發

本年十二月十一日遞回奉

硃批知道了欽此 十一月初八日

裁撤駐台片

再科布多東南兩路台站並管接遞新疆文報去年秋間軍務喫緊伊犁塔爾巴哈台烏魯木齊各城摺報公文多由該台馳遞臣以事係戎機宜期妥速因循照光緒二十一年遵旨整頓台站辦法委員駐台督率當於東十四台之哈喇烏蘇南八台之搜濟分派筆帖式兩員帶領兵書各二名前往經理並嚴飭蒙古員弁必須隨到隨遞勿許刻延此項官兵自去年七月初一日派駐已於今年五月底撤回此差較苦前案尚有津貼官每員月加銀八兩兵書每名月加銀四兩此次臣加以覈減官二員各給銀四兩兵書四名各給銀二兩共開支十二箇月至上次在台經理文報員弁尙經奏獎今情事稍殊應請毋庸溢保理合附

片陳明伏祈

聖鑒謹

奏 光緒二十七年十月初八日拜發

本年十二月十一日遞回奉

硃批知道了欽此 十一月初八日

滿員保獎摺

奏爲綏遠城換防員弁三年班滿照章酌保繕摺具陳仰祈

聖鑒事竊查前於光緒十四年間因換防員弁遠戍寒邊異常勞苦經前大臣沙克都林札布等援照烏里雅蘇台奏案擬於換班屆期擇尤酌保一次以示鼓勵奏奉兵部議覆准將三部院候補筆帖式及委署筆帖式並委驍騎校各員令於換班時擇其尤爲出力者酌保數員等因節經循辦在案茲綏遠城換防人員三年期滿自應照章酌保以昭激勸查該員弁遠戍荷戈餉微差苦去年遄

旨備邊尤多出力不無微勞可錄惟該員等向由候補筆帖式委署筆帖式及委驍騎校皆保以本城驍騎校補用現查堪行列保者祇有補用驍騎校候補筆帖式溥湧吉林委驍騎

校恩騎尉吉拉敏候補筆帖式麟慧委署筆帖式金奇遲五員其溥湧吉林兩員均已得有
驍騎校升階不便重複再保自可另請獎敘擬將補用驍騎校候補筆帖式溥湧吉林均俟
補缺後

賞給四品頂戴委驍騎校恩騎尉吉拉敏候補筆帖式麟慧委署筆帖式金奇遲均請以驍
騎校儘先補用以上五員所請雖半與成案未符然於保舉限制並無違逾茲值變通政治
之時可否照擬給獎出自

天恩除飭取該員等履歷咨部外所有酌保換防員弁緣由理合繕摺陳
奏伏祈

皇太后

皇上聖鑒訓示謹

奏 光緒二十七年十月初八日拜發

本年十二月十一日遞回奉

硃批著照所請該部知道欽此 十一月初八日

滿兵留駐片

再綏遠城換防官兵揀充候補委署筆帖式及委驍騎校各員遇有當差得力與熟悉地方情形者每於換防屆期均經留駐一班甚有連駐三四班者蓋口外係蒙古游牧往來文牘多需繙譯每有差遣更資蒙語新兵初學斷非三數年不能明澈故必久於是地者方克收駕輕就熟之效茲查候補筆帖式溥湧吉林麟慧委署筆帖式金奇暹該四員滿蒙文義均好蒙語亦頗通曉應請照章均予留駐俾供指使除咨兵部查照外理合附片陳明伏祈聖鑒謹

奏 光緒二十七年十月初八日拜發

本年十二月十一日遞回奉

硃批兵部知道欽此 十一月初八日

並無吏役片

再准吏部來咨以欽奉

諭旨裁汰吏役令卽欽遵辦理並定簡明章程分別咨報吏部暨政務處查覈等因查科布多係防戍軍營舊設三部院續設稽察俄商局向以章京筆帖式等員分任辦事除糧餉章京係用京員餘皆取材綏遠城換防弁兵積功洊升類能識滿蒙文字文稿多由撰擬至承

繕則用綠營防兵謂之字識辦理多年尙無貽誤迨臣到任於公事加意推求每遇重大事件臣亦即自行屬稿或令該員等擬作妥爲覈改旋以事須愼密又於臣署設立籌邊文案處遴員辦理取便督率經已附陳在案年餘以來似覺漸有條理口外情形迥與內省不同並無書吏亦無差役惟在官即易滋弊而無人不可作弊仍當時加查察有犯必懲期仰副朝廷奮除積習力圖自強之盛意除分別覆報吏部政務處查照外謹附片陳明伏祈

聖鑒謹

奏 光緒二十七年十月初八日拜發

本年十二月十一日遞回奉

硃批知道了欽此 十一月初八日

俄官到科照約欸待支應片

再俄國駐紮庫倫匡蘇勒官施什瑪勒福每屆三年前來西北查閱邊界商務前准庫倫烏里雅蘇台來咨屬爲支應該匡蘇勒旋於八月初九日行抵科布多連日會晤與臣議辦商務交涉數事已於八月十三日取道北台沙拉布喇克前往彼闊什雅某頓城臣派員護送至索果克卡倫而還此次臣照約欸待飭台支應該匡蘇勒感激

朝廷德意以故尙少要求惟於保護俄商各節諄懇設法詞意迫切容臣咨商外務部妥籌辦理至酌送該臣蘇勒羊隻米麪甄茶等項計共用銀三十六兩零已飭於房租項下動支除分咨查照外理合附片陳明伏祈

聖鑒謹

奏 光緒二十七年十月初八日拜發

本年十二月十一日遞回奉

硃批該部知道欽此 十一月初八日

欠餉無著懇 恩體恤敕部核示摺

奏爲戶部指撥晉豫兩省籌解欠餉現接晉撫來咨已經

奏免豫撫亦無允協信息邊情仍前窘迫商蒙借欠各款無法措還惟有籲懇

天恩俯賜體恤抑

敕部臣妥籌辦法示遵俾全危局無失大信具摺披瀝直陳仰祈

聖鑒事竊臣於上年十一月間

奏奉部議令由河南山西兩省籌解欠餉俾還商蒙欠款嗣以欠款實難久延晉豫籌解不

足濟急又於本年四月二十一日瀝情懇

恩仍

敕戶部暫將此項從減墊撥俾資清理以昭大信而顧地方專摺具

奏奉

硃批戶部議奏欽此旋經部議以所欠商款五萬兩欠發兵餉銀一萬三千五百餘兩前既議令河南山西兩省於欠解科布多餉銀內設法籌解現在該二省時局漸紓自應仍令該二省將積欠該城餉銀按照該大臣此次減撥數目各騰挪若干分批起解俾得清理欠款所請由部墊撥之處仍應毋庸置議等因奏奉

諭旨依議欽此咨令欽遵到城臣當即咨商該兩省撫臣並致手書切屬接濟旋岑春煊來函內稱籌解舊欠論晉力實萬不及既承切屬爲歸還借款要需自應飭司設法酌籌數目多寡不敢預必等語臣披閱之下深以爲慰方謂該撫果能力顧大局不分畛域非久必有以應急不至徒託空言且即指此以許承借各商一面派委委員前往太原請領不料至十月初三日忽接該撫來文咨送摺稿乃知該省已於八月十四日專摺具

奏烏科二城欠款仍照原案分年湊還每城二千五百兩以紓晉力竟不能勉照部議辦理

矣臣至此方悔函牘交馳委員提解不但無裨餉需轉復徒增勞費仰人鼻息其難如此推而至於河南亦必不肯籌撥可知臣伏思去年辦防借墊商款欠發蒙餉一案經臣一再疏懇請由部墊原係迫於無可如何並非不知體念部臣籌畫之難即部臣於常年經費則兩次代墊於欠借各款則令晉豫酌解舊欠亦深諒邊計之不易欠餉之應還故令籌款以資接濟誠以辦防乃是偶然不爲常例僅止協解一次各予三二萬金在該二省庫帑不至重絀而邊遠瘠區即蒙大惠初非責令從此源源撥解多多益辦富科布多以窮該省也細繹部咨旣曰設法籌款又日照減撥數目騰挪若干可見部臣具有斟酌毫無畸輕畸重即臣屢經被駁亦不能不服其公允臣自幼讀書粗明大義旣不能爲

國家理財亦尙知爲

國家節用本不欲以邊方區區之款屢瀆

宸聽無如勢處萬難旣不能自行設籌又不能徧向他省告貸止此晉豫欠款尙係一綫生機若竟如該撫辦法則科布多應還商款蒙餉旣不能雨自天復不能出自地更從何處張羅臣處此窮荒無告之區又值商蒙交困之際實屬智盡能索難爲無米之炊至該撫摺內敘及科城二十六年後半及二十七年前半經費暨前撥防餉一萬兩由部墊撥到晉均已

陸續委解此時當已得資接濟等語查所云部撥後半前半均係常年經費不與防欸相干即使略有借動終須撥還且寅支卯糧尙虞支絀並查去年部墊經費早已解到動用無餘其今年之前一半經費應抵春夏兩季額支之項且先設法分別墊欠餉到即當還補至秋冬兩季已成懸欠若該省仍不協給即又無法可施是得資接濟之說似尙未悉窮邊實在情形況待用萬緊餉到便須動支亦無餘欸可以存儲若止算入帳不算出帳則內而戶部外而各省應存帑項當不勝其多戶部可以不必爲難矣臣焦灼萬分急病交迫自恨才短無術補苴惟有仰懇

天恩再賜體恤抑或

敕令部臣妥籌辦法示遵務期欸項有著庶以藉全危局無失大信臣不勝感激理合具摺披瀝直陳伏祈

皇太后

皇上聖鑒訓示施行謹

奏 光緒二十七年十月初八日拜發

本年十二月十一日遞回奉

硃批戶部議奏片併發欽此 十一月初八日

餉項支絀現在情形片

再去年籌布邊防辦理蒙團一切用款除動挪庫存正項及平餘雜款之外僅得

特旨撥給庫平一萬兩新疆借墊湘平二萬兩折合庫平已少八百兩又由該省扣除鞘釘各項銀兩計實解到庫平銀一萬九千一百九十四兩零此外別無協濟之款計此不足三萬金不過僅敷留兵五百一年餉需臣原擬將新疆借款分別酌還商墊補發原欠蒙餉前已附片

奏明惟前因留兵乏餉咨請

行在戶部覈示現准咨覆謂此項留兵歲支餉需本部實未能如數發給應由該大臣自行奏明裁撤等語臣奉咨之下甚屬爲難蓋此項留兵論彈壓地方固屬不足在保護洋商尙稱有用八月間俄駐庫倫臣蘇勒施什摩勒福過此議及護商一節甚爲著意且有去秋俄商密海勒阿克索諾福及蒙古工人前往阿爾泰山一帶收取欠帳查無下落一案百計密訪尙無頭緒未能辦結臣業於夏間咨明總理衙門並以牽涉借地尙在會商塔爾巴哈台查辦若不稍資兵力以後洋商實難空言保護誠恐所省者小所失者大第有兵無餉孫吳

亦將束手況以臣之迂拙無才尤不能保平安無事臣亦不敢與部臣相抗只得勉爲遵辦且看裁撤後情形如何至欠餉纍纍部臣既覆以未能撥給則臣自當設法料理除

特賞之一萬兩本係因留兵撥給應以抵支月餉其新疆借墊之一萬九千一百九十四兩自可併爲此項兵餉之用即不能再顧及當日商墊初欠蒙餉仍是絲毫不能歸還不能補發總之邊遠瘠區向資內協以較東北新疆且不過九牛之一毛況去年沿邊沿江沿海無不設防即無不需餉恐未必能以數萬金救急應變均在部臣籌慮之中尤難逃

聖明洞鑒若都如山西待科布多辦法竊恐將引爲前車之戒無敢實心任事者矣查烏里雅蘇台去年曾奉戶部撥給的餉五萬兩故該城得資接濟今科布多應得晉豫兩省撥解舊欠均難指準可否請

敕部臣暫籌接濟俾應急需而顧邊局伏候

聖裁所有餉項支絀現在情形謹附片陳明伏祈

聖鑒

訓示臣不勝惶悚謹

奏 光緒二十七年十月初八日拜發

本年十二月十一日遞回奉

硃批覽欽此 十一月初八日

請 簡杜爾伯特左翼正盟長摺

奏爲請

簡正盟長員缺以重盟務繕摺具陳仰祈

聖鑒事竊查杜爾伯特左翼正盟長札薩克固山貝子察克都爾札布因病出缺所遺正盟長一缺前經臣附片

奏明以杜爾伯特左翼副將軍達賚汗噶勒章納木濟勒暫行署理一俟揀選妥協再行請簡奉

硃批該衙門知道欽此欽遵在案茲經臣將杜爾伯特左翼應備揀選正盟長之汗王貝勒貝子公等除年未及歲者毋庸行取外餘均飭調來城詳加察看該王貝勒貝子公等或資序尚淺或歷練未深惟查有現署正盟長副將軍達賚汗噶勒章納木濟勒精明強幹熟悉情形暫署以來辦理盟務毫無貽誤且爵秩較崇以之補授洵堪勝任可否即請以現署正盟長副將軍達賚汗噶勒章納木濟勒

簡放杜爾伯特左翼正盟長之處出自

逾格慈施謹將該汗王貝勒貝子公等銜名年歲食俸年分另繕清單祇呈

御覽恭候

欽定伏俟奉到

諭旨臣即欽遵辦理所有開單請

簡正盟長員缺以重盟務緣由理合繕摺具陳伏祈

皇太后

皇上聖鑒謹

奏 光緒二十七年十月二十八日拜發

二十八年正月初六日遞回奉

硃筆圈出杜爾伯特左翼署正盟長副將軍達賚汗噶勒章納木濟勒欽此 十一月二十五日

謹將杜爾伯特左翼應補正盟長汗王貝勒貝子公等銜名年歲食俸年分敬繕清單祇呈

御覽

署正盟長副將軍特固斯庫嚕克達賚汗噶勒章納木濟勒現年四十八歲食俸三十二年

副盟長札薩克多羅貝勒納遜佈彥現年四十六歲食俸九年

札薩克多羅郡王圖柯莫勒現年二十八歲食俸三年

札薩克固山貝子納楚克多爾濟現年四十三歲食俸五箇月

札薩克輔國公圖都布現年三十歲食俸七年

代奏杜爾伯特固山貝子納楚克多爾濟叩謝 天恩摺

奏爲循例據情代奏叩謝

天恩仰祈

聖鑒事竊前經臣具

奏左翼札薩克固山貝子察克都爾札布遺缺請以伊長子預保二等台吉納楚克多爾濟承襲貝子之爵等因一摺欽奉

硃批著照所請該衙門知道欽此當經轉飭遵照去後茲據杜爾伯特左翼署盟長達賚汗噶勒章納木濟勒呈稱轉據新襲貝子納楚克多爾濟申稱奉到札飭遵即祇詣科布多城萬壽宮望

闕叩謝

天恩訖伏思納楚克多爾濟蒙古世僕未報

國恩茲復渥荷

慈施賞襲貝子之爵惟有勉竭愚誠認真辦理旗務管束所屬保安邊境仰副

聖主高厚鴻慈於萬一並據聲明該貝子尙未出痘例不進京等情懇請轉

奏前來理合循例據情代

奏伏祈

皇太后

皇上聖鑒謹

奏 光緒二十七年十月二十八日拜發

二十八年正月初六日遞回奉

硃批知道了欽此 十一月二十五日

揀補俄商局筆帖式摺

奏爲揀補俄商局筆帖式員缺以重洋務繕摺具陳仰祈

聖鑒事竊查科布多稽察俄商務局筆帖式雲秀前經臣

奏補新添糧餉處幫辦章京員缺業奉

批准所遺筆帖式一缺係應分駐索果克邊卡專辦俄商收繳運照事宜自非堅忍耐勞之員難期得力茲查有補用驍騎校候補筆帖式溥湧公事明白差使奮勉向充臣衙門巡捕於辦理交涉機宜尙知體會以之擬補可無貽誤如蒙

俞允應俟該員五年期滿就武回綏遠城俟補驍騎校後即以防禦遇缺儘先坐補先換頂戴其該員應找支銀糧俟奉

旨之日開支報部仍遇差便給咨該員赴部帶領引

見至遞遺候補筆帖式應由臣揀員充補咨部辦理所有揀補筆帖式員缺緣由謹繕摺具

陳伏祈

皇太后

皇上聖鑒謹

奏 光緒二十七年十月二十八日拜發

二十八年正月初六日遞回奉

硃批著照所請該部知道欽此 十一月二十五日

奏調綏遠城換防新兵到科片

再前准綏遠城將軍咨派委科布多換防委驍騎校蔭監奎廉管帶附生前鋒卓麟繙譯候補筆帖式前鋒興文五品頂戴前鋒恆貴鹿壽繙譯候補筆帖式馬甲成秀繙譯教習馬甲瑞秀五品頂戴馬甲景貴馬甲特合春連瑞養育兵依罕惠陞就便分解部墊光緒二十六年後一半經費銀兩於本年六月初八日自綏遠起程等因茲查該委驍騎校奎廉帶同該兵十一名均於十月二十日到防臣面加考驗分試滿蒙漢文義均能通曉當經分撥各衙門局處當差按例開支銀糧仍俟三月後照章均作為委署筆帖式除分咨查照外理合附片陳明伏乞

聖鑒謹

奏 光緒二十七年十月二十八日拜發

二十八年正月初六日遞回奉

硃批該部知道欽此 十一月二十五日

請假兩月片

再臣於去秋驚憂成疾至冬向愈不料今年自春徂秋屢經觸發加以時局縈心邊務掣肘

憂憤之極益乖調養臣性本卞急自來口外盤錯之區遇事能忍躁氣漸除但鬱悶亦即因之加劇昨於十月初十日晚間忽覺氣逆喉痛竟有積塊壅塞胸膈每食輒噎不能納穀當服祛痰降氣丸藥又以攻伐太過變爲泄瀉現已半月有餘下利不止虛喘漸增委頓殊甚前蒙

恩准採辦藥物而迢遙萬里急切難致刻下患病如此竟至無從施治焦灼實深惟有仰懇天恩賞假兩箇月俾資靜攝免成沈痼其一切公事刻止贖臣一人仍當力疾經理不敢藉耽安逸自外

生成所有臣因病請假緣由理合附片具陳伏乞

聖鑒謹

奏 光緒二十七年十月二十八日拜發

二十八年正月初六日遞回奉

硃批著賞假兩箇月欽此 十一月二十五日

散木居奏稿卷之八

門人鈴木吉武校字

散木居奏稿卷之九

幹難 瑞洵

无藥集 光緒辛丑十一月起十二月訖

札哈沁刺麻磕頭摺

請 頒報匣押封片

擬將蒙古糧折改放本色摺

籌防欸目請開單報銷片

遵保章京筆帖式懇給獎敘摺 附清單

附保出力章京片

附保驍騎校片

請 賞還春普保案片

請催直晉經費摺 以上十一月二十四日拜發

叩謝 天恩摺

蒙旗辦振摺

請動倉糧放振片

筆帖式麟慧咨回原旗片

具報官廠駝馬數目片

請將積年報銷分別陳案新案清理摺

擬派員往勘布渠片

蒙兵放煙賞煙請仍照舊章辦理片 以上十二月十九日拜發

札哈沁刺麻磕頭摺

奏爲

奏

聞事據札哈沁總管三保呈報本旗圖古里克庫倫得木齊喇嘛達爾嘉等十一人前往西
甯棍佈木招磕頭懇請發給照票等情呈報前來臣查向章凡蒙古喇嘛等遇有呈請前往
五台山西甯等處磕頭者一面具

奏一面發給照票令其前往久經辦理有案今札哈沁得木齊喇嘛達爾嘉等呈請前往西
甯棍佈木招磕頭自應照准除由臣發給照票一張暨咨行西甯辦事大臣查照俟該得木

齊喇嘛達爾嘉等磕頭事竣即飭催回旗外理合具摺
奏

聞伏祈

皇太后

皇上聖鑒謹

奏 光緒二十七年十一月二十四日拜發

二十八年正月十七日遞回奉

硃批該衙門知道欽此 十二月十九日

請 領報匣押封片

再科布多向來拜發摺件均用

頒發報匣封遞旋經臣於去年六月復請

賞給

御押兩分奉

旨照准嗣值軍務猝啓

奏事兩次之報匣朱蒙發回當即改用夾板包封馳遞惟驛路經由皆係蒙古台站該官弁夙知報匣爲緊急

奏報遞送迅速往返不過一月有餘今改夾板每視爲尋常公文無論如何檄諭迄未了然故具一摺動須一月光景始能上達

御覽及奉到

批回且須四十日內外事機濡滯頗不放心現幸大局底定臣愚見北路陳

奏事宜似以仍用報匣爲便合無仰懇

天恩從新

賞頒報匣四分

御押四分鑰匙四分以資數

奏如蒙

俞允臣當派員晉

京祇赴辦理軍機處請領謹以附請伏祈

聖鑒謹

奏 光緒二十七年十一月二十四日拜發

二十八年正月十七日遞回奉

硃批著照所請欽此 十二月十九日

擬將蒙古糧折改放本色摺

奏爲邊費日絀不敷周轉擬將蒙古各項官員兵丁應領糧折銀兩援照成案暫放本色以足兵食而節餉力繕摺具陳伏祈

聖鑒事竊臣伏查科布多例支官兵糧糈原係均放本色嗣因存糧不敷滿支改放折色卡倫蒙兵且以一半折放煙茶而遇倉庾較豐年久恐致霉爛或一年放本一年放折或連年全放本色均經

奏明有案查科布多所管台站屯田駐班官學明阿特額魯特兩部落各項蒙古官兵每年應領糧折銀兩向由常年經費項下按半開放惟自上年多事以來常年經費戶部墊撥之外山西應協省分絲毫未給現該省又經

奏明須俟上下兩忙有收方能設法籌解蓋已幾幾乎不可必得矣加以近來整頓一切並未請有專款全仗騰挪濟用現在止有部墊本年前一半經費解到即已告罄有如沃焦應

放各項尙多欠缺其直隸去今兩年應協之款亦無撥解雖經函牘交馳委員催領而該二省仍腦後置之徒使萬里寒邊空煩筆舌虛耗盤費似此年復一年不但地方應辦事宜無從籌布即例定應支之項亦慮壓閣臣蚤夜焦思持籌乏術止有極力撙節作求人不如求己打算期數歲計復查科布多蒙古各旗近多被災日形苦累來往俄商皆須護送差使又極繁重此項糧折並爲蒙古計口授食之需不容短少值茲帑藏空虛自當勉籌補苴之策臣悉心計畫現在倉儲糧石舊存尙有五千七百餘石本年新糧刻正驗收又約有五千餘石統算當在萬石有奇前議脩建倉廩現以待款停工尙未竣事此項糧石陳陳相因日久竊虞紅朽似不如將所有各項蒙古官兵糧折銀兩援照成案暫行放給本色既資兵食又可稍節餉力一年通覈約須動放一千數百石在存糧石若以支放三五年於倉儲不至過絀即地方歲增糧石亦愈得流通之益一俟經費照常撥解再當察酌情形

奏明辦理合無請

旨俯准照辦實於地方兵食均屬有裨如蒙

俞允俟奉

諭旨臣即欽遵飭辦謹將邊費日絀不敷周轉擬將蒙古各項官兵糧折銀兩援照成案暫

放本色以足兵食而節餉力緣由繕摺具陳伏祈

皇太后

皇上聖鑒訓示謹

奏 光緒二十七年十一月二十四日拜發

二十八年正月十七日遞回奉

硃批著照所請該衙門知道欽此 十二月十九日

籌防欸目請開單報銷片

再現在大局底定防務已鬆應將籌防用款暨留兵一年支餉分別報銷前已將出入大數奏明並將支發欸目擇要咨部先行立案伏思臣自到任後事無大小皆必身親從不假手於人今欲清理銷案尤非自行覈辦不可惟查自來辦理各項報銷無不曲意遷就勉符例章少干駁斥實則全非本來面目蓋欲合例便須捏飾而一一據實開報事之所有又或爲例之所無浮冒雖不能免而多用少報或竟不敢開報之欸目亦頗有之此中情形早在聖明洞鑒之中臣愚見現值

聖主整齊庶政之際報銷一事煩碎繳繞流弊較多

朝廷方欲改弦更張變通以盡其利似無須仍用此作僞具文總以改就簡明一目了然爲妥可否仰求

天恩俯准臣將經辦防務一切用款開具清單報銷免其造冊以昭覈實如蒙

俞允臣即督飭經手之員查照支發底簿覈算辦理實用實銷不稍掩飾再行咨請戶兵各部覈辦至前奉戶部一再指令山西河南籌解欠餉俾得清理墊欠各款迄今仍未據撥解絲毫前經臣專摺具

奏自應敬候

諭旨合併陳明臣所請係爲力求實際起見是否有當謹附片籲懇伏祈

聖鑒訓示謹

奏 光緒二十七年十一月二十四日拜發

二十八年正月十七日遞回奉

硃批准其開單報銷欽此 十二月十九日

遵保章京筆帖式懇給獎敘摺 附清單

奏爲遵

旨酌保科布多額缺章京筆帖式各員懇

恩照擬給獎以勵勤勞專摺繕單具陳仰祈

聖鑒事竊臣前

奏請將部院額缺章京筆帖式等援案按照邊省軍營勞績擇尤保獎並定年限員數以杜冒濫等因本年二月初五日遞回原摺奉

硃批著照所請該衙門知道欽此具仰

湛恩汪濊不薄邊功曷勝欽感查科布多近年以來邊事日棘交涉漸增糧餉處綜覈錢糧印務處經理案牘而蒙古處管理蒙古部落哈薩克鄂拓克事務並卡倫台站牧政責成彌重其俄商局辦理洋務尤爲大局攸關又兼去年遵

旨防邊簡校蒙兵試行團練舉凡籌備餉需摺捕賊匪稽查保甲偵探軍情以及守城清野放卡駐台各事雖由臣主持布置倖免疏虞該章京筆帖式等亦復均能出力艱苦不辭洵屬有勞可錄自應遵

旨酌保以昭激勸臣悉心斟酌著績固宜嘉獎而薦剡亦不可濫登稽考成章未敢過從優異除糧餉章京另片請獎外謹將該章京筆帖式等擇尤擬保數員敬繕清單祇呈

御覽合無仰懇

天恩特沛

俯准照擬給獎出自

高厚鴻慈除飭取該章京筆帖式等履歷咨部外所有遵

旨酌保額缺章京筆帖式各員繕單請獎緣由謹專摺具陳伏祈

皇太后

皇上聖鑒訓示謹

奏 光緒二十七年十一月二十四日拜發

二十八年正月十七日遞回奉

硃批著照所請該部知道單併發欽此 十二月十九日

謹將遵保章京委署主事筆帖式各員擬請獎敘敬繕清單祇呈

御覽

計開

首先即補防禦後以佐領補用先換頂戴印務處承辦章京主事職銜玉善擬請俟補佐領

後以協領即補先換頂戴

首先坐補防禦後以佐領即補先換頂戴補佐領後以協領補用蒙古處承辦章京主事職銜英秀擬請

賞給該員祖父母父母二代二品封典

分發省分補知縣後以直隸州知州補用俟補直隸州後加知府銜俄商局承辦章京主事職銜穆騰武擬請仍以直隸州知州分省遇缺即補

補防禦後以佐領補用先換頂戴印務處幫辦章京主事職銜崇文擬請俟補佐領後以協領即補先換頂戴

補防禦後以佐領補用先換頂戴糧餉處幫辦章京主事職銜雲秀擬請以佐領遇缺即補遇缺即補防禦後以佐領補用先換頂戴蒙古處幫辦章京主事職銜鍾祥擬請俟補佐領後以協領即補先換頂戴

四品頂戴遇缺即補防禦委署主事文惠擬請補防禦後以佐領補用並請賞加三品銜

補驍騎校後以防禦補用先換頂戴印務處筆帖式清林擬請俟補防禦後以佐領即補先

換頂戴

補用防禦糧餉處筆帖式景善擬請俟補防禦後以佐領補用先換頂戴

補驍騎校後以防禦補用先換頂戴蒙古處筆帖式錫齡阿擬請俟補防禦後以佐領即補先換頂戴

附保出力章京片

再查

記名班先理事同知糧餉章京委署主事翰林院筆帖式榮泰去年三月即已報滿因軍事猝起來能及時更換是以仍行接辦旋值

京師不靖邊境戒嚴餉道梗阻直晉應協經費並皆停撥科布多年例支欸頓無指望羅掘倍極維艱又加奉

旨籌布邊防挑練蒙兵軍需緊要局勢瀕危深慮備豫稍疏禍不旋踵臣即援照從前辦法督率該員謀諸商賈暫議挪借既濟公家之急即以其財命頗費唇舌始得勉從方當朝不保夕人情惶懼之際城防台卡一日數驚既須供應額支又須接濟軍用兼籌並顧竭力維持於是兵心藉其固結地方賴以安全雖由承受指揮而該員肆應之功不可泯也伏查

光緒二十四年前大臣寶昌等因該員清釐欠發各餉著有微勞附片特保請以
記名理事同知准歸班先帶領引

見先換頂戴欽奉

批旨著照所請吏部知道欽此仰見

朝廷優恤邊陲有勞必錄欽感同深該員此次尤屬異常出力且辦理糧餉事務已逾四年
至今亦未交卸自應從優保獎惟以格於成例未敢冒昧瀆陳查該員本係

京察一等

記名以理事同知通判用並奉

旨准歸班先人員合無籲懇

天恩敕部將該員榮泰仍歸

京察一等

記名理事同知遇有缺出仍歸班先帶領引

見俟得缺後在任以知府用先換頂戴以示鼓勵之處出自

逾格慈施臣爲勵勤示勸起見是否有當伏祈

聖鑒訓示謹

奏 光緒二十七年十一月二十四日拜發

二十八年正月十七日遞回奉

硃批著照所請吏部知道欽此 十二月十九日

附保驍騎校片

再補用驍騎校額外驍騎校文普錫麟圖二員到防以來或逾六年或屆三年迭奉差委均無貽誤去年隨同臣籌布邊防蚤夜奔馳尤屬倍著勞績若不量加鼓勵未免向隅合無仰懇

天恩俯准將額外驍騎校補用驍騎校文普錫麟圖二員均俟補驍騎校後以防禦即補先換頂戴以昭激勸出自

鴻施除飭取履歷咨部外理合附片具陳伏祈

聖鑒訓示謹

奏 光緒二十七年十一月二十四日拜發

二十八年正月十七日遞回奉

硃批著照所請兵部知道欽此 十二月十九日

請 賞還春普保案片

再糧餉處筆帖式春普前因志氣頗懈嗜酒廢公經臣附片

奏參請將該員補驍騎校後以防禦補用先換頂戴保案撤銷奉

旨照准欽遵在案茲查該員自撤保後供差改過力圖自贖現在已屆一年尙知愧奮合無
懇

恩將該員前撤保案

准予賞還以示懲勸之公謹附片具陳伏祈

聖鑒訓示謹

奏 光緒二十七年十一月二十四日拜發

二十八 年正月十七日遞回奉

硃批著照所請該部知道欽此 十二月十九日

請催直晉經費摺

奏爲直晉應協經費請

旨敕催速解以資接濟具摺馳陳仰祈

聖鑒事竊前因經費不敷奏奉

諭旨敕交戶部議令直隸省於旗租項下每年協撥銀二千五百兩向由該藩司委解至口北道衙門轉發科布多委員接領起解去年軍務猝啓畿輔戒嚴此項頓歸無著今年亦未撥給前因和局已定經臣咨請大學士督臣李鴻章飭司照撥並經加函哀懇委員往提迄今尚未准覆焦盼殊深科布多近年經費專指直晉兩項從前東南各省協餉均已停撥支絀情形早邀

聖明洞鑒山西應撥經費會奉戶部咨開所有烏科二城經費行令不分上忙下忙總在七八月間全解到綏遠城俾得早日領解以資接濟今撫臣岑春煊前奏本年後一半銀兩擬俟下忙有收再爲設法籌解萬難期其應急且稍一壓閣卽須過年是又暗爲短欠矣若直隸之二千五百兩亦復從緩正不啻雪上加霜絕徼荒寒嗷嗷待哺者何以堪此況臣所管蒙古各部落困苦日甚現並據明阿特額魯特兩旗呈懇補發早年欠餉以恤蒙累此須山西補解舊欠到日方能酌發雖經戶部指撥但該省又已奏減每年仍給二千五百兩既無大批銀兩亦屬無從撥還此需餉急切之實在情形也竊維臣待罪邊陲值茲時局方媿未

能籌款稍分

宵旰之憂豈宜因區區經費屢瀆

宸聰無如地方瘠苦懸釜待炊不能見諒於鄰封惟有乞
恩於

君父萬不得已仍應籲懇

慈施敕令直隸督臣李鴻章速飭藩司將去今兩年應協之五千兩照章籌撥並

敕山西撫臣岑春煊嗣後於科布多經費各款仍遵部議早籌撥發勿待分忙致誤兵食庶
期餉項早到一日早濟一日之生其本年後一半經費務卽委解至綏遠城以便委員接解
無再藉延邊城雖介偏隅同關大局李鴻章等體

國公忠天下仰望但於窮塞略加體恤卽已叨惠不淺除再行咨催外謹具摺馳陳伏祈
皇太后

皇上聖鑒訓示施行謹

奏 光緒二十七年十一月二十四日拜發

二十八年正月十七日遞回奉

硃批著戶部飭催籌解以濟邊餉欽此 十二月十九日

叩謝 天恩摺

奏爲叩謝

天恩仰祈

聖鑒事竊臣接到家信謹悉臣胞弟戶部緞疋庫員外郎瑞澂於本年九月初九日奉

上諭江西廣饒九南道員缺著瑞澂補授欽此臣當卽恭設香案望

闕叩頭謝

恩伏念臣胞弟瑞澂才識庸賚勞尙淺迺荷

鴻施逾格

簡授監司在

聖主求舊必於勳門而世僕效忠益難報稱查九江爲水陸之衝關道有征權之責當此鉅艱初集深虞隕越貽羞臣惟當郵書訓飭戒其矜夸務令勉副職司慎求治理論地方則以培養民氣爲本稽稅課則以釐剔蠹弊爲先總期事事求實滴滴歸公俾共勵夫血誠冀稍酬夫

恩遇所有臣感激下忱謹繕摺具陳叩謝

天恩伏祈

皇太后

皇上聖鑒謹

奏 光緒二十七年十二月十九日拜發

二十八年二月十二日遞回奉

硃批知道了欽此 正月十八日

蒙旗辦振摺

奏爲蒙古公旗報災查明情形較重懇

恩准撥銀糧振濟以戢流離具摺馳陳仰祈

聖鑒事竊據杜爾伯特右翼公多諾嚕布呈報該旗連年被災四項牲畜倒斃殆盡官員已極窮迫其兵丁男婦刺麻黑人竟至無所資生每日不得一飽出外募化者日多一日若不設法撫恤恐致流離愈衆窮釀事端懇求振濟前來臣查去年冬令雪澤不調今春又生蟲孽專喫青草蒙古各旗大半被災輕重不一臣以若辦普振需款浩繁誠恐戶部籌撥維艱

臣是以未敢輕發惟聞該公旗實已成災自應即予查辦當派委員前往該旗確勘並飭杜爾伯特右翼盟長亦派蒙員會查旋據稟稱查得該旗實係連年遭災困苦情形不堪言狀除稍有牲畜能度命者二十三戶竟有七十七戶男婦老弱刺麻黑人無衣無食難望存活現多逃往別旗募化行乞實堪憫惻等語臣覆維口外蒙古專靠游牧多以駝馬牛羊湏酪充飢富者始能食肉若野無青草畜牧不能蕃孳生計即因之枯窘茲既查屬實情自難稍存膜視且有去年振濟札哈沁之事尤未宜辦理偏枯而蒙困到處皆然亦不能強令同盟養贍定例蒙古連年荒歉同盟內不能養贍應請

旨派員查明撥銀振濟臣悉心籌酌僅止一旗辦振用項無多即無須動請部款擬由科布多公項內勻撥銀五百兩再動支倉糧小麥大麥一百石遴委廉幹人員帶往該旗將被災蒙古貧苦人等查明戶口分別拯濟覈實散放其糧石作為籽種責令該旗招集流亡之丁壯派令就可耕之地於明年三四月間及時試種即令該盟長酌量借給牛隻如獲秋收便可足資接濟既救一時之災兼爲他日開墾之漸似屬一舉兩得於蒙古尚有裨益現飭右翼盟長權爲調助俟奉

旨後臣即欽遵辦理臣爲籌振濟以戢流離起見是否有當理合具摺馳陳伏祈

皇太后

皇上聖鑒訓示謹

奏 光緒二十七年十二月十九日拜發

二十八年二月十二日遞回奉

硃批著照所請該衙門知道片併發欽此 正月十八日

請動倉糧放振片

再北路軍營不同內地並無養濟院收養貧民處所以致老弱廢疾無所存恤比歲多災尤增困憊近經臣查知附城左右窮苦無告之蒙古漢民男婦大小共有二百五十餘人之多類皆不能自食現值冬寒所在僵仆誠有如漢詔所云鰥寡孤獨窮困之人或阡于死亡而莫之省憂者是地方官之責有未盡也臣已於十月朔捐買米麪在臣署外按名散放聊資拯濟但綿力有限未能多施且慮後難爲繼體察情形仍惟有推布

上恩爲窮寒百姓籲求振貸臣擬每年冬令於倉儲項下動支小麥大麥各五十石施放十冬臘三箇月每月六次卽實給米麪所費無幾而生命所全已多臣當委妥員經理並可親自察視務期實惠均霑野無餓殍仰副

朝廷厚恤邊氓之至意如蒙

俞允應於每屆秋令由臣衙門先期

奏明辦理所用糧石並請歸入常年報銷是否有當謹附片陳

奏伏祈

聖鑒訓示謹

奏 光緒二十七年十二月十九日拜發

二十八年二月十二日遞回奉

硃批覽欽此 正月十八日

筆帖式麟慧咨回原旗片

再科布多戍防候補筆帖式綏遠城步甲麟慧前因三年班滿經臣附片

奏請留駐尙未奉到

批旨查該員已於今年正月派赴山西催領餉銀旋據稟請病假茲復接其來稟以久病未愈懇准開去戍防差使咨回本城當差自應照准除批飭遵照暨分咨兵部綏遠城將軍外謹附片具

奏伏祈

聖鑒謹

奏 光緒二十七年十二月十九日拜發

二十八年二月十二日遞回奉

硃批兵部知道欽此 正月十八日

具報官廠駝馬數目片

再查科布多官廠牧放牛馬駝隻三項牲畜前遵部議整頓馬政章程飭令該管蒙古員弁認真經理秋季派員稽查年底奏報一次節經循辦在案本年八月間業經派員查驗該廠舊存馬二百五十七匹舊存駝七百九隻新收由烏里雅蘇台解到駝二百隻共駝九百九隻牛隻無存除動用並例倒外實尙存馬二百三十六匹駝八百四十七隻尙無缺額情弊逐一烙印仍飭該管協理台吉等妥爲牧放以備應用現屆年底理合

奏報伏祈

聖鑒謹

奏 光緒二十七年十二月十九日拜發

二十八年二月十二日遞回奉

硃批該衙門知道欽此 正月十八日

請將積年報銷分別陳案新案清理摺

奏爲前任積年收支經費欸目均未報銷補辦維艱現在設法清釐已將光緒二十年以前造齊各冊派員覆覈以備送部擬將光緒二十一年至光緒二十六年未報各案作爲陳案量予變通暫行開單報銷嗣後卽歸新案照舊造冊籲懇

天恩飭部照准以清塵牘繕摺具陳仰祈

聖鑒事竊照科布多常年額定經費收支欸目向係按年造冊咨由烏里雅蘇台將軍覈轉送部而從前辦理軍需防務及交撫蒙古哈薩克各事凡係另由各省協解餉項戶部撥給經費者皆歸專案自行造報均奉部覆准銷在案現查常年經費自光緒五年至光緒二十六年經清安沙克都林札布魁福寶昌四任整二十年之報銷迄未辦送臣始尙以爲因循積壓正擬督催繼乃查知係因光緒元二三四各年之銷案尙未奉准部覆拘泥不卽續送其實戶部曾於接到前四年銷冊後咨催跟接趕辦前參贊大臣魁福亦於交卸之先督飭前糧餉章京奎烜將自光緒五年至二十年之銷冊代造完竣存候送部前參贊大臣寶昌

未即辦理臣因報銷稽延太久慮難清理現飭糧餉處將已造之冊逐細覈對出入如均相符即可查照向章咨送烏里雅蘇台將軍轉行達部惟自光緒二十一年以至二十六年節年收支款目尙須逐細查造查此項報銷官更兩任事閱數年論經手之堂屬現在雖有三
人按支發之餉需早已隨時告罄刻值邊務殷繁事多人少若仍責以照舊造報必須設局
清理專辦此事即不免添出許多薪費且亦難期急就從前魁福任內補造各冊用款八百
餘兩辦理一年有餘始克歲事可以想見竊謂現當

朝廷整理庶政力汰浮文之時似此陳陳相因代辦補送之冊籍可以從省臣悉心籌酌擬
將光緒二十一年以後二十六年以前各前任未報各案作爲陳案請暫變通辦理一律開
具簡明清單咨送戶部備案仍照章請由烏里雅蘇台將軍轉達其自光緒二十七年以後
報銷即屬新案仍照舊造冊報銷庶於設法清釐之中仍寓實事求是之意積年塵牘可期
一律廓清即嗣後辦理亦不難著手矣愚昧之見是否有當謹繕摺據實具陳伏祈

皇太后

皇上聖鑒訓示遵行謹

奏 光緒二十七年十二月十九日拜發

二十八年二月十二日遞回奉

硃批著照所請該部知道欽此 正月十八日

擬派員往勘布渠片

再臣前曾面奉

懿旨敕令到任後籌辦開墾事宜臣遵奉之下時刻在心經已體察情形於遵查科布多應辦事宜摺內首陳及之自應俟奉有

諭旨再行欽遵辦理查臣前摺所指烏闌古木布倫托海察罕淖爾布拉罕河青格里河額爾齊斯河各處或舊迹久湮或間有民墾一時猝難措置惟布倫托海地方爲烏梁海游牧土貊膏腴爲北路所豔稱同治年間曾經設立辦事幫辦各大臣舉行屯墾且蒙

恩敕戶部撥給經費銀十萬兩旋因李雲麟辦理操切激成兵變初與屯田無涉也因噎廢食論者惜之今欲試行屯墾惟該處尙可由官經營以爲倡導此外則宜勸諭蒙古使之屯牧兼資藉寬生計第查該處舊有渠道廢棄垂三十年口外種田全仗引水灌溉渠流不暢屯亦無由而興臣現擬遴派妥員於明春正月帶同工役前往布倫托海將原有渠道逐細履勘就便估定工料修費詳悉稟覆再議開辦竊計彼時前摺必已奉到

批旨矣渠工究需若干雖難懸揣然今非昔比亦不能糜費鉅款要亦不過數千餘兩而已
謹將擬辦屯墾應修渠工緣由先行附片陳明伏祈

聖鑒訓示謹

奏 光緒二十七年十二月十九日拜發

二十八年二月十二日遞回奉

硃批著照所議認真辦理期有成效可觀欽此 正月十八日

蒙古放煙賞茶請仍照舊章辦理片

再科布多所管卡倫蒙古官兵應領四季糧石秋冬放給本色春夏則係折放茶塊復按每
斗折給煙觔二包屯田蒙古官兵亦有賞煙之條此煙向係派員赴新疆古城採買其價銀
由每包八分遞減至四分二釐二毫嗣於光緒二十三年十月經前大臣寶昌附片奏稱差
員按年赴歸化城採買此項代煙爲定價所拘莫能揀擇迨經由台運解回科該官兵領出
此煙多向市商兌換貨物隨每包換給一二文錢之貨物實屬徒費銀兩無補所需自宜稍
事變通請準此後凡支放卡倫屯田代煙一律按每包價銀四分二釐二毫折放實銀等情
比即改辦旋以窒礙難行寶昌雖悟而艱於更正亦遂置之臣查蒙古嗜欲有別故早年定

章蒙古賞項多用茶煙且以抵放兵糈是不獨因地制宜亦因人而施也奉行有年上下便之自經改給實銀仍照原價於受者無所損益惟每於糧餉處開放此項時纖微瑣屑平兌已極繁難分晰尤多折耗迨由蒙官承領再行發給蒙兵又須按名散放即如二十四卡倫官兵應領煙三千八百四十包按每人二包折給便須以一百六十餘兩之煙價分包現銀至一千九百二十包之多而其他賞需尙不與焉未免太近苛碎即原奏所稱赴歸化城採買亦係因新疆回變暫行改道初非恒例至謂以煙換一二文貨物一節查北路物價翔貴商蒙交易多以靛茶綫帶代銀每茶一塊合銀五六錢隨時長落每帶一條合銀三分換買食用各物至少以半條爲止未聞有一二文錢之貨物不過蒙古每以此煙給與商鋪抵帳換貨商家圖佔便宜必從極賤之值折算而已臣與糧餉章京細加酌覈折放實銀在庫欸充足時尚無害事現值經費欠闕左支右絀實未便徒耗現銀況爲政之道簡則易從應仍請照舊章辦理是否有當謹附片詳陳伏祈

聖鑒訓示謹

奏 光緒二十七年十二月十九日拜發

散木居奏稿卷之九

門人鈴木吉武校字

散木居奏稿卷之十

幹難 瑞洵

強行集 光緒壬寅三月

叩謝 天恩力疾銷假摺

敬舉人才摺

神靈顯應請頒扁額摺

屯田蒙古參領仍留三年摺

防守出力武員可否保獎片

直隸協餉減撥扣平係屬錯誤請 敕部轉行查照片

裁除操賞移作滿兵津貼並文案處心紅等項支銷片 以上三月初一日拜發

蒙旗請獎摺

揀補章京筆帖式等摺

具報致祭往返日期摺

查明請 旨 賞祭摺

散木居奏稿卷之十

強行集

一 餐菊軒

明保章京片

玉章京請卹片 以上三月二十二日拜發

叩謝 天恩力疾銷假摺

奏爲叩謝

天恩力疾銷假並抒下情具摺瀝陳仰祈

聖鑒事竊 臣於去冬十月因患病委頓曾經附片

奏請假期俾資靜攝免成沈痼本年正月初六日遞回原片奉

硃批著賞假兩箇月欽此仰承

聖眷之垂廕俯切 臣衷之慚感比時 臣所苦緣泄利太久元氣重虧早見虛損之象加以嚴寒凜烈風雪逼人頭暈骹疼實爲狼狽蒙古習俗有病皆延刺麻誦經祈禱 臣以並無湯劑可服遂亦仿效兼用溫補丸藥尙覺相宜用得一息倖延未遽僵仆現已時交三月天氣暄和利疾已愈氣喘較前亦輕但兩骹受寒太深右身筋脈腫脹夙疾更復牽連觸發步履蹇滯頭腦暈痛之病則自前年春出口時即染此恙亦總未能霍然兩月以來接見僚屬及蒙古王公皆在臥室緊要公事仍自覈辦所謂靜攝乃託空言 臣往復思維欲因疴而解職旣

有負

恩慈欲戀棧而貪榮則又虧官守況值

朝廷力圖富強邊方同關重要使竟常以孱軀勉強從事不惟上辜

聖主用人之至意亦實非臣報

國之初心循省五中進退維谷刻計幫辦瑞璋到任尙需時日科布多事局仍是臣一人主持自未敢遽請開缺致涉冒昧假期既滿應即力疾強起照常治事勉任勞怨以圖少效洎埃惟是臣犬馬之年雖當強仕而髮弊齒腐精力早衰及今若能調理尙可留此有用之身若遂耽誤因循恐永無報效之日矣且遭際

聖明勤勤求治培養滿蒙尤爲自強本圖現當世變日殷邊務諸需整理在臣運籌乏術固深覺其不勝而地方無米難炊又實未由自立夫以身弱如此才短如此此而欲任重致遠未有不顛覆者臣固不足惜如大局何臣擬俟瑞璋到任後當將地方一切應辦事宜詳報告知俟其得就熟習再行揣量臣病勢如果仰託

福庇臣健壯如初自當與瑞璋和衷共濟勉圖功儻一如現在困憊情形仍惟有籲懇鴻仁曲垂矜憫暫開臣差缺

准令回旗既可醫治病體復免貽誤邊疆此則臣區區苦衷不得不先事陳明者也所有臣叩謝

天恩力疾銷假並抒下情緣由理合具摺瀝陳伏祈

皇太后

皇上聖鑒謹

奏 光緒二十八年三月初一日拜發

本年四月二十二日遞回奉

硃批知道了欽此 三月二十四日

敬舉人才摺

奏爲敬舉人才以備

任使繕摺臚陳仰祈

聖鑒事竊臣伏讀前年疊次

諭旨汲汲以人才爲務屢

詔中外大臣保薦臣忝膺邊寄未報

國恩值茲幹濟需才益懷以人事君之義冀爲

朝廷儲楨幹之用臣亦藉補鴛鴦之愆苟有所知不敢不秉公薦達茲查有翰林院侍講宗室寶熙心存忠愛志氣方新自入詞林砥節礪名益讀書稽古留心時務尤能不囿於風氣再加磨練實爲有用之才

記名御史禮部員外郎于式枚廣西翰林改官部屬曩佐

晉封侯爵故大學士李鴻章北洋幕府凡重要奏疏公牘多出其手學識淹貫志慮忠篤抱負甚偉鬱不得伸在直隸十餘年於

朝廷政事郡國利病瀛海情變靡不洞悉蓋得於閱歷非同耳食之學且習聞李鴻章緒論尤熟於交涉之故其才器足可匡時刑部主事鄭杲山東進士研經鑄史博涉多通尤於國朝掌固考求有素不事表襮行誼卓然其學問足爲羣倫模楷允稱師儒之任前新疆布政使趙爾巽漢軍翰林曾爲諫官侃直敢言泊簡貴州知府洊陟監司布按所至飭吏安民政聲洋溢品操簡潔又以敷歷有年稔習邊要情勢辦事穩慎持大體前以遭艱回旗現計服闋亦當赴

闕擴而充之堪膺封疆之寄福建候補道孫道仁湖南人原任提督孫開華之子英才卓犖

任俠自喜尤於兵事討究有得現在閩統領練軍訓習洋操頗爲疆吏所倚重河南候補道易順鼎湖南人學瞻才長講求經濟性情忠勇幹略恢宏確是救時之器山西大同府知府李桂林直隸翰林操行廉謹才識深密以經術飭吏治學道愛人循良無媿極其局量司道未足盡其所長此數員者若蒙

聖恩量加拔擢假以事權必可裨佐時艱蔚爲

國棟上不負吾

君下不負所學也其應如何分別

召對存記之處出自

聖裁非臣所敢擅請至臣所保儻有不實亦不敢辭濫舉之咎所有敬舉人才以備任使緣由謹繕摺臚陳伏祈

皇太后

皇上聖鑒謹

奏 光緒二十八年三月初一日拜發

本年四月二十二日遞回奉

旨留中欽此 三月二十四日

神靈顯應請頒扁額摺

奏爲

神靈顯應建祠落成籲懇

賞頒扁額以答

靈貺恭摺具陳仰祈

聖鑒事竊臣參贊衙署園內供奉

蟒神久彰靈蹟隱現莫測變幻無方蒙漢軍民常見化身每一長鳴必有徵驗蓋

神德之盛

國興有祥理固然也去夏苦旱徧地生蟲比值屯工之禾甫種游牧之草將枯待澤孔殷雲霓望切經臣蠲吉齋禱旋即立應雖有蝨孽竟得未妨田稼且復甘霖滂沛槁苗勃興於是歲事仍獲有秋屢豐兆慶臣寅感之餘當卽鳩工庀材建祠供奉現已落成臣伏維

神靈感應揆諸禦災捍患有功德於民則祀之義允宜食報馨香茲值祠工告竣如蒙宸翰之褒崇益顯邊垂之保障合無仰懇

賞頒扁額一方發交臣祇領敬謹懸挂以答

靈貺出自

上裁謹繕摺具陳伏祈

皇太后

皇上聖鑒謹

奏請

旨 光緒二十八年三月初一日拜發

本年四月二十二日遞回奉

硃批著照所請欽此 三月二十四日

屯田蒙古參領仍留三年摺

奏爲屯田蒙古參領已屆期滿仍請留辦三年以資熟手繕摺具陳仰祈

聖鑒事竊查科布多管理屯田蒙古參領阿畢爾密特自光緒二十四年八月間

奏補屯田參領員缺扣至光緒二十七年八月十二日三年期滿自應照章揀員

奏明更換惟現值庫款支絀餉項難籌屯田尤爲當務先急其辦理得力人員似可毋庸拘

泥調換查該參領阿畢爾密特熟悉屯務人亦老成三年以來督率蒙古兵丁耕穫毫無懈怠且近年收成分數逐見加增實屬奮勉出力擬懇

天恩請將該參領阿畢爾密特留辦三年以資熟手俟再屆期滿即行更換如蒙

俞允實於屯田有益是否有當謹繕摺具陳伏祈

皇太后

皇上聖鑒

訓示遵行謹

奏 光緒二十八年三月初一日拜發

本年四月二十二日遞回奉

硃批著照所請該衙門知道欽此 三月二十四日

防守出力武員可否保獎片

再前年軍務猝啓口外人心浮動將發難於俄商加有中外哈薩克纏回互相潛煽劫案層出而本地又無得力兵隊彈壓保衛憂憂其難幸臣由京帶來武弁數名其中尚有曾經從軍打仗之人其換防綠營員弁中間亦有可用者當以護城蒙兵業已選調到城臣即委屯

防參將世襲騎都尉祥祐督率該弁等會同蒙員分任操防緝拏盜匪照料洋商晝夜邏巡不容少懈如是者一年有餘捕獲賊犯多名均經隨時訊明就地懲辦其派往各游牧駐防偵探各員亦於緝匪護商勤奮從事用得洋商來往照常無一失事邊境賴以謐安俄人未滋口實是其綏戢地方隱銷兵革綜厥勤勞似與擒逆克城無少殊異比經臣將該員弁等各予記功擬俟事定請保臣伏讀邸鈔見前陝西撫臣端方以署西安城守副將甘肅遊擊劉琦巡查城關不辭勞瘁將其越級保升以副將補用奉

旨照准今科布多地居邊徼辦理倍極維艱且以新集之蒙軍當垂危之絕域該員弁等勞苦備臻較諸統重兵食厚餉者尤爲難能可貴臣既獎許於先即未便掩抑於後並接定邊左副將軍連順函開前辦防守出力人員現經奏奉

諭旨准其擇尤保獎欽此科布多自屬事同一律惟查章京筆帖式各員因其多年出力隨辦防務亦著微勞已由臣專摺奏獎蒙

恩允准自毋庸再行加保應將換防武職及差委員弁分別辦理查屯防參將暨千總把總等員本年九月恰值五年班滿例保之期茲擬併案覈保量予從優已足藉示鼓勵相應

奏明請

旨可否准將防守出力之換防暨差委武職各員酌照烏里雅蘇台辦法由臣從優奏保十數員以彰勞勩而免向隅其在事出力應歸外獎之弁兵並予咨部辦理均出自天恩高厚臣不敢擅便謹先附片陳請伏祈

聖鑒訓示謹

奏 光緒二十八年三月初一日拜發

本年四月二十二日遞回奉

硃批准其擇尤酌保毋許冒濫欽此 三月二十四日

直隸協餉減撥扣平係屬錯誤請 敕部轉行查照片

再直隸每年應協科布多經費二千五百兩前經臣咨商該省照撥現准署督臣袁世凱咨會已據藩司將烏科二城光緒二十七年經費報解計二千三百五十兩兩城分用並云直省自去年後半年所有各營俸餉均酌發一半又遵部議籌還洋欸扣六分平等語臣接閱來咨卽知辦理錯誤查此項經費係奉部議奏准指撥之欸科城即係受協軍營似與該省所轄各營有間其所謂酌發一半當專指直隸本省而言至應協京外各餉恐不能視同一律至扣六分平一節似亦該省支放餉欸則然若與別省及軍營協餉自應由各該省該營

自行辦理不能坐扣並查光緒二十五年直隸會將此項經費扣平經科布多咨行更正旋據該省認錯補解在案今又扣平是否現據該省

奏明將一切協餉概由該省代扣減平臣所處遼遠無由而知惟科城近來事增款絀用度不敷即此二千五百兩均有額定待支事款乃該省概將二十六年之項停解又將二十七年之項僅給一半又每兩加扣減平恐袁世凱周馥均甫到任未習情形臣已詳悉咨明該省請再查覈第慮人微言輕不足取信相應附陳伏祈

聖鑒敕部轉行查照辦理謹

奏 光緒二十八年三月初一日拜發

本年四月二十二日遞回奉

硃批戶部知道欽此 三月二十四日

裁除操賞移作滿兵津貼並文案處心紅等項支銷片

再科布多換防宣化大同兩鎮兵丁向有操賞一欸本係歲支一千二百兩嗣因撙節經費奏明減定三百兩臣查換防馬步兵丁額數僅止二百二十四名除去十屯種地八十名餘皆分布參贊幫辦兩署充當巡捕戈什三部院一局字識與夫看守城門倉庫監獄巡查街

原
书
缺
页

329--344

開情形該卡倫侍衛常陞夙來膽小事無巨細悉以稟聞萬無不即具報自干重咎之理此又其詐僞之顯而易見者然既據照會勢出無可如何不能不爲查辦刻已遴派妥實人員馳往酌度辦理惟該委員止能清理哈薩克事務至邊界事關重大該委員等萬萬不應作主臣已經諄諭相機商緩藉支展以便圖謀尙不知能否辦到第北路廢弛已久孤立空虛毫無可恃故臣議籌整頓至再至三雖已欽奉

批旨准行無如心長力短人財兩空加以窮寒荒寒彼固以爲有可取求我總以爲無足輕重故一言兵則爲兩准部咨飭卽裁撤五百之蒙兵一言餉則爲三奉部撥久不協濟數萬之陳餉此而惟恃區區血誠以抗強國仍與敷衍因循何異其不及之勢固不待智者而後知已詩經有云無拳無勇職爲亂階正臣今日之謂也臣於外情稍有所知於中弊亦非罔覺自到任後卽早見及不能平安無事宜爲愁患之謀節經瀆奏一無隱飾早蒙

聖慈洞鑒爲今之計應以內辦爲主而以外辦爲輔蓋外辦總須萬里請

命彼直迫不能容內辦則外務部王大臣與彼公使可以詳細權商就近秉承

聖謨亦不至游移無主一經欽奉

諭旨臣自當敬謹奉行期於迅赴事機無所格礙惟事體艱鉅關係大局臣萬不敢輒自主

張輕棄寸土似當

特簡大員前往查辦就便商定界務庶可藉以維持較爲穩著至俄人眈視中華志不在小尙不止此一二處日久宕延不圖清理不惟不能杜其饒舌且適足以啓其貪心是該處界務若不重新勘定葛藤一日不斷枝節一日不完此次俄人用兵佔取之說亦係因深知科布多底蘊勢力萬有不敵故出此嘗試之語實則該卡倫止設蒙兵十名俄亦無須發兵但有數人前來強佔該侍衛即無法可施臣去年卽已密片陳明矣總之不讓便爭不爭便讓實無兩全之策茲若僅責臣以設法因應在臣才力有限固不敢率意以啓爭而情勢堪虞亦殊難空言以禦侮臣忝膺邊寄不敢諉卸亦不敢擅專相應據實

奏明仰懇

敕下外務部王大臣速與俄使晤商屬其行文西悉畢爾總督務當嚴束邊官各守各界以俟奉到

朝廷諭旨和平辦理以期永固邦交一面仍請

諭示機宜俾有遵循大局幸甚臣幸甚除已照覆俄臣索勒官暨咨呈軍機處外務部斟酌辦理外謹由驛五百里密摺馳

奏伏祈

皇太后

皇上聖鑒

訓示無任憂憤迫切待

命之至謹

奏 光緒二十八年四月初四日拜發

本年五月十八日遞回奉

硃批著外務部妥爲商辦片併發欽此 四月二十五日

邊界地方陸續讓與俄人片

再密陳者科布多所管邊界經疊次劃分實已割界俄人十分之大半計同治三年八年則有明誼奎昌將阿勒泰山迤北地方分入俄界故舊有之烏克克欽達蓋圖烏魯呼昌吉斯台哈喇塔爾巴哈台那林胡蘭阿吉爾噶霍呢邁拉扈等八卡倫均向內挪移改設現在之卡倫均非舊址致將阿爾泰淖爾烏梁海兩旗連人帶地一併分與其所定界圖紅線外向係哈薩克游牧之區既已割去無所棲止又不願歸俄因均擁擠於烏梁海之哈巴河等處

暫居就牧光緒七年因索還伊犁改訂條約酌定新界九年又經升泰額爾慶額將有名之齋桑淖爾東南一帶地方及塔爾巴哈台界內之賽里鄂拉以西各卡倫一併割棄於是乃有阿拉克別克河之專約故以現情而論除阿爾泰山額爾齊斯河哈巴河直已無險要可守無地利可取矣 臣竊常平心訪詢細意推究當時分界大臣固非有心讓地委緣才識庸闇平日並不察閱輿圖考求形勢一旦身膺重任躬與界務到彼之後直如盲人瞎馬夜臨深池加以彼族要挾逼迫又凡事不如俄人之精熟不得不拱手奉令一聽客之所爲 臣曾以詢之當年隨去之員據云額爾慶額往勘阿拉克別克界務因並未帶有測繪之人其畫押界圖即出自俄人之手草率了事失算已極 臣謹將地方陸續割與俄人緣由據實附陳伏祈

聖鑒謹

奏 光緒二十八年四月初四日拜發

本年五月十八日遞回奉

硃批覽欽此 四月二十五日

欽遵 前旨索還借地安插蒙哈再籲 明諭祇奉遵行以杜患萌而規舊制專摺瀝陳摺

附清單二件

奏爲烏梁海游牧暫安之哈薩克四出紛擾恐釀釁端欽遵前

旨索還借地妥籌安插詳查邊要情形熟審人心向背再籲

明諭祇奉遵行以杜患萌而規舊制專摺瀝陳仰祈

聖鑒事竊查科布多所屬阿爾泰山哈巴河一帶地方原係烏梁海七旗游牧自同治年間
烏里雅蘇台奏請借給安插胡圖克圖棍噶札拉參徒衆後因棍噶札拉參遁逃之哈
薩克科布多又奏請暫爲安插於烏梁海七旗之內聲明借地歸還再令哈薩克西行不得
久佔烏梁海游牧均經奏明奉

旨欽遵在案迄今逾三十年借地固久假不歸哈民亦喧賓奪主歷任大臣日覩情形屢有
索還之奏所奉

明詔亦幾盈篋何嘗三令五申恭讀光緒十五年九月十一日所奉

上諭朝廷兼權熟計借地自應給還邊防尤不可忽應否一面將該處游牧地方仍歸烏梁
海俾得安插蒙哈一面由塔爾巴哈台照舊派兵駐守期於防務民情兩無妨礙之處著沙
克都林札布與額爾慶額會商妥議等因欽此祇繹

宸謨執兩用中毫無偏向實爲至當不易之規若能祇遵早已得清轆轤何至屢煩聖慮懸閣至今無如歷任大臣半執已見各遂其私文牘紛繁迄無成議臣既非當時經手之人更不敢持狃於一偏之論悉心體察確有所見敢爲我

皇太后

皇上詳悉陳之塔爾巴哈台借地原係一時權宜無如棍噶札拉參徒衆既已安插彼時塔屬無歸之柯勒依十二鄂拓克哈薩克亦卽相因而至聚族而居現約計有四鄂拓克之衆且兵燹以後流寓漢民在彼耕種者甚多始而科布多索取則以巴爾魯克山俄借未還爲詞繼而巴爾魯克山俄已交還則又以哈巴河是西疆門戶爲說地既可耕久則聚而成鎮兼之哈民受約踴躍輸將勒派差徭取之甚便歷任既無遠見任意剝削哈民借地若歸民必隨之以去此塔城不願歸地之實在情形也科布多收撫哈衆原恐啓其外向之心始出此羈縻之術然招之既來揮之不去盜竊搶刦無日無之烏梁海求還借地安頓哈民報呈連年不絕臣到任後即接左右兩翼散秩大臣等催呈並據來城謁見面訴各情現並接據該哈薩克總管等呈詞籲求安插加以塔城攤勒過重在塔者現亦流入於科近年不止烏梁海七旗有之即南面土爾扈特游牧亦在在均有哈民流寓愈積愈多實有人滿之患此

又科城必須索地之實在情形也至云塔城苦待哈民攤派過重紛紛逃出各情並非臣過激之言實因查詢流寓土爾扈特人衆始知逃入科境若遇塔城派差卽可以科屬爲解檢查舊卷光緒二十四年新疆巡撫咨稱據塔城咨收逃哈在濟木薩一帶盤獲哈目哈里克克里克僉稱實係科屬并非塔轄如必收回惟願赴阿爾泰山科屬舊牧科城徧查哈衆并無逃出之人此不願回塔之一證也前年七月二十八日又接新疆撫臣來咨仍係塔城派員擒收逃哈於喀喇沙爾尋得哈衆二千餘人頭目白克牲畜五六萬隻氈房四五百頂詢據供詞稱爲科屬情願回科新疆電詢塔城該大臣春滿卽以速咨科城令其派員接護收回復電臣因查哈薩克在科原係暫爲收撫屢年烏梁海因擁擠過甚索地安插文書絡繹是科屬無地可容情形該大臣不能不知徒以該城派員收哈而哈不願回僞稱科屬旣無術以收哈衆復無辭以對新疆遂以令科收回敷衍了之不知科屬不能收新疆不_能留塔城不欲返此二千餘無依之哈民又將何以安置乎抑將令其流而爲匪乎或竟任其反而外向乎此又一證也臣所以謂歷任大臣半執成見各遂其私者此也現在阿爾泰山尙未交收此項哈民自未便徑由科布多派員安插前已咨行新疆巡撫派員押解暫交塔城收哈委員由新疆邊地徑行押令安分統歸阿爾泰山游牧先安其情願回科之心又咨照塔

城即以借地未還此項人衆屬科屬塔原無區別暫令歸牧以安其心擬俟軍事大定再行商辦借地安插之事暫且如此了結臣覆查塔城不還借地蓋恐人隨地去不能遂其任意勒派哈衆之私科城必須索還確因地窄人稠實在別無可以安插逃哈之法哈之在科別無徭役祇有每屆五年烏里雅蘇台將軍巡閱卡倫時哈薩克幫助北台牲畜一差故在塔屬之哈民無不願隸科城以連年由塔逃出之哈民與連年由塔派人擒收罔不堅稱情願回科各案證之其情亦大可見矣要而言之當初借地原爲暫安棍噶札拉參徒衆迨該徒衆既經遷置新疆巴英溝地方塔城即應將該地交還科布多今棍噶札拉參早經回寂且已蒙

恩准其轉世而該地仍爲塔城占踞如故

詔旨迫促函牘交馳延展依然迄未遵辦臣不知該地有何利益而歷任大臣恡惜不與至於如此也查此案業經前科布多大臣沙克都林札布等請自光緒十八年起展緩三年將該地交還科布多管轄奏奉

上諭著准其暫緩交割屆期歸還不得因循延緩一奏塞責等因欽此現計展限已逾七年未便再任推宕而烏梁海七旗蒙古丁口日增生計日蹙哈薩克又極待安插均係實在情

形今副都統春滿接辦塔城參贊大臣事務已有年所該大臣久官口外稔悉邊情當不至如歷任大臣之專挾私見或於公事尙易商量爲今之計惟有仍遵從前所奉

寄諭蒙古哈薩克人數衆多必應歸還借地妥籌安撫方不至滋生事端之

旨將該處游牧地方仍行收歸烏梁海俾得安插蒙哈即可將現由新疆來歸之哈目白克等二千餘人就地安撫茲事關繫重大一俟奉到

俞旨臣當親往阿爾泰山哈巴河一帶履勘情形將在科之哈薩克一併遷往在烏梁海生計固可稍紓在哈薩克亦不至無所棲止並將該處哈民清查數目編立戶口擇哈目之明白老練者奏請

賞給大銜每年定一供應

朝廷交馬例差所有塔城差徭勒派全行裁撤願隸塔屬者歸塔願隸科屬者歸科以順輿情而免淆亂其阿爾泰山本係名區號稱巖鎮應否另設大員鎮守管理臨時斟酌情形一併妥籌具

奏請

旨遵行以期一勞永逸長治久安至哈巴河駐守一節科布多現在尙無練兵自應仍遵

前旨暫由塔城照舊辦理以俟將來有隙填紮再行撤退如此分別辦法疆界既已分清人民不致夾雜塔屬之哈安業自不流離科屬之哈得所何能竄擾則實邊固圉除虐安民計無淑於此者否則哈民漫無歸宿易致潛逃即使年年派員擒收亦難免此收彼逸在科則愈積愈多在塔則愈逼愈遠年復一年終無了局其寇掠生事流入於俄又不待言之患矣況現據俄匡索勒官照會阿拉克別克河地方齊壘哈薩克有越界住牧情事意在借驅逐哈衆爲名圖佔我界正在查辦尤宜設法清理以免膠葛臣統籌全局斟酌再三若非速定辦法後患方長何堪設想可否仰懇

聖裁俯察臣所擬各節再

賜明諭俾得祇遵妥慎籌商早爲料理以杜患萌而規舊制藉仰紓

朝廷北顧之塵茲將烏梁海左右兩翼散秩大臣所上蒙文暨哈薩克呈詞全行譯漢祇呈御覽爲此繕摺瀝陳愚昧之見是否有當伏祈

皇太后

皇上聖鑒訓示臣不勝恐懼迫切待

命之至謹

奏請

旨 光緒二十八年四月初四日拜發

本年五月十八日遞回奉

硃批著卽親往履勘將該處哈民清查酌度情形妥籌安插務令各得其所以前順輿情而重邊要餘依議欽此 四月二十五日

謹將烏梁海左右兩翼散秩大臣所上懇請催還借地蒙文原呈譯呈御覽

阿勒台烏梁海左右兩翼散秩大臣額爾克舒諾三音博勒克呈據本烏梁海七旗人等會同訴稱卑旗向來倚靠肥壯游牧耕種打牲安逸度命充當差使旋於同治年間將本游牧之膏腴好地借給塔爾巴哈台又屢次分給俄羅斯出貂地方致各處哈薩克等闖入所有膏腴擅自佳牧烏梁海等衆反致擁擠無處謀生以致饑饉無法欲以牧地得租奈膏腴被塔爾巴哈台借去其中間之地又經畫界分與科屬哈薩克不但不給租稅還將我們烏梁海人等逐擄似此苦累我等何以聊生等情連次瀆請前來查所報皆係實情從前已將各情節次呈報歷任按班請咨塔爾巴哈台將借地歸還迨光緒十八年間經

欽差大臣沙會同科布多塔爾巴哈台參贊大臣齊集阿爾泰山承化寺地方會議

奏定應由塔爾巴哈台將借地歸還並展限三年一俟限滿塔爾巴哈台所屬務將阿爾泰山哈巴河一帶地方歸還烏梁海並因烏梁海倍形窮苦復令塔爾巴哈台所屬哈薩克等酌幫牲畜以免彼此爭競彼時烏梁海惟望速還膏地不願收其牲畜是以未要塔爾巴哈台哈薩克牲畜現在

欽定三年限期於光緒二十一年間早已限滿塔爾巴哈台參贊大臣並未將所屬收回騰還借地哈衆漸漸增添以致我們烏梁海等衆實極窮迫度日維艱復經據情呈報按班旋奉飭令聽候本大臣議定再行指飭遵辦等因當已札知本屬七旗遵照今候多年仍不知如何辦理哈薩克等漸至增添滋事搶佔草廠虐害烏梁海窮蒙無法棲止烏梁海自己耕種打牲養命膏脂之地委失與人憂愁不已哈薩克人多藉勢逞強烏梁海因窮積憤往往捨命相爭近年加有俄人通商時滋嫌隙尤多可慮若生事端卑散秩大臣副都總管亦實無法辦理似此無處居住憤怨之烏梁海蒙衆斷難約束相安卑散秩大臣何能當此重咎卑等愚見非請將從前塔爾巴哈台所借阿爾泰山哈巴河一帶地方務必趕緊歸還將窮困烏梁海並擁入之哈薩克等分晰定地安插居住以免夾雜紛擠彼此爭端游牧或可安

穩無事現值按班整頓地方體恤蒙古無微不至一片忠誠爲

國之心

聖主自必信任一經奏請定可邀

恩准行合無懇祈按班恩施具摺請

旨飭將塔爾巴哈台所借哈巴河一帶地方仍當欽遵前奉

諭旨即行歸還烏梁海以除苦累而免滋釁即卑旗不至終於失地亦差足仰慰

高宗純皇帝當年收撫豢養之

恩現並可將各哈薩克等分晰妥爲安置以資各安生計實爲恩公兩便理合將所有下情

據實再行呈報叩乞按班鑒查慈憫施行烏梁海左右翼散秩大臣額爾克舒諾三音博勒

克謹呈

謹將哈薩克總管頭目等所上懇請

賞給永遠住牧地方原呈譯呈

御覽

哈薩克頭目章嘎爾總管珠旺幹莫鸞達克博特木齊蘇喀爾拜等爲呈報事接奉和貝按

昔乃月考卷之二
班札開令將本屬四鄂托克哈薩克戶口數目查明造冊呈送以憑查考等因奉此當查從前已將本四鄂托克哈薩克戶口造冊呈報本屬衙門在案除將由彼至今並無添減之處呈報外本四鄂托克哈薩克自歸科布多收管駐當

皇上差使以來已經年久我們哈薩克原無居住游牧我們無法出租在烏梁海土爾扈特游牧內居住從前光緒十八年間

欽命參贊大臣沙到哈薩克地方卑哈薩克等懇乞憐憫奏求

皇恩賞給住牧之地經大臣沙諭示俟三年後分給你們哈薩克游牧迄今多年我們四鄂托克哈薩克雖無居住游牧亦願與

中國勉當犬馬之差惟流離年久多致窮困且人數衆多既無準地安置難免不紛紛四出與蒙俄互有爭端伏思卑哈薩克世受

國家厚恩

皇太后

皇上向於外蕃尤爲

天高地厚一經籲請無不立沛

恩綸茲具實情理合呈報和貝按班亟將哈薩克等困苦情形

奏明代爲乞

恩賞准永遠住牧地方以示拯救而資約束卑哈薩克情願敬謹充差報效

國家爲此聯名謹呈

新疆逃哈如係所屬自應收回片

再二月間准新疆撫臣饒應祺咨據焉耆府知府申報喀喇沙爾和碩特貝子桑吉佳普報稱去年五月內忽有哈薩克人衆來塔什河地方強住貽害地方請飭驅逐出境旋即札飭該府辦理哈薩克玩抗不遵嗣查知該哈目哈巴鐵連吉帶哈衆百數十家搬往羅布淖爾去訖其克勒伯等衆尙未遷移該哈薩克或稱科布多所屬又云塔爾巴哈台所屬並不實語究隸何城咨請臣派員並咨塔城會同一律查明押解回收等因前來查來文所稱哈目名字科布多均無其人臣現亦正飭查辦如果實係科布多所屬自應派員收回惟若此紛紛四出滋擾再不擇地妥籌安插立法箝制終必構成邊患清安任內雖曾請欵安撫所奏半屬空言並未實在辦到延至於今甚難清理此臣所以亟欲收束以爲補牢之計也謹附片具

奏伏祈

聖鑒謹

奏 光緒二十八年四月初四日拜發

本年五月十八日遞回奉

硃批知道了欽此 四月二十五日

請催幫辦片

再幫辦大臣瑞璋尙無出口之信自因萬里長征製裝不易惟近年邊務繁劇迥非昔比交涉尤難因應且無才識並茂可以助理之文武人員故臣到任以來遇事躬親直以一人而兼數役以致精力遽遜於前去冬大病至今春二月始漸就痊然每遇用心過度仍連夜失眠驚悸不止次晨必痰中帶血日前因接俄官索地照會憂憤萬分竟又數夜未睡肝氣下陷泄利復作而時發時止亦無從調治矣自揣多病之軀恐不能久膺重寄況一人之智慮有限天下之事變無窮亟盼瑞璋早來可資商權有彼坐鎮臣雖帶病遠役亦不敢辭如該大臣尙未起程應請

旨敕催作速前來以期共維邊局謹附片陳請伏祈

聖鑒謹

奏 光緒二十八年四月初四日拜發

本年五月十八日遞回奉

硃批瑞璋著即迅速前往欽此 四月二十五日

更換 衆安寺胡圖克圖摺

奏爲更換胡圖克圖接管

衆安寺事務恭摺仰祈

聖鑒事竊前據管理科布多

衆安寺事務胡圖克圖德清鄂特蘇爾呈報該胡圖克圖自光緒二十五年三月初一日到寺接管之日起連閏扣至光緒二十八年二月初一日三年期滿先期呈報應請轉咨烏里雅蘇台揀選熟習經卷之胡圖克圖一員來科更替以備接管寺務等情當經據情轉咨在案旋准烏里雅蘇台咨稱胡圖克圖德清鄂特蘇爾在科駐管寺務既屆三年期滿自應札飭札薩克圖汗揀選熟習經卷之胡圖克圖前往接替現由該汗部落盟長選派札勒堪札胡圖克圖達木鼎巴雜爾前來科布多

衆安寺接管等因於本年三月二十八日據札勒堪札胡圖克圖達木鼎巴雜爾到城來謁
臣當即接見查該札勒堪札胡圖克圖達木鼎巴雜爾秉性靈異經典精通夙爲蒙古所崇
奉即飭接管

衆安寺事務並令敬誦

皇經祝

釐保

國理合恭摺具

奏伏乞

皇太后

皇上聖鑒謹

奏 光緒二十八年四月二十三日拜發

本年六月初八日遞回奉

硃批知道了欽此 五月十六日

更正筆誤片

再臣於四月初四日附奏邊界情形一片聲叙同治三年則有明誼奎昌將阿勒泰山迤北地方分入俄界故舊有之烏克克欽達蓋圖烏魯喀昌吉斯台哈喇塔爾巴哈台那林胡蘭阿吉爾噶霍呢邁拉扈等八卡倫均向內挪移改設數語其哈喇塔爾巴哈台一卡片底本有哈喇二字值臣正又犯病不能親書此奏因係密片當令繕摺之員在臣內室辦理以昭慎密不料重複鈔稿矜持太甚竟將哈喇二字遺漏未寫又同治三年下尚有八年二字未寫以致繕片因之沿誤並未看出迨臣查知而摺已拜發旬日矣事關邊界不厭推求應請敕下軍機處即予查照更正至所稱阿勒泰山迤北各卡倫一節詳考界圖且係自北而西而南節節進佔蓋同治年之棄地始於明誼而成於奎昌光緒九年之棄地則升泰額爾慶額實踵前失又加甚焉沿邊卡倫乃已兩易其地此臣所以慄慄危懼夙夜疚心也伏祈

聖鑒謹

奏 光緒二十八年四月二十三日拜發

本年六月初八日遞回奉

硃批著查照更正欽此 五月十六日

查無私挖鉛砂摺

奏爲循章派查都蘭哈喇地方並無偷挖鉛砂情形恭摺具報仰祈

聖鑒事竊查札哈沁部落都蘭哈喇地方舊有鉛鑛久經封禁向由科布多新疆兩處各派官兵於每年三月十五日前往該處會查有無私挖以重邊禁在案本年三月適屆會查之期當經預咨該撫饒應祺照章辦理旋據巴里坤鎮總兵接奉該撫照會已經揀派委員臣亦即派委筆帖式溥湧帶領兵丁馳往都蘭哈喇地方於三月十五日會同巡查茲據該員等稟稱查得該處並無偷挖鉛砂情形取具該總管等印結稟請具奏前來除飭札哈沁總管等隨時稽查外理合繕摺具報伏祈

皇太后

皇上聖鑒謹

奏 光緒二十八年四月二十三日拜發

本年六月初八日遞回奉

硃批知道了欽此 五月十六日

妥籌經費摺 附單一件

奏爲估計應辦事宜需用經費約數遵

旨妥籌敬抒管見懇

恩敕部准撥的欸以濟要需而資整頓擬以三年爲限屆滿即請分別減停繕單具摺
奏陳仰祈

聖鑒事竊臣前於上年覆陳遵查應辦事宜一摺奉

硃批所陳各節著即妥籌經費再行次第舉辦以收實效欽此仰見

朝廷體懷邊要力圖振興跪誦之餘且欽且悚伏維科布多東連喀部南達新疆西倚阿爾
泰山北鄰俄羅斯界實爲朔漠名區藩維巖鎮乃自匪患鴟張三十餘年以來部落日益貧
弱藩籬疏薄又加屢次分界竟將科布多所屬之阿爾泰淖爾烏梁海兩旗地方與齋桑淖
爾迤東數百里劃歸俄國以致我益削弱而彼益內侵大有臥榻鼯睡之象而哈薩克不肯
向外者亦即因之闌入擁擠擾攘無從鎮遏以彼時勢而論早當牖戶綢繆大修邊備乃當
事者既昧於策畫主計者更執息事節費一面之詞限制邊吏練兵籲餉駁斥相隨歷任大
臣罔敢違抗亦遂不得不以敷衍塞責釀成積衰不振之局固無怪其然也夫軍國大計難
規小利而貴有遠謀即今列強環伺時局萬艱俄人既肆東封復勤西略計所割取我之屬
地蓋自東北以訖西北周匝三垂迴環不下二萬餘里其鐵路已由布哈爾東北造至札木

干分爲二枝其東一枝即傍我伊犁西境北折至波那丁斯科順額爾齊斯河以達彼倭木
斯科呼應靈通轉輸利便業經告成從此西北邊防安望復有解嚴之一日往歲帕米爾一
役實已爲將來圖佔喀什噶爾張本先據屏藩後窺堂奧其得步進步誠不知何所底止矣
自強之道要在乎平時營度數布銖積寸累行之以漸而持之以恆未雨之謀不容紓緩若
不豫圖於閒暇變端猝發安所得應急之餉拒敵之兵矧在今日洋務愈辦而愈難外侮漸
逼而漸緊萬不可仍事因循不自爲計竊謂目下時勢誠亂極思治轉危爲安一大關鍵幸
值
朝廷銳意自強振新庶政茲復以臣所陳者
准令次第舉辦冀收禦侮綏疆之效而又
垂諒壹是需欸措手維艱先令妥籌經費直不啻
洞燭邊垂待治之情形與臣爲難之欸曲
特加體恤臣何人膺茲
寵眷苟爲臣管見所及安忍不抒千慮一得之愚查科布多大漠窮荒毫無出產枯窘異常
加以兵燹之後蒙困商疲局勢尤爲艱棘較之烏里雅蘇台庫倫尙復不如遠甚臣前已將

邊餉難籌實在情形具摺奏陳早邀

聖慈洞鑒卽云烏梁海阿爾泰山地產驍沃尙有農鑛漁牧之利可收然地尙爲塔城借佔未經交還且卽有可爲亦先須耗開辦之費經始動需巨款而獲利尙在他年若竟不能索回則更無從下手矣是就地取財殊無把握而臣所陳應辦各事又皆至大至要極有關係必當及時趕緊舉辦者如須一一試行斷非有財有人不濟而財尤爲先急此所以反復思維計無所出仍不能不呼籲

聖明而冀稍留

宸慮者也夫天下事運之以才力而成之以財力財力不足才力雖宏亦無所用況臣本無才之可見而地方又無財之可言臣不揣冒昧遇事銳欲自任固是臣之短然自念在官一日當盡一日之心卽當辦一日之事故於公誼所在無敢稍存諉卸今茲經費若徑行仰懇奏請

敕部酌撥庫款或援舊日協濟之例仍責各省分籌協解名正言順其事非不可行然同爲臣僕會值時艱竟不設想部臣疆臣仰屋之苦惟知曉曉瑣瀆一味要求臣亦殊不願出此惟現值

朝廷勤求治理並亟邊籌世變櫻心亦實不宜以欸紕舉贏一仍舊貫致涉疏虞而釀後患
臣自奉

旨後蚤夜以思通籌全局竊以口外既無可生發自不得不仍於內地代謀茲於萬難設法
之中思有一事尙屬可行且係就臣夙所條奏與疆臣現所擬議者更加引伸並非別創新
法查戊戌七月臣曾因疏陳南漕積弊改折有益無損一事附奏清理衛所屯田當蒙

特派慶親王奕劻協辦大學士孫家鼐會同戶部妥議正摺所請駁而不行其附片所陳清
理衛屯則已議准謂當

敕各督撫切實辦理今河運海運已奉

特旨通飭改折則有漕各省屯田尤不當聽其隱沒且現在轉運皆係輪船民船糧艘久廢
運軍無人而屯田實已輾轉典賣屢更業主地冊掌自衛書之手衛官但屆時向書吏索取
年例陋規並不管田在何處數有若干積弊至此此無論漕之折與不折皆亟當覈實清理
者邇來應

詔上書者率以爲言劉坤一張之洞會奏變法論尤切至原奏議將用價所置之屯田准其
報官稅契將屯餉改爲地丁於舊章屯餉外每畝酌加報效銀二分總計各省屯田二十五

萬餘頃可歲增銀五十萬兩再益以裁省衛官之費實爲鉅款等語所擬請弛不准典買之禁辦法極寬而酌令報效銀數亦復甚微實屬毫無擾累輕而易舉臣夙知此項屯田弊竇太多久已名實兩亡今若一律清查將向由各衛自行徵租者統改歸坐落各州縣經收卽可剔除許多中飽再無論業爲民執軍執均准作爲己產無慮失業又爲除去種種需勒用費民間旣得利又除累必無不樂從者洵可上益餉源下霑實惠此於清查後卽令按畝加倍納租亦不爲苛然臣不敢妄獻此議今擬仿照劉坤一等原奏令有田者於每畝酌加報效銀二分之一外再令加繳一錢名爲清查繳價止交一次不再重徵覈以戶部例載漕衛屯田七萬五千七百九十六頃確數計算約可得銀七十五六萬兩蓋旣免照典買官田律計畝治罪又不追原租價入官已極便宜則令酌納微貲理亦宜之也又查

功令田畝稅契例應納銀今旣准承買者報官稅契則應繳之契價稅銀諒亦不能全無僅按每畝三分計之亦當得銀二十二萬餘兩以之抵充科布多籌邊經費練兵餉需總可敷衍三年若再將租項覈實釐定歲入又將不止十餘萬且係常年額徵尤爲可靠鉅款此爲理財中最有著落毫無流弊之一端宜求

皇太后

皇上明降嚴旨毅然行之無慮阻撓窒礙者也臣又悉心覈度臣所奏應辦事宜計練兵墾田考牧撫哈四事初年開辦需費已近三十萬次年屯務已有基緒可以稍省兵餉各項則不能去兵即不能減餉牲畜擬三年購足數目應與初年一樣至第三年大略相同而其中收還借地一節尤爲中外大局所關最大最要之政其交割後一切布置防守所費彌復不貲尙容前往逐細履勘沈思妥議難以豫定茲但就兵墾牧哈四事約略估計每年應請撥銀二十四萬兩閏月加給惟無須視爲定額擬以三年爲限期滿即可分別應減應停

奏明辦理嗣後不過止須開支防兵餉需屯牧局廠官兵薪費而已如果能著成效則除練兵外自餘墾牧二事皆可得利萬無虧折再將金山之鑛妥籌開採其獲利當必益豐而於荒漠之山川肇興寶藏裨益巖疆俾其可屯可牧可戰可守則於實邊守險之道收效更在無形尤安內攘外百年之至計也臣伏念部臣職司度支當茲變法圖強之頃旣須籌賠償之費又須籌辦事之款兼營並顧煞費躊躇臣苟有一知自不容以越俎引嫌故安緘默重以

諭旨殷殷以妥籌經費責之臣竊謂茲事體大規模甚宏必合樞臣部臣邊臣內外夾持同心協力經營數年方有實效臣前於覆奏摺內已陳其端矣自來封疆辦事每以一省之財

舉一省之政

朝廷責望既專一切治兵理財用人又皆有所憑藉少所牽掣用能克底於成今臣所處之地則瘠遠荒寒應辦之事則艱苦卓絕准駁須聽部臣之權衡接濟必仰疆臣之鼻息迢遙萬里操縱由人即竭駑駘亦難奏績苟非由內籌定實在的欸按期協解如前者部撥伊犁屯牧經費往事仍是徒託空言斷不可靠必至欲籌邊事轉誤邊事非長策也臣所擬辦法未知是否可行如其不行即當另爲設措或移緩就急或酌盈劑虛或於各省應協東北邊防經費騰挪濟用是所望於公忠體

國力顧大局之部臣合無籲懇

天恩敕下督辦政務處王大臣與戶部諸臣會同秉公覈議總期指撥確實的欸按期准由戶部源源領解即仍令各省分協亦必須由部督催先令統解至部再由臣派員赴領俾欸歸有著邊機諸務得以次第究圖及時興舉足資整頓而濟要需方爲切實正辦其初年開辦經費並須早爲通挪發給使有所措手不致待欸誤事邊維幸甚大局幸甚伏維以上各事欽承

諭旨申命再三臣才力庸虛本不足以辦此惟念此舉實爲北路安危所繫而上體

昔乃月考年考一
朝廷宵旰之勤下維時局艱虞之迫臥薪不及求艾已遲若再顛預漫不設備不惟重增
聖主北顧之塵且恐邊患再起將有一發莫禦者實不得不殫摠義憤勉力爲之如蒙
俯鑒此章以上所請俱能特邀

俞允尙求

敕諭部臣暫勿拘泥文法容臣放手辦理實力實心期收異日之效不效則治臣之罪邊事
是臣專責旣已無所顧畏必當誓竭血誠力任勞怨不以艱難而自沮不以人言而中更並
應恪遵穩慎之

諭次第措置認真經理不敢輕率鋪張苟圖自便再有貽誤糜公帑以壞邊疆庶幾仰副
委寄之至意管見愚昧是否有當謹具摺

奏陳並將應辦事宜估需經費約數並大致辦法另行繕單祇呈

御覽伏祈

皇太后

皇上聖鑒訓示不勝惶悚感激之誠謹

奏 光緒二十八年四月二十三日拜發

本年六月初八日遞回奉

硃批戶部覈議具奏單併發欽此 五月十六日

謹將估計應辦事宜需用經費約數暨大致辦法敬繕清單祇呈

御覽

計開

一練兵前奏至少須千餘人係就必應置防之處粗擬分設之兵原以轄境遼闊戎備太單且自收撫哈薩克以來散居游牧喜爲寇掠無兵不足以資鎮攝而密邇強鄰時時不可弛備尤須精儲爪牙期立藜藿不采之威非願輕開邊衅欲以兵戎相見也口外民皆爲商數甚寥寥不但綏戢地方捕拏盜匪非兵不行卽護送來往洋商尤極關係和局更非有兵不能放心況欲興屯開鑛民工所不及者亦不能不資兵力新疆如伊塔各城無不於滿兵蒙兵綠兵之外加練漢隊獨科布多無之默察外情深憂內患實非汲汲增兵不可然兵貴精不貴多蒙兵漢勇若得二千人以內卽庶幾可資守禦再將各旗蒙兵仿照德操更番調練不數年後便可人人皆兵堪備徵調果能認真督練演習槍械行陳一兵實得一兵之用則強橫之哈回恣肆之洋人自無不悚然懷畏而俄見我真能修備非復昔日因循更當稍戢

貪狡況臣嘗聞洋人談及彼國無不練兵沿邊臨海尤爲著意科布多獨不講求彼皆以爲不重邊地之證若練二千人官弁兵勇樽節估計以五百人歲需三萬兩計之一歲共需銀十二萬兩此爲彈壓地方起見仍擬用我營制而以西法部勒之若全改洋操未免太費且理精法密難遽馴習自可從緩其卡倫只得十兵過形薄弱即覈與早年定制及烏里雅蘇台各卡兵數均甚相懸必須酌增其額以及蒙古各旗須分設保護俄商之兵如用餉不多自須樽節歸併均於現估餉內勻濟其要歸於兵皆實用餉不虛糜而已至阿爾泰山將來尙須設兵置戍以固塞防事體較大當另覈議不在此內

一墾田布倫托海地畝寬袤刻尙不悉實在確數據往來人言田美而多然須視渠道以爲盈絀能多開渠使能多種田現擬以次試墾須用兵屯而僱精於農工之民人教引究亦無須貪多蓋口外人少若糧石太多難得銷路仍歸堆積亦屬非宜且須開置官糧局半濟兵食半資商糶則公家不糜屯田之費地方亦得屯田之益而各游牧之向來購買均可改向官局辦理如果值廉而質佳並可接濟烏城官兵商蒙之用而准商購運亦無慮奪其貿易之利是謂便兵便民不得以爭利論今擬儘銀二萬兩爲購製耕牛農具兵工餉貲各項局員雜費之用就此試辦逐年擴充異日耕穫豐收蒙兵樂於趨事且耕且守必可收古人屯

田便利之效惟初次開辦用款稍費除現辦濬治渠道之外如立倉造房置磨設公所安台站與夫轉運駝隻建廠牧養皆必須辦理者其需款亦在二萬兩以外此以布倫托海一處而言極力從省約用銀四萬兩以外即可具有規模至蒙古各旗之地或因年久廢耕或爲客民佃種亦當爲之釐整當量其無力者酌發牛籽器具以助其成所需價銀亦擬併於四萬兩內騰挪濟用惟力是視

一畜牧北方畜牧之利自昔著稱漢唐宋元以來北方富人首言畜牧

國朝承平二百餘載尤以講求牧政爲亟成法燦然蒙古亦無不以收養牲畜爲生殖之本特東盟則大受馬賊之害北邊亦曾被兵荒之災加以晉商重利盤算牛羊駝馬率以抵收欠帳搜括將空萬騎千羣長驅入塞以致蒙古生計頗艱貧瘠日甚旣乏資本更無從廣置圍場嘗考泰西各國每田百畝必空數畝不耕不穫專殖青草圈作牧場就畜牧之利巨富長子孫者不乏其人故臣謂就蒙古地方而踵效西法則畜牧實性相近而地相宜閱劉坤一張之洞會奏遵變法摺修農務條內附陳蒙古生計以游牧爲主近數十年蒙部日貧亦請

飭下蒙古王公暨該處將軍大臣酌擬有益牧政事宜奏明辦理可見非臣一人之私言也

惟科布多僅有吐門圖官廠一區現存駝八百餘隻馬二百餘匹爲數甚稀但供差使已苦不敷且非孳生亟宜另立大廠略取伊犁整頓孳生章程酌宜辦理若牧養得法去中土之弊而取西制之精必能碩大蕃滋日增月盛推而極於製造牛乳收剪羊毛駝絨皆可擴充試辦久則利益自著天下未有爲其事而無其功者其四項牲畜皆非賠本之事似不妨多爲收買擬一年以銀五萬兩爲度採買三年便可停止務期公家多一分養息蒙古卽少一分剝削庶游牧二字足稱名實但須按照時值購買老年例價無從強辦其管理孳廠官員薪俸兵丁月餉並一切例支均係不可少之需應俟詳悉擬定

一撫哈收還阿爾泰山借地安插蒙古哈薩克一事攸關邊疆大局最爲緊要需欸亦爲最鉅而臣前奏僅以安置蒙哈立言實則臣微意全爲及早下手部署以防後患爲保守阿爾泰山之計與其後發制於人不如先發制人也此山譯義爲金山東幹北幹縱橫數千里山重水複形勢制勝在古爲著名之腴區在今爲彼族之几肉我不亟謀守禦終將拱手讓人俄今力爭阿拉克別克河克色勒烏雍克地方卽爲他日要索阿爾泰山張本其情可見而現爲塔城久假不歸聞所布置亦不過派兵一二百名以一旗員駐紮所謂扼要設防恐非實際尤爲可慮揣俄人覬覦之意以其地勢好又處處產金譯閱美國華盛頓報云美政府

曾派員考查中華滿蒙物產據稱蒙古阿爾泰山金苗平衍有挖得整塊重至數觔者俄人久已察悉已建鐵路與此山逼近其心叵測等語臣又閱前出使大臣原任左副都御史薛福成出使日記內云俄之東境與中國以阿爾泰山爲界阿爾泰山卽古之金山俄人於山之北麓開鑛鍊金特派大臣駐紮經理等語可見俄人並未忘情於此山也且該處土田肥沃天氣溫和利於耕作在北路實爲可取之地窺俄人舉動其謀最隱其心甚深從不向我明言此山之佳而惟汲汲於鐵路且每從遠處著手布置恐有一朝出言借索如旅大故事必致無法謝絕者夫禍患每生於所忽而備禦宜戒夫不虞故臣欲未雨綢繆爭此先著抑臣又聞外洋形勢凡兩國接界之處莫不明斥堠修礮臺造兵房雖累世和好而設備謹嚴反能彼此相安無事誠能於此建官駐兵設卡築壘就民種田延師勘鑛和輯漢夷繕治守具我果可以自固彼即無從進攻此地爲將來之所必爭應請加意經營期於十年而成重鎮綜其繁費蓋難殫論事體重大實不敢草率擬議應俟收回之後當由臣親往察勘趁安插蒙哈之便因地制宜妥議一切辦法詳細奏明請

旨定奪今先就安插蒙古哈薩克一節覈計哈薩克兩萬餘人蒙古亦有一二千人須聽其遷徙者移彼就此使其耕牧兼資咸受約束永爲翊衛竊計亦非四五萬金不克敷用光緒

十年曾因違

旨准其收撫暫令在烏梁海境內住牧仍俟給還借地妥爲安插比經奏奉

諭旨敕由戶部撥銀七萬兩是其明證

以上應辦事宜估計應需經費通盤覈算截長補短每年須得二十四萬金不能再少應請
敕部按年照撥以便次第舉辦仍無須常耗鉅款擬以三年爲限期滿卽分別應減應停

奏明辦理至阿爾泰山布置各節事款較繁應歸另案估撥此時多寡均難懸揣且該處關
係中外大局較爲重要其應如何妥籌防守當俟察勘明白詳慎擬議具有切實辦法再行
專摺

奏請

敕下廷臣集議取自

上裁

仰邀 特旨酌撥經費盡心舉辦片

再臣正摺另單所陳擬辦各條固深知於

國計邊務均屬有益尙非迂闊難行且有欲罷不能之勢誠如

朝廷決計舉辦再得其人以經理之發端雖宏自足徐收實效然臣不敢謂其事之必成者以籌款難遽有著臣才望又不足取信於內外諸臣也伏查往年科布多辦防辦事協餉甚多非盡取資山西此外如河南山東浙江安徽江西湖北廣東七省均有協濟各疆臣顧全邊局多能應期報解頗少蒂欠其辦法係均派員解至綏遠城將軍衙門由彼接解初無遲誤故現欠餉省分止山西河南兩處可以爲證且當猖匪變亂時新疆軍需協餉多由科布多辦理轉運並無所謂道遠難致不能協濟其所以爲是說者蓋非不知舊事即不願撥給耳非惟此也即戶部從前專撥代墊之款亦復爲數甚鉅臣曾於舊日冊檔稽查而知今自臣到任經費頓覺艱難邊務亦愈增棘手卽晉豫欠餉一事可知以此揣之則此舉之內撥外協恐均未有把握若果能仰邀

特旨敕部酌撥接濟有恃此等籌邊大事自當殫誠規畫行之以漸而持之以恆次第酌宜盡心力而爲之儻中帑不能勻挪各省又徒託空言則雖欲籌辦一事亦不能行似應仰懇宸斷另簡精明強幹通達時務之大員前來督辦臣仍幫同經理祇盡辦事之責不任管餉之事庶可期內外一心經費應手必能利無不興事無不舉臣因違

旨妥籌謹再竭愚慮附片具陳伏祈

聖鑒訓示謹

奏 光緒二十八年四月二十三日拜發

本年六月初八日遞回奉

硃批著勉力籌辦毋庸推諉欽此 五月十六日

遵籌經費正摺所陳清理衛屯接閱邸報始知已奉 諭旨敕行片

再遵籌經費正摺早經繕妥因臣於四月初間病又復作迄無少減未能拜發迨月之十七日適有差弁自京旋營帶來正二月邸報臣恭讀之下敬悉漕衛屯田一事已奉

諭旨敕下有漕省分辦理即無庸再由臣瀆陳惟查北路荒瘠實無從就地設籌自不能不仍取諸內地而理財之事屬之疆臣而掌於戶部臣職司邊寄亦不敢輒爲出位之思茲因清理衛屯爲臣昔所條奏用敢再申前請而除此臣亦別無奇策區區下忱理合附片陳明

伏祈

聖鑒謹

奏 光緒二十八年四月二十三日拜發

本年六月初八日遞回奉

硃批知道了欽此 五月十六日

妥籌保護俄商改設護兵摺 附單一件

奏爲蒙古游牧地方遼闊人類繁雜俄商來往易滋釁端妥籌保護切實辦法擬將暫留防兵減數改爲護兵具摺請

旨仰祈

聖鑒事竊前承准總理衙門咨行恭錄光緒二十六年十二月十三日保護洋人

上諭兩道行令欽遵辦理等因臣內憂時局外審邊情當此創鉅痛深之餘何敢不爲懲前毖後之計業經通飭所屬蒙古各旗盟長札薩克散秩大臣副都統總管及卡倫侍衛台站官員等一體遵照不准視爲泛常稍涉疏忽惟辦事貴求實際立法以簡易爲宜防患當慎先幾臨時之補苴已晚茲以大局甫定

誥誡重申自當妥籌切實辦法其有爲難亦不能不專達

上聞以期斟酌適宜取益防害查科布多所屬蒙古有杜爾伯特新土爾扈特霍碩特明阿特額魯特烏梁海札哈沁諸部大漠窮荒縱橫廣袤該蒙古強弱雖有不同然與俄人交接總未十分水乳加有哈薩克羈入住牧人數既多復極剽悍素慣寇掠愍不畏法而尤以烏

梁海阿爾泰山一帶地方爲最繁雜該處尙爲塔城借去未歸塔屬哈薩克又復闌入接聯一片更有十蘇木額魯特人衆相爲比附實屬人類淆混良莠不齊蒙旗留兵五百名分駐三處今年餉需尙屬無著殊不足以資彈壓而俄商又素好與哈夷交易茶布牲畜任意賒欠官旣無從稽察而相離千數百里鞭長莫及更亦無從保護必至出事或人貨俱無或拖賴帳目始經該頭目呈請究追每至束手不得辦法此爲難者一迤北邊界無不與俄壤毘連隨處能來故俄商多由彼界逕至各游牧烏梁海尤爲足迹所習經該部落距科布多城近或四五百里遠且千餘里並非必由科布多城經過故地方官無從知其舉動卽亦無從預爲防範此爲難者又一查俄人來各旗貿易尙多由邊卡經過來去雖可自由究有卡座可查至俄屬又有纏頭安集延諾果依各項回民則又均由新疆西路邊界前往阿爾泰山哈巴河一帶貿易四通八達頭頭是道旣非卡倫所能限制卽非人力所能防維此爲難者又一科布多雖因通商設立稽察俄商局專辦驗票換單之事索果克卡倫地方並設筆帖式一員帶領兵書駐守係屬分卡似於俄商非無稽察但此係爲巨商販運茶貨重轍而設不由此路不能換給憑單然該商每恃科布多無通曉條約之人久已視若具文頗多繞越前年秋卽有俄商由南省辦運甄茶在塔城領照來此換單之事卽經臣查知覈與通商條

歟不符當即認真究辦俄商自知理屈認罰而去是爲明證且隨便貿易往來各旗亦非必須取道索果克其哈克淖爾霍通淖爾各處皆可行走多無執照路引官更無從查知此爲難者又一哈薩克素性頑悍每多圖財害命棄尸曠野河流之案其蒙古之無賴者亦頗不乏此類而俄商不畏苦寒險遠往往於八九月間隨帶一二蒙古工人奔馳阿爾泰山一帶尋討欠債斯時即降大雪多致封壩被阻不能旋回且有從此竟無蹤跡者去年二月間據俄商頭目與烏梁海散秩大臣等呈報有俄商密海勒瑪策福之筆齊業齊密海勒阿克索諾福帶領蒙古工人達克巴於前年秋八月前往阿爾泰山一帶地方討取舊帳至今全無下落一案可以爲證事先既不能覺察事後卻大費搜尋山谿險阻道路崎嶇野獸毒蟲出沒靡定冰天雪地更從何處捉摸查阿爾泰山雖屬科布多所轄但於同治八年早經塔城參贊

奏明借地安插胡圖克圖棍噶札拉參徒衆至今三十餘年該胡圖克圖早已圓寂且經蒙恩准其轉世其徒衆亦已奏明安置新疆之巴英溝地方乃塔城仍不將阿爾泰山遵旨交還故該處現仍暫歸塔城管理臣因案情較重已疊次札飭烏梁海散秩大臣等詳細查訪復經加派妥靠人員前往密查人文絡繹迄無端倪不得不一面究查一面咨請

行在總理衙門查照轉行森滿屬其一體認真查辦免貽外人口實前接

行在總理衙門覆文業經照咨辦理並據該散秩大臣呈覆查明該俄商係往遜都魯克奇林克木車克等處均在借地之內臣比即飛咨春滿查辦業准覆咨仍推重科布多辦理現准外務部咨據俄公使照會令科布多塔爾巴哈台各派妥員會同該國委員詳細往查刻俄派之員即係在科布多貿易之達魯噶呢克寶阿薩諾福定於五月初九日在遜都魯克地方會齊然此案究竟能否查出仍無把握此爲難者又一以上種種窒礙爲難若不妥籌切實辦法使之化難爲易該盟長等勢將迴護處分推諉規避諱匿顛預諸弊由此而生必至有保護之名仍無保護之實一有舛錯動關全局臣何能當此重咎前年七月曾據俄商達魯噶面懇以口外地闊人雜請爲設法保衛去秋駐庫臣蘇勒官施什瑪拉福來科亦爲臣切切言之臣悉心察酌實非於蒙古各旗均選樸實精壯兵丁分段駐紮專爲鎮攝哈薩克保護俄商之用不足以重責成而免疏虞前察哈爾曾設警察營近山西亦將洋人往來孔道按卡置兵專資保護同爲庇商緝匪起見且近年頗有俄英法德諸國人員前來游歷均須一體保護查該蒙古共三十旗今擬每旗各挑選馬隊兵十名均以蒙官一員帶領以筆齊業齊一名管理登記呈報事宜平日則操演槍械捕拏賊盜遇有俄人運貨前來到某

旗貿易卽到某旗告知便由該弁兵卽時護送或赴遠處索帳往返亦由該兵出派數名隨同照料按旗接替均隨時將洋人名姓面貌人數有無貨物件數及經過各旗日期詳細具報臣衙門查覈其於各國游歷人員並須加派官兵按站護送如此則防範周密庶免意外之虞卽使或遭事故亦有綫索可尋不至茫無措手釀成鉅案上煩

宵旰之慮至新疆西路一帶自須量增卡座以密稽察應可由臣咨商新疆撫臣斟酌辦理此項兵丁若有三百名卽可敷用勢處無可如何萬不能不籌添設溯查光緒五年間因防護台站增練蒙兵三百名曾經奏奉

諭旨准由戶部指令安徽江西兩省在於釐金項下各撥銀九千兩按年籌解茲查此項兵丁事同一律且較防台尤爲緊要計管帶官弁及兵丁共三百六十餘員名一年應需口分樽節估計前數僅能敷用且係洋務要需難任延欠必須撥給有著的欸事關杜患安邊此費自不當惜並查前項暫留蒙兵五百名尙未請有專餉臣曾以咨請部示旋准

行在戶部咨覆以未能如數發給應令自行奏明裁撤等因在部臣目擊前年之變練兵無用激切而出於裁汰自非於邊要獨有苛求本應遵辦惟係奉

旨暫留分防未敢輕言遣撤且就地方情形而論尙嫌單薄故臣遵查科布多應辦事宜一

摺首以練兵爲言何能請增請撤起減自由置邊備於不顧第既乏餉何由足兵況茲又有安設保護專兵之舉若再請益勢必愈難舉行權其輕重酌其盈虛只得量移守隘之兵以置衛商之隊查前項蒙兵僅分紮烏闌古木布倫托海布延圖河不足散布各旗茲擬以三百名額於各旗再行選派聯絡應用庶帑項並無加增交涉亦有裨益值此時艱在部臣疆臣素顧大局必能深明事機熟籌利害亦不致以歲添撥款爲口實且並未敢求多於留兵之外實已勉強牽合部議而臣籌邊體

國並顧兼權區區苦心當荷

聖明洞鑒至該俄商任便來往無從稽察應照約款由該國邊界官按人給予執照於局卡分別呈驗臣與匡蘇勒面商從此必須曉諭各商每於到城與蒙古各旗時均即隨時呈報該達魯噶轉報臣衙門即與某人交易銀貨亦應以實具報俾可按牘而稽臣均與匡蘇勒詳議已據允許如此設法認真經理實力舉行縱不敢謂永遠無事然查察之力既有所施斯保護之責自爲易盡似尙足以彈壓姦宄消弭釁端究屬穩著現因欽奉

上諭繙譯通飭欽遵該各蒙旗頗有戒心皆謂洋人不易保護倉猝出事慮干重譴烏梁海畏難尤甚前據首先呈訴下情嗣於去年六月間各部落汗王貝勒貝子公暨盟長札薩克

等來城謁見並據公同面求設法體恤臣伏思保護洋人本係應辦之事不容或執異詞第口外情形既與內地不同亦必須妥定切實辦法方不至別生枝節貽患無窮可否仰懇天恩俯察保護遠人事關大局情事與前迥殊必宜稍假權力將臣所擬辦法各節特賜允准抑或

敕下全權大臣與外務部會同戶兵二部悉心覈議益期周妥之處伏候

聖裁如蒙

俞允並應請

旨敕令外務部照會俄使行知駐劄庫倫匡蘇勒官轉飭俄商一體遵照庶幾呼應能靈更資得力再應辦事宜估需經費現已遵

旨妥籌專摺覆

奏儻荷

聖慈准予撥款則此項俄商兵餉當併歸練兵經費內勻挪支發即可無須另撥所有妥籌蒙古地方俄商切實保護辦法請將防兵減數改爲護兵各緣由謹繕摺具陳並將烏梁海蒙文譯呈

御覽臣愚昧之見是否有當伏祈

皇太后

皇上聖鑒

訓示謹

奏請

旨 光緒二十八年四月二十三日拜發

本年六月初八日遞回奉

硃批該部知道單併發欽此 五月十六日

謹將烏梁海兩翼散秩大臣額爾克舒諾三音博勒克副都統察罕伯勒克總管鄂齊爾札布桑敦札布棍佈札布瓦齊爾札布等原呈蒙文譯漢鈔呈

御覽

阿勒台烏梁海左翼散秩大臣額爾克舒諾副都統察罕伯勒克總管鄂齊爾札布桑敦札布右翼散秩大臣三音博勒克總管棍佈札布瓦齊爾札布等爲呈請事前奉參贊大臣札開祇錄光緒二十六年十二月十三日

上諭兩道內開遇有各國官民入境務須照料保護儻有不逞之徒凌虐戕害各國人民立即馳往彈壓獲犯懲辦不得稍有玩延如或漫無覺察甚至有意縱容釀成巨案或另有違約之行不即立時彈壓犯事之人不立行懲辦者該管督撫文武大吏及地方有司各官一概革職永不敘用欽此欽遵合行札飭烏梁海兩翼散秩大臣額爾克舒諾三音博勒克等遵照轉飭所屬各地方欽遵

諭旨務須竭力妥爲保護各國人民毋得滋生事端致干重咎等因奉此當即嚴飭烏梁海副都統總管並各官員等均各約束所屬蒙衆遇有各國人等入烏梁海所屬境界務必妥爲竭力保護斷不敢稍有疎忽致煩

聖慮惟查烏梁海左右兩翼七旗游牧地方遼闊縱橫千數百里蒙哈雜處本屬蒙衆散居游牧良莠已多不齊加以哈薩克人等刼掠成風向無約束近十餘年來俄國商人暨纏回隨便往來烏梁海各旗貿易者甚多並未領有該國邊界官執照即有領票者亦無一人呈驗該俄人往來無定設有事故相隔或數十里數百里不等刻即實難周知無從馳往彈壓保護況阿勒泰山一帶地方現仍暫歸塔城管理彼處近連塔界額魯特十蘇木人尤繁雜又有俄屬安集延諾果依各項回民均可由新疆西路邊界前往阿勒泰山哈巴河一帶貿易

昔乃月多和冬一
易處處能來尤屬易於滋事無法防範且該處每屆秋深卽常降大雪冬春人跡罕見夏季河水漲泛儻遭風雪或遇河水陡發更覺無法保護卑散秩大臣總管暨烏梁海蒙衆世受國恩值此時艱理應保安邊境稍分

朝廷之憂何忍畏難推諉專避處分無如地方遼闊蒙哈雜處俄商任意往來實慮保護難周深恐或出事故不能不將各情據實陳明理合呈報參贊大臣鑒查究應如何妥定辦法保護之處仰乞指示遵行卑散秩大臣等不勝感激爲此謹呈

烏梁海蒙兵未能裁撤片

再前准

行在戶部來咨以防因時設兵虞餉絀飭將留兵如有可裁卽行遣撤等因本擬照辦惟現因蒙古游牧地方洋人往來易滋衅端不能不妥籌保護切實辦法擬將暫留防兵改爲護兵以三百名爲額遴員分帶另於正摺

奏陳請

旨辦理尙有布倫托海駐紮烏梁海之兵丁二百名以現在該處正在修理河渠試辦屯田北路漢民絕少工匠尤稀舉凡將作查工諸役不得不藉資兵力卽使裁撤仍須由該部落

調集不如卽以留用庶一兵實得一兵之力餉項更無虛糜而於屯費且可節省是否有當
理合附片具陳伏祈

聖鑒訓示謹

奏 光緒二十八年四月二十三日拜發

本年六月初八日遞回奉

硃批知道了欽此 五月十六日

散木居奏稿卷之十一

門人鈴木吉武校字

散木居奏稿卷之十二

韓難 瑞洵

壺盧集 光緒壬寅五月二十四日起七月初六日訖

代奏杜爾伯特正盟長謝 恩摺

具報十屯二十七年收成分數請予獎賞摺

十屯播種完竣摺

奏調駝隻片

請將俄商局改爲洋務局摺

更定保獎限制片

請 賜諭旨敕晉豫撥解片 以上五月二十四日拜發

公旗振濟完竣摺

附奏杜爾伯特留兵撥俟裁併勻布情形片

請將換回驍騎校吉拉敏等四員暫行留營帶往辦理收安事宜片

撥糧振濟窮苦片

請假就醫摺 以上七月初六日拜發

代奏杜爾伯特正盟長謝 恩摺

奏爲循例代

奏叩謝

天恩仰祈

聖鑒事竊據新授杜爾伯特左翼正盟長副將軍特固斯庫魯克達賚汗噶勒章納木濟勒呈稱接奉檄開前於光緒二十七年十月繕單具

奏請

簡杜爾伯特左翼正盟長一缺現於本年正月初六日遞回原摺原單奉

硃筆圈出杜爾伯特左翼署盟長副將軍特固斯庫魯克達賚汗噶勒章納木濟勒欽此恭錄檄飭欽遵前來當即祇詣科布多

萬壽宮叩謝

天恩伏思噶勒章納木濟勒蒙古世僕受

恩深重毫無報效茲復渥荷

殊施賞補杜爾伯特左翼正盟長之缺惟有殫竭愚誠認真辦理盟務不敢稍涉因循以期仰答

高厚鴻慈於萬一等情懇請轉

奏前來理合循例代

奏伏祈

皇太后

皇上聖鑒謹

奏 光緒二十八年五月二十四日拜發

本年七月初九日遞回奏

硃批知道了欽此 六月十六日

具報十屯二十七年收成分數請予獎賞摺

奏爲具報屯田收穫糧石分數照章請將該管官員兵丁分別給予獎賞繕單具陳仰祈

聖鑒事竊查科布多光緒二十七年所種屯田十分共收大麥小麥青稞三色糧七千二百

三十二石臣當派筆帖式吉林會同屯防參將世襲騎都尉祥祐等將所收糧石內揀擇乾

昔才居冬和冬二二
潔三色糧七百石收入屯倉以爲今年籽種其餘糧石均運交城倉收納查例載種地官兵各視其收穫分數量加鼓勵等語此次該屯田兼管專管千總把總蒙古兼管專管參領驍騎校委章京及綠蒙各兵丁應得議敘賞項據屯防參將世襲騎都尉祥祐呈請覈辦前來臣覆查無異應懇

天恩將該屯田參將祥祐交部照例議敘其六屯正掣頭宣化鎮標張家口營候補經制外委梁振基收穫在十四分以上應照章請俟補經制外委後以把總補用九屯正掣頭宣化鎮標獨石口協右營馬兵李生貴收穫在十三分以上應照章請以經制外委補用出自鴻慈逾格其餘官弁兵丁謹繕清單恭摺具陳伏祈

皇太后

皇上聖鑒

敕下部院覈覆施行再臣前於上年十一月二十四日具

奏邊費日絀不敷周轉請將蒙古各項官兵應領糧折暫放本色摺內聲敘本年新糧刻正驗收約有五千餘石等語茲查去年共實收糧七千二百三十二石前奏係約略預計是不能恰合確數謹

奏 光緒二十八年五月二十四日拜發

本年七月初九日遞回奉

硃批該衙門議奏單併發欽此 六月十六日

謹將光緒二十七年十屯收成分數暨綠蒙官弁兵丁應給議敘賞項敬繕清單祇呈
御覽

計開

發領籽種小麥三百八十石

今收小麥五千二百七十九石

發領籽種青稞二百五十石

今收青稞一千二百二十九石八斗

發領籽種大麥七十石

今收大麥七百二十三石二斗

查每歲十屯地內例應動用籽種糧七百石

上年共收穫三色糧七千二百三十二石

統計收成分數十分零三釐三毫一絲今將所收三色糧石仍照舊例存留籽種七百石收入屯倉外其餘糧六千五百三十二石均收入城倉訖

統轄屯田直隸昌平營參將世襲騎都尉祥祐兼管屯田宣化鎮屬多倫協中營千總傅鎮海兼管屯田宣化鎮屬張家口左營候補經制外委張發

以上三員均係屯田員弁統計收成分數十分零三釐三毫一絲均應交部議敘

專管頭二三四屯宣化鎮屬張家口營繕房堡把總趙金鼇所管便屯拉展收穫糧石八分三釐三毫二絲應毋庸議敘

專管五六七屯宣化鎮標城守營把總李明所管三屯拉展收穫糧石十一分一釐三毫應交部議敘

專管八九十屯宣化鎮屬張家口營洗馬林堡把總丁喜所管三屯拉展收穫糧石十一分八釐六毫四絲應交部議敘

兼管頭二三四五屯委署蒙古參領圖佈敦所管五屯拉展收穫糧石八分六釐七毫五絲零應毋庸給賞

兼管六七八九十屯委署蒙古參領阿畢爾米特所管五屯拉展收穫糧石十一分七釐八

毫六絲應給頭等賞小彭緞二疋

專管頭二屯委署蒙古驍騎校札木色楞所管兩屯拉展收穫糧石七分零零三絲應卅庸給賞

專管三四屯委署蒙古驍騎校察杭班第所管兩屯拉展收穫糧石九分六釐六毫零應給二等賞小彭緞一疋

專管五六屯委署蒙古驍騎校濟克札布所管兩屯拉展收穫糧石十二分零五毫二絲應給頭等賞小彭緞二疋

專等七八屯委署蒙古章京那木濟勒多爾濟所管兩屯拉展收穫糧石十分零六釐四毫六絲應給頭等賞小彭緞二疋

專管九十屯委署蒙古章京圖們額爾哲依所管兩屯拉展收穫糧石十一分七釐九毫二絲應給頭等賞小彭緞二疋

收穫糧石在十四分十三分以上六九兩屯每屯綠營當差副犁頭一名每名應給頭等雙賞銀三兩每屯當差綠營兵六名兩屯共兵十二名每名應給頭等賞銀一兩五錢每屯蒙古領催一名每名應給頭等雙賞茶四塊煙四包每屯蒙古當差兵二十四名兩屯共兵四

十八名每名應給頭等賞茶二塊煙二包

收穫糧石在十分十一分以上三五八十屯綠營兵三十二名每名應給頭等賞銀一兩五錢蒙古兵一百名每名應給頭等賞茶二塊煙二包

收穫糧石在九分以上四七屯綠營兵十六名每名應給二等賞銀一兩蒙古兵五十名每名應給二等賞茶一塊煙二包

以上共賞銀八十八兩除扣二成銀十七兩六錢外實給七十兩四錢

共賞小彭緞九疋每疋折布八疋每布一疋折銀三錢三分共合銀二十三兩七錢六分除扣二成銀四兩七錢五分二釐外實給銀十九兩八釐

共賞茶三百五十四塊

共賞煙四百四包

十屯播種完竣摺

奏爲十屯播種完竣繕單

奏報仰祈

聖鑒事竊照科布多屯田向於每年春雪消化地氣開通始行播種前飭管屯官弁將去年

倉存新收小麥大麥青稞籽種共七百石領出分給陸續布種茲據報於四月十八日一律播種完竣謹將動用籽種數目繕單祇呈

御覽伏祈

皇太后

皇上聖鑒謹

奏 光緒二十八年五月二十四日拜發

本年七月初九日遞回奉

硃批知道了欽此 六月十六日

謹將十屯播種動用籽糧數目繕單祇呈

御覽

計開

小麥三百八十石

種地五十二頃七十九畝七分七釐

大麥七十石

種地十一頃六十六畝六分六釐

青稞二百五十石

種地四十一頃六十六畝六分六釐

十屯通共動用小麥大麥青稞籽糧七百石

十屯通共種地一百六頃十一畝九釐

奏調駝隻片

再科布多官廠駝隻不敷應用向應由烏里雅蘇台

奏明調取以供要需節經辦理在案茲據駐班處公銜三等台吉色喀寧等呈據管理官廠協理台吉齊達爾巴勒申稱官廠存駝爲數無多雖去年已經添調但現在差務絡繹仍屬不敷應差擬請設法調取以備各項需用轉呈覈辦等情據此查該廠牧放駝隻每年春夏採運木植修造農具兼運秋冬屯田收糧暨赴古城採買官兵米麪並備補立各項例倒之用據稱不敷應差係屬實情且臣現奉

批旨飭將布倫托海屯田認真辦理所有應用農具籽種官兵糧糈一切在在皆須預爲轉運全僱商駝脚價太費長途往返又未安設台站更不得不兼資官駝之力既據該廠懇請

調取自應通融辦理未便因去年甫經調用稍涉拘泥業經臣咨商烏里雅蘇台將軍仍由所屬孳生羣內揀挑口輕臃壯大騾駝二百隻委員護解來科以濟要需現准咨覆仍令查照辦過成案徑行具摺

奏調俟奉

諭旨再行欽遵辦理等因前來相應請

旨敕下烏里雅蘇台將軍卽由所屬孳生羣內飭令揀撥口輕臃壯大騾駝二百隻派員護送前來以資應用所有官廠駝隻不敷仍由烏里雅蘇台調取以備要需緣由理合附片具陳伏祈

聖鑒謹

奏 光緒二十八年五月二十四日拜發

本年七月初九日遞回奉

硃批著咨商連順酌量調用欽此 六月十六日

請將俄商局改爲洋務局摺

奏爲科布多洋務日殷亟須得人而理原設稽查俄商局名實不符擬請量爲變通改爲洋

務局仿照內省辦法以免窒礙而裨交涉具摺詳陳仰祈

聖鑒事竊自光緒七年改訂俄國陸路通商章程准俄商由天津販運土貨走歸化城科布多出索果克邊卡回國當以事關洋務一切稽查保護驗貨換單各事均屬辦辦關係緊要經前大臣沙克都林札布於光緒十六年十二月

奏明設立稽查俄商務局遴委章京一員以資承辦復設筆帖式二員一駐索果克卡倫辦理收繳運照稽查貨物各事一駐局中隨同辦事並選募兵書添支糧餉並聲明將來俄務較繁再行奏請加添先行試辦等情均經總理衙門會同吏戶兵三部議覆奏准在案臣蒞任以來體察情形原定章程雖似周密而按之名實諸多未洽且寬嚴之間亦未適得其平以致俄商無所取信官兵視爲畏途有不能不稍事變通者查科布多承辦蒙古事務章京即理藩院例載之兵差司員本係京缺近多改由外補專辦蒙古部落及台站卡倫事務從前俄羅斯尙未准其通商而卡倫邊界相連即已有交涉之事悉由承辦蒙古事務衙門辦理此係舊例已閱多年自光緒七年改訂條約始經設立稽查俄商局徒以初設時不諳機要並未行文知照該國商務衙門以致俄商有事待理每仍赴懋蒙古處並不遵照新章改聽俄商局覈辦即該商運貨來往驗照換單等事亦必須隨時指示一若不知有此局者

此所謂俄商無所取信也原奏又稱索果克卡倫內有哈克淖爾一卡該處俄商從前來此貿易或多行走此路現亦須另派官一員幫同稽查擬在索果克哈克淖爾兩卡設筆帖式一員巡兵四名字識一名通事一名分駐要隘辦理換單各事且防俄商繞越中途銷售之弊等因按索果克卡倫尚在科布多迤北距城千有餘里東達哈克淖爾卡倫西連達爾沁圖卡倫南通博勒佈拉噶蘇台北與俄國邊界接近地勢極高大山環繞狂風驟雪四時不絕除駐卡官兵外渺無人煙官兵日用食物皆須購自城市若轉運糧石稍滯即致斷炊且皆住宿蒙古包每遇大風沙石飛揚樹木爲拔蒙古包即難支立必須護持晝夜不止汲水負薪手足坼裂如遇大雪柴薪尤難尋拾至於奇寒酷冷更不待言兼之邊瘴逼人中則致病漢趙充國所謂霜雪疾疫瘕墮之患已徵其實此處舊設駐卡侍衛艱苦萬狀今駐卡之筆帖式與該侍衛情事相同至甄叙勤勞則侍衛三年期滿尙有保獎該筆帖式乃並不議及不獨相形見絀即按之內省辦理洋務人員每屆三年例許優獎者亦復判若穹壤就使與科布多三部院當差人員比較亦覺彼逸而此獨勞彼甘而此獨苦故一論及此差罔不談虎色變視爲畏途固無怪其然也臣伏維時艱日棘外轡堪虞洋務一端實宜講求諳練用心經理茲者詳加體察交涉事本繁難除勘界換約係出特舉自餘詞訟游歷以至錢債

細故幾無一不與大局相關況承議欸之後情形又變辦理更屬爲難原非商之一字所能盡其委曲名實既有未符自應

奏明更定擬請將稽查俄商局改爲洋務局便可函蓋一切辦事已有條理而立法尤在任人並應將承辦章京改爲總辦仍照原議准其滿漢兼用其筆帖式兩員不必定爲額缺改爲委員亦勿拘泥滿漢務以得人爲主應由臣隨時量材器使不妨少寬其額以資造就仍予限制至多不得過六員之數以防濫竽刻下就地取材已難其選如果將來洋務倍增更屬非才莫辦應否請由外務部揀派通曉俄文明白洋務者前來承辦以期勝任尙容臣妥酌具

奏至保獎一節查吏部奏定章程內開嗣後隨同南北洋大臣專辦洋務出力人員自奉委之日起扣滿三年請獎以十員爲率等語科布多毗連俄壤似應屬之北洋吏部既有專條亦宜援照辦理在事人員如果得力每屆三年應請准予保獎或不得力亦即隨時撤懲其索果克駐卡之官應改派委員前往辦理至霍通淖爾地方一人勢難兼顧並應增設一卡委員駐守以密譏察所需局費心紅紙張薪燭以及兵書通事等口分悉均照支總辦及委員亦仍按品給予鹽菜銀兩期歸節省如此略予變通庶幾機局較靈辦理無虞窒礙而循

名責實取益尤宏合無籲請

諭旨俯准照擬辦理實於邊維大局有裨如蒙

俞允伏候

命下再由臣咨請外務部吏戶二部欽遵並照會俄國駐劄庫倫臣蘇勒官通飭該商遵照
臣爲慎重交涉起見是否有當理合具摺詳陳伏祈

皇太后

皇上聖鑒訓示謹

奏 光緒二十八年五月二十四日拜發

本年七月初九日遞回奉

硃批外務部議奏片併發欽此 六月十六日

更定保獎限制片

再臣前因科布多係防戍軍營額缺章京筆帖式等員換防來營僅止補缺摺內聲請回綏
遠城後以升階補用並無別項保舉當於前年九月專摺懇

恩准照邊省軍營勞績保獎並定請保以三年爲期列保以數員爲度等因欽奉

硃批著照所請該部知道欽此伏思臣初意原因該員等宣勤邊塞清苦艱辛按之防戍定章本應予保惟查向來辦法除糧餉章京三年期滿如果出色准保以主事即用外其換防人員奏補章京以七年爲期滿筆帖式以五年爲期滿額外驍騎校以三年爲期滿似未屆滿即不應保在臣原可隨時考察具有斟酌絕不濫登薦剡第恐後來者不悉初辦情由或至誤會原奏一涉拘牽辦理即多窒礙假如章京於七年尙未報滿之先預加兩保未免過優轉使躁競之端自此而開大非臣鼓勵羣材之本意矣再四籌酌不得不切實聲明預防流弊擬請此項三年保獎章京筆帖式額外驍騎校均須已經期滿方准列保升階仍當察其才具操守及平日辦事如何以憑覈定不得循行故事稍滋浮濫其非已經報滿之員如果實在出力祇准獎給銜頂級紀不准遽加優保庶於激勸之中仍屬不失限制至去冬奏保章京筆帖式各員係因多年出力且辦防著有微勞併案辦理已蒙特恩允准並均准部覆欽遵註冊自無須再事嚴覈爲此附片陳明伏祈聖鑒訓示謹

奏 光緒二十八年五月二十四日拜發

本年七月初九日遞回奉

硃批覽欽此 六月十六日

請 賜諭旨敕晉豫撥解片

再准戶部來咨知臣前奏晉豫兩省欠餉並無允協信息邊情窘迫懇

敕部臣妥籌辦法一摺議令仍由山西河南兩省照減撥數目騰挪分解細繹原奏措詞甚屬切至惟近年外臣多以北路荒寒無關輕重故於協餉一節每每不肯照撥茲雖

詔旨飭催部文迫切而以臣私意揣之終恐該省置若罔聞未必遂能遵辦伏思科布多前議修繕倉廩奉

旨准給之革員麟鎬贓銀四千兩聞該旗業經奏懇免繳臣亦未敢請部改撥徒干駁斥現在又加開濬布倫托海渠道布置明歲開屯一切事宜在在需款萬不能一錢不名挪借商賈一節臣以舊欠未還媿難啓齒且商力亦實不支山西河南兩省雖已疊次咨催山西尙有信支吾河南直置之不理似此不顧大局臣實屬無法可施竊謂既經戶部三次指撥便應指定以何款抵解方能有著臣愚見山西賑務已完該省年景頗好而捐項因奉

明旨停止事例各捐生趕辦者異常踴躍收數倍蓰河南省亦年穀順成時局均已大紓竊計若於晉捐項下及豫代收捐與該省展捐項下各爲騰挪三四萬金隨後再行分別歸補

昔才月方和冬二二
實非萬做不到之事查該二省欠餉本鉅今臣於晉僅請還三萬四千兩於豫僅請還四萬兩在臣實已曲諒疆臣之爲難何該撫藩竟不設身一思臣之如何爲難耶再四籌維似非奉有

諭旨該撫等仍是不肯撥給實偏處此惟有籲求

聖慈嚴飭該撫等各飭藩司即於捐款項下照依臣咨商之數迅速撥解綏遠城將軍衙門以便接領儻再有心膜視臣即將該藩司指名

奏參伏祈

聖鑒訓示謹

奏 光緒二十八年五月二十四日拜發

本年七月初九日遞回奉

硃批戶部議奏欽此 六月十六日

公旗振濟完竣摺

奏爲蒙古公旗振濟辦理完竣並將撥給籽糧督飭播種繕摺

奏報仰祈

聖鑒事竊前因杜爾伯特右翼公多諾魯布旗報災查明情形較重當經專摺懇

恩准撥銀糧振濟以戢流離嗣於本年二月十二日遞回原摺奉

硃批著照所請該衙門知道欽此臣欽遵卽飭糧餉處如數動撥庫平銀五百兩小麥大麥共一百石遴派糧餉處筆帖式景善運解前往該旗將被災蒙古貧苦人等查明戶口分別拯濟並飭用銀購買羊隻酌量散放諭令覈實辦理去後茲據該員景善稟稱奉派攜帶銀糧前往杜爾伯特右翼公旗振濟遵卽起程馳抵該旗與該公多諾魯布晤面宣示聖恩該公欣喜感激卽率所屬人等望

闕叩頭同聲頌抃旋同該公親往波什圖那米拉察罕哈克三處舊墾之地周履查勘約有二十頃均可引渠灌溉已於四月二十五日起督率蒙兵將籽種大小麥一百石開犁播種至五月初四日一律完竣其耕牛農具係由盟長處借給復會同該旗官員購買大羊三百五十隻羊羔三百五十隻以便孳生每大小羊二隻合實銀一兩四錢三分共合用實銀五百兩零五錢當同該公傳齊屬下人等查明被災戶口計共四百一十一名口按人酌給共散放羊七百隻均各承領等情並由該公出具印結一紙戶口冊一本一同稟請查覈前來臣覆查此次該旗被災設法振濟在公家所費無多而蒙古貧苦人等均已各霑實惠儻今

昔乃月多禾冬一
秋能獲豐收從此連年遞種逐漸增屯更足以資接濟而擴地利該員景善督率勤奮經理
尙能用心其採買羊隻價值既極減省散放亦復公平現據盟長親王索特那木札木柴呈
稱該旗蒙古人等甚爲歡抃均知頂戴

皇仁至此案事屬蒙振用欸無多應歸入常年報銷請免另造以歸簡易所有蒙古公旗振
濟辦理完竣並將撥給籽糧督飭播種各緣由謹繕摺

奏報伏祈

皇太后

皇上聖鑒謹

奏 光緒二十八年七月初六日拜發

本年八月十七日遞回奉

硃批該衙門知道欽此 七月二十五日

附奏杜爾伯特留兵擬俟裁併勻布情形片

再分駐科布多杜爾伯特蒙古兵丁一百名係紮布延圖河前委札薩克鎮國公多諾魯布
管帶附奏在案去年冬間因該旗被災令回游牧查看旋據具稟請振經臣專摺奏明撥給

銀糧撫恤並飭該公會辦其兵令營總暫爲管理茲查該公須在游牧經理屯務不必回防且此項兵丁又經臣奏請改爲保護洋商之兵已蒙

允准應俟奉到部咨即按每旗十兵原議挑選分派除烏梁海留駐屯工外其杜爾伯特部落之兵尙當裁併勻布謹附片陳請伏祈

聖鑒謹

奏 光緒二十八年七月初六日拜發

本年八月十七日遞回奉

硃批知道了欽此 七月二十五日

請將換回驍騎校吉拉敏等四員暫行留營帶往辦理收安事宜片

再臣現奉

派赴阿爾泰山查向來前往該處必須五六月間天氣清和方能行走一交秋令即大雪封山厚至數尺冷逾嚴冬人蹤斷絕沿途烏拉駝馬無從支應今已七月既不能行只可俟至明夏其辦理收安一切事宜動輒需人差委遠調多員徒勞台站又恐規避不來反致耽誤惟查應行撤回換防旗綠武職中如即補驍騎校吉拉敏儘先守備宣化鎮屬岔道營永寧

汎千總馬成英六品頂戴宣化鎮標城守營把總張存德六品頂戴宣化鎮標右營把總盧慶雲均年力強壯通曉蒙語相應仰懇

天恩俯准將該驍騎校吉拉敏等四員暫行留營以便隨帶驅使一俟阿爾泰山事畢旋營再行酌量遣回謹附片陳請伏祈

聖鑒訓示謹

奏 光緒二十八年七月初六日拜發

本年八月十七日遞回奉

硃批著照所請欽此 七月二十五日

撥糧振濟窮苦片

再臣前因科布多附城左右窮苦蒙古漢民老弱廢疾無所存恤不能自食當經附奏懇

恩准於每屆冬令提用倉糧小麥大麥各五十石按人散放先期具

奏奉

旨俞允自應欽遵辦理茲已節屆立秋業飭查明現在窮苦蒙漢廢疾人等數在二百六十餘名口與去年大致相同應請循照前奏動支倉糧小麥大麥各五十石交磨房磨碾俟十

月初一日起至十二月底止每月分作六次即以米麪按人放給俾霑實惠而廣
皇仁理合附片陳明伏祈

聖鑒謹

奏 光緒二十八年七月初六日拜發

本年八月十七日遞回奉

硃批知道了欽此 七月二十五日

請假就醫摺

奏爲臣病勢日增調治棘手籲懇

恩准給假前往新疆就醫繕摺具陳仰祈

聖鑒事竊臣因前年之變驚憂成疾有類怔忡去年十月間復患噎症當經奏蒙

賞假兩箇月調攝嗣以假期屆滿所患雖未就痊尚可勉力支柱因即疏陳銷假強起任事
滿擬漸次向愈圖報涓埃詎於本年三月二十六日接據駐劄庫倫俄臣索勒官施什瑪勒
福照會逼索阿拉克地界憂憤交乘遂致病益增劇始係咯血失眠繼增牙疼迨五月二十
三日忽犯惡心乾嘔次日即胃氣上衝呃逆頻作旋又腰脊兩脅走氣作痛胸膈日添脹悶

飲食輒噉補泄交施迄無少效今已四十餘日病情無已有加雖仍力疾辦公而職守所關恆多曠廢刻下不能起牀竟成臥治悚疚殊深似此二豎侵尋頽然在官已同廢物而處此苦寒之地若竟

奏請開缺又恐迹涉規避此心無以自明況受

恩深重

委任至專臣一息尙存亦惟矢以盡瘁報

國輾轉焦思憂灼彌甚竊維新疆爲省會名區古城烏魯木齊醫藥均便臣私計若於幫辦瑞璋到任後能邀

聖恩賞給臣假期三箇月准赴該省就醫涉境既非甚遼遠職司亦無慮久虛而臣遷地爲良心境開朗再爲廣求方劑或冀仰叨

福芘當可霍然且臣奉

派前往阿爾泰山辦理收安事宜饒應祺巡撫全疆亦尙須與之商榷一切藉得面議尤爲詳盡覆查臣工患病往往有請回旗回籍就醫者無不奉

旨允准茲臣事同一律然並不敢遽請回旗可否仰懇

恩准賞給臣假期三箇月前往新疆就醫出自

聖主如天之仁如蒙

俞允應俟幫辦瑞璋到任後臣卽將印鑰交其暫護再行輕騎減從秋後起程仍俟假滿病痊卽行馳回本任萬不敢稍耽安逸上貢 下闕

硃批著賞假一箇月在任調理欽此 六月二十五日

散木居士奏稿卷之十二

門人鈴木吉武校字

散木居奏稿卷之十三

幹難 瑞洵

勉力集 光緒壬寅

代謝 天恩摺

御押報匣領到片

洋務局裁撤章京筆帖式片

請 敕揀派諳悉俄語學生片

叩謝 天恩摺

參撤章京摺 以上九月初二日拜發

新疆會勘借地安插逃哈似不可行未敢附和請 敕再行妥籌摺

先陳安哈辦法片

續假片

奏爲先將收安事宜豫籌布置請 准借撥欸項摺

派員收哈片 以上九月十三日拜發

杜爾伯特左翼副將軍仍以正盟長兼任摺 原摺滿漢合璧

奏調徐鄂來營片

請調覺羅緒齡來營差委片

塔城割據阿爾泰山地段萬不可行請 敕長庚秉公查勘摺

再陳索地情由片

密陳擬安置哈薩克情形片

力疾銷假片

奏調馬匹摺

廟工採購料物請免稅添駝片

前糧餉章京榮泰給咨離營片

蒙古保舉摺

附保駐班蒙員片 以上十月二十九日拜發

代謝 天恩摺

奏爲據情代

奏叩謝

天恩事竊據烏梁海左翼散秩大臣額爾克舒諾右翼散秩大臣三音博勒克左翼副都統察罕博勒克左翼總管倭齊爾札布桑敦札布右翼總管棍布札布瓦齊爾札布等呈稱接奉按班札開業將塔爾巴哈台前借烏梁海阿爾泰山一帶地方具摺奏請收還仰蒙硃批照准行令欽遵等因跪聆之下感激無似當卽宣示

聖恩所有七旗官員兵丁人等無不望

闕叩頭同聲歡頌此後蒙哈各安生計亦免彼此互啓爭端俾烏梁海不至終於失地皆我皇太后

皇上之所賜也理合將感激下情叩乞鑒覈可否代奏等情呈請前來臣查該烏梁海散秩大臣等感激實出至誠不敢壅於

上聞謹繕摺據情代

奏叩謝

天恩伏乞

皇太后

皇上聖鑒謹

奏 光緒二十八年九月初二日拜發

本年十月十五日遞回奉

硃批知道了欽此 九月二十五日

御押報匣領到片

再承准軍機處知會前據奏請

御押四分報匣四分鑰匙四分現均由

內發下相應知會迅速派員備文來京祇領等因承准此臣遵即派委蒙古處承辦章京主事職銜英秀晉京承領咨呈軍機處在案茲該員因尚須赴部聽候帶領引

見經將承領

御押六分報匣四分鑰匙四件遴派妥實弁兵先行齎呈來營已於七月初九日如數奉到臣敬謹祇領收存以備拜發摺報之用除呈覆軍機處查照外理合附片陳明伏祈

聖鑒謹

奏 光緒二十八年九月初二日拜發

本年十月十五日遞回奉

硃批知道了欽此 九月二十五日

洋務局裁撤章京筆帖式片

再臣前奏請將稽查俄商局改爲洋務局另設總辦委員各節現承准外務部咨行議准覆奏奉

旨依議欽此應卽欽遵辦理查原充俄商局承辦章京主事職銜分省遇缺卽補直隸州知州穆騰武前年九月請假回旗旋復稱病屢次續展該局雖有署理之員究嫌職事久曠茲外務部原奏謂科布多界在西北俄人往來邊界不獨運貨經商自應遴派諳悉洋務人員總司一切遇事相機籌辦較有裨益等語洵屬扼要之論其新設總辦一差容臣另行遴員奏充章京穆騰武旣未回營自難遷就應令另候差委所有章京一缺筆帖式二缺均自奉准部咨之日卽行裁撤其更張未盡事宜容再咨部辦理除分咨查照外謹附片陳明伏祈聖鑒謹

奏 光緒二十八年九月初二日拜發

本年十月十五日遞回奉

硃批該部知道欽此 九月二十五日

請 敕揀派諳悉俄語學生片

再科布多毘連俄壤邊界務殷又加通商往來稽察防護事事皆極緊要乃平日辦法不問輕重一欲以敷衍了之現經改設洋務局必須從新整理查向來與彼西悉畢爾總督及匡蘇勒官等移行公牘因不解洋文係用清字照會俄官來文則於俄文外並附清文相形既已見絀而輾轉譯錄不免訛誤紛滋殊於交涉大有關係臣竊思同文館舊日學生不乏通曉洋文之人相應請

旨敕下外務部揀選諳悉俄國語言文字年力強壯之學生一名飭由台站前來科布多當差俾充譯職實於洋務有裨該學生如果得力應俟三年准予獎勵邊徼苦寒其月支薪費可否量從優給之處均出

天恩理合附片陳請伏祈

聖鑒訓示謹

奏 光緒二十八年九月初二日拜發

本年十月十五日遞回奉

硃批外務部知道欽此 九月二十五日

叩謝 天恩摺

奏爲叩謝

天恩仰祈

聖鑒事竊臣前因病勢日增調治棘手當經具摺陳懇

賞假三箇月擬赴新疆就醫茲於八月十九日遞回原摺奉

硃批著賞假一箇月在任調理欽此仰見

皇太后

皇上體恤臣工仍復

垂厯邊寄跪讀之下感悚曷勝伏思臣忝戍塞防時多痰疾屢瀆

宸聽已切慚惶茲復蒙

賞假期俾資調理

宏恩曲逮銜戢彌深臣惟有廣覓醫方慎施藥餌以冀速痊銷假仍效馳驅稍酬
高厚生成於萬一謹繕摺叩謝

天恩伏祈

皇太后

皇上聖鑒謹

奏 光緒二十八年九月初二日拜發

本年十月十五日遞回奉

硃批知道了欽此 九月二十五日

參撤章京摺

奏爲參撤不能得力之章京恭摺仰祈

聖鑒事竊查補佐領後以協領卽補先換頂戴遇缺卽補防禦蒙古處幫辦章京主事職銜鍾祥年力雖尙強盛而才識實甚庸凡遇事不肯實心辦理近年隨時體察其惰滑欺罔有萬不能再事容忍者如去夏派赴阿拉克別克卡倫與俄員會查牌博臣以俄人正議蓋房必將商及界務臣當卽繕給該章京滿洲檄文一件中敍不應在中界以內建造房屋並邊吏不能擅許土地各節囑令與俄員看視俾該章京有詞可措並令認真會查乃該章京到彼後仍草率從事竟將此檄置之不提其來稟亦未聲明是否已給俄員看過其不經意可

知是爲數衍又阿拉克別克界務前接外務部王大臣等密函仍屬臣由外辦理與俄官相機辯駁臣未敢諉謝因查此事俄人生心由於初次蓋房駐卡侍衛並未阻止亦未呈報以致得步進步非將當年駐卡之侍衛參劾無以爲辨論之地當飭該章京詳查職名候辦乃再三催促該章京竟壓閣不查是爲瞻徇又本年夏間辦理杜爾伯特右翼札薩克鎮國公多諾魯布旗振濟先經臣

奏明撥飭大小麥籽種一百石飭令布種以資接濟原因該旗本有舊墾之地也乃該章京輕受盟長之託當面與臣力言該旗地皆山坡磽瘠萬不能種經臣正言駁斥決意辦理並將盟長私派之員摘頂示懲旋據該蒙員認咎聲稱該旗實有可種地畝願助其成嗣經委員督飭播種完竣業經

奏報是爲阻撓又近來蒙漢官民屢有失馬之案甚至蒙古王公來城馬亦被竊即使控告亦置不理有人勸其須稍拏辦者該章京則云那年不是如此絕不究查近依城署竟至盜賊肆行成何事體是爲廢弛此外該章京辦事不合之處尙多臣未便過於苛求其更可異者該章京以承辦蒙哈要務及交涉洋務之員自宜格外謹慎乃竟時常上街在商鋪家閒坐又好議論公事口外人心浮動最好造謠鎮定之不暇何堪復揚其波此其尤爲非是者

也北路軍營向係章京辦事大臣僅能畫諾大權久已下移早成績重難返伊等又黨堅勢衆朋比把持一鼻出氣無非欺長官媚富商斂苦豪遂其私計現因整飭邊務奉

旨令臣勉力籌辦毋庸推諉竊謂害去而利始見積習如此若不擇尤參撤一二邊事仍難措手臣伏思任事固尙才能而觀人必取心術似此虛浮詐飾不重公事之員久予留營實屬無益現經臣查悉該章京去年早丁父憂已將其一切差使撤去咨回綏遠城原旗補行穿孝以重倫紀該章京既不得力應庸再行來防致滋貽誤此後儻再查有庸劣之員臣仍卽予參處除分咨查照外謹繕摺具陳伏祈

皇太后

皇上聖鑒訓示謹

奏 光緒二十八年九月初二日拜發

本年十月十五日遞回奉

硃批該衙門知道欽此 九月二十五日

新疆會勘借地安插逃哈似不可行未敢附和請 敕再行妥籌摺

奏爲新疆咨令派員會勘阿爾泰山地段擬安逃哈辦理稍近躁率恐啓蒙哈疑慮致滋爭

闕有誤大局似不可行臣未敢附和請

敕該將軍巡撫再行妥籌先將委員撤回臣仍一面鎮撫蒙哈令其靜候安插以杜內釁而安邊圉具摺馳

奏仰祈

聖鑒事竊臣自奉到前奏請

旨收還借地安插哈薩克一摺

硃批當即欽遵檄知烏梁海並將哈薩克總管頭目等傳調來城宣示

諭旨該總管等欣喜過望同聲感頌均望

闕磕頭叩謝

天恩一面責令分造戶口清冊飭將逃往新疆古城烏魯木齊塔爾巴哈台各處者各有若干戶詳查實報已據開呈計有九百數十戶臣比飭該總管等各於所管擇妥實之人八名前來隨同委員前往新疆招收逃哈該總管等遵辦後均暫回游牧訂俟明年三月一同來城隨往阿爾泰山辦理一切臣亦一面派員速赴新疆各處收撫正在辦理間適准伊犁將軍馬亮新疆巡撫驍應祺會銜咨稱塔城哈薩克潛行四出逃至迪化奇台鎮西昌吉焉耆

一帶經塔城委員查收該哈衆抗不回牧有稱係科布多所屬者咨明貴大臣復稱非其所屬應歸塔收而哈衆現又逃至新平縣屈莽山等處人畜疫死甚多急須查辦究竟該哈薩克歸科歸塔應委員會同前往阿爾泰山科塔交界請貴大臣塔城大臣派員會同履勘所屬牧場夏窩冬窩是否足敷哈衆游牧逐細稟復以憑會奏茲查有同知銜候補知縣王服昱候補縣丞李偉堪以派委前往會勘相應咨請查照辦理等因前來臣接閱之下不勝悚慮查該將軍等所擬辦法名爲安民防患實則借安插逃哈爲由欲合羣力仍爭阿爾泰山哈巴河借地久假不歸耳此事關係烏梁海人心向背北路大局臣尙當詳奏茲且不論但以查勘牧地擬安逃哈一事言之從前新疆屢次奏爭迭奉

寄諭無一不令與科布多參贊咨商秉公酌度毋存成見誠以該處爲科布多所管有地主之義也今者欲安逃哈委勘地段亦似應由該將軍巡撫先與臣往復咨商意見相同方可舉辦乃巡撫饒應祺本年春夏既已兩次咨行商令科塔分收臣曾經附奏擬辦情形茲又改欲自行籌安復與將軍馬亮商定即行僅以咨行臣查照辦理了事竟於烏梁海七旗丁戶衆多現在游牧不敷瞻養連遭災疫饑寒交迫非收舊牧無以謀生及哈薩克二萬數千人錯處各旗騷擾佔奪時滋爭鬪非擇地妥爲收束不能久安各情與夫科布多種種爲難

全未爲之籌計但知攘攷土地竟似一經會奏科布多即不敢不讓者似非事理之平且遽行派員前往查勘並令臣亦派委員會辦無非欲入其彀中將來會列銜名即難再生駁議似此徑情自遂操之過蹙並不熟思審處彼已兼籌無論烏梁海不能自甘窮餓絕不肯坐失百餘年自有之膏腴即臣職在守邊亦萬不能將蒙古命脈所繫朔漠形勢之區輕棄尺寸况烏梁海甫知奉有收還

恩旨乃忽變爲新疆先安逃哈又不豫爲開導明白曉諭一味蠻做必致羣相惶惑聳動不安即科之哈衆不下三萬人明年前往辦理尙不知該地是否可敷安插能否與蒙古分居屯牧今新疆輒欲先安逃哈竟不管將來科布多之哈又當安於何處前經臣傳示

綸音該總管等感激非常方謂從此適彼樂土可以安居今聞新疆先有安置之事豫佔地利必將科布多分應安插之衆擠之於廣莫之野無何有之鄉憤激之餘亦實難保不滋生怨望互啓競爭若委員但了目前不顧大局辦理稍形操切尤虞激而生變縱帥臣撫臣力能彈壓而鞭長莫及智計亦將有時而窮彼時施以惠則難饜貪心威以兵又恐滋困闕阿爾泰山哈巴河能否攘歸新疆事未可知而先已禍起蕭牆此實不可不防者也尤可慮者現在時局萬艱羣強環伺一絲命脈惟在滿蒙而俄人計餌利誘蒙古亦不少甘心服役之

人所恃

朝廷恩誼纏綿蒙古懷畏夙深無敢妄生他念耳若仍視爲愚頑不加愛護或且任意苛虐以爲可欺直不翅叢雀毆魚偏之向外恐人去地隨將蒙古游牧泯焉漸盡不復服屬國家阿爾泰山一帶尙何能爲新疆所有臣恐該將軍等向以防俄藉口者今且自防之不暇矣此臣所以謂爭地固不可行而會勘安插尤不可行也溯查光緒十七年因塔城奏請派員會勘借地蒙

派魁福前往彼時以烏梁海蒙情急迫率爾前往深恐激生事端未敢冒昧具摺陳明夫以特派大員尙且未敢逕行今新疆委員會勘情事較前尤爲可慮臣現已咨覆新疆以已奉諭旨派令親往履勘清查妥籌自應遵

旨辦理此時未便率行派員致涉兩歧且事關北路大局未敢輕舉請煩妥籌等語尙不知新疆意見如何臣平心以思通籌全局現在科塔哈衆旣已潛至新疆前接該撫來咨原有擬由科塔兩城各派委員往收之說自應仍照原議由科塔各派委員前往查明收撫帶回原牧由該城大臣設法安輯必使其耕牧得所無慮飢寒終不至紛紛逃掠尤須觸除苛累官中必無需勒方足以示體恤而資箝束不但不便遽遷於阿爾泰山並無須移置於羅布

淖爾所慮地方印官欺凌需索尤甚軍營臣風聞哈衆有在新疆北路一帶暫牧者均須出給銀兩盈千累百方准僑寓否則驅逐名爲草銀即此可證蓋但知安插而不爲之善其後亦非計也即塔哈羣願歸科亦是此意該將軍巡撫所派查勘委員深恐辦理失宜風聲一播必滋蒙哈疑慮人心動搖不平之鳴因之俱起譁變竄散實在意中科城無兵鎮攝後患何堪設想臣以爲治邊之道總以安靜不擾爲先此次新疆所派委員竊謂宜以不去爲是如蒙

聖明俯察

敕諭該將軍巡撫速將委員先行撤回尤爲至幸統俟臣明年前往勘查會商妥協再爲擬辦庶昭慎詳俾蒙哈之疑慮不生於邊局則保全滋大若該將軍等膠執已見不以臣之言爲然儻或激成變端既非地方之福亦非該將軍等之利彼時始悔躁率恐已無及臣現在因病蒙

恩賞假調理若使心存諉卸原可置不與聞惟以事關北路大局措置偶乖動滋大患臣旣已見及何忍藉養病以引避恐嫌更不敢徇情面而遂安緘默用是力疾具摺馳

奏迫切愚誠願求

垂諒伏祈

皇太后

皇上聖鑒訓示施行再此次新疆來咨臣覆咨一併鈔錄呈送軍機處查覈合併陳明謹

奏 光緒二十八年九月十三日拜發

本年十月二十六日遞回奉

硃批另有旨欽此 十月初六日

先陳安哈辦法片

再臣擬明年四五月間前往阿爾泰山遵

旨辦理清查安插事宜竊謂科布多哈衆固當安戢即爲塔城所管而有在借地之內住牧者亦未便過分畛域迫令遷移應俟到彼後詳加察勘通盤酌度並當咨商春滿總以不失人心爲主庶期相安無事謹先附陳請釋

聖鑒謹

奏 光緒二十八年九月十三日拜發

本年十月二十六日遞回奉

硃批知道了欽此 十月初六日

續假片

再臣因病仰蒙

特賞假期在任調理奉到

批旨之日適臣病正加劇比經新疆鎮迪道李滋森薦一湘人攜帶藥物前來診治連日按視據云病由平日積勞用心過度又多憂恐以致心腎太虧氣血枯滯疼痛驚悸虛象迭生口外藥多糟粕難期速效總以靜養爲主否則恐不可治等語臣自揣亦是如此假期屆滿在卽而病勢反復靡常合無再懇

聖恩續行賞假一箇月俾資調攝一俟就痊卽當銷假至緊要公事臣仍力疾覈辦不敢藉病偷安貽誤邊局謹附片陳請伏祈

聖鑒訓示謹

奏 光緒二十八年九月十三日拜發

本年十月二十六日遞回奉

硃批著再賞假一箇月欽此 十月初六日

奏爲先將收安事宜豫籌布置請 准借撥欸項摺

奏爲臣前往阿爾泰山須俟明夏先將應辦事宜豫籌布置請

敕借撥欸項以濟要需繕摺具陳仰祈

聖鑒事竊臣前於本年四月間

奏請索還阿爾泰山借地安插哈薩克等因一摺奉

硃批著即親往履勘將該處哈民清查酌度情形妥籌安插務令各得其所順輿情而重邊要餘依議欽此具仰

朝廷恩恤邊氓至意曷勝欽感自應遵

旨及時馳往詳查妥籌辦理惟查此路道途崎嶇強半山壩一交秋令卽大雪封山厚至數尺冷逾嚴冬人蹤斷絕向無郵驛從前會勘借地安撫蒙哈之役皆係先設台站方克行走現已九月中旬自難就道臣之病亦未大痊騎馬前往實屬無能支柱即隨帶文武人員並須斟酌調派諸凡布置均費經營急切難期周妥況事關安撫藩夷尤宜從容部署示以鎮定未便操之太急且哈薩克紛紛竄逸現在新疆者尙屬不少亟應先行收回方有歸宿亦免貽患鄰境刻正分別籌辦臣熟思審處自可俟至明年四五月間再行前往其辦理收安

事宜在在需款更非豫爲張羅不可此項哈民現經查據該頭目總管等冊報所管哈薩克計共三千五百餘戶人丁約在二萬四五千名口此外依附卡倫邊界往牧者尙不在內比年牲畜災倒率皆窮苦流離以光緒十年舊事相衡彼時由戶部撥給銀七萬兩撫恤偏重蒙古至哈薩克不過連類而及以致羣抱向隅未得同霑實惠臣此行本以安插哈民爲主應撫之人較多又加安設台站駝馬隨帶文武委員以及親兵跟役通事薪費犒賞日用餼糧羊隻一切均非得有現款無從措辦此次安撫擬照前次賞給蒙古每二名乳牛一隻每一名乳羊五隻甄茶二塊之案將哈民之窮苦者每名酌量從減給與即此已逾五萬兩之數其窮蒙尤須一律施惠方無缺望且哈蒙由現居處所遷往阿爾泰山擇地住牧其無力者並須稍給遷費至擬分撥田畝發給牛具籽種勸令兼習耕作以期各有恆產而盡地利尙當另議即茲需款前估五萬兩之數殊覺不敷然旣

奏明在先卽未敢請益於後只可由臣設法撙節墊補第事體繁鉅需項孔殷雖臣前於遵旨妥籌經費摺內開單估請現已奉到戶部咨會俟由各省將衛所屯田繳價稅契辦法議行報解即行由部分撥第辦理收安事宜至遲即在明夏仍屬緩難濟急臣極知部庫不敷周轉而實偏處此萬不能不仰仗司農相應請

旨敕下戶部暫行借撥銀五萬兩權期應急即由將來分撥科城籌邊經費項下如數扣還庶事機既不致貽誤度支亦無慮虛懸如蒙

俞允應俟奉到

諭旨臣即欽遵派員迅速赴京請領趕解回營應用所有臣前往阿爾泰山須俟明夏先將應辦事宜豫籌布置請

敕借撥欸項以濟要需緣由謹繕摺具陳伏祈

皇太后

皇上聖鑒

訓示施行謹

奏 光緒二十八年九月十三日拜發

本年十月二十六日遞回奉

硃批戶部知道欽此 十月初六日

派員收哈片

再臣前准新疆撫臣饒應祺咨稱去年五月內有哈薩克人衆在喀喇沙爾塔什河地方強

住貽害地方該哈薩克先云塔爾巴哈台所屬後又云係科布多所屬並不知究隸何城咨請臣會同塔城派員查明押解回牧等因當經臣附片具陳奉

硃批知道了欽此嗣復准咨催辦臣當以蒙古處前查該逃哈是否所管未能切實臣未敢深信因將所管哈日總管等傳調來城嚴加詢問始據稟稱此項逃哈實有所管在內因無準地住牧以致四出逃竄此外尚有潛往新疆者不止此數懇請收回安插妥地等情查該逃哈已據查明計有九百餘戶既係科布多所管自應查照撫臣原議派員往收臣現派屯防參將世襲騎都尉祥祐帶領筆帖式兵丁並哈薩克通事等前往各該處查明一律收回以便明年辦理安插惟聞此項哈衆現在新疆人口牲畜大半被疫駝馬倒斃尤多困苦流離殊堪矜憫茲既派員往收並應設法籌濟以資綏戢臣現飭糧餉處先由經費項下借撥庫平銀三千兩發交該參將祥祐攜往各該處察酌情形分別辦理或購給糧石或添補牲畜迅速押解安靜回科以免再行出擾致貽口實此項銀兩應俟請撥欸項領解到日再行歸還除咨請撫臣飭屬一體照料彈壓外理合附片陳明伏祈
聖鑒謹

奏 光緒二十八年九月十三日拜發

本年十月二十六日遞回奉

硃批知道了欽此 十月初六日

杜爾伯特左翼副將軍仍以正盟長兼任摺 原摺滿漢合璧

奏爲杜爾伯特左翼副將軍員缺籲懇

天恩仍以本翼正盟長兼任繕摺具陳仰祈

聖鑒事竊科布多所管杜爾伯特左右翼各設副將軍一員頒給

敕印旗纛令箭管理蒙古官兵今查杜爾伯特左翼副將軍達賚汗噶勒章那木濟勒前已
欽奉

硃筆圈出補授杜爾伯特左翼正盟長其副將軍職任應即開缺另將應放之王貝勒貝子
公等開單

奏請

簡放惟本部落內一時實無堪以勝任之員未便遷就且副將軍鈐轄所管部落蒙古官兵
責任綦重現雖邊圉敕平而安不忘危未容弛備並查杜爾伯特右翼副將軍即係右翼正
盟長札薩克親王索特納木札木柴兼任茲該盟長噶勒章那木濟勒軍令分明蒙兵悅服

臣以爲若仍令其兼任似屬相宜合無籲懇

天恩俯准即令杜爾伯特左翼正盟長達賚汗噶勒章那木濟勒仍行兼任副將軍實於戎政有裨爲此繕摺具陳伏祈

皇太后

皇上聖鑒訓示謹

奏 光緒二十八年十月二十九日拜發

本年十二月十九日遞回奉

硃批著照所請該衙門知道欽此 十一月二十五日

奏調徐鄂來營片

再查有五品銜不論雙單月遇缺即選鹽大使徐鄂曾在奉天黑龍江當差才氣內斂器識宏深稔習邊情講求洋務絕無華士浮囂習氣再加磨練堪爲有用之材現在九江關道署內司理文牘茲科布多籌辦邊務需才孔殷且臣明年夏間遵

旨前往阿爾泰山辦理清查安插事宜尤須得力可靠人員方足以資佐助相應請旨敕下吏部轉行江西巡撫傳令該員趕緊晉

京呈請兵部理藩院發給勘合烏拉票由北路台站速行來營俾收指臂之效期於塞徼有裨謹附片陳請伏祈

聖鑒訓示謹

奏 光緒二十八年十月二十九日拜發

本年十二月十九日遞回奉

硃批著照所請該衙門知道欽此 十一月二十五日

請調覺羅緒齡來營差委片

再科布多現籌舉辦一切全在得人而臣奉

旨派往阿爾泰山尤須隨帶文武俾資差遣在營人員太少且多各有責任未便紛紛遠離只可分別留調除擬留者前已另片具

奏奉

旨照准茲查有藍翎補用都司覺羅緒齡年志方強饒有血性曩曾隨使美日秘三國充當武弁並悉外洋情形合無仰懇

天恩俯准調營差委以供驅策查該員近年並未在京前聞其淹滯直隸天津一帶庚子之

亂蹤跡尤不可知惟有請

旨敕下兵部直隸總督轉飭查訪如得其人即由兵部理藩院發給勘合烏拉票等件令由北路台站速行來營以便隨往至辦事需才仍應俟經費確有的欸再容斟酌彙

奏調用謹附片陳請伏祈

聖鑒

訓示施行謹

奏 光緒二十八年十月二十九日拜發

本年十二月十九日遞回奉

硃批著照所請該衙門知道欽此 十一月二十五日

塔地割據阿爾泰山地段萬不可行請 敕長庚秉公查勘摺

奏爲塔爾巴哈台割據阿爾泰山地段萬不可行請

敕將軍長庚秉公查勘持平定議早爲覆

奏以息競爭而恤蒙艱慎防維而固邊要繕摺馳陳仰祈

聖鑒事竊阿爾泰山哈巴河一帶借地前於光緒十八年間業經前大臣吉林副都統沙克

都林札布與前接辦塔爾巴哈台參贊大臣伊犁副都統額爾慶額遵

旨會勘商定覆奏請以展限三年仍由塔城交還科布多管轄欽奉

諭旨兪允並令屆期歸還不得因循延緩一奏塞責等因嗣今年四月又經臣專摺瀝陳請旨收還以使安插蒙哈復奉

硃批照准正在欽遵辦理布置一切適聞調任將軍長庚因塔爾巴哈台曾有前借科城地段未便輕議歸還之奏奉

旨飭交會商具

奏尚未覆陳特電請前往查勘奉

旨准行該將軍公忠明亮洞悉邊情日擊躬親必能兼顧統籌折衷一是無庸臣再參末議惟是羣羣之愚尙有未能釋然者則以

祖訓之所昭垂塞防之所維繫蒙情之所依戀時勢之所倚賴此四者臣已不免鰓鰓過慮其有關大局隱患抑又多端竊以阿爾泰山哈巴河一帶地段如欲改歸塔爾巴哈台管轄萬不可行敢爲我

皇太后

皇上詳細陳之阿爾泰山額爾齊斯河本係烏梁海舊牧故於唐努山烏梁海阿爾泰淖爾烏梁海之外名爲阿爾泰烏梁海 名從主人也溯查杜爾伯特及烏梁海未內屬時錯牧於額爾齊斯嗣烏梁海就撫以烏蘭古木地與之尋又定烏蘭古木爲杜爾伯特游牧別以科布多爲烏梁海游牧乾隆二十四年烏梁海以科布多產貂不給捕請徙就阿爾泰山陽額爾齊斯之源採捕

詔如所請

高宗上諭故有額爾齊斯地與其爲哈薩克俄羅斯所竊據不若令烏梁海往徙之

旨自是安居百有餘年恪供貢役無間歲時前以借地安插胡圖克圖棍噶札拉參徒衆已屬急公今不加以獎勵反欲奪其土地無端強佔情理兩乖旣非

祖

宗柔遠之經復遏蕃部輸誠之悃此稽之

祖訓以爲不可行者一也攷阿爾泰山自古爲用武之地有元海都之叛其入寇之路每逾金山而窺和林蓋以其地險阻阨害兵家之所必爭且曲抱科布多南西北三面實外蒙古喀爾喀屏幃故

先朝舊制以屬北路管轄不隸新疆洵

大聖人因地制宜之妙用今若劃歸塔城不但參錯犬牙紊亂畫地分治之大法而北路挾去藩籬毫無閑禦一旦有事無要可扼進戰退守將兩無所恃實於漠北蒙古邊備大有侵損不止科布多勢成孤立已也況查塔城所爭借地之區在科布多之西距城不過十程而離塔城大臣治所且至十九站道里遠近既甚懸絕其地並當塔城東北如在腦後且與分入俄界之齋桑泊爲鄰與在科布多前路形勢便宜者亦復迥異今若改屬塔城鞭長莫及控制多所不便於防務實無裨萬一徒使北路頓亡捍蔽益令俄人窺我失算狡啓戎心此準之塞防以爲不可行者二也杜爾伯特土爾扈特烏梁海札哈沁諸部向爲北路維藩而烏梁海七旗自乾隆年間歸順

天朝謹守臣節尤具忠貞今雖部落寢微而其衆尙多撫之得宜則益堅其翊戴棄而勿恤實難免其睽離長駕遠馭之規屬部強則我之門戶固誠以蒙古輿地與中國邊塞相接其部族強弱攸繫中國盛衰也今若一旦敝其膏腴附益他城塔爾巴哈台固爲如願烏梁海豈能甘心從前新疆爭地急切之古屢次呈訴以改歸塔城管轄衆心不服曾經前大臣等具奏近年呈請催還文書尤復絡繹此驗之蒙情以爲不可行者三也況以時局而

論近今外侮憑陵

中朝孤注民心縱云固結然已非復全盛之時自甲午之役而人心一變庚子之役而人心又一變東北西北蒙古諸部多與俄連彼族利餌計誘蒙古可內可外之心不能保其必無又別爲風氣皆有自主之權彼之游牧即彼之土地若其人已攜其地何有阿爾泰烏梁海之淪入彼疆可爲殷鑒此時欲激厲蒙古使之爲彼樹敵效我扞禦方當厚恩誼以結其腹心勤拊循以聯其指臂我

朝嘉惠蒙古用其人民從不利其土地今正資其護衛豈遂可稍失體恤儻竟如塔城辦法竊恐內外各盟蒙古聞風解體各懷二心將有礙於

國家大局更何能獨利於新疆一隅此按之時勢以爲不可行者四也至於烏梁海七旗地蹙丁增比歲屢遭灾祲人畜俱困情形艱窘必須收回借地以資生計與夫往年收撫二哈薩克不下三萬之衆僑居各旗剽掠爭佔擾累蒙古不能相安非指此地無從安置各情疊經前大臣及臣累次疏陳已在

聖明洞鑒之中無容瀆

奏臣荷戈北徼將及三年稍悉情勢邊務殷繁惟此爲科布多最要大政此次長庚親往履

勘擬議辦法要須詳盡周帀兼顧統籌務使目前無遺議日後無遺患乃能毗益邊鎖宏濟時艱度該將軍之才識必能早見及此相應請

旨敕下該將軍秉公查勘持平定議早爲覆

奏萬勿徧徇新疆漠置北路於不顧以息競爭而恤蒙艱慎防維而固邊要大局幸甚臣幸甚臣亦知現經

派查自當靜候

奏復第以茲事體大關繫匪輕既不宜再涉宕延更不可稍有遷就必須妥速籌一兩全無失辦法且若再不定局轉瞬即到明年臣遵

旨前往辦理清查安插亦恐多所牽絀無從措手用敢竭其千慮一得之愚繕摺馳陳伏祈

皇太后

皇上聖鑒訓示施行謹

奏 光緒二十八年十月二十九日拜發

本年十二月十九日遞回奉

旨留中欽此 十一月二十五日

本年十二月三十日發還原摺奉

硃批另有旨欽此 十一月二十六日

再陳索地情由片

再塔爾巴哈台佔據借地抗不遵

旨交還一案前大臣沙克都林札布魁福等請

敕歸還陳奏至於數四至光緒十八年始經沙克都林札布額爾慶額會商奏定訂準交割
仍許展限三年奉

旨允准不料光緒二十四年春滿復有未便輕議歸還之奏今年四月臣復申前請欽奉

硃批依議其前任與臣所以屢屢籲奏不休者實因烏梁海七旗地蹙人增飢寒交迫自將
阿爾泰山一帶地段借出現在游牧不敷養贍迭據呈請索還俾謀生計情詞極爲哀切又
因哈薩克散居各旗擁擠爭競不能相安不下三萬之衆必須得地妥爲安插方免擾累蒙
古構成仇讐而除借地又別無安置之方故不得不爲之請

命實爲杜患安邊起見初非掉弄筆鋒徒挾意見也夫使舉此地而竟歸塔城於烏梁海並
無大害於新疆果有大利臣雖愚亦知顧全大局何必過袒烏梁海以助其爭無如烏梁海

倚此爲養命之根源外蒙古恃此爲設防之屏蔽一旦委棄不但科布多從此無以爲守烏梁海亦從此無以爲生人心地利兩兩失之臣知

朝廷嘉惠蒙古慎重邊防必不肯出此也臣又伏讀乾隆四十五年

上諭喀爾喀年來佔據游牧實由該將軍等瞻顧本處情面所致即自京簡放者亦顧預從事如現任博清額所奏札薩克圖汗部落札薩克巴哈圖爾侵佔科布多杜爾伯特等游牧尙未交還該將軍亦未實力催辦非心存袒護而何看來將軍參贊等斷不可辦理游牧事務等因欽此仰維

廟算於蒙古游牧

規畫周詳首嚴爭佔之禁塔爾巴哈台迭次奏奪實已大違

祖訓且以科布多索還自有之地爲爭是非倒置尤屬失平總之塔城不還借地乃是不肯輕捨事權止爲私計一面辦法並未統籌全局該處形勢險要環抱科布多西南北三面爲外蒙古喀爾喀之阨塞且爲烏梁海舊牧其地得失實繫烏梁海人心向背北路安危大局輕言割畀萬不可行此事若長庚不異議仍擬遵

旨由科布多收回自屬大公至正萬全無失儻尙有爲難一時不能交還則烏梁海七旗蒙

古窮困待援情形急切究應如何撫慰與夫哈薩克不下三萬之衆既經收撫又應如何別謀安插均屬不容懸置必須預爲籌畫相應請

旨敕下將軍長庚兼權並顧妥議辦法以恤蕃族而維邊局臣職司所在謀慮宜周既有所知不敢緘默理合附片具陳伏祈

聖鑒訓示謹

奏 光緒二十八年十月二十九日拜發

本年十二月十九日遞回奉

旨留中欽此 十一月二十五日

本年十二月三十日發還原片奉

硃批覽欽此 十一月二十六日

密陳擬安置哈薩克情形片

再密陳者科布多早年哈薩克止在烏克克卡倫之外住牧不准私入內地至今理藩院則例尚有烏梁海西界設立卡倫四處派兵防守不准哈薩克潛入烏梁海游牧地方如私入內地立即驅逐仍責成卡倫官員不時嚴查之條乃自同治八年中俄劃界舉烏克克霍呢

邁拉扈等八卡倫地方悉以畀俄哈薩克始漸內徙然尙未波及蒙旗迨光緒十年塔城哈薩克因遭逼勒誅戮相率來投驅之不去遂經前大臣清安等奏明奉

旨飭令收撫比即暫安於烏梁海游牧後竟蔓延至土爾扈特杜爾伯特明阿特各旗幾無處不有哈薩克踪跡舊章防禁蕩然無存此科布多驛入哈薩克之實在情形也哈薩克既經附牧擾攘佔奪日啓競爭前任大臣不能不籌安插於是乃有請還阿爾泰山借地之奏實逼處此不得不然其實乾隆二十四年

上諭本有額爾齊斯地與其爲哈薩克俄羅斯所竊據不若令烏梁海往徙之

旨可見杜漸防微

廟謨至爲深遠馴致今日並不能仰體

聖意前任奏請安插哈衆惟以阿爾泰山爲言固由不諳掌故亦實限於地勢除此無從辦理即臣亦不免因仍踵請蓋可見其難矣惟是將來收回借地之後還定安集仍當使烏梁海蒙古佔其形勝其哈衆止可徙置於邊遠地方萬萬不宜使之據險爲虎附翼致釀異日之患尤莫妙於使當西北藉禦強鄰緣俄人向謂哈薩克不受約束不無懼意正可藉資扞蔽也此輩強盛兇頑不遵法度人數又多儻使得地以蓄精銳併力以肆拚飛加以糾合回

氛呵成一氣誠恐終爲邊疆大害故臣前見馬亮饒應祺等冒奏安插全未預防後患臣怒焉憂之曾於具奏摺內聲明無須安置羅布淖爾云云即已微露其端惜馬亮饒應祺懵懵未見及此耳臣本擬明年前往該處悉心查勘妥籌辦法詳細具奏請

旨故未敢昌言漏洩要之哈薩克性情刁悍劫掠爲能又與俄哈聲氣聯貫若不擇地妥爲安插立法箝制必至邊腹到處皆哈再有劉四伏其人者一經煽變則哈回交鬭禍變何可勝言故臣前奏有仍由該管大臣派員收回之議臣到任將及三年於哈薩克情形知之較詳用再附片密陳伏祈

聖鑒謹

奏 光緒二十八年十月二十九日拜發

本年十二月十九日遞回奉

旨留中欽此 十一月二十五日

本年十二月三十日發還原片奉

硃批覽欽此 十一月二十六日

力疾銷假片

昔乃月三十一日
再臣所患呃逆氣痛諸症皆見痊可惟心悸如故近月又加腦鳴頭目昏暈精神日形疲憊
先是八月奉到請赴新疆就醫

批摺蒙

特賞假一箇月在任調理嗣於九月十三日附

奏續假又蒙

賞假一箇月計至十月十九日即已屆滿刻下竟成虛勞醫調不易自非解任靜攝難可全
愈惟現因借地安插一事蒙哈互啓猜疑正須鎮撫邊維緊要臣已依期銷假力疾視事謹
附片陳明伏祈

聖鑒謹

奏 光緒二十八年十月二十九日拜發

本年十二月十九日遞回奉

硃批知道了欽此 十一月二十五日

奏調馬匹摺

奏爲科布多官廠馬匹不敷應用援案請由烏里雅蘇台調取以應要需繕摺具

奏仰祈

聖鑒事竊據喀爾喀駐班札薩克一等台吉色得瓦齊爾呈據管理官廠協理台吉奇達爾巴拉呈報本管廠內所存官馬除補放各項動用開除外所存馬匹現止贖一百五十九匹多係口老不堪應用誠恐貽誤要差應如何添補之處懇祈轉呈覈辦等情臣查光緒二十六年間前大臣寶昌等因官廠馬匹不敷應用咨由烏里雅蘇台所屬孳生羣內調用口輕騾馬二百匹專摺具奏奉

旨著照所請該衙門知道欽此欽遵辦理在案茲屆前調之期又逾兩年現據該廠呈報馬匹無多不敷應用係屬實在情形當經咨商烏里雅蘇台去後頃准咨覆現在孳生羣內僅存騾馬二百四十餘匹應仍酌量具奏調撥一俟奉到

硃批再行照辦等因前來臣查該城現在孳生羣內僅存騾馬二百四十餘匹若必照案多調恐致竭蹶爲難第科布多官廠需用孔殷又不能不酌量請撥臣悉心酌覈應請

旨敕下烏里雅蘇台將軍等轉飭由孳生羣內揀撥口輕騾馬一百二十匹派員護解前來俾應要需理合繕摺具

奏伏祈

皇太后

皇上聖鑒訓示謹

奏 光緒二十八年十月二十九日拜發

本年十二月十九日遞回奉

硃批著照所請該衙門知道欽此 十一月二十五日

廟工採購料物請免稅添駝片

再臣於前年十二月曾將擇地捐貲建修廟宇奏明奉

旨知道了欽此委因工鉅費繁又以天氣早寒一年祇有六箇月能以興作迄今尚未藏事然工程已得強半期以明年秋季一律告竣惟僻在邊陲百貨罕至舉凡彩飾之顏料陳設之供器以及幡幔龕座香燈經卷各件無一不須內地購置即無一不由台路轉運現在布置一切已須陸續派員督口製辦誠恐關局台站不悉情形或有阻滯可否仰懇

天恩准由臣咨行所過地方轉飭免驗放行並俟起解由察哈爾烏里雅蘇台加傳馱駝三十隻以資運送仍每次不得有逾以杜夾帶之弊約計採辦各項不過兩次即可齊備亦不至重勞台力除分咨外謹據實附陳伏祈

聖鑒訓示謹

奏 光緒二十八年十月二十九日拜發

本年十二月十九日遞回奉

硃批著照所請欽此 十一月二十五日

前糧餉章京榮泰給咨離營片

再科布多糧餉章京榮泰前年八月因該員已經三年報滿適值籌備邊防當經臣附

奏將該員留營差委奉

旨允准茲新任糧餉章京委署主事希凌阿已於七月二十七日到營業經接交管理據該

員榮泰稟請回

京臣覆查前接吏部咨會已將該員擬選

盛京刑部主事北路防務現在較鬆已令將經手事件料理清楚給咨離營除分管外理合

附陳伏祈

聖鑒謹

奏 光緒二十八年十月二十九日拜發

本年十二月十九日遞回奉

硃批該衙門知道欽此 十一月二十五日

蒙古保舉摺

奏爲遵

旨酌保蒙古各旗正副盟長大臣總管札薩克各員籲懇

恩准照擬給獎以昭激勸專摺繕單具陳仰祈

聖鑒事竊臣前因蒙古各旗經理俄商遺棄貨物毫無損失有裨大局專摺奏懇

天恩准將該旗正副盟長散秩大臣總管等酌請獎叙以昭激勸等因欽奉

硃批准其擇尤酌保毋許冒濫欽此跪讀之下具仰

朝廷眷逮邊勞莫名欽感伏思前年軍務猝興內省洋教毀傷之案層見疊出口外北路亦
烽煙告警一日數驚科布多所管蒙古各旗無處不有俄人蹤跡人心浮動蒙情鹵莽設非
約束有方防維偶一不慎即必立構爭端邊釁且將大啓所幸各該正副盟長散秩大臣總
管札薩克等尙能遵守臣條教皆知內嚴防範外示懷柔而於俄商遺棄貨物經理查存毫
無損失俾彼族無可問難游牧賴以保全洵屬有裨大局深堪嘉尙自應遵

旨酌保以昭激勸臣悉心察覈該汗王等所請

賞叙本與尋常保舉不同外似優異實則未逾例章毫無冒濫謹繕清單祇呈御覽合無仰懇

天恩俯准照擬給獎出自

逾格鴻慈其各旗及台站卡倫出力應保之蒙員另由臣分繕擬獎清單咨明理藩院覈辦所有遵

旨酌保蒙古各旗正副盟長大臣總管札薩克各員繕單請獎緣由謹專摺具陳伏祈

皇太后

皇上聖鑒訓示謹

奏 光緒二十八年十月二十九日拜發

本年十二月十九日遞回奉

硃批該衙門覈議具奏單片併發欽此 十一月二十五日

謹將遵保蒙古各旗正副盟長散秩大臣總管札薩克等員擬請獎叙敬繕清單祇呈御覽

計開

杜爾伯特左翼正盟長副將軍特固斯庫魯克達賚汗噶勒章那木濟勒擬請

賞用黃韁

杜爾伯特左翼副盟長札薩克多羅貝勒納遜佈彥擬請

賞戴雙眼花翎

杜爾伯特左翼札薩克多羅郡王圖柯莫勒擬請

賞戴三眼花翎

杜爾伯特左翼札薩克固山貝子納楚克多爾濟札薩克固山貝子龐泰鍾鼐二員均擬請

賞戴雙眼花翎

杜爾伯特左翼札薩克輔國公圖敏巴雅爾札薩克頭等台吉烏瓦齊爾二員均擬請

賞戴花翎

杜爾伯特右翼正盟長副將軍札薩克和碩親王索特納木札木柴擬請

賞戴三眼花翎

杜爾伯特右翼副盟長札薩克多羅貝勒圖們濟爾噶勒擬請

賞戴雙眼花翎

賞加貝子銜

札哈沁總管三保擬請

賞給二品頂戴

烏梁海左翼散秩大臣額爾克舒諾擬請

賞給頭品頂戴

烏梁海左翼總管倭齊爾札布桑敦札布二員均擬請

賞給二品頂戴

烏梁海右翼散秩大臣三音博勒克擬請

賞給頭品頂戴

烏梁海右翼總管棍佈札布瓦齊爾札布二員均擬請

下行原闕

杜爾伯特右翼札薩克鎮國公多諾魯布札薩克頭等台吉阿育爾札納二員均擬請

賞戴花翎

上爾扈特正盟長札薩克多羅郡王密錫克棟古魯布擬請

賞用黃韁

土爾扈特副盟長札薩克固山貝子瑪克蘇爾札布擬請

賞戴雙眼花翎

霍碩特札薩克頭等台吉克什克佈彥擬請

賞加鎮國公銜

札哈沁信勇公車林多爾濟擬請

賞給二品頂戴

額魯特總管喇嘛札布明阿特總管達什哲克博二員均擬請

賞給二品頂戴

杜爾伯特左翼札薩克輔國公圖都布

杜爾伯特左翼札薩克頭等台吉僧格多爾濟

杜爾伯特左翼札薩克頭等台吉巴圖瓦齊爾

杜爾伯特左翼札薩克頭等台吉阿畢爾密達

杜爾伯特左翼札薩克頭等台吉檔達爾

烏梁海左翼副都統察罕博勒克

以上各員均擬請

賞給軍功加二級

附保駐班蒙員片

再科布多向由烏里雅蘇台於賽音諾顏札薩克圖汗兩盟揀派札薩克台吉等前來駐班或按兩季或按一季分別更換管理地面蒙古暨圖們吐官廠各事宜查光緒二十六年春夏兩季駐班皆係輔國公銜三等台吉色埒甯迨至秋季正值軍務猝啓布置邊防戎馬倥傯烽煙告警此差遂爲畏途相率規避於是仍令該台吉接辦嗣今年春夏兩季又均係該台吉來駐查前年北路戒嚴人心惶駭俄界之哈薩克纏回又復乘機煽變盜賊四起情形岌岌塵市頗覺擾動該台吉乃能處以鎮靜彈壓綏戢竭力維持隨辦城防罔辭艱險不但蒙古畏服卽漢民亦頗感戴今者大局早定安謐如常該台吉旣著勤勞自應一併給獎合無請

旨將輔國公銜三等台吉色埒甯

賞戴花翎以昭勸勉出自

天恩謹附片陳請伏祈

聖鑒訓示謹

奏 光緒二十八年十月二十九日拜發

本年十二月十九日遞回奉

硃批覽欽此 十一月二十五日

散木居奏稿卷之十三

門人鈴木吉武校字

歲寒集

枝木居疏稿



金山使者

瑞洵題

散木居奏稿卷之十四

幹難 瑞洵

歲寒集 光緒壬寅

辦理布倫托海渠工大概情形摺

揀補蒙古處幫辦章京摺

卡倫侍衛分別調署代辦片

具奏揀員先行馳駐哈巴河等處辦理安輯蒙哈事宜摺

哈巴河防務仍擬由科布多經理片

屯兵仍照原保給獎官階摺 以上十一月二十八日拜發

烏梁海呈控塔城章京據情具奏摺 附單一件

派員查驗官廠駝馬片

據呈代奏敬申管見請 旨辦理摺 附單一件

將軍長庚函詢定地示期晤商公事可否請 旨片

密陳塔城久佔游牧烏梁海人心不甘恐爲邊患片 以上十二月初八日拜發

辦理布倫托海渠工大概情形摺

奏爲具報辦理布倫托海渠工大概情形暨布置開屯一切事宜緣由仰祈
聖鑒事竊臣於上年十二月間附片具

奏擬於布倫托海試辦屯田先派委員勘修渠工各節嗣於本年二月十二日遞回原片欽
奉

硃批著照所議認真辦理期有成效可觀欽此臣跪聆之下感奮莫名比時工匠業由古城
僱到當即派委州同職銜崔象侯帶同工匠兵書人等押運糧麩器具各項馳往布倫托海
一帶認真勘辦先行設立屯田局布置一切並刊發關防領用該員自到彼後奔馳跋涉逐
日察勘履雪餐風載更寒暑兩月有餘始得要領其冒犯危險橫被阻撓之事實已備嘗艱
苦時以工大費繁率皆憚畏煩難咸思停辦該員獨以爲事係奉

旨志在必成爰調集烏梁海蒙兵並添僱匠役助以民夫協力工作已於三月二十二日開
工現據稟報工程已得十分之七於九月初二日因天氣漸冷暫行停工察閱該員迭次來
稟所叙辦法均尙穩妥於經費亦知節省所用兵丁均係查照定例於額餉外每日按名加
給麩四兩鹽菜銀三分匠役亦係照例於日支工價外按名日支麩觔科布多人工甚稀工

極貴除堰壩鉅工必需匠工修做始行僱用其餘一切土工皆係添調烏梁海兵丁與哈薩克承修所有製買器具發給各項犒賞木石運力並鋤鋤錘鋸釘鐵筐篋繩索口袋鞍屨以及委員人等薪水麪勛雜用等項或照市價或按例章亦復毫無浮濫現已修成大渠二道分渠八道計有六十餘里之遠畝數約倍於科布多舊屯十分工程已得大半明春尙須續爲多開支渠以資分溉臣伏維此項渠工本應先將估定工料修費

奏請

敕部立案俟奉覆准再爲興修惟因僻處塞垣迴殊行省不但工程做法不同內地即覈算錢糧亦無真正諳悉之人勉強牽合既近敷衍而草率經營又難言確有把握用是不敢冒昧豫

奏且時已夏五若必拘請部覆誠恐或誤工期故臣與該員預爲約法先須求辦事實際不必拘估修常經止期不妄用一錢不可圖省一工現應通力合作以冀速成統容工竣據實奏報此渠工未能估

奏之實在情形也至農具耕牛已陸續購買逆料明年當可開屯應需籽種擬先定以一千石徐圖擴充該處土宜大麥小麥之外兼擬試種稻米除稻米須由古城採買其大麥小麥

若全用銀購需欸已多而倉儲陳糧又不合式經臣於今年夏間添發籽糧預飭十屯官兵每屯酌量加種已多收有大麥小麥千石之數毋須動帑再買惟由科布多運送至布倫托海屯所計程一千九百餘里踰山渡水萬分艱難官廠之駝正值派赴新疆採運軍糈多已佔用現由烏里雅蘇台調來駝隻止有二百不盡可用覈計轉運籽種食糧農具用駝總在千隻今官駝止挑選三百隻若按向來市價僱用民駝自科布多城至布倫托海共十八站每隻腳價貴則十一兩至賤亦須八兩刻下已須九兩就此統算如僱六百五十隻已需腳價五千八百五十兩渠工所需及布置開屯一切用欸均係臣設法騰挪借墊支用已屬不貲自不得不苦思撙節因知蒙旗刺麻牲畜尚多當由臣飭令各旗官長與之商借仍酌量幫給銀兩並押駝官兵加以賞犒現已由杜爾伯特土爾扈特札哈沁各旗借準駝六百五十隻約明如有倒斃按隻賠補合幫價補倒計之當亦不逾三千兩之數一俟此項駝隻到日即派弁兵將籽糧農具一切分起運解前往限二月十五日以前陸續齊抵布倫托海萬不至有誤農期以上辦理稍有基緒臣仍隨時函檄交飭責成該委員崔象侯等認真經理不得始勤終怠冀屯務早得告成邊實日臻饒裕以開風氣而圖自強庶仰副朝廷訓誨勗勉之

恩意至渠工仍請俟一律告竣再行專摺

奏報其有應分咨部院查照立案者臣亦隨時辦理其屯田詳細章程尙容臣悉心覈定另行具

奏所有具報辦理布倫托海渠工大概情形暨布置開屯一切事宜緣由理合具摺先行馳陳伏祈

皇太后

皇上聖鑒訓示謹

奏 光緒二十八年十一月二十八日拜發

光緒二十九年正月二十二日遞回奉

硃批著即督飭認真經理務收成效欽此 十二月二十五日

揀補蒙古處幫辦章京摺

奏爲揀補蒙古處幫辦章京員缺恭摺仰祈

聖鑒事竊科布多蒙古處幫辦章京主事職銜鍾祥經臣以辦事不能得力

奏明開去差使咨回綏遠城原旗所遺員缺自宜揀員充補茲查有糧餉處筆帖式景善資

深才練熟悉邊情堪以擬補查該員已保補防禦後以佐領儘先補用先換頂戴應仍留原保並俟七年期滿即以綏遠城防禦首先坐補如蒙

兪允遇有差便即給咨赴部帶領引

見其應找支銀糧俟奉

旨後再行照例辦理爲此恭摺具

奏伏祈

皇太后

皇上聖鑒訓示謹

奏 光緒二十八年十一月二十八日拜發

光緒二十九年正月二十二日遞回奉

殊批著照所請該衙門知道欽此 十二月二十五日

卡倫侍衛分別調署代辦片

再查瑪呢圖噶圖勒幹卡倫侍衛常陞因患目疾甚重稟請派署給假來城醫治查該侍衛常陞尙知認真駐守該卡近依阿拉克別克河口現有交涉要件自未便令以病軀敷衍當

經檄示照准現以昌吉斯台卡倫侍衛英紱調署以重卡防兼資因應其昌吉斯台卡倫事務較簡揀派即補防禦文普前往暫行代辦均經嚴飭妥慎經理不許生事除分咨查照外理合附片陳明伏祈

聖鑒謹

奏 光緒二十八年十一月二十八日拜發

光緒二十九年正月二十二日遞回奉

硃批該衙門知道欽此 十二月二十五日

具奏揀員先行馳駐哈巴河等處辦理安輯蒙哈事宜摺

奏爲阿爾泰山一帶地方橫被侵佔人民夾雜事權錯出蒙哈憤怨情形日棘亟宜設法釐整平爭弭患以保巖疆現擬委員先行馳駐辦理安輯仍俟臣明年親往察勘妥籌挽治以冀埽除錮弊鞏固邊防具摺馳陳仰祈

聖鑒事竊臣前年夏間到任之初即聞阿爾泰山地方種落龐雜徵斂煩苛蒙哈怨咨農商咸擾官貪兵竄號稱弊藪比以下車伊始慮傳言未必盡真未敢冒昧入

告又因哈巴河借地尙隸塔城彼於暫管界內辦理失宜儘可具文咨明亦不必動達

天聽是以臣遲遲未發今者邊隅承乏將及三年地方利弊知之較確塔城駐劄之員亦仍前所爲毫無忌憚且於科布多所管土地日益展佔靡所底止科布多參贊竟反不能自治其地自理其民烏梁海且將盡失其游牧事關私佔蒙古部落擾亂北路大局有不能再安緘默更有不能不急爲整理者謹將該處現在情形爲我

皇太后

皇上約略陳之阿爾泰山借地早年胡圖克圖棍噶札拉參駐彼時徒衆繁多又有十蘇木額魯特人等附牧聲威甚盛足爲西北屏藩迨後該胡圖克圖徒衆遷居新疆庫爾哈喇烏蘇巴英溝地方阿爾泰山哈巴河遂爲塔城委員駐防之所始尙稍稍敷衍近十餘年則將防務置諸腦後僅派章京一員名延年者帶蒙兵五十名虛張聲勢美其名曰塔城東北路營務處實則假防守之名常川駐劄以爲需勒索哈之久計藉漸施其侵佔鄰疆土地之陰謀同治十二年辦理借地原議止係八百里安置刺麻八百名暫資耕牧界圖具在四至本自分明今乃於原借地段之外四出侵軼計從哈巴河起東則至冠濟勒圖卡倫約六百餘里西則至哈喇額爾齊斯河下游東岸約三百餘里南則至布倫托海約七百餘里北則至霍呢邁拉扈卡倫約六百餘里周圍覈計已在二千四百里以外而既借哈巴河之西復私

佔哈巴河之東尙不與焉並擅令塔城之哈薩克任便強住占踞水草致令烏梁海反被擁擠坐失膏沃乃竟復發給執照派令塔哈每屆冬令前來布倫托海收割青草不准本游牧攔阻現經鈔取該員印照爲憑又哈喇額爾齊斯河出魚最美每日撈取者恒數百人且爲塔哈霸占直不准烏梁海蒙古及科布多哈民取食一尾該員貪抽魚釐竟不顧心所未安夫至烏梁海河魚烏梁海蒙古轉不能食實出情理之外揆諸澤梁無禁之義

聖朝善政豈宜有此又該員於哈巴河之南北私開屯田五六百里令哈民爲之承種聞歲入之糧盡入私橐並不交官以致今年哈民刁難竟藉端挾制不爲收割聞該員甚嫉科布多之辦屯又私於克林河一帶添開地畝致布倫托海招僱承修渠道之鄉約馮得壽被其奪去幾墮大工幸烏梁海蒙古昆都巴圖瓦齊爾情願承修始未誤事又該員勒索之法名目最多所屬苦之其最爲奇特者則因光緒十八年沙克都林札布額爾慶額會商奏定借地展限三年再行交割其未交以前令塔哈在烏梁海境內住牧者酌幫牲畜烏梁海從未上緊追要該員乃乘機冒索責令所管哈衆於駝馬牛羊每百按年各供其一其實該哈衆於塔城大臣衙門亦有獻納水草銀者每馬一匹牛一條出銀二錢羊一隻出銀二分以爲食用烏梁海水草之酬報也查此款本係奏奉

諭旨令塔城哈薩克幫助烏梁海之項乃該城竟一索再索烏梁海轉不能如數收取如此重徵其何以堪又該員於所管蒙哈攤派既重且繁無論何項大小差使皆從多數且因哈民多富動輒勒罰盈千累百聞該員每因蒙哈不肯遵辦輒將其官摘頂鞭撻其哈目甚有欲投俄以避之者蒙官則或欲尋死或欲上告該員常受窘辱今年夏間正值俄員與臣所派委員會同該員查辦要案之時該員適又有因向蒙員索馬百匹不給摘頂恐嚇蒙員遽欲自刎該員旋即服理之事竟爲俄員所知傳爲笑柄回城會向臣言之然此所陳不過略舉梗概此外欸蹟向多既非臣屬員臣無須苛責惟以科布多所屬蒙古游牧竟容鄰境劣員占踞妄爲至於此極臣若再不設法釐整不惟無以服烏梁海蒙古之心且恐日即淪胥必至將來激成事端不可收拾而阿爾泰山近依俄界尤慮易啓輕侮之心更生枝節況現在布倫托海擬辦屯田常有蒙哈前往作踐十月間據該局稟報竟有蒙兵派往公出路遇塔哈分持槍刀毆傷蒙兵一名並將騎馬二匹及什物搶劫之案業經該局派出蒙哈官兵訪查確係塔哈所爲函請該員延年查拏恐亦未必肯辦以上各節疊據烏梁海散秩大臣稱訴暨屯田局委員稟報臣復加察訪悉屬實情該處蒙哈重遭苛虐怨憤已盈徒以畏避塔城庇護甚堅不敢呈控又因該員延年上年爲其子完姻即聘副都統春滿之女爲媳以

堂屬而兼至親益增勢燄以至人皆側目敢怒而不敢言刻下蒙哈怨咨農商咸擾往來之人論及該員無不切齒裂眦皆同聲飲恨且無不日盼臣爲之伸理革除弊端亦可見火熱水深不堪荼毒情形之至爲迫切矣臣竊嘗綜覽北路科布多大勢論生殖則以烏梁海爲最論控制亦以烏梁海爲優覈其廣袤幾與杜爾伯特土爾扈特霍碩特札哈沁諸部相埒而又水草美好地擅上腴如額爾齊斯河布倫托海哈巴河克林河青格里河等處皆屬宜屯宜牧之區該部落人復強勁與他蒙古之積弱不同其地既有可爲其人亦尙可用故臣遵旨估計應辦事宜需用經費約數摺內盛稱阿爾泰山謂宜於其地設置重鎮已邀

聖明洞鑒今該處尙未經營先遭蹂躪實爲臣意料所不及然亡羊補牢猶未爲晚查塔城委員辦理錯誤之事以任令塔屬哈薩克廣佔烏梁海游牧一事關係最重清理尤難烏梁海不敢與爭但向臣懇告哀懇萬不能不爲查辦況以臣渥蒙

倚任至重且專旣

令臣將應辦事宜認真整頓復

諭以毋庸推諉

諄諄訓誡臣若猶苟且依違徇情掩飾不惟辜

恩亦且溺職惟是塔哈佔牧一節若仍行文咨請塔城收回恐該城亦難辦到而事關重大即科布多委員亦未必能措置得宜自應由臣明年前往安插蒙哈之便暫行駐劄察看情形因地制宜統籌全局隨時

奏明辦理以昭慎重而慰衆望臣志在報

國雖拮据卒瘞所不敢辭亦期與五月欽奉

硃批令臣清查妥籌之

旨相符第今年於布倫托海試辦屯田先修河渠工程已完大半約計明歲三四月可望開種現在布置耕牛農具造倉安磨約束兵工一切事宜該委員異常艱苦該處迫近塔城防營竟至盜賊出沒臣甚不放心且自設立屯局以來該處蒙哈漢回每有申訴之事請爲訊究臣以該委員專辦屯田不應兼管地方亦須另派專員經理地方農工均屬緊要不容偏重致失人心既係臣所管地方臣責無旁貸亦擬咨行塔城轉飭該員延年彼此各守各界各辦各事勿許再有干預以清界限而顧考成現查擬補蒙古處幫辦章京主事職銜景善久在北路熟悉邊情且夙得蒙哈之心擬卽委令前往額爾齊斯河布倫托海等處擇地暫駐辦理安輯蒙哈事務並爲保護屯田遇有詞訟持平訊結重大事宜仍詳稟臣覈示辦理

一俟臣明年前往阿爾泰山再行察酌情形妥籌挽治辦法以爲持久之計務使邊宇謐安
蒙哈得所期仰紆

朝廷北顧之廛其該員延年辦理乖方種種荒謬情節較重似非一參所可示懲應否
特交公正大員認真查辦仰俟臣明年前往確切查明再爲
奏請之處伏候

聖裁竊維科布多與俄壤處處毘連彼自有我齋桑淖爾形勢日逼外侮迭乘筆舌之爭終
不可恃臣職在防戍每一念及不覺憂危之意悚然而生幸我
聖主銳意自強慨然有臥薪嘗膽之志必蒙

俯察地方緊要辦事爲難與臣圖治微意以上所請俱得仰邀
恩允北路幸甚大局幸甚所有阿爾泰山地方現擬委員先行馳駐辦理安輯仍俟臣明年
親往察勘妥籌挽治各緣由是否有當理合具摺馳陳伏祈

皇太后

皇上聖鑒

訓示遵行不勝激切惶恐待

命之至謹

奏請

旨 光緒二十八年十一月二十八日拜發

光緒二十九年正月二十二日遞回奉

硃批另有旨欽此 十二月二十五日

哈巴河防務仍擬由科布多經理片

再阿爾泰山哈巴河地方夙爲俄人所垂涎查光緒九年與俄分界初議割讓哈巴河八年四月俄遽派兵隊七八百人突至該處占踞經烏梁海散秩大臣巴圖莽鼐抵死力爭屢呈呼籲誓不願淪入彼疆經前大臣清安等剴切奏明蒙

敕分界大臣與俄官商辦終歸罷議然俄之睥睨迄未寢謀近年強佔阿拉克別克卡倫克色勒烏雍克地段即爲將來蠶食哈巴河地步以兩處相離道里不過兩站半三百餘里也若我再不急圖扼守恐彼日益展侵襲取至爲容易臣前將阿爾泰山擬籌布置並欲親往察勘各情繕單奏明已邀

慈覽果能餉需應手人才奮興以全力經營將來可易積漠爲膏腴化門戶爲堂奧北路一

帶皆在扞衛之中布勢既遠禦侮即在無形但非未雨綢繆恐倉猝亦難措置耳查塔爾巴哈台所辦該處防務不過敷衍之局久已名實兩亡前臣具奏請收回借地時尙不確悉情形猶以爲兵多糧足科布多一時力難接辦因有哈巴河防守事宜仍暫由塔城經理之語今始查知所駐僅蒙兵五十名而騷擾苛累之弊且甲於各省防營是哈巴河一帶借地明年收回其防務直以統歸科布多自行辦理爲是既免有事互相推諉即塔城每年支銷阿爾泰山哈巴河防費鉅款亦可從此節省似較妥協臣自任地方責無旁貸自當殫竭血誠一力任之期副言行相顧之義謹附片先行陳明是否有當伏祈

聖鑒訓示謹

奏 光緒二十八年十一月二十八日拜發

光緒二十九年正月二十二日遞回奉

硃批覽欽此 十二月二十五日

屯兵仍照原保給獎官階摺

奏爲屯田兵丁覈計分數擬保官階係照定例辦理並經兵部疊次覆准有案懇恩敕部仍照原保給獎以資激勸而裨屯工繕摺

奏陳仰祈

聖鑒事竊臣於本年五月奏報光緒二十七屯田十分收成分數請將統轄兼管專管綠蒙各官以及兵丁照章議敘給賞並因六屯正犂頭宣化鎮候補經制外委馬兵梁振基收穫在十四分以上請俟補經制外委後以把總補用九屯正犂頭宣化鎮馬兵李生貴收穫在十三分以上請以經制外委補用等因欽奉

硃批該衙門議奏單併發欽此茲准兵部咨行議覆原奏內開查定例屯田官員兵丁收穫糧石在八分以上者專管官加一級兼轄官紀錄二次統轄官紀錄一次各等語此案原奏以候補外委梁振基收穫至十四分以上應照例改爲加一級所請俟補經制外委後以把總補用之處請毋庸議其馬兵李生貴仍令自行獎賞毋庸議給官階以符定例等語臣伏查定例屯田收穫糧石在八分以上者分別專管兼管統轄給予加級紀錄係專指官員而言至屯田兵丁收穫在十三分以上原准請保官階溯查屯田舊章初定收穫分數在十分以上馬兵准保把總嗣於嘉慶五年前大臣奏請收穫十分以上馬兵改以外委補用十一分以上始准保用把總迨道光元年復奏改十三分以上始保把總旋於道光五年又經直隸總督奏請將屯田馬兵保用把總改爲以經制外委補用是屯兵保升官階循辦已閱百

年至今無改即兵部議覆照准之文亦已不一而足且此案擬保之犂頭梁振基即因當年屯田收數較優由馬兵得保以經制外委補用此外奉部覈准屯田兵馬丁以經制外委補用之案尙有馬兵劉世發梁毓書劉廷科張世威馬福山張繼興任永富藍世魁馮永成孫喜十名故前於奏報光緒二十七年收成分數摺內即因仍陳請本係遵照部咨成案辦理未敢有逾定章今奉部駁自因兵燹之後案牘散佚稽考無從是以從嚴覈辦惟屯田爲邊維大政保舉乃用人微權勤獎懣懲全資操縱若從此兵丁不准保舉官階竊恐激勵術窮於屯務不無窒礙況現正擴充開墾之時尤不可無以鼓舞除原保俟補經制外委後以把總補用之馬兵梁振基現已據報病故應即扣除毋庸再議外合無仰懇

天恩俯准嗣後屯田保舉仍照定例辦理並請

敕部將前案照原保給獎以資激勸而裨屯工出自

鴻施逾格臣爲維持屯務起見謹繕摺

奏陳伏祈

皇太后

皇上聖鑒訓示施行謹

奏 光緒二十八年十一月二十八日拜發

光緒二十九年正月二十二日遞回奉

硃批著照所請兵部知道欽此 十二月二十五日

烏梁海呈控塔城章京據情具奏摺

奏爲烏梁海呈控塔城章京欺跡較多情節甚重據情具陳仰祈

聖鑒事竊烏梁海左右兩翼散秩大臣副都統總管等現因借地一事一同來城呈訴各情

經臣另摺陳

奏臣以其情詞憤激正在苦口開導極力撫慰之際不料伊犁將軍新疆巡撫所派委員正值前來蒙古疑慮復生爭執益力復於十二月初五日面見臣親遞呈詞兩件懇求代

奏臣當令譯成滿文閱看一係仍請速收借地一係控告塔城章京延年除借地一案另行擬議

奏請外查該章京延年劣跡業經臣於十一月二十八日具摺指參請

旨辦理茲據復行揭告詳覈各款自以於借地外又復私佔游牧二千數百里侵損烏梁海生計與將塔城哈薩克每年應交烏梁海租馬租羊巧取肥己兩事最爲貪謬情節較重其

餘所陳各節亦皆大拂輿情殊失

朝廷優待蒙古之至意似須認真根究按律擬辦始足伸蒙古積年之憤而持
國家刑法之平惟新疆諸大員恐不無投鼠忌器之見其應如何
嚴飭查辦之處出自

天恩該蒙古環跪籲求異常迫切臣不敢壅於

上聞謹將原呈譯漢祇呈

御覽爲此繕摺具陳伏祈

皇太后

皇上聖鑒訓示謹

奏請

旨 光緒二十八年十二月初八日拜發

光緒二十九年二月初六日遞回奉

硃批另有旨欽此 正月十二日

派員查驗官廠駝馬片

再查科布多官廠牧放牛馬駝隻三項牲畜前遵部議整頓馬政章程飭令該管蒙古員弁認真經理秋季派員稽查年底奏報一次節經循辦在案本年八月間業經派員查驗該廠舊管馬二百四匹舊管駝八百三十七隻新收由烏里雅蘇台解到駝二百隻共駝一千三十七隻牛隻無存除動用並例倒外實尚存馬一百五十九匹駝九百七十二隻尚無缺額情弊飭令逐一烙印仍責成該管協理台吉等妥爲牧放以備應用現在瞬屆年底理合奏報伏祈

聖鑒謹

奏 光緒二十八年十二月初八日拜發

光緒二十九年二月初六日遞回奉

硃批兵部知道欽此 正月十三日

謹將烏梁海七旗控告塔城章京延年蒙呈譯漢祇呈

御覽

烏梁海左翼散秩大臣額爾克舒諾副都統察汗博勒克總管桑敦札布總管鄂齊爾札布右翼散秩大臣三音博勒克總管棍布札布總管瓦齊爾札布率同衆蒙古等呈爲劣員欺

壓佔奪擾害蒙衆私踞游牧受侮多年不堪毒虐合詞籲懇參贊大臣俯賜垂憐據呈具奏請

旨辦理事竊我七旗於同治十二年遵奉

聖旨令擇地借給胡圖克圖棍噶札拉參並因

上諭有云該烏梁海地屬科布多著托倫布保英留心察看先事防維毋稍疏忽並飭烏梁海兩翼散秩大臣等諭知該蒙古人衆各守本分務令永遠相安等因欽此我等恪遵

恩旨照常住牧保護地方不料後來塔城派有章京延年前來設防胡圖克圖徒衆亦遂遷居新疆該章京性情貪暴苛虐異常凡事不講情理任意妄爲藉防守爲名兵稀械壞實則安心不良既擾害我等不得安居復縱令哈薩克四出佔地我等凡有種地打牲取魚割草必遭毒打鱗傷加以驅逐反說地是塔城的不容我等烏梁海過界一步致我等畏避勢力不敢爭鋒不得已紛紛退至科布多河薩克賽河察罕河青格里河圖勒巴淖爾得里滾河布拉干河一帶致男女老弱人等擁擠紛紜飢不得食寒不可衣怨憤之聲不可遏止該章京霸佔極大地方於哈巴河克林河等處私開屯田牧放牲畜所得之利盡入己囊且復將哈薩克應交我們租馬每年一百四十匹伊竟巧取入己並派有刺麻兒帶俄解二人按年

收取租羊每年收租羊一千隻此已收有十年其所侵食數逾鉅萬故該章京於塔城還地一事百方阻撓不使辦理雖屢奉

諭旨如同具文是該章京延年不但欺我愚蒙並欺

聖明矣以上各節曾在科布多前任按班前呈控無奈未蒙覈辦今幸值我參贊大臣整頓地方體恤蒙古任勞任怨敢作敢當我等若猶不據實控訴未免失此機會況我七旗人等無不逐日勸請申冤萬口如一亦難違衆總之該章京延年辦事無能牟利有術禦敵不足害民有餘我等但求還地原不必於該章京之過惡復行追究惟念現當整理游牧之時實恐該章京仍肆阻撓再誤大局敢爲我參贊大臣直陳之查本烏梁海在投誠之先所有生齒人衆各自謀生彼時凡有能爲之人向無能者彼此奪佔游牧爲生故本烏梁海游牧所屬有能爲者居守阿爾泰山嗣於乾隆二十年間烏梁海投誠時亦隨帶原有之阿爾泰山一帶牧地歸降乾隆二十四年間奉

高宗純皇帝恩旨賞給烏梁海七旗作爲游牧由彼時起呈

進貂皮狐皮當差嗣因古城賊匪變亂大軍向西進發烏梁海充當各台差使今又充當八處卡倫緊要各差不惜身命奮勉行走當差者在烏梁海之意原爲酬報

聖主鴻恩賞給烏梁海阿爾泰山之故是以勉強要差稍盡厥職今將自有之肥地失去本烏梁海之人斷不能違從亦斷不能讓給亦無從賠墊當差又查烏梁海游牧哈韜里山嶺起至瑪呢圖止於同治八年間經科布多參贊大臣奎昌會同俄官分定界址建立牌博又由哲斯山嶺起至阿拉克別克止於光緒九年間經伊犁大臣升泰會同科布多幫辦大臣額爾慶額等定界新立鄂博兩次將所有好地全行分給俄國現在僅贖借與呼圖克圖棍噶札拉參之地水草尙好嗣於光緒十八年間科布多大臣沙克都林札布會同塔城參贊大臣額爾慶額會議由十八年起展限三年還地酌令塔城哈薩克一年幫給烏梁海馬一百四十匹羊一千隻爲租三年之間即應給馬共四百二十匹羊共三千隻本烏梁海並未圖要一匹一隻是實嗣後該哈薩克尙有續交爲數尤多乃塔城派駐章京延年欺詐需索並將十餘年地租馬匹肥入己囊又不令烏梁海之人打魚打牲不准種地不准牧放一見烏梁海便即毒打又因借地塔城另生枝節編造虛僞異端本烏梁海所報是實塔城額魯特漢民各哈薩克等現佔哈巴河游牧南北東西俱在烏梁海游牧大概在五百餘里強橫肆行搶奪牲畜霸佔田地打魚俱係章京延年效給本烏梁海之人被塔城之人欺虐至極每言我們富足意欲殺盡烏梁海之人能賠給牲畜如此不合道理之言時時告知我們烏

梁海最爲無理妄行者於借地之外該章京延年又縱令塔城哈薩克四出侵佔計自哈巴河起東至扈濟勒圖卡倫約有六百餘里西至哈拉額爾濟斯河下游東岸約有三百餘里南至布倫托海約有七百餘里北至霍呢邁拉扈卡倫約有六百餘里周圍約有二千四百餘里前已報明如此任意亂佔不公不恕之事恐未必奏明當時若奏明我等知

聖主必不准行也今烏梁海實係困迫萬分儻若不將游牧收回我們萬人之命不惜必向塔城之人爭鬪難免釀成人命重案將此先爲聲明現聞新疆派人查勘游牧大家聞此落淚憤憤不平商議已定都要努力堅守阿爾泰山若離阿爾泰山所屬之人不但不受散秩大臣副都統等管束即科布多大臣亦不能管束就是我們七旗向來敬重之現任瑞按班我們也不能聽其管束我們實出逼勒無法又查同治年間將本游牧暫行借給胡圖克圖棍噶札拉參自棍噶札拉參圓寂以來已十餘年經塔爾巴哈台凡事設法將本游牧地租被塔城大臣章京延年二人需索肥己我們烏梁海人等另找養贍極窮人等竟至四出乞食本年六月間叩賀

萬壽來城蒙參贊大臣諭示已奏奉

諭旨將烏梁海游牧依議交還等因跪聆之下同聲歡誦業已叩謝

天恩我們靜候辦理乃近來訪聞新疆派員欲往我們游牧查勘我們烏梁海地方本是我們當年自有並非強佔新疆之地何用查明自因新疆漢員居多不悉蒙古游牧情形烏梁海並無應由新疆查勘情事儻若新疆官員前來烏梁海爲要我們地方我們不能仍支差使再查本印務處檔案自暫行借給胡圖克圖棍噶札拉參並未另行借給塔爾巴哈台胡圖克圖又非塔城所屬之人本是甘肅洮州之人況胡圖克圖之徒衆均已遷居新疆有年今塔城藉詞安插哈薩克並派出辦理東北路章京駐守並未認真辦防虛應故事特爲擾累烏梁海打算安心設計將我們烏梁海游牧任佔地租私行人己邊地較遠瞞欺聖主違背例章不遵法紀此章京延年貪橫歟跡之昭著者也理合具情呈訴叩請參贊大臣俯憐萬餘性命立將借地索回施行並將我七旗苦楚下情奏明感恩無既如蒙

諭旨交審我等情願對質如虛甘罪不避謹聯名上呈

據呈代奏敬申管見請 旨辦理摺

奏爲據呈代

奏敬申管見請

旨辦理以安烏梁海人心而維科布多大局繕摺馳陳仰祈
聖鑒事竊烏梁海左右兩翼散秩大臣副都統總管等前因奉
旨收還阿爾泰山哈巴河借地當據合詞呈懇

奏謝

天恩經臣具摺代陳欽奉

硃批知道了欽此比卽祇錄札飭欽遵現因將軍長庚有前往阿爾泰山察勘之舉烏梁海
慮變前議皆謂此次欽奉

諭旨若仍不能行恐從此游牧直無復收遷之望又因塔爾巴哈台於借地之外四出展佔
且有二千四五百里通計已在三千餘里以外若竟議常踞或仍擬緩還則烏梁海土地委
棄大半困苦又異從前生機遏絕亂端將啓七旗丁戶較多良莠不齊近月浮議紛滋人心
惶惶怨憤不可禁止疊據該大臣總管等上文聲訴旋於十一月二十四日烏梁海左翼散
秩大臣額爾克舒諾副都統察罕博勒克總管桑敦札布鄂齊爾札布右翼總管棍布札布
瓦齊爾札布率領七旗官員等竟一同來城僅止右翼散秩大臣三音博勒克老病未到時
值

長至令節臣祇詣

萬壽宮行禮叩賀該大臣等率領二百餘人羅跪馬前紛訴苦情嗣於臣出門必來叩求始猶在轅門以外繼則齊至大堂勸解不散詰以有無別故惟云當年借地安置格根刺麻原是好心詎二十餘年塔城從而占踞總不歸還又派有章京駐劄廣佔地畝霸用水草我等蒙古受欺已甚且復時有凌虐需勒幸蒙按班奏請收回奉

旨允准我等正深慶幸不料現在又有察勘之舉萬一議歸塔城我等烏梁海直將待斃現在所屬人等紛紛訴告僉云若從此失去游牧我等不能仍奉你們七人爲官長我等或自行保守地方或四散另尋生路你們亦不應管據此忿激之言實屬可慮儻果如此我等實無法約束不得不預先聲明謹具呈詞一件仍懇據情入

奏籲求

天恩體恤等語臣當即傳呼進見面加撫慰謂因借地一事已於九月十月兩次拜摺上陳力言不可割讓至塔城章京延年廣佔游牧苛虐蒙哈種種欺蹟亦已具摺奏參並擬先派章京一員前往額爾齊斯一帶暫駐辦理安輯蒙哈事宜且請明年親往該處駐劄於安插蒙哈之便將地方應辦事宜加以整頓凡此興利除弊辦法當爲爾等所共信我

皇太后

皇上恩周中外向來待蒙古最爲優厚若知爾等如此困苦必可仰邀

俞允至借地一事長將軍素顧大局人極明白斷不至偏袒塔城料其覆奏亦不至遽議奪地爾等不可輕信謠言致有擾動等語詳加開導舌敝唇焦無奈蒙古性情愚魯終似半信半疑該散秩大臣等一味懇求總云須將呈詞代遞如蒙

皇太后

皇上察知我等苦楚下情我等方能甘心等語臣正在覈辦復於十二月初五日據該大臣等又親遞呈詞一件請爲併

奏前來臣查該散秩大臣等所言雖云理直氣壯然頗多不平之鳴足見該蒙古於塔城怨毒已深憤恨之極不禁形之詞色復經臣於撫慰之中略示裁抑之意伊等尙能帖服別無狡執之詞惟環跪乞恩而已伏維臣於此事陳奏再三自問殊嫌煩瑣原不敢復瀆

聖聰無如烏梁海人心睽渙亂萌已兆若不仰求

宸斷仍任塔城爭執永無完結則一誤再誤恐將立啓爭端釀成邊患况據屢呈呼籲亦難匿不上

聞此臣惴欸之愚所以不能遂已於言也夫事之必須查辦者原因理涉兩可勢處互爭非躬親目擊無以釋游移而定辦法今以烏梁海自有舊牧當初借安刺麻事過境遷忽被塔城占踞且霸至二十餘年之久復私佔至二千數百里之多更縱令劣員妄肆苛虐漁肉蒙民在塔城爲不應爲極爲無理在烏梁海索所當索實爲有詞準之天理人心稽之

朝章

廷旨夫固名正言順至公至平本無待反復推詳始衷一是況已屢奉

上諭猶且紛紛執奏抗不遵行似此外重內輕尤非所以尊

朝廷而恪共臣職之道也且臣聞長庚自請前往阿爾泰山本因會奉

敕查迄未辦理總係經手未完又見馬亮饒應祺等有安插逃哈一奏牽涉借地以長庚會查者而馬亮竟欲接辦以拾其漏長庚自不能不汲汲電請親往察勘實則長庚於塔城霸佔烏梁海游牧及委員延年種種劣跡早已不以爲然並深悉塔城強奪之誤亦頗知科城割讓之難觀其徘徊審顧遲遲有待者蓋已煞費躊躇矣況此次烏梁海七旗盼還游牧實屬萬分急迫顯出甘心之言隱挾相爭之勢儻仍曲徇塔城定必立致釁端諒長庚亦絕不肯操切從事致激蒙變以甘爲禍先也臣伏查該將軍久在西北前後二十餘年於蒙哈情

形設爲熟悉矧早負才名飽更世變其辦事持重早爲臣所知度其查明覆

奏悉除歸地外亦未必別有辦法竊以爲不如

敕諭長庚熟察蒙情仍遵前

旨辦理俾烏梁海共頌

聖明益堅翊戴而使

恩出自

上之爲得也如此則烏梁海感戴

鴻慈爭可平患可弭即於塔官之怨憤塔哈之仇隙均可解釋不至再圖報復是亦

駕馭蒙古之微權伏望

俯納芻言深維早計大局幸甚臣幸甚臣以此事輾轉焦慮寢饋不安旣已明知烏梁海情

急勢迫將爲困獸之爭塔城斷不能收漁人之利何敢稍存諱飾致誤事機用敢不揣冒昧

繕摺馳陳敬申管見並將烏梁海原呈一件譯漢祇呈

御覽伏祈

皇太后

皇上聖鑒

訓示施行無任迫切待

命之至再烏梁海十一月二十四日所遞呈詞與第二次呈詞大致相同另行譯漢呈送軍機處查覈合併聲明謹

奏 光緒二十八年十二月初八日拜發

光緒二十九年二月初六日遞回奉

硃批另有旨欽此 正月十三日

將軍長庚函詢定地示期晤商公事可否請 旨片

再臣正繕摺間先後接到將軍長庚兩函一由庫爾哈喇烏蘇發一由額爾齊斯河發第一函屬令臣繪寄烏梁海地圖並詢及烏梁海游牧現在究係如何情形潛住科境哈薩克人衆現存實數若干近年蒙哈雜居究係如何安置以臣訪察必確見聞必周懇即復信詳晰告知第二函係告臣以其辦理此事初無成見決不能偏徇新疆置北路於不顧亦不欲迴議塔屬拂科境之輿情並以其中情形不一緘牘非能盡達不如晤面會商可以暢所欲言於辦理此事尤可易臻妥協因知臣先已奉

昔フ月多利名ニル
派往勘阿爾泰山清查哈民業經奏明擬於明年夏間前往甚願臣移於明春起身以便彼此會晤並令臣示期定地等語查長庚於借地一事立論甚屬持平辦法當無左袒其欲臣往晤一節昨讀邸鈔敬悉幫辦大臣已蒙

簡放英秀該大臣前經臣派令晉京藉差引

見現在尚未回營臣刻仍不敢遠離計英秀明年正月內當可到任彼時臣或可前往古城一帶與長庚訂期會晤臣或由彼取道瑪納斯以達布倫托海察視該處渠屯各工順赴阿爾泰山或仍折回札哈沁沙紫蓋台前赴阿爾泰山均可隨時酌行否則長庚必欲見面臣不往長庚便須前來科布多境內晤商一切臣未敢擅便理合附片陳明請

旨訓示祇遵謹

奏 光緒二十八年十二月初八日拜發

光緒二十九年二月初六日遞回奉

硃批知道了欽此 正月十三日

密陳塔城久占游牧烏梁海人心不甘恐爲邊患片

再密陳者臣細閱烏梁海所遞兩呈於塔城久佔游牧實不甘心所謂困獸猶鬪也故一則

曰烏梁海若不將游牧收回我等不惜萬人之命必向塔城之人爭鬪並都要努力堅守阿爾泰山一則曰七旗人等實難免渙散其狡强者不免流爲盜賊設再有外人勾引誘往彼方害不可言無法彈壓誠恐激變將有不測等語詞意至爲激切該部落人夙强悍向以射獵著聞且多蓄有烏槍丁口萬餘其中少壯尙多可用近年生計日艱患貧已甚故該旗雖幼童女子皆知好地爲塔城佔踞惟恐不還同聲怨恨又加俄人於開拓疆土之外頗知收籠人心常加煽動臣亦頗聞烏梁海人心近年不甚堅固易受愚惑故臣於該旗呈詞所言各節閱之增悚不敢謂爲恐嚇直須早作隄防況科布多所管蒙古各旗惟烏梁海地方最爲廣遠若其人已離心必致大爲邊患彼時剿撫亦處兩難儻竟投入俄疆諂附俄人爲之要素自有游牧臣不知彼時新疆如何因應勢將爲

朝廷重增

宵旰之憂蹙疆域而啓戎心攘權利而誤大局臣實懼之危之伏望

聖明深維遠慮早

賜宸斷斥絕妄奏

速沛宏慈不惟烏梁海感激

天恩即臣亦可幸免大戾迫切愚誠伏祈
聖鑒謹

奏 光緒二十八年十二月初八日拜發

光緒二十九年二月初六日遞回奉

硃批覽欽此 正月十三日

謹將烏梁海七旗呈請速收借地原文譯漢祇呈

御覽

烏梁海左翼散秩大臣額爾克舒諾副都統察汗博勒克總管桑敦札布總管額齊爾札布
右翼散秩大臣三音博勒克總管棍布札布總管瓦齊爾札布率同衆蒙古等謹呈爲聯名
瀝呈懇請察覈據情上

奏請

旨施

恩事竊查阿爾泰山哈巴河借地一案本年五月間蒙參贊大臣據情具
奏應即收還烏梁海游牧欽奉

硃批依議職等於十月

皇太后萬壽聖節均詣科布多

萬壽宮隨班叩祝當蒙參贊大臣宣示

恩旨職等跪聆之下欽感同聲遵即齊詣

萬壽宮叩謝

天恩並呈請代奏亦奉

旨知道了欽此惟因現在聞有長將軍前往該處查勘情形之舉是此事尙須斟酌卑旗蒙古人等又復驚惶異常浮言四起均說此次不能收回後任按班更無可望惟恐失地人心搖動職等忝爲官長無法彈壓是以一齊來城面稟實情求爲設法弭患昨於十一月二十四日親遞呈文蒙許覈辦在案近日面聆鈞訓始知參贊大臣於借地一事近又再三陳奏不敢再瀆

聖聰第念卑旗苦楚下情仍有不能不言且以事關大局更有不忍不言者設此地若竟改歸塔城則職等實爲不忠不孝不明不義之人而且大患方張隱憂難釋深慮人心渙散變端立見儼哈巴河借地不還仍歸塔城本烏梁海實難再支老弱者必致轉於溝壑強壯者

散於四方投往他處難免引誘入俄終爲邊患用敢不辭處分爲我參贊大臣再詳陳之伏查阿爾泰山額爾齊斯等地方本是烏梁海自行帶地歸服

聖朝乾隆二十四年欽奉

高宗純皇帝諭旨賞給永遠住牧今若自職等手內棄去是爲不忠又光緒九年與俄人分界原議割讓哈巴河一帶地方職額爾克舒諾之父巴圖莽鼐持理力爭屢請大臣代奏終歸罷論地得未失今若從職等失去是爲不孝又烏梁海所有游牧地方惟阿爾泰額爾齊斯等處爲好現在所屬蒙民兵丁男女大小均被驅擠無地住牧明明有好地不要回必致飢寒交迫生計日窮是爲不明又職等大臣總管等雖與兵民同一窮苦然究有俸銀可支比所屬稍強今我等忝居官職而漠視所屬人等凍餒而不恤是爲不義且查此地爲邊陲扼要地方必須布置安官設兵今若收回尙可由科布多大臣實心籌畫布置若仍歸塔不還在塔不過藉以需索漁利專圖肥己身家之計絕不整頓終不可長保此土是此地爲烏梁海計固應索還爲大局計亦以索還爲上策也查七旗原是一家骨肉向來同心守分少有爭鬪自哈薩克闖入以來擁擠擾害時有爭端該哈搶劫爲能每每佔奪水草近歲屢成訟案去年尙有搶馬傷斃蒙兵情事經參贊大臣派員查辦該哈不願抵償終歸賠卹了事

永遠如此何能相安實不能不擇地另行安插加以較好游牧皆被塔城侵佔且令塔哈住牧致將七旗人等反被逼擠至水草不好之處又派章京延年設法虐害我七旗之處一言難盡近來卑旗大衆聞借地雖經奏准收還奈新疆偏向塔城均有齊心將借地並私佔之地從此改爲塔城產業竟不稍爲察酌烏梁海困苦流離情形卑旗官兵老少人等無不同聲憤怨新疆不公不平章京延年從中作主獻計現在所屬人等一萬一千餘人多有不服職等約束之意且有科布多大臣亦不能約束之言職等甚爲驚惶憂慮看來七旗人等實難免渙散老弱者尙不過飢寒待盡其狡强者卽不免變爲盜賊設再有外人乘機勾引誘往彼方其爲害更不可言矣刻下七旗人心慌亂已極職等無法彈壓誠恐激變將有不測之虞職等伏思我

皇太后

皇上待蒙古最爲優異

天高地厚職等知旗漢自己產業

皇家止徵租賦從不無端追奪今烏梁海七旗自有游牧養命之根基諒我聖主必不加罪而抄沒之也職等值此艱難萬分急迫惟有叩懇參贊大臣再爲據情入奏

代求

天恩俯恤

敕令塔城仍遵兩次

諭旨即行交還烏梁海自行管理以資安置謀生不至失所貽憂
國家職等七旗之人均有天良自當照舊供差永圖竭誠報效於
聖世無任悚懼謹率同七旗人等上呈

散木居奏稿卷之十四

門人鈴木吉武校字

散木居奏稿卷之十五

幹難 瑞洵

讓賢集 光緒癸卯

懇開差缺並請 另簡賢能摺

阿勒台山防務請 敕故撫妥籌布置片

邊防用款報銷開單具奏摺 附清單

暫安台站片

奏保委員片

懇開差缺並請 另簡賢能摺

奏爲邊務日益艱難 臣病勢日益沈劇實屬不勝鉅任深恐貽誤籲懇

天恩開去臣差缺回旗調理並請

速賜另簡賢能前來接替以重巖疆瀝陳實在下情仰祈

聖鑒事竊臣以駑鈍之資過蒙

倚任光緒二十五年九月由翰林院侍讀學士

超擢科布多參贊大臣臣感激馳驅抵任以來雖與水土不宜然齒戴方強心力尚可支拄故於公事奮勉籌辦從未稍即怠荒詎料庚子秋軍務猝啓口外烽煙告警風聲鶴唳草木皆兵旋聞

鑾乘西巡聯軍深入大局不絕如縷臣憂憤之極遂以致疾自時厥後諸證踵增而以去歲病爲尤多時乃最久先後蒙

恩賞假三次嗣因冬防緊要又值新疆有勘察阿爾泰山借地之舉蒙哈驚疑人心不靖臣不得不力疾強起照常視事以資鎮撫其實病猶未愈也滿擬公餘靜攝體氣漸復尙欲遵旨前往阿爾泰山將哈民清查妥爲安插再將該處應辦事宜詳察實

奏故臣去年十一月仍有暫駐阿爾泰山之請比接長庚函商願於今春定地會晤面商公事亦經臣附片請

旨遵行誠以臣子之義厥重匪躬力苟能爲不容諉謝豈意一交春令二豎復又侵尋自元旦至今日重一日不惟腦鳴加甚更添下部之證晝夜不止危篤萬分氣血既虛變態百出正月初六日早晨忽舌強不能言語現話雖能說而左臂左髀麻木不仁竟如痿痺神志忽明忽昧又似庚子秋間光景始患心悸僅止夜間今則白日亦動輒驚惕尤畏金木之聲公

牘不能閱視屬僚不能接見呻吟衾褥一息僅存塞上既無明醫又乏良藥愈治愈壞直無術以起沈疴夫臣痰疾纏綿此猶一身之災無足輕重乃至外人乘之而益肆欺凌鄰境因之而更圖傾害則且有礙大局其患將中於

國是此實臣所大懼也伏維科布多爲北路要區邊務本已殷繁加有哈薩克錯居種族紛龐號稱難治當此事會艱難百端待舉卽勤明強固精力過人者猶不足以幹濟臣則旣短於才復困於病久膺鉅任萬不能勝矧密邇強隣交涉動關重要忍辱因應尤覺智盡能索有過無功委緣臣不諳洋務辦理失宜頗爲俄人所不喜前彼公使照會外務部已有責言是臣即不以病去官亦將因事去官矣臣蚤夜以思邊務如此之棘病勢如此之深若不退避賢路仍戀棧以圖苟安覆轍償轅終將顛蹶彼時卽將臣治罪已屬無及再四籌維前蒙
屢

賞假期今病已至此理應解職惟有迫切陳情籲懇

天恩垂念邊疆重要久病之人不勝鉅任

俯准開去臣差缺感荷

矜全實無旣極並求

速賜另簡賢能之員前來接替整頓一切俾不終於貽誤地方幸甚臣年甫四十有五如得
仔肩暫釋不蹈愆尤或可興疾回旗安心醫治儻蒙

福芘調理就痊卽當泥首

宮門求

賞差使再圖犬馬之報至謂規避苦寒飾詞引退臣忝爲世臣不敢出此謹繕摺瀝陳實在
下情不勝惶悚依戀待

命之至伏祈

皇太后

皇上聖鑒

訓示謹

奏請

旨 光緒二十九年二月十九日拜發

本年四月初九日遞回奉

硃批著再賞假三個月毋庸開缺欽此 三月十五日

阿勒台山防務請 敕新撫妥籌布置片

再臣前奏阿爾泰山一帶地方橫被侵佔蒙哈憤怨塔城駐防委員延年辦理乖方需索苛斂任令塔哈廣佔烏梁海游牧各情欽奉

寄諭事關北路大局著潘效蘇確切查明妥籌整頓並將該地方應辦事宜如何布置詳悉具奏等因欽此具仰

聖明眷顧邊疆孜孜求治之至意曷勝欽服臣伏查該處借地現在應聽長庚察勘覆奏歸還計尙需時惟阿爾泰山一帶久爲俄人所垂涎往者中法交綏俄人潛越邊界直抵布倫托海以求魚爲名窺探路徑不爲無因今俄情叵測仍未寢謀既奉

諭旨責令新疆整頓撫臣潘效蘇會蒞戎行辦事明決不似饒應祺之顛預敷衍應請

密敕該撫妥籌布置思患豫防臣現已因病籲請開缺萬不可稍存退讓總以地方爲重況該處借地尙隸塔城本歸該撫統轄抑亦責無旁貸也管見所及謹附片密

奏伏祈

聖鑒訓示施行謹

奏 光緒二十九年二月十九日拜發

本年四月初九日承准

軍機處知會原片奉

旨留中欽此 三月十五日

邊防用款報銷開單具奏摺 附清單

奏爲光緒二十六年布置邊防辦理蒙古團練暨護城護卡蒙軍用過口分津貼隨營各處文武薪費一切犒賞修理等項銀兩並挑留蒙兵發給薪費口分謹將收支欸目遵旨開單報銷繕摺具陳仰祈

聖鑒事竊照光緒二十六年軍務猝啓北路戒嚴臣是年六月到任後即接理藩院飛咨祇錄

諭旨飭令蒙古各旗簡練隊伍辦理邊防旋欽奉

寄諭令臣就所轄地方妥籌布置嚴加防守復奉

諭旨准令挑練蒙兵自固邊防等因欽此當以換防屯田兵丁額數旣稀又別無滿漢軍隊可資調度祇有舉辦蒙古團練並參用清野之法安其游牧即以效我扞禦杜彼侵掠因令杜爾伯特土爾扈特霍碩特明阿特額魯特札哈沁烏梁海諸部三十旗每旗挑選兵丁二

百名一半馬隊一半步隊駐防本旗通合六千名又另於杜爾伯特明阿特額魯特三旗復行挑選兵丁馬隊二千名以一千名飭調來城駐防以一千名分派前赴阿拉克別克昌吉斯台八卡倫助守其團兵營制餉章酌照光緒六年駐練札薩克圖汗蒙兵成案辦理護城護卡之兵營制餉章則按同治十一年前大臣長順練兵成案辦理所有團練並護兵辦齊起支口分日期均經奏明在案旋因經費難繼防務稍鬆復經臣附奏先行裁撤團兵三千名護城護卡兵一千名截至光緒二十六年閏八月底止嗣奉

諭旨令將團練蒙兵全行裁撤護城護卡兵裁撤一千五百名暫留五百名認真挑選分防各處等因臣謹即遵

旨辦理算至是年十月底止復共裁撤三千五百名其月支津貼口分薪費各項全係動用庫存平餘雜款及挪借商款等項撙節開支以上各節節經臣陸續奏陳隨時咨行戶兵二部查照至奉

旨留兵五百名臣於去年四月又經奏明減數改爲保護洋商之兵奉

旨允准嗣於十月間並奉戶部咨令辦理聲覆惟以餉項尙無的款祇於上年十二月底先行裁撤三百名仍未能按照每旗十兵飭令挑補以事關護商計授不宜或放或停恐滋懈

弛轉致疏虞也所有辦防用欸及留兵餉需值庫儲虛竭之秋邊防喫緊之際全仗騰挪乞貸催索欠餉設法支應煞費苦心既無不合例之動支更無不覈實之欸目前經臣奏請免造細冊欽奉

恩旨准其開單報銷欽此臣感激之餘倍增悚惕即飭前管籌防支發委員會同糧餉處詳悉鉤稽覈算辦理茲據該委員等分晰開報繕列簡明清單呈請

奏咨前來臣詳加覆覈舊管無項新收提用庫存平餘雜欸經費挪借商欸新疆墊撥奉

旨飭部撥給山西河南協解舊欠台費暨糧石變價扣收一分平餘六分減平一併列入正項統共合收庫平銀十五萬四千八百九十七兩三錢六分開除團練蒙軍護城護卡蒙軍奉

旨暫留蒙兵各營官弁兵丁口分並籌防文案支發各處派辦清野駐台駐卡督催文報偵探軍情隨營文武員弁酌給薪水津貼及修補器械鞍轡添購馬匹氈房皮衣暨一切雜支各項共實支庫平銀十五萬八千六百一十八兩應扣減平平餘銀兩悉遵部章辦理實在仍不敷銀三千七百二十兩六錢四分欠借商欸銀四萬九千三百兩其不敷銀兩已於糧餉處存留雜欸項下如數撥補至商墊之欸自應俟山西河南兩省將舊欠台費銀兩解到

陸續歸還惟近年興辦屯工及整頓地方各事時有通融既不宜失信商民而市廛枯窘異常尤賴官力維持方與地方有益除山西舊欠台費銀兩據該藩司許俟今年夏間撥解清款外應乞

天恩敕部再爲行催河南巡撫轉飭藩司仍將欠解台費銀兩速予籌撥俾資彌補而免賠累出自

鴻慈所有辦理邊防挑留蒙兵一切動支各款逐一確覈委係實用實銷毫無浮濫仰懇敕部准銷以清款目除將清單分咨戶兵工三部查覈外理合繕摺具陳並敬繕簡明清單祇呈

御覽伏祈

皇太后

皇上聖鑒

敕部准銷施行謹

奏 光緒二十九年三月二十七日拜發

本年五月十六日遞回奉

硃批該部知道單併發欽此 四月二十三日

謹將光緒二十六年辦理邊防團練蒙兵訓練護城護卡蒙兵各項收支款目暨留兵五百名截至裁撤日止開支餉費遵

旨開具簡明清單祇呈

御覽

計開

舊管無項

新收

一收奏提糧餉處扣平雜款等項庫平銀二萬兩

一收奏提糧餉處經費庫平銀一萬二千三百六十九兩

一收陸續挪借商號科平銀五萬兩合庫平銀四萬九千三百兩

一收戶部撥給庫平銀一萬兩

一收新疆墊撥湘平銀二萬兩合庫平銀一萬九千一百九十四兩

一收山西撥解舊欠軍需台費庫平銀二萬兩

一收河南撥解舊欠軍需台費庫平銀一萬兩

一收借動糧餉處存儲六分減平庫平銀一千六百兩

一收本案支發各項扣回六分減平庫平銀九千五百一十七兩零八分

一收本案支發各項扣存一分平餘庫平銀一千五百八十六兩一錢八分

一收動用倉糧五百石按照時值每石二兩七錢變價科平銀一千三百五十兩合庫平銀一千三百三十一兩一錢

以上共收庫平銀十五萬四千八百九十七兩三錢六分

開除

一支光緒二十六年分杜爾伯特左翼十二旗右翼四旗土爾扈特二旗霍碩特一旗札哈沁二旗烏梁海左翼四旗右翼三旗明阿特一旗額魯特一旗共三十旗團練蒙兵六千名一半馬隊一半步隊每名月給口分銀三兩自是年八月初一日起連閏算至十月底止計四箇月共發銀五萬四千兩

一支分帶團練蒙兵杜爾伯特等三十旗營總三十員帶隊章京三十員隊官三十員畢齊業齊三十員蒙古醫生三十名蒙古獸醫三十名自是年八月初一日起連閏算至十月底

止計四箇月應領口分共發銀三千零六十兩

以上團練蒙兵並官弁官醫等每月支銀一萬九千零二十兩自光緒二十六年八月初一日起至閏八月底止計兩箇月共支銀三萬八千零四十兩旋於是年閏八月底

奏明裁撤團練蒙兵三千名仍留團練蒙兵三千名又自是年九月初一日起至十月底裁撤之日止計兩箇月每月支銀九千五百一十兩共發銀一萬九千零二十兩二共發銀五萬七千零六十兩係照光緒六年前參贊大臣清安調練蒙兵准銷成案支給

一支團練各旗添補馬匹修理鞍轡器械每旗發銀五百兩計三十旗共發銀一萬五千兩
一支光緒二十六年分杜爾伯特額魯特明阿特選練護城護卡蒙兵馬隊二千名每名月給口分銀四兩自是年八月初一日起連閏算至十月底止計四箇月共發銀二萬四千兩
一支護城護卡蒙兵管帶四員營總八員帶隊章京八員隊官八員畢齊業齊八員蒙古字識八名通事八名官醫生八名獸醫八名自是年八月初一日起連閏算至十月底止計四箇月應領口分心紅柴炭共發銀一千三百四十四兩

一支印務蒙古糧餉等處翼長二員蒙古書手四名漢字識四名聽差兵四名自是年八月初一日起連閏算至十月底止計四箇月共發津貼銀八十四兩

一支印務蒙古糧餉三處月支心紅紙張自是年八月初一日起連閏算至十月底止計四箇月共發銀七十二兩

以上護城護卡官弁官醫字識等並各處翼長心紅津貼等項每月支銀八千五百兩自光緒二十六年八月初一日起至閏八月底止計兩箇月共發銀一萬七千兩旋於是年閏八月底

奏明裁撤護兵一千名仍留護兵一千名又自是年九月初一日起至十月底裁撤之日止每月支銀四千二百五十兩計兩箇月共發銀八千五百兩二共發銀二萬五千五百兩係照同治十一年前參贊大臣長順練兵成案支給

一支分赴蒙旗督催清野委員差弁三十員隨營差遣文員二員武員一員武弁二員籌防處筆帖式八員書識八名兵役十六名自光緒二十六年七月初一日起連閏算至二十七年五月底止計十二箇月共發銀二千八百八十八兩

一支奏設籌防處月支心紅紙張自光緒二十六年七月初一日起連閏算至二十七年五月底止計十二箇月共發銀二百八十八兩

以上各旗督催清野委員並隨營差遣員弁及籌防處筆帖式兵書人等月支津貼心紅銀

五百零五兩自二十六年七月初一日起連閏算至二十七年五月底裁撤之日止計十二箇月共發銀六千零六十兩

一支光緒二十六年十一月以後奏留杜爾伯特烏梁海蒙兵馬隊五百名每名月支口分銀三兩自是年十一月初一日起至二十八年十二月底止計二十六箇月共發銀三萬九千兩

一支留兵馬隊管帶三員參領委營總三員帶隊章京十員隊官十員畢齊業齊十員漢字識十名通事十名醫生十名獸醫十名自是年十一月初一日起至二十八年十二月底止計二十六箇月月支口分心紅柴炭共發銀一萬二千九百七十四兩

此項官弁兵等原擬每月加給口分官二兩兵一兩係經奏咨奉准嗣因餉項支絀並未照加

以上奏留蒙兵並官弁兵等及心紅柴炭口分月支銀一千九百九十九兩自光緒二十六年十一月初一日起至二十八年十二月底分別裁留之日止計二十六箇月共支銀五萬一千九百七十四兩

一支賞給蒙兵五百名皮衣銀每名二兩共發銀一千兩

一支光緒二十六年六月初一日起連閏算至二十七年五月底裁撤之日止派駐內地及蒙古各旗偵探敵情委員弁兵十六員名每員名月支津貼銀四兩計十三箇月共發銀八百三十二兩

一支光緒二十六年七月初一日起連閏算至二十七年五月底裁撤之日止派駐東南兩路台站經理遞送摺報公文筆帖式二員月支津貼銀四兩兵書四名每名月支津貼銀二兩每月共支銀十六兩計十二箇月共發銀一百九十二銀係照舊案減半支給

一支蒙古護城護卡兵添購氈房一百頂每頂價銀十兩共發銀一千兩

以上統共開支餉費及各項庫平銀十五萬八千六百一十八兩

以上統收各項並挪借商號共合庫平銀十五萬四千八百九十七兩三錢六分

實在

不敷庫平銀三千七百二十兩六錢四分

查此已由糧餉處雜款項下撥補

尙欠挪借商號庫平銀四萬九千三百兩

查欠借商款應咨催山西河南兩省撥解舊欠台費陸續歸還並俟有款酌量彌補

暫安台站片

再布倫托海距科布多城計程已及二千里之遙自去春設局開渠布屯檄諭稟函往來絡繹皆須交由札哈沁土爾扈特烏梁海右翼紆繞接遞不能直達動延時日難期迅速竟有一文三月始經接到者殊誤事機自非暫行安台不可現值接修渠道工作繁興除籽種農具各項業已陸續派員解往兵工匠役人等日食糧麪並飭就近採買惟局中需用銀茶仍須由城運濟而工屯緊要創始經營尤資指示當經檄飭札哈沁土爾扈特烏梁海左右兩翼各行擇定水草較好地方分安台站止供接遞文報計從札哈沁沙紫蓋台起至布倫托海止共接安十三台每台派駐蒙兵二名並隔三四台各加派筆齊業齊一名按台各設駝二隻馬四匹筆齊業齊每名月支口分銀二兩五錢兵每名月支口分銀二兩月支糧四斗二升駝馬均按向來採買價值購置至台站向有羊價一欸係爲來往差使官兵支食之用不能不給令酌照南北台站章程覈發已據各旗覆報均於三月初一日設齊此項作爲暫安台站至將來屯田有效轉運一切更資台力尙應體察情形從新更置除咨部查照外理合附片陳明伏祈

聖鑒敕部立案謹

奏 光緒二十九年三月二十七日拜發

本年五月十六日遞回奉

硃批該部知道欽此 四月二十三日

奏保委員片

再籌防出力章京各員臣已於前年十二月間具摺奏保欽奉

硃批著照所請該部知道欽此嗣准部咨均已欽遵註冊此外尚有當時在事同一出力之文員自未便獨令向隅查有州同職銜崔象侯前經臣奏明留營派在文案處辦事並籌防處當差祇以到營未久止將其勞績錄記候獎未肯遽加保舉惟查庚子之變北路戒嚴敕籌邊備當以兵力太單難資禦侮惟有試辦蒙古團練參用前人清野之法保游牧以支危局遂委該員專任督查周巡諸部綿歷三秋辛劬罔懈其於隨辦城防迭奉差委亦均奮勉去春派赴布倫托海勘修渠工布置屯務百端草創煞費經營該員備嘗險艱毫無畏縮且留營瞬及三年查看該員雖無過人才智而肯任勞怨卽爲難得現值籌邊用人之際似當量加激勵獎其前勞卽以策其後效合無仰懇

天恩俯准敕部將州同職銜崔象侯以直隸州州同不論雙單月遇缺儘先卽選並請

賞加五品銜以昭勸勉出自

鴻慈逾格除飭取該員履歷咨部外理合附片具陳伏祈

聖鑒訓示謹

奏 光緒二十九年三月二十七日拜發

本年五月十六日遞回奉

硃批吏部議奏欽此 四月二十三日

散木居奏稿卷之十五

門人鈴木吉武校字

散木居奏稿卷之十六

幹難 瑞洵

讓賢集 光緒癸卯

屯工需欸請 敕部撥摺

加種賞銀片

借駝幫價等項片

屯田局召募民勇片

賞假謝 恩摺

接任謝 恩摺 代

請補屯田蒙古參領摺 代

並無私挖片 代

務局另刊關防片 代

屯工需欸請 敕部撥摺

奏爲屯田緊要工用浩繁借墊已多力難爲繼籲懇

讓賢集

一 餐 菊 軒

天恩敕下戶部先於允協籌邊經費暫行酌量撥給以濟急需期收成效繕摺具陳仰祈聖鑒事竊布倫托海創修渠工暨布置開屯一切事宜並籽糧係由加種駝隻借用蒙旗期節採運之費各緣由經於上年十一月二十八日具摺陳奏復聲明一切用款均係臣設法騰挪借墊支用不貲等情本年正月二十二日遞回奉

硃批著即督飭認真經理務收成效欽此仰承

訓誨之切責望之殷臣敢不勉竭庸虛少圖稱塞自當督飭承辦各員實力經營殫心辦理不使稍有懈怠功敗垂成雖在病中亦復未忘申儆現據屯田局稟報已於三月初四日復行開工將未完渠道接續興修其開種應辦事宜亦趕緊預備惟是需用一切甚屬不敷去年設局以後所需工料採買轉運已支用八千數百兩之數而布置開屯製購農具耕牛駝馬馱運籽種借駝幫價採買糧糈種種用項又已用過一萬四千餘兩至該局月需甄茶糧麪或自科布多解濟或由古城瑪納斯一帶僱運腳價尤昂加以目下工作方急添調蒙兵招募民勇糧餉彌益增多凡茲在在需貲若不預籌接濟恐無以觀成功而速集事懇請覈辦等情前來臣查布倫托海屯田當同治年間曾頒部帑特派重臣竟以辦理無方終歸寢罷此次重新修舉乃仰體

聖明興屯實塞事期必就不敢因循現將作大興動支頗鉅庫儲夙非豐裕既無可挪市商早罄蓋藏又難再借況臣已因病乞休益覺無術持籌空嗟仰屋前閱邸鈔陝西省籌辦水利擬懇劃留部款十萬兩先行濟工奉

旨照請欽遵有案茲科布多事同一律工程固無彼之鉅工款亦無彼之多臣去年遵旨估計辦事需用經費約數

奏奉戶部議准布倫托海開辦屯田一切用款需銀四萬兩許俟各省將衛所屯田契價一事清查舉辦集有成數即由部分撥作爲開辦經費刻尙不知各省辦理如何但繳價即未必通行而稅契爲

國家令典萬無不能辦成之理若照衛屯二十五萬餘頃計之亦應可得鉅款此時當已陸續查報候撥臣謹擬先向戶部請借銀四萬兩權濟屯工之急仍由戶部將來於籌邊經費內扣還清欸此仍原估之數於度支非有所耗而於邊維屯墾得助其成所益匪細度部臣力顧大局不遺邊鄙必能體諒臣竭蹶之況與窮邊迫切之需也第工屯方棘待欸稽時查前由戶部咨令山西劃撥收還阿爾泰山安插哈民經費銀五萬兩前已派員赴領不日即當解到只可先於此項暫行挪用俟此次請撥屯費到日卽爲歸還期於開墾安民兩無耽

昔フ月ヲシテハ一
誤合無仰懇

天恩敕部照撥俾屯工不至中輟邊利得以早興地方幸甚臣實因現時籌無可籌借無可借重以

諭旨一再責成深恐以細費誤工有負

委任用敢爲此無厭之請謹繕摺具陳伏祈

皇太后

皇上聖鑒訓示無任悚切待

命之至謹

奏 光緒二十九年三月二十七日拜發

本年五月十六日遞回奉

硃批戶部議奏欽此 四月二十三日

加種賞銀片

再農田籽種必須新糧科布多十屯每年收穫約在六七千石上下以之支放官兵廩糈並接濟烏里雅蘇台所餘卽已無多布倫托海開屯需籽實不便取資於倉以致儲峙或絀但

若於新疆購買採運費亦不貲臣悉心籌計惟有加種一法遂於上年春飭糧餉處於十屯每屯加發小麥籽種二十石大麥四石責成屯田參將督率官兵逐屯加種比屆秋收已據交納新糧小麥八百三十八石二斗五升大麥一百六十一石七斗五升業飭運赴屯局查加種必須添兵先據該屯稟請臣以事屬暫舉未肯允從惟既爲

國家節帑即不宜過失體恤已於上年九月間賞給銀六百兩令蒙古官兵分領以獎微勞其綠營官兵需欸不多並由臣捐廉另行酌賞除咨部外理合附片陳明伏祈

聖鑒敕部查照謹

奏 光緒二十九年三月二十七日拜發

本年五月十六日遞回奉

硃批該部知道欽此 四月二十三日

借駝幫價片

再臣前於具報布倫托海渠工大概情形及布置開屯一切事宜摺內曾經陳明轉運籽糧農具等項官駝不堪多用民駝腳價太貴擬向蒙旗借用期資節省旋即商定杜爾伯特土爾扈特札哈沁三部落共借到健駝六百五十隻經派官兵督同押駝蒙古官兵將籽糧一

千石及農具輓茶各項連用官駝三百隻共九百五十隻分次起運已據報於二月內先後運至屯田局交納平安無事駝隻倒弊不過三十五隻按例亦未逾額該蒙古官兵等實屬出力當由臣酌加酬賞計幫價銀一項給杜爾伯特左翼四百兩右翼四百兩土爾扈特王旗一百兩貝子旗一百兩札沁旗三百兩蒙古押運官兵一百一十員名共發給川資銀五百零六兩綠營官兵支給治裝在外至補倒按每隻十五兩共給銀五百二十五兩以上通共僅用銀二千三百三十一兩計省僱駝價銀四千五百餘兩惟由官借用辦法向來視為苦累苟非誠信素孚蒙古絕不情願即此亦止可偶一爲之臣意在節省恐與定例多所不符謹附片陳明伏祈

聖鑒敕部立案謹

奏 光緒二十九年三月二十七日拜發

本年五月十六日遞回奉

硃批戶部知道欽此 四月二十三日

屯田局召募民勇片

再查向來地方辦理工程多資兵力良以民夫散漫不如勇隊整齊而兵餉工賃費亦相埒

北路匠人素稀工值尤什伯內地且往往居奇刁挾布倫托海屯所僅有烏梁海蒙兵二百名爲數太少去年興辦渠工於傳調哈薩克之外尙加招僱民夫用人已及五百而七月之久尙未告竣蓋因此工異常艱險勞費遂增現在該處開工接修據屯田局總辦稟請添調兵工期速歲事爰復檄飭烏梁海兩翼再行挑選精壯兵丁八十二名派赴屯所助工事竣即行撤回又因該處時有劫掠之案並令該局於阿爾泰山一帶就近召募務農民夫六十名俾充屯田護勇旣以巡緝盜賊兼可隨資差遣茲據報於三月初一日募齊點驗均屬年輕力壯諳悉農工堪資彈壓土寇保護屯田之用餉則勇每名月支銀四兩二錢勇目每名月支銀四兩八錢暫仍挪墊支發俟屯收有效尙須通盤籌畫妥定詳章

奏明辦理除咨部外理合附片陳明伏祈

聖鑒敕部立案謹

奏 光緒二十九年三月二十七日拜發

本年五月十六日遞回奉

硃批該部知道欽此 四月二十三日

賞假謝 恩摺

奏爲叩謝

天恩仰祈

聖鑒事竊臣於本年二月十九日因邊務艱難病勢沈篤不勝鉅任當經瀝情具摺懇恩俯准開去差缺回旗調理茲於四月初一日遞回原摺奉

硃批著再賞假三箇月毋庸開缺欽此跪聆之下感激曷勝伏念臣世受

國恩家承將種馳驅萬里荏苒三年每維

倚畀之優加深愧涓埃之未報前者自陳苦急實以病危寄重貽誤至爲可憂迺荷

聖慈不棄復蒙

寬予假期如此

高厚隆施臣雖捐糜頂踵猶未足酬答萬一也惟臣之病已成壞證塞上藥既不全醫尤難覓僅有一換防滿兵診治剛柔雜進謬誤恆多邇來日益加劇非得工無從挽救矣辜恩曠官負疚滋甚默計將來恐仍不能不仰籲

聖明暫求解職然使遙蒙

福庇所患儻能見輕即不復元亦當強起任事容俟三月後揣量情形再爲

奏明辦理所有臣叩謝

天恩緣由謹繕摺具

奏伏祈

皇太后

皇上聖鑒謹

奏 光緒二十九年五月初六日拜發

本年閏五月二十四日遞回奉

硃批知道了欽此 閏五月初五日

接任謝 恩摺代

奏爲恭報臣馳抵科布多接任日期叩謝

天恩仰祈

聖鑒事竊於光緒二十八年十月二十三日奉

上諭英秀著賞給三等侍衛作爲科布多幫辦大臣欽此適臣於是年十一月初八日奉差

至京初十日當即叩謝

天恩旋於是月二十日跪請

聖訓蒙

恩賞假一箇月回旗省親並奉

旨著照例馳驛前往欽此先後仰蒙

召見二次

垂問周詳

誨諭殷切跪聆之下欽感曷勝

陛辭後臣先回綏遠城原旗本年正月二十二日假期屆滿臣即起程仍赴張家口請傳台站於三月初六日進發茲於五月二十四日馳抵科布多二十六日接任當經恭設香案望闕叩頭謝

恩伏維科布多爲北路巖疆毘連外界自參贊大臣瑞洵奮力經營造端宏大舉凡開闢地利整飭戎防柔輯遠人撫綏部落在在具有規模一新氣象徒以人才罕到經費維艱急切難收速效而強鄰偪處交涉尤益爲難臣猥以駐防末弁才識庸凡荷蒙超擢幫辦大臣每念

施恩之逾分恆覺受寵之若驚重寄驟膺亟思力圖報稱惟有勉策駑駘用心學習恪遵慈訓隨同參贊大臣瑞洵殫竭血誠將一切事宜認真辦理不敢稍涉敷衍致萌廢弛以冀仰答

高厚鴻慈於萬一所有臣馳抵科布多接任日期謹恭摺具陳叩謝

天恩伏祈

皇太后

皇上聖鑒再臣經過內外蒙古游牧均極安謐雨水亦調合併附陳謹

奏 光緒二十九年五月初六日拜發

本年閏五月二十四日遞回奉

硃批知道了欽此 閏五月初五日

請補屯田蒙古參領摺代

奏爲請補屯田蒙古參領員缺仰祈

聖鑒事竊查科布多屯田蒙古參領員缺每屆班滿向係飭由三札兩盟保送人員

奏明更換前於上年十一月間因屯田參領圖布敦已屆三年期滿當經札飭駐班札薩克

等轉行該盟揀派妥員前來更替茲據駐班公銜三等台吉色埒齊呈據札薩克圖汗部落盟長文稱該缺請以現任屯田驍騎校札木色楞擬正以屯兵薩木丹擬陪請補屯田參領員缺等情保送前來臣覆查該員札木色楞現年四十五歲係札薩克圖汗部落人在屯有年既據擬正自應以之請補屯田參領員缺如蒙

俞允實於屯務有裨其所遺屯田驍騎校之缺另行揀補咨院查照所有屯田參領員缺照依該盟保送擬正人員揀補緣由理合繕摺具

奏伏祈

皇太后

皇上聖鑒訓示再參贊大臣瑞洵現在奉

旨賞假是以未經列銜合併聲明謹

奏 光緒二十九年五月初六日拜發

本年閏五月二十四日遞回奉

硃批著照所請該衙門知道欽此 閏五月初五日

並無私空片代

再查札哈沁部落都蘭哈喇地方舊有鉛鑛久經封禁向由科布多新疆兩處各派官兵於每年三月十五日前往該處會查有無私挖以重邊禁在案本年三月因屆會查之期當經派委筆帖式惠陞帶領兵丁馳往都蘭哈喇地方會同巴里坤總兵所派委員於三月十五日會同巡查茲據該員稟稱查得該處並無偷挖鉛砂情形取具該總管等印結稟請具奏前來除飭札哈沁總管等隨時稽查外理合附片具陳伏祈

聖鑒謹

奏 光緒二十九年五月初六日拜發

本年閏五月二十四日遞回奉

硃批知道了欽此

閏五月初五日

洋務局另刊關防片代

再查科布多原設稽查俄商局改爲洋務局前經

奏奉外務部議准咨行遵辦茲已另刊總辦科布多洋務局關防於四月十七日發交該局領用其舊關防並令銷毀謹附片具

奏 光緒二十九年五月初六日拜發

本年閏五月二十四日遞回奉

硃批知道了欽此 閏五月初五日

散木居奏稿卷之十六

門人鈴木吉武校字

散木居奏稿卷之十七

幹難 瑞洵

維谷集 光緒癸卯

代奏達賚汗謝 恩摺 原摺滿漢合璧

屯田收穫糧石摺 附單

十屯播種完竣摺 附單

蒙古保舉摺

山西換防官兵變通辦理片

代奏達賚汗謝 恩摺

奏爲據情代

奏叩謝

天恩事竊照杜爾伯特左翼副將軍一缺前經奏請以該翼正盟長達賚罕噶勒章那木濟勒兼任等因奉

旨著照所請該衙門知道欽此當即檄知該罕欽遵來城祇詣

萬壽宮叩謝

天恩並據該罕呈稱噶勒章那木濟勒蒙古世僕知識庸愚甫荷

鴻慈補授正盟長茲復渥蒙

聖恩仍令兼任副將軍

隆施稠疊感激靡涯惟有勉循職分將所屬官兵認真鈐轄訓練期漸轉弱爲強以仰答

高厚生成於萬一所有感激下忱懇請代

奏叩謝

天恩等情前來理合專摺據情具

奏伏祈

皇太后

皇上聖鑒再參贊大臣瑞洵現在奉

旨賞假是以未經列銜合併聲明謹

奏 光緒二十九年閏五月初三日拜發

本年六月十九日遞回奉

硃批知道。欽此 閏五月二十九日

屯田收穫糧石摺

奏爲具報屯田收穫糧石分數照章請將該管官員兵丁分別給予獎賞繕單具陳仰祈
聖鑒事竊查科布多光緒二十八年所種屯田十分共收大麥小麥青稞三色糧六千七百
六十六石當派筆帖式春普會同屯防參將世襲騎都尉祥祐等將所收糧石內揀擇乾潔
三色糧七百石收入屯倉以爲今年籽種其餘糧石均運交城倉收納查例載種地官兵各
視其收穫分數量加鼓勵等語此次該屯田兼管專管把總蒙古兼管專管參領驍騎校委
章京及綠蒙各兵丁應得議叙賞項據屯防參將世襲騎都尉祥祐呈請覈辦前來臣覆查
無異應懇

天恩將該參將祥祐交部照例議叙其餘官弁兵丁謹繕清單恭摺具陳伏祈

皇太后

皇上聖鑒

敕下部院覈覆施行再參大臣瑞洵現在奉
旨賞假是以未經列銜合併聲明謹

奏 光緒二十九年閏五月初三日拜發

本年六月十九日遞回奉

硃批該衙門知道單併發欽此 閏五月二十九日

謹將光緒二十八年十屯收成分數暨綠蒙官弁兵丁應給議敘賞項敬繕清單祇呈
御覽

計開

發領籽種小麥三百八十石

今收小麥四千二百六十四石四斗五升

發領籽種青稞二百五十石

今收青稞一千一百二十五石

發領籽種大麥七十石

今收大麥六百七十六石五斗五升

查每歲十屯地內例應動用籽種糧七百石

上年共收穫三色糧六千七百六十六石

統計收成分數九分六釐六毫五絲今將所收三色糧石仍照舊例存留籽種七百石收入屯倉外其餘糧六千六十六石均收入城倉訖

統轄屯田直隸昌平營參將世襲騎都尉祥祐

兼管屯田宣化鎮屬張家口營洗馬林堡把總丁喜

兼管屯田山西大同鎮屬河曲營把總馬根義以上三員均係屯田員弁統計十屯收成分數九分六釐六毫五絲均應交部議叙

專管頭二三四屯宣化鎮標右營把總盧慶雲所管四屯拉展收穫糧石九分二釐四毫七

絲零應交部議叙

專管五六七屯宣化鎮標城守營把總張存德所管三屯拉展收穫糧石八分二釐三毫五

絲應毋庸議叙

專管八九十屯宣化鎮屬張家口營膳房堡把總趙金鼇所管三屯拉展收穫糧石十一分

六釐五毫二絲應交部議叙

兼管頭二三四五屯委署蒙古參領阿畢爾米特所管五屯拉展收穫糧石九分二釐四毫

九絲零應給二等賞小彭綬一疋

兼管六七八九十屯委署蒙古參領圖佈敦所管五屯拉展收穫糧石十分零零八毫一絲
零應給頭等賞小彭緞二疋

專管頭二屯委署蒙古章京圖們額爾哲依所管兩屯拉展收穫糧石九分一釐一毫七絲
零應給二等賞小彭緞一疋

專管三四屯委署蒙古驍騎校札木色楞所管兩屯拉展收穫糧石九分三釐七毫八絲應
給二等賞小彭緞一疋

專管五六屯委署蒙古驍騎校察杭班第所管兩屯拉展收穫糧石九分一釐四毫九絲零
應給二等賞小彭緞一疋

專管七八屯委署蒙古驍騎校濟克札布所管兩屯拉展收穫糧石九分五釐零三絲零應
給二等賞小彭緞一疋

專管九十屯委署蒙古章京那木濟勒多爾濟所管兩屯拉展收穫糧石十一分一釐七毫
八絲零應給頭等賞小彭緞二疋

收穫糧石在十分十一分以上二八九十屯綠營兵三十二名每名應給頭等賞銀一兩五
錢蒙古兵一百名每名應給頭等賞茶二塊煙二包

收穫糧石在九分以上三四五六屯綠營兵三十二名每名應給二等賞銀一兩蒙古兵一百名每名應給二等賞茶一塊煙二包

以上共賞銀八十兩除扣二成銀十六兩外實給銀六十四兩

共賞小彭緞九疋每疋折布八疋每布一疋折銀三銀三分共合銀二十三兩七錢六分除扣二成銀四兩七錢五分二釐外實給銀十九兩八釐

共賞茶三百塊

共賞煙四百包

十屯播種完竣摺

奏爲十屯播種完竣繕單

奏報仰祈

聖鑒事竊照科布多屯田向於每年春雪消化地氣開通始行播種前飭管屯官弁於去年倉存新收小麥大麥青稞籽種共七百石領出分給陸續布種茲據報於四月二十九日一律播種完竣謹將動用籽糧數目繕單祇呈

御覽伏祈

皇太后

皇上聖鑒再參贊大臣瑞洵現在奉

旨賞假是以未經列銜合併聲明謹

奏 光緒二十九年閏五月初三日拜發

本年六月十九日遞回奉

硃批知道了欽此 閏月二十九日

謹將十屯播種動用籽糧數目繕單祇呈

御覽

計開

小麥三百八十石

種地五十二頃七十七畝七分七釐

大麥七十石

種地十一頃六十六畝六分六釐

青稞二百五十石

種地四十一頃六十六畝六分六釐

十屯通共動用小麥大麥青稞籽種七百石

十屯通共種地一百六頃十一畝九釐

蒙古保舉摺

奏爲蒙古各旗前保盟長總管等員力顧大局功難軒輊理藩院奏令分註著實勞績另行擇尤擬獎無從遵辦謹將所保黃糧酌請改

賞並依烏里雅蘇台庫倫

奏准之案籲懇

天恩將其餘各員仍照原保給獎以昭公溥而維蒙心繕摺

奏陳仰祈

聖鑒事竊前因蒙古各旗經理俄商遺棄貨物毫無損失有裨大局經參贊大臣臣瑞洵將各旗正副盟長散秩大臣總管等遵

旨奏請獎叙以昭激勸並將各旗及台站卡倫出力應保員弁開單另咨理藩院覈辦嗣於光緒二十八年十二月十九日遞回原摺奉

硃批該衙門覈議具奏單片併發欽此旋准理藩院議奏所保各員均未分別著實勞績次第無從覈議奏令分註各員實在勞績擇尤另行酌擬獎叙等因恭錄

諭旨咨行前來臣細譯院奏自係爲嚴防冒濫起見亟應遵照惟當日辦理爲難一切委曲情形尙有院臣所不及知者查庚子年拳匪揭竿軍務大起畿輔內地以及東北各省無不遭其蹂躪獨此邊漠聯俄之地轉能保全無事實賴蒙古部落布置得法而遵守約束則各盟長總管等出力爲多比時俄境諸卡皆已增防且於阿拉克別克屯糧運械更以兵輪駛入哈巴河口軍容甚盛意在耀兵當此地方存亡呼吸之際設使當時稍失機宜或取其貨物或殺其商人必致立召外兵全境糜爛一荼一毛一矢一石均能招邊疆無窮禍患不惟勞師費餉而游牧淪胥人民塗炭事後且添北路賠償鉅款故瑞洵深防後患疊頒文告並派員前往勸諭蒙古務以團兵各守各旗照舊保護俄商不許妄動或至失地殞師如能照此辦理將來許照軍功請獎曾經附片

奏明並於上年專摺

奏請奉

旨准其擇尤酌保毋許冒濫欽此茲按其成勞擇尤遵保本係酌照蒙古保舉辦法並未稍

有冒濫在該院原可酌量議准俾益激蒙古忠義之心永作朔方保障乃院臣拘牽文義仍以爲破格之舉亦可謂不諒苦心矣又查烏里雅蘇台庫倫均有蒙古請獎之

奏先經該院駁改加級紀錄嗣經該將軍大臣復奏仍照原保均奉

旨允准茲院臣於科布多保案僅令分別勞績另覈請獎是院臣於寬嚴之間尙非竟無斟酌但臣細加審度反復思維於分註勞績一節實屬無從遵辦蓋能保護洋商不與開釁即是顧全邊境力維大局論功旣無分軒輊請獎即難判等差至擇尤一節查該蒙古杜爾伯特和碩特明阿特額魯特土爾扈特烏梁海札哈沁諸部合共三十旗原保三十員即係按一旗一員請保已屬拔尤無可再擇臣愚見今昔情形不同西北防務無殊東北不能不用蒙古以爲藩蔽況各旗均有俄商貿易近來英法德各國前來遊歷洋員又復踵至爲日方長尤資保護所恃以駕馭蒙古者惟此保獎從優藉可鼓勵耳若事急則許其重賞時平則抑其前勞亦殊不足以昭大信現在變法求強似未便以常例相繩也今將杜爾伯特左翼正盟長副將軍特固斯庫魯克達賚汗噶勒章那木濟勒土爾扈特正盟長札薩克多羅郡王密錫克棟古魯布原請黃韁擬請改

賞紫韁其餘各員均請毋庸更易合無籲懇

天恩許依烏里雅蘇台庫倫之案將科布多前保蒙古各員仍照原保給獎出自

逾格鴻慈其片保駐班台吉色埒甯一員已聲敘實在勞績另單咨保台站卡倫蒙員八十員均係保護俄商出力且所保僅止頂戴本照尋常辦理應併請毋庸再改謹繕摺

奏陳伏祈

皇太后

皇上聖鑒訓示再參贊大臣瑞洵現在奉

旨賞假是以未經列銜合併聲明謹

奏 光緒二十九年閏五月初三日拜發

本年六月十九日遞回奉

硃批著照所請該衙門知道欽此 閏五月二十九日

山西換防官兵變通辦理片

再科布多額設換防屯田官兵除直隸宣化鎮派撥外尚有山西大同鎮標把總一員馬步兵十八名向係五年班滿分別更換前因該官兵將屆更換之期當經先行

奏明並分咨辦理嗣准護理山西巡撫趙爾巽咨稱此項官兵均在奉

旨裁撤之列第念邊事緊要戎備不容空虛而鎮邊又例無額兵可資調遣已籌定辦法兩條一云將山西換防官兵盡行遣回即由本城就近召募一云儻必須由晉派往止可將此項官兵改作續備名色至於餉項一切照章解往應用等因咨商覈覆前來臣查山西省綠營既已全裁自難仍拘舊例而科布多換防綠兵積習太深亦正籌商整頓再三審酌自應照該撫第一條辦法較為覈實此後應將此項馬步兵等改爲就地召募至前者辦理換防一案初議將大同官兵更換官一員兵六名今查班滿之山西大同鎮河曲營把總馬根義原缺已裁無可派換應請將該把總暫行留營爲約束兵丁之用其應換兵六名甚屬疲弱仍應沙汰另行募補其該官兵一年應支俸餉併應如來咨由大同鎮覈計餉乾糧米共合銀若干附入常年經費搭解來防以備支放如此變通辦理既免萬里徵調之煩更易責塞上屯防之效似於邊維不無裨益除咨覆山西巡撫暨分咨戶兵二部查照外事關改制理合附片具陳伏祈

聖鑒訓示謹

奏 光緒二十九年閏五月初三日拜發

本年六月十九日遞回奉

硃批該部知道欽此 閏五月二十九日

散木居奏稿卷之十七

門人鈴木吉武校字

散木居奏稿卷之十八

幹難 瑞洵

棒喝集 光緒癸卯

力疾銷假籲請事竣 陛見摺

刊用木質關防片

隨帶員弁兵丁片

查照分界前案僱用烏拉等項酌量發價片

幫辦大臣接護參贊大臣印務摺代

會奏改設行省有害無利摺 稿佚

請 飭加撥安哈經費片

需款急切請 敕戶部妥議實在辦法摺

請仍籌撥屯田經費片

具摺自効摺

署理蒙古處承辦章京片

參贊大臣中途墜馬回城調治摺代

力疾銷假籲請事竣 陛見摺

奏爲假期已滿病仍未痊力疾銷假謹遵前

旨前往阿爾泰山辦理接收借地及清查安插哈民事宜附報啓程日期並請俟差竣籲求

天恩准令臣晉京

陛見具摺

奏祈

聖鑒事竊臣於上年四月間

奏請索還阿爾泰山借地安插哈衆等因奉

硃批著即親往履勘將該處哈民清查酌度情形妥籌安插務令各得其所以順輿情而重

邊要餘依議欽此比擬承

命卽行履勘妥辦嗣因漸交秋令大雪封山厚至數尺人馬難行當經

奏明容俟今夏天氣清和再行前往詎意入春以來臣之病忽又加劇深懼以孱弱之體曠

廢職司因因於二月十九日瀝疏懇祈

俯准開去差缺回旗調理蒙

恩賞假三箇月計至閏五月二十九日卽已屆滿刻下所患偏痺風證雖漸止息而腎疾總未全愈腦鳴心悸仍如平時且用心稍過說話稍多夜中卽必驚恐不能成寐精神大減於前若以臣病情而論仍應再懇開缺謝絕世事息心靜養方可望其大痊惟現因阿爾泰山借地業經長庚等查明會奏仍歸科布多收管欽奉

上諭應如所請辦理並以潛居哈民人隨地歸

責成臣妥爲安插約束和衷會商悉心經理其應辦事宜以安哈爲最要亦惟安哈爲最難臣若因病不能去則須派委員前往而環顧僚屬竟無其人且佔牧之哈民人數太多又性情曠悍不守官法非臨之威重大員難資鎮攝更須體恤蒙情酌度地勢商量安置方昭妥愼脫有失宜不免啓爭貽患並查阿爾泰額爾齊斯均爲邊防最要之區欲爲保疆禦侮之謀似應查照臣前奏專設大員督辦布置一切事彌艱鉅自非灼考其便宜周知其情狀身親閱歷得其要領通盤籌畫不足以振全局而恢復遠謨此則關係重大苟非其人尤未易以輕舉也伏思臣前請開缺原因沈疴久抱不堪負荷重任非敢顧惜微軀再四審量邊疆

事大身家事小而上維

聖明倚毗之切下體蕃部喁服之殷一息尙存難耽安逸自宜舍命前驅力疾自任略副古人盡瘁之義謹擬欽遵前

旨前往阿爾泰山將該處哈民一律清查相地妥爲安插設法約束一面督率烏梁海兩翼辦理接收借地並將邊防布置統籌詳議據實上陳期仰稱

朝廷慎固封圻子惠邊黎之至意臣所管參贊印鑰茲於六月初二日移交幫辦英秀暫行護理臣現正料簡行裝定於十二日啓程抑臣更有請者臣自違

京輦已越三年犬馬戀

主之忱無時或釋雖北路差使向無述職而睽懷

君國忠愛出於至誠初非有一定之成例以奉行故事臣懇欵之愚惟求

天恩俯准臣於阿爾泰山差竣之後晉京

陛見庶稍遂仰

聖瞻

天之願即邊防要政亦得叩求

宸訓有所遵循臣不勝欽企感激之至所有假期已滿病仍未痊力疾銷假謹遵前
旨前往阿爾泰山辦理接收借地及清查安插哈民事宜附報啓程日期並籲求
陛見各緣由謹具摺

奏陳伏祈

皇太后

皇上聖鑒訓示謹

奏 光緒二十九年六月初二日拜發

本年七月十八日遞回奉

硃批著俟事竣後再行請旨欽此 六月二十八日

刊用木質關防片

再臣現已前往阿爾泰山業將參贊大臣印鑰移交幫辦大臣英秀暫行護理臣另刊木質
關防一顆文曰

欽差辦理阿爾台山安輯事宜科布多參贊大臣行營關防即於六月初二日開用查阿爾
台山地極邊接近俄界離科布多城十一站約千有餘里若再至額爾齊斯河則又遠五

昔才居第希先之十一
站矣且值大雪封山即聲氣隔絕實屬無從兼顧臣起身之後科布多應辦事宜應由英秀照常辦理徑行具奏不必再與臣往返咨商或以周折而致耽誤臣遇事亦即專奏謹將報匣勻帶兩分應用除分咨查照外理合附片陳明伏祈

聖鑒謹

奏 光緒二十九年六月初二日拜發

本年七月十八日遞回奉

硃批知道了欽此 六月二十八日

隨帶員弁兵丁片

再臣現隨帶章京三員驍騎校筆帖式八員千總把總外委十員分任差遣換防營兵匠役蒙古親軍書手通事亦分別擇帶約不逾二百名之數但取足供驅策而已伏思臣此行本爲安民自宜先除苛政與之更始以切撫綏應將向來行走台站所有遞禮折羊前站通事跟役各項規費一概革禁不准絲毫需索當於沿途明白牌示該官兵等遠役極邊差使艱苦亦應量加體恤現擬隨往之官員兵丁每員名均酌照軍需則例支給盤費銀兩俾資食用差竣即行住支臣亦遵照出差定章按日支領盤費如此則蒙哈不至受累經費所支無

聖鑒謹

本年七月十八日遞回奉

硃批該部知道欽此 六月二十八日

查照分界前案僱用烏拉等項酌量發價片

再光緒九年間前幫辦大臣額爾慶額奉

旨前赴哈巴河勘分界址隨帶文武員弁兵丁應用騎馱馬匹駝隻烏拉齊等項因爲數較多間係僱用並加賞犒以輔合力之不及均經造冊報部奉准覈銷有案臣此次前往地方即是阿爾泰哈巴河一帶蒙哈情形較前益形困苦更不能不少加體恤擬即查照前案辦理斟酌發價事竣覈實報銷除咨部外謹附片陳明伏祈

聖鑒謹

奏
光緒二十九年六月初二日拜發

本年七月十八日遞回奉

硃批該部知道欽此 六月二十八日

幫辦大臣接護參贊大臣印務摺代

奏爲恭報臣接護參贊大臣印務日期仰祈

聖鑒事竊參贊大臣瑞洵現已具摺陳明銷假前往阿爾台山辦理收地安哈事宜並將參贊大臣印務

奏交臣暫行護理茲於六月初二日業經臣接受應將一切公事照常辦理隨時

奏陳伏查參贊大臣瑞洵自到北路不服水土此次患病較久總未大痊原擬俟假滿仍欲懇請開缺惟現因交收塔城借地欽奉

寄諭以潛住哈衆人隨地歸令該大臣妥爲安插約束悉心經理此項哈薩克性夙剽悍慙不畏法本難管轄又兼人數太多前以強據烏梁海牧地蒙古已懷不甘然欲令其遷回又恐塔城不能辦到令奉

恩旨准其人隨地歸揆度情勢亦惟有如此辦法但開導烏梁海使之遵從必費氣力又須將此數萬之衆一一安置妥貼編立戶口分設官長籌及久遠方能少杜後患自非得蒙哈向所信服之人無從辦理至安插科布多哈衆尤在其次此事關繫至爲重大操縱頗不容

易前因該大臣患病正慮無人能了茲該大臣深知其難仍欲扶疾前往其忠勇之概實足令人起敬雖塔哈久佔烏梁海游牧能否相安尙不可知然以瑞洵之聲威謀略誠信素孚必能措理合宜似較他人猶易爲力也所有臣接護參贊大臣印務日期理合恭摺具奏伏祈

皇太后

皇上聖鑒謹

奏 光緒二十九年六月初二日拜發

本年七月十八日遞回奉

硃批知道了欽此 六月二十八日

請飭加撥安哈經費片

再布倫托海開屯需費另經臣附片切陳當蒙

慈鑒惟辦理安插哈薩克較開墾尤爲緊要於邊局殊有關繫措置稍失機宜卽不免滋費生事臣甚以爲憂當去年奏請撥欸時並未計及塔哈隨地來歸臣生長膏梁旣不工於綜覈營中又無助理之人匡其不逮一任臣約略估計即行具

奏故收地安哈僅請銀五萬兩開辦屯電請銀四萬兩今皆已知其不敷臣查科布多與新疆不同伊犁向有歲協善後經費十一萬餘兩塔爾巴哈台亦有三萬兩烏魯木齊爲數尤多各省年年照撥各部亦年年准銷科布多則一年止得山西協濟經費四萬九千餘兩直隸二千五百兩額支僅能敷衍安有餘力旁及此其所以諸務廢弛似不能盡諉咎於不辦事也若戶部再不體諒邊艱稍稍接濟則屯事中輟其過尙輕儻於哈薩克撫馭失宜甚至釀成邊患則臣實無可辭咎臣瑞洵夙性嚴急本非好博寬厚之名者但我無一兵彼乃動逾數萬且虎狼之性斷難馴擾俛察時勢不得不略示恩意以爲羈縻此中權度臣固不敢稍涉大意第歸科布多之塔哈既奉

諭旨令臣妥爲安插約束悉心經理似有不得不請戶部代爲籌畫者應懇

天恩敕下戶部鑒察苦衷無論如何爲難再行撥給銀五六萬兩俾有可措手不至因惜小費而誤大局儻所用無多仍即覈實報存絕不任令藉端糜費萬不得已謹再附片籲陳伏祈

聖鑒訓示謹

奏 光緒二十九年六月初二日拜發

本年七月十八日遞回奉

硃批覽欽此 六月二十八日

需款急切請 敕戶部妥議實在辦法摺

奏爲滙陳辦事爲難需款急切情形請

敕部臣統籌全局再行妥議實在辦法以重邊要而免貽誤全大局而便遵循仰祈

聖鑒事竊臣瑞洵前於本年三月二十七日曾因布倫托海屯田緊要工用浩繁奏請

敕由戶部暫行酌撥經費以濟急需奉

硃批戶部議奏欽此頃准戶部將議覆原奏祇錄

諭旨咨行欽遵查照到營查原奏內云臣等伏查上年五月據科布多籌邊經費當經臣部議令各省妥議章程清理各省衛所屯田分別繳價稅契抵充科布多籌邊經費蓋指各省清理屯田繳價納稅之款而言而各奏明辦理今該大臣奏稱屯田緊要工用浩繁請由臣部暫行撥給銀四萬兩將來由籌邊經費內扣還等語查該大臣所稱籌邊經費蓋指各省清理屯田繳價納稅之款而言而各省清理屯田現惟山東奏定章程分年繳價其餘安徽湖北等省辦理均未就緒不知何日有款可解該大臣豈得竟以此項籌邊經費爲辭先請由部撥給銀兩作爲布倫托海屯田

經費且布倫托海之開屯既據該大臣請催山西河南兩省欠餉以資應用何得又請由部撥給臣等查閱該大臣奏報二十六年布置邊防銷款摺內乃知該大臣現在尙欠商款四萬九千餘兩亦指山西河南欠餉歸還此其所以不能不另請部款爲開屯經費也惟山西河南兩省共應先行解還科布多經費銀七萬四千兩如果全數解到計抵還商款外尙可餘銀二萬數千兩以供布倫托海開屯之用臣等公同商酌擬仍請

旨敕下山西河南各巡撫轉飭藩司遵照臣部上年六月奏案迅將欠解科布多經費銀兩設法籌解毋任延宕其布倫托海開屯經費卽於山西河南籌解欠款內撙節動支如有不敷再由該大臣隨時設法籌措彌補等語臣等於部臣指駁各節不必深辯惟現在任事之難待欸之急與夫防務之不能不整飭邊務之不能再廢弛各情部臣尙不及知臣等殊難緘默若欲邊吏獨任其難而部臣不諒其苦

朝廷責其辦事而部臣又斥其用財竊以爲勢成桡鑿恐有宜請部臣設身處地悉心審察者臣等敢將目下科布多應辦之事與需欸實在情形爲

聖主披瀝陳之現在阿爾泰山借地已奉

寄諭飭令定期交收潛住之哈民人隨地歸

責令臣瑞洵妥爲安插約束查臣瑞洵前

奏請由戶部借墊銀五萬兩係止籌備安插科屬哈民而言已慮不敷曾經

奏明茲塔屬之哈民又隨地來歸豈能歧視且爲數太多雖尚未清查然聞其人丁約有三千餘戶合之科屬哈民當以五六萬計應俟詳查具

奏尙幸塔哈多富無須普加體恤但亦不能家家饒足人人樂業其窮苦者亦應一律施惠斷非五萬之數所能足用若再撥給牛具籽糧分授田畝則需款彌多更屬無從措辦此一端也阿爾泰山額爾齊斯河等處地介極邊形勢稱勝然外有強鄰之窺伺內有哈衆之縱橫東南又與伊犁塔爾巴哈台瑪納斯接壤四通八達爲獮匪出沒之路拚飛未已伏莽堪虞憂患交乘動關大局一有疏失不惟北路切近之災亦臣等難辭之罪今者借地不久歸還金山南北沿邊千餘里豈能置之不顧茲乃並無一兵殊不足以嚴守禦而資彈壓臣瑞洵前於具奏應辦事宜摺內曾經陳明將來阿爾泰山尙須設兵置戍以固塞防即已有見於此惟兵以餉爲命脈軍火器械爲根本若經費尙非十分有著則派兵接防卽不能一氣呵成此又一端也科布多俄商最夥散之蒙古游牧者多於漢民近俄英法德諸國前來游歷人員尤復絡繹全須保護一有疏虞卽滋大釁臣瑞洵去年四月有請將留防蒙兵五百

名減數改爲護兵按照各旗十名分布專護洋人之奏奉

旨俞允嗣並接戶部咨令辦理聲復亦以月餉尙無的欸祇於去年十二月底先行裁撤三百名以節餉需仍未能飭令選派以符初議蓋以事關護商計口授食若忽放忽停轉恐懈弛而生事此又一端也科布多所管各卡倫以阿拉克別克一卡爲最喫緊近年頗覺多事
昌吉斯台卡亦爲俄人往來孔道其所隸之分卡又處處聯俄無不關緊要本宜整肅戎防加意戍守乃自光緒七年復設以來兵額減至每卡十名氈廬之敝破器械之朽窳直已不成氣象而對境俄卡則堡壘整潔甲兵堅利未免相形見絀且易啓盜賊輕侮之心體察情形亟宜整頓臣等嘗閱前伊犁將軍長庚籌邊奏稿見其修築卡堡辦法與科布多情事相宜其法係土堡石壘各就地之所宜工之難易料物之遠近斟酌辦理用欸亦不甚多似可照辦至卡倫兵額原設每卡有五十名者有四十名者臣等本有

奏請規復之議至卡倫交涉難辦駐守之侍衛不能勝任曾經臣瑞洵電商外務部設法變通嗣奉覆電以所擬係爲因時制宜起見令由臣瑞洵自行

奏辦乃亦均以無欸可指因循未及舉行此又一端也此上數端僅就現在急應舉辦者約略言之其實應辦之事尙不止此至如練兵以固圉考牧以實邊二者尤爲切要以其需欸

較繁未敢陳及若夫阿爾泰山借地收還彼處密邇俄疆錯居蒙哈內訌外患均屬可憂權量重輕自與東北邊防無分軒輊不能不力謀防守亦豈無兵無餉所克濟事臣瑞洵前因籌邊需費奏請清查衛所屯田取其價稅本係因戶部集款維艱代爲籌畫實則疆臣邊臣但當籲帑辦事不應干預部務初謂各省果能將此項認真查辦則繳價稅契固已可得鉅款即常年租賦亦有增益不但濟邊疆之要需並可省部臣之籌措本屬一舉兩得乃今閱戶部奏章則謂各省清理屯田不知何時有款可解則是此舉將不可靠在部臣雖未明指如何而其不能分撥協濟以應邊需之急已在言外臣瑞洵去年四月遵旨估計應辦事宜需用經費約數摺內曾有臣所請未知是否可行其不可行即當另爲設措是所望於公忠體

國力顧大局之部臣之語竟不料前言之微中也大抵庚子之變議和賠款爲數太鉅部臣疆臣無不視爲剝膚之灾然眉之痛但得剜肉補創以顧洋債便爲盡職其他政事均若可從緩圖至遇事涉邊疆則更有無足重輕之見橫亘胸中從前科布多亦曾議及增防皆被部臣嚴駁而止不知邊患如此其深時艱如此其棘斷非粉飾因循蹈常襲故所能補救我朝旣處列強爭馳之世界自應建千古未有之奇勳事在必行雖費不惜特須視所任之人

與所辦之事以爲衡若但知節用而並不事事恐日即於危弱而終無以自強久將隱釀患萌且至有大費帑項之一日此當事者不可不知也此次部臣所奏布倫托海屯田經費仍令山西河南兩省籌解欠欸樽節動支如有不敷由臣瑞洵設法籌措雖經奏奉諭旨然臣等實苦無從遵辦已於另片詳陳查山西舊欠台費三萬四千兩去年已解過二

萬兩尙欠一萬四千兩河南舊欠台費據該撫文稱本欠七萬三千兩內有光緒三年河南旱災由部改撥湖北廣東等省銀一萬六千兩實祇欠五萬七千兩綜計兩欸必須全數解清除還商欠方能餘出二萬數千之數然萬無如數報解之事豫料今年河南止能酌撥一萬兩聊爲點綴且亦不敢說定此中爲難曾任封疆辦事者亦不容不知也夫屯墾止邊務之一端臣等所深憂過慮者哈民旣已歸附固當妥爲安置洋務雖尙平靖終宜暗爲設防此外應辦各事皆與防務相表裏可並行而不可偏廢若欲臣等照舊敷衍徇情苟安按之時局旣已有所難行揆之寸心亦實有所不敢臣等愚見竊謂經費縱屬難籌邊防未容稍弛臣瑞洵本無才望不工理財自當在罷斥之列前已附片奏請另簡大員前來督辦已邀

慈鑒究竟此後阿爾泰山科布多均應如何布置臣瑞洵擬辦各條應否遵

旨次第舉行衛屯各節既難指準當如何由戶部另行妥籌的款以資接濟戶部筭領度支義無旁謝敢求

敕下部臣統籌全局再行妥議實在辦法指示奉行俾臣原議籌邊要政不至徒託空言亦免屢瀆

聖聰之咎叨沐

鴻施永無涯涘伏思臣瑞洵痼疾侵尋精力日遜原不堪再膺重任自蹈魯尤徒以阿爾泰山一役無人能了關係重大不能不扶病前往上副

聖意下順衆情其防務擬辦一切亦實迫於事勢不得不然其不敢誤邊局者在此其不敢欺

朝廷者亦在此此心可質天日初無絲毫意見敢與部臣背馳也尙冀

聖主垂察

敕下部臣曲爲原諒臣等幸甚所有瀝陳辦事爲難需欸急切情形請

敕部臣統籌全局再行妥議實在辦法以重邊要而免貽誤全大局而便遵循各緣由理合具摺馳

奏伏祈

皇太后

皇上聖鑒

訓示謹

奏 光緒二十九年六月初二日拜發

本年七月十八遞回奉

硃批戶部議奏片二件併發欽此 六月二十八日

請仍籌撥屯田經費片

再戶部奏覆布倫托海開屯需用經費仍指山西河南兩省欠餉濟用如有不敷並令隨時設法籌措彌補等因理應遵照竭力辦理惟查布倫托海之開屯同治年間已經辦過並非臣瑞洵創始彼時係布倫托海辦事大臣李雲麟經理旋以激成兵變並未辦成李雲麟亦革職遣戍而事後開銷聞屯墾報銷十萬兩布置地方一切又報銷六十萬兩浮濫實不能免不聞戶部駁斥今臣瑞洵辦理開墾事同一體原估僅止四萬兩較之昔日孰實孰虛孰省孰費自在

聖明洞鑒之中刻下渠工告歲農作方興舉凡委員薪費兵役工匠餉資日食糧麪犒賞何一不須用銀現計渠屯各工將次完竣用款三萬四千餘兩而建倉安磨設立公所尙須次第經營又豈所指欠餉所能救急並查山西舊欠台費僅三萬四千兩除已解二萬兩外止欠一萬四千兩臣瑞洵不避嫌怨再四資催該藩司來文尙有怨詞河南所欠亦止五萬七千兩除已解一萬兩外不過尙欠四萬七千之數若如部臣所云全數報解亦僅能敷衍況近年各省多爲洋債所迫司庫皆極竭蹶無可如何安有餘力兼顧邊地今部臣以萬不可靠之款撥作屯田之用是不啻畫餅以予科布多而使飽啖以充飢也臣等仰屋徬徨殊苦無從遵辦且臣瑞洵去年雖會片陳辦事需款情形於山西河南欠餉僅約略言之並未確指爲開屯之用至今臣等設法籌措彌補云云科布多常年經費止得五萬一千餘兩非如伊犁塔爾巴哈台之多又處邊瘠之區尤屬無從羅掘臣瑞洵素性迂拘臨財尤有斟酌當用則用不稍惜費當省則省不敢濫支試以改行省而論即因其舉動窒礙需款浩繁另摺瀝陳

奏請罷議不然則以數千里游牧而改置省會能無協撥大帑又豈可以區區欠餉了之耶
布倫托海屯田正當喫緊之際仍應請

旨敕令戶部暫行照數墊撥無致前功盡棄則邊陲幸甚謹附片陳請伏祈
聖鑒訓示謹

奏 光緒二十九年六月初二日拜發

本年七月十八日遞回奉

硃祈覽欽此 六月二十八日

具摺自効摺

奏爲具摺自効請

旨從重治罪仰祈

聖鑒事竊臣前於六月初二日專摺

奏陳力疾銷假並定期馳往阿爾泰山辦理接收借地安插哈薩克各緣由旋於是月十二
日啓程因山路太多駕杆車窒礙難行騎馬前往不料於是月十七日未刻至第六台過薩
克賽浩喇什大壩臣因馬逸被傷情形甚重萬不得已現已回城醫治仍接管參贊印務收
安之事英秀力顧大局願效馳驅英秀另摺詳細

奏報臣已囑其一切遵

旨辦理伏念臣受

恩深重未報涓埃計自違寄忝膺屢以病狀上瀆

宸聽已極悚仄茲於奉

旨交辦之件又不能始終其事竟無由收一簣之功午夜捫心愧憾無地辜

恩溺職實屬咎無可辭惟有籲懇

天恩將臣從重治罪庶稍釋隱微之疚略贖貽誤之愆叨沐

生成永深銜結謹具摺自効伏祈

皇太后

皇上聖鑒

訓示謹

奏 光緒二十九年七月初六日拜發

本年八月二十二日遞回奉

殊批瑞洵著交部議處欽此 八月初二日

署理蒙古處承辦章京片

再知府銜分省遇缺即補直隸州知州穆騰武已據銷假回營臣等公同商酌該員曾充蒙古處承辦章京現此缺尚未

奏補應令該員先行署理蒙古處承辦章京主事職銜俟一年後如能遇事整頓再爲請旨充補除分咨查照外謹附片陳明伏祈

聖鑒謹

奏 光緒二十九年七月初六日拜發

本年八月二十二日遞回奉

硃批知道了欽此 八月初二日

參贊大臣中途墜馬回城調治摺

奏爲參贊大臣中途墜馬回城調治由臣馳往阿爾泰山辦理收地安哈事宜恭摺馳

奏仰祈

聖鑒事竊參贊大臣瑞洵於本年六月初二日具摺陳明力疾銷假前往阿爾泰山辦理收地安哈事宜並於昨日將參贊大臣印務

奏交臣暫行護理該大臣旋於十二日啓程乃於六月十九日據隨帶章京錫齡阿等派兵

馳來科稟報據稱該大臣於六月十七日行抵六台薩克賽浩喇什大壩騎馬驚逸墜於岸畔左邊半身自頂至踵均爲怪石碰傷鼻口出血面目全腫腰脊骹足筋骨且有傷損尙幸樹林遮護未陷深澗之中跌傷之處疼痛異常骨雖未折已有脫節每一呼痛立即昏迷不省人事等情飛報前來臣當即派員星馳看視並令勸其回城調治另商辦法該大臣志在盡瘁報

國一意堅執仍欲扎掙前往復經臣派員致函再三勸慰以該大臣爲

國家有用之人總當葆愛此身以備

朝廷任使若明知不能支持而必貿然輕進儻有差池亦於大局何補況如此重傷何能騎馬不如暫行回城醫治另議辦法隨行員弁跟役等亦再三稟阻該大臣始勉強允從現於六月三十日回城延請在科貿易通曉外科洋人醫治又兼該大臣夙疾本未大痊因亦觸發萬非旬月所能全愈伏思臣身膺邊寄原有幫辦之責茲該大臣既不能前去自當由臣前往將收地安哈事宜竭力辦理以期稍效犬馬之力藉圖報稱竊幸該大臣與臣早經議有章程現應仍將參贊印務移交該大臣接收力疾辦理地方公事臣卽馳往阿爾泰山將借地哈民仍照該大臣所定辦法肅規曹隨隨宜籌辦以期無誤事機其收還借地後將來

如何布置邊防事體重大誠非臣才力所能及亦非臣所敢任應俟將該處情形查明回科後與該大臣妥慎籌商再行據實具

奏至臣此行原應

奏明請

旨再行前往第前已咨商春滿頃准來咨派定領隊大臣圖瓦強阿前往交還現在已交秋令轉瞬即大雪封山無從前進事關大局萬不敢拘泥貽誤臣現於七月初六日將參贊印務仍交該大臣接收臣即於是日啓程除臣應帶差官跟役外所有該大臣

奏明隨帶文武人員暨蒙兵通事各項人等均照舊帶往以資差遣並仍用原刊關防所有參贊大臣中途墜馬回城調治由臣馳往辦理收地安哈各緣由謹恭摺馳

奏伏祈

皇太后

皇上聖鑒謹

奏 光緒二十九年七月初六日拜發

本年八月二十二日遞回奉

硃批另有旨欽此 八月初二日

散木居奏稿卷之十八

門人鈴木吉武校字

散木居奏稿卷之十九

韓難 瑞洵

造塔集 光緒癸卯

侍衛躁妄生事委員附和助虐先行奏參摺

密陳塔城電奏不免挾嫌及本城戍防滿員清苦情形片

幫辦大臣馳抵承化寺後前往哈巴河片

運判徐鄂到營派委差使飭往英秀行營辦事片

遵 旨酌保換防差委武職各員弁防戍出力摺

綠營換防官兵到防日期暨回營官兵照案由台行走摺

防兵互相對調片

額外驍騎校文普再留三年片

請動倉糧放賑片 以上九月初二日拜發

電陳阿勒台收安現定從緩摺

阿勒台收安議緩謹陳可疑可慮情形摺

造塔集

卷之十九

衛隊安生事委員附和助虐先行奏參摺

奏爲駐卡侍衛隊安生事委員附和助虐先行奏參摘頂撤差認真查辦恭摺仰祈

聖鑒事竊於本年八月二十六日接准伊犁將軍馬亮咨稱光緒二十九年七月二十八日

准軍機處電開伊犁將軍鈔電飛遞科布多參贊大臣並轉塔爾巴哈台參贊大臣奉

旨春滿電奏稱阿爾泰山交還科城一案遵旨派令領隊大臣圖瓦強阿前往督飭辦理交

割事宜茲據該領隊函稱有科城委員溥湧等因詐索科屬哈薩克總管不遂將該總管鎖

押卡倫侍衛處旋經哈爾搶去彼此戰鬪互相受傷該委員等專差持文到城借調礮械意

欲復仇經章京拒絕風聞猶有在科城調兵之說等情著瑞洵迅即馳往哈巴河阿爾泰山

一帶將安輯交收事宜妥爲辦理並彈壓科屬哈爾總管等各安游牧毋任滋事委員溥湧

等詐索情事並著瑞洵查明參辦毋稍迴護欽此跪讀之下曷勝悚惶伏查瑪呢圖噶圖拉

幹卡倫阿拉克別克河地方住牧哈薩克屢經俄員以界務未清迫令遷移臣以事關邊要

尙在堅持嗣於五月十六接奉外務部函開因俄使照催速辦王大臣以相持過久深恐釀

成事端更難收束令臣察度情形如在彼實難住牧即將此項哈爾移置離彼較遠之區少

茲膠葛商屬統籌妥辦前來臣詳慎圖維王大臣恐妨大局臣亦未可偏執已見維時臣尙

在

賞假期內當經商由英秀遴員往辦英秀以即補驍騎校溥湧情形尙熟因即派爲遷哈委員切諭慎勿滋擾去後旋於七月初六日據署理該卡侍衛英紱與委員溥湧各稟稱查訪得哈目堆森博特總管梅林拜等有謀殺哈薩克札蘭敖斯班情事侍衛英紱當即傳詢梅林拜伊推諉不知口出強言暫將其頂戴摘去看押次早有哈薩克數十人來將侍衛房屋打壞將梅林拜搶去又將房內物件搶去多半並打傷卡兵十數名搶去官馬八匹職溥湧前往彈壓該哈衆仍然不遵手執火鎗刀矛亂打當令卡兵開鎗虛擊哈衆始暫退去查堆森博特梅林拜所屬哈衆不法任意滋事若不及早懲辦侍衛難以管轄等情臣接閱稟詞以其情節支離即料及不免有藉案勒索之事值英秀適往阿爾泰山哈巴河辦理收安事宜隨將稟中疑竇逐層指出咨令查究並以該侍衛委員辦理不合應即加以參處嗣於七月二十六日復行咨令將該侍衛委員嚴切訊究慎勿專責哈官致有偏斷並另致函告以當此安插哈衆之時綏戢尙且不暇何可再有擾累務期訊得確情持平辦理方能折服哈衆之心萬不可輕聽一面之詞致失朝廷體恤邊氓恩意此皆未奉

諭旨以前辦理此案之實在情形也臣本擬俟英秀查訊明確再行從嚴參辦茲既經春滿電奏奉

旨交查臣遵即恭錄咨令英秀就近欽遵辦理毋稍袒護惟該委員等有無詐索及如何向塔城借調礮械等情現雖尚未查明然侍衛英絃既稱訪聞哈官有謀命重情何以早不具稟來城請示覈辦直待委員溥湧到後忽加傳訊並遽將哈官梅林拜摘頂管押辦理殊屬躁妄溥湧係奉檄遷哈並非派令訪案乃竟橫生枝節狼狽爲奸致激成毆搶重案即此已均咎無可辭相應請

旨將三品頂戴三等侍衛英絃四品頂戴即補驍騎校溥湧均先摘去頂戴撤去差使聽候查辦其遷哈之事已早咨由英秀就近一手督辦至該卡侍衛現實無人可以接替前准兵部咨稱侍衛處已經揀派護軍校鐵齡應請

敕下兵部傳令該員迅速前來以重卡防除將前致英秀疊次咨函鈔稿咨呈軍機處查照外所有駐卡侍衛躁妄生事委員附和助虐請先摘頂撤差認真查辦緣由理合恭摺具陳伏祈

皇太后

皇上聖鑒

訓示謹

奏 光緒二十九年九月初二日拜發

本年十月二十一日遞回奉

硃批著照所請該衙門知道欽此 九月三十日

密陳塔城電奏不免挾嫌及本城戍防滿員清苦情形片

再侍衛委員辦事乖方已遵

旨認真查辦另摺先行奏參將來查究明確如果屬實再當從嚴効治斷不敢稍涉迴護致負

委任惟臣尚有下情幸際

聖明不敢不委曲密陳者臣前接英秀承化寺行次函稱詢問該處民戶究願歸塔抑願歸科該民戶不免游移及塔城章京延年到後次日即衆口一詞齊願歸塔等語在英秀固屬多此一問致生枝節而該民戶等墾田畝安廬舍耕鑿有年已同土著何所疑懼何所希冀一朝盡棄其田畝房屋而毅然離科就塔此豈情也哉其爲該章京延年之從中教唆已可

昔乃人參系一
概見臣伏查延年係欽奉

諭旨撤差查辦之員豈盡一無可議乃新疆撫臣竟以全行查無實據奏請毋庸置議完結而於不能掩飾如與春滿兒女姻親一節則置不復提諸如此類尙難枚舉且塔城文武亦當不乏而春滿必派該章京前來隨同辦理交還事宜一似該城除延年外別無可用之員均難索解凡此一味偏袒有心與臣爲難而

詔旨可以不遵大局可以不顧臣傷病顛連亦何心與之計較且臣之參延年原因蒙衆呈請不敢壅於上

聞初非與春滿別有竟見即春滿自臣到任後亦復函問時通素無芥蒂特因借地索還不免側目又奉

旨人隨地歸益失所望而臣復奏參延年遂致惱羞成怒矣此次該侍衛委員等辦理固有不合然使向無嫌隙亦何至動行電奏究其所謂詐索不過爲爭五六隻廩羊耳臣久有所聞早經咨令英秀嚴究夫王道不外人情北路戍防人員缺乏經費支絀應支鹽菜銀糧爲數甚微辦事章京一年所入二百九十餘金筆帖式且不過一百二十金地處邊瘠百貨奇貴平居一身飲食服用已形竭蹶遇有出差等事整治行裝鞍轡往往設法張羅多方借貸

始克成行既無以養其廉勢未便苛責其貪況長途跋涉多索數羊以稍資盤費論理固屬不應原情亦尙可恕若竟察見淵魚概加查劾將至營署一空況此等事不僅北路爲然即西路亦所常有若咸加以詐索之名鋪張上達則且奏不勝奏夫事有重於此者多矣即如春滿前在伊犁時佔一回婦及調塔城竟攜之赴任而回婦之戚族遂盤踞署內把持公事竟至并豬肉不准入城此爲新疆人所共知者其爲隱患關乎西北全局而何人肯舉以入告又如延年平日之詐索纍纍屢釀重案而新疆撫臣却爲之洗刷乾淨又有何人肯向朝廷一再陳之耶且英秀辦事用人向來膽小無如本城經費太少人員無多間有一二明白曉事之員均各有專差未便遠離如溥湧者已係捨短取長夫塔城經費歲餘三四萬兩科城經費歲止五萬餘兩若科城亦如塔城之有善後軍裝各費可以通融則人材何患不多津貼可以增給卽盡人皆可責以自愛凡此種種春滿夫豈不知此次電奏雖云因公然已迹近報復蓋其蓄怨已久適有不知輕重之侍衛委員授以口實遂乘機而發也若臣不顧公義亦任性使氣則塔既參科科復參塔互相攻訐伊胡底止爲臣子者不能爲國家分憂乃反挾其私忿紛瀆

宸聽臣雖愚亦不敢出此臣之瑣瑣上陳者非敢分辯實因深知延年居心險詐常與駐塔

俄員往來甚密其幸災樂禍一惟恐科城之無事者若以搖惑民戶之伎倆更煽俄員以與臣爲難則一己之身名原無足重特慮北路邊防從茲多事有礙大局阿爾泰山科布多皆巖疆鎖鑰自將齎桑淖爾界俄之後形勢日偏因應彌難竊幸三年以來臣密範堅持力謀抵拒雖於交涉舊案未能挽回但土地未失尺寸洋商相戒勿越未敢滋事不知費幾許苦心始克臻此此後若竟有奸邪居中播弄助其狡謀則

朝廷之倚臣以杜患安邊者轉將因安邊而啓患此臣所大懼也若將來邊患竟從臣而起則臣獲罪滋甚臣心益不安伏念借地不日收回阿爾泰山一帶山河要區防務喫重亟宜妥籌整頓臣嘗與英秀熟計再三尙擬奏請另

簡專員劃疆分理科布多參贊事權較輕循章即可爲治臣去留似屬無甚關係因思前此自効幸已蒙

恩交部議處惟有籲懇

俯鑒愚拙曲予矜全可否將臣

酌量撤回以息爭端而杜患萌大局幸甚臣幸甚臣受恩深重備荷

優容用敢不揣冒昧據實密陳伏祈

聖鑒不勝感激悚惶之至謹

奏 光緒二十九年九月初二日拜發

本年十月二十一日遞回奉

硃批該大臣既知杜患安邊爲重應卽彼此和衷商辦不得各懷成見意圖諉卸欽此 九月三十日

幫辦大臣馳抵承化寺後前往哈巴河片

再接幫辦大臣英秀函稱自起行後兼程前進於七月十七日馳抵阿爾台之承化寺暫駐塔城辦理交還事宜領隊大臣圖瓦強阿在哈巴河等候英秀已往該處屆時將交收事宜和衷商辦再爲詳陳等語臣忝膺邊寄不敢以傷病未痊少耽安逸收地安哈之事臣未能往辦深切疚心尤復蚤夜圖維未嘗愒置蓋地原烏梁海游牧現雖仍歸科布多哈族從此將復久居深慮該旗未必能容而哈衆猥多性復剽悍耕牧年遠安土重遷若迫令他徙必因操切而生事臣於閏五月間調集烏梁海散秩大臣總管等來城切實開導並宣示人隨地歸之

諭該蒙古等同聲感激謂當懷遠

昔才居多和名之
朝旨相安無事辭意極爲馴順臣查安插哈民以此爲最要關鍵蒙古旣無梗阻當可迎刃而解但看英秀辦理何如耳謹附片具陳伏祈

聖鑒謹

奏 光緒二十九年九月初二日拜發

本年十月二十一日遞回奉

硃批著遵前次電旨妥籌辦理欽此 九月三十日

運判徐鄂到營派委差使飭往英秀行營辦事片

再臣前調之鹽大使徐鄂現已馳抵科布多城該員才長識達志切匡時於內治外交講求有素當經派充洋務局總辦並新設籌邊處責成綜理一切事宜伏念阿爾台借地現正辦理交收山河要區亟宜妥籌布置今年逢閏邊城氣候和暖大雪尙未封山已令該員兼程前往英秀行營隨同辦事俾收指臂之助再據該員面稱已於光緒二十七年七月在順直賑捐案內由鹽大使加捐鹽運使司運判呈驗部照屬實理合附片具陳伏乞

聖鑒敕部查照謹

奏 光緒二十九年九月初二日拜發

本年十月二十一日遞回奉

硃批知道了欽此 九月三十日

遵 旨酌保換防差委武職各員弁防戍出力摺
奏爲遵

旨酌保換防差委武職各員弁戍防出力懇

恩照擬給獎以昭激勸分別繕單專摺具陳仰祈

聖鑒事竊臣前經附片具

奏請將防守出力之換防暨差委武職各員從優

奏保十數員以章勞勩而免向隅等因欽奉

硃批准其擇尤酌保毋許冒濫欽此仰見

聖恩寬大不薄邊功宣示闔營同聲感頌查科布多僻在極邊接近俄界庚子之變軍務猝興口外人心浮動將發難於俄商中外哈薩克又頗隱圖煽變情形岌岌彼時並無得力兵隊蒙軍復皆新集儻措置稍有不慎即釀釁端全局且將大震當經遴委換防參將世襲騎都尉祥祐督率隨營武弁會同蒙員帶領護城蒙兵分任防守彈壓地面緝拏盜賊保衛洋

商晝夜徼巡雨雪無間遇有竄匪立即捕獲懲辦不令滋蔓其派往各游牧偵探各台卡助防各員亦能堅忍自持於外人並無齟齬地方賴以敕平彼族未滋口實迄今已越三年中外輯和邊境安堵是該員弁等認真防護克保危疆綜厥勤勞實與軍功無少殊異洵屬異常出力自應遵

旨從優列保以昭激勸臣悉心察酌既未便仍照尋常覈辦亦不敢稍涉冒濫並查換防參將暨千總把總等員去年十二月已屆五年班滿列保之期平日屯防尙屬出力前經奏請併案覈保奉

旨允准茲並差委員弁分別勞績遵照兵部新定章程覈實擇尤擬保十數員敬繕清單祇呈

御覽合無仰懇

天恩俯念科布多地當極徼防守彌艱

准予照擬給獎出自

逾格鴻慈其在事出力應歸外獎之弁兵另由臣咨部覈辦並有應給頂戴者亦均酌賞功牌彙案咨部除飭取該員弁等履歷咨部外所有遵

旨酌保換防差委武職各員弁戍防出力分別請獎緣由謹繕單專摺具陳伏祈

皇太后

皇上聖鑒訓示再幫辦英秀現赴阿爾泰山未經列銜合併聲明謹

奏 光緒二十九年九月初二日拜發

本年十月二十一日遞回奉

硃批兵部議奏單併發欽此 九月三十日

謹將擬保換防差委武職各員弁銜名敬繕清單祇呈

御覽

謹開

直隸提標昌平營參將世襲騎都尉祥祐擬請在任以副將儘先補用並請

賞加總兵銜

該員在防已閱五年整頓屯務連歲收穫倍加管教兵丁差操無懈且庚子年督理邊防尤著勞勩實屬異常尤爲出力

宣化鎮懷來路岔道營永寧汛千總儘先卽補守備馬成英擬請俟補守備後以都司儘先

補用先換頂戴

五品頂戴宣化鎮多倫諾爾協中營千總傅鎮海擬請

賞換四品頂戴

五品頂戴宣化鎮張家口營膳房堡儘先千總把總趙金鼇擬請俟補千總後以守備儘先補用

六品頂戴宣化鎮標右營把總盧慶雲

六品頂戴宣化鎮標城守營把總張存德

五品頂戴宣化鎮標城守營雞鳴堡把總丁恩

六品頂戴宣化鎮張家口營洗馬林堡把總丁喜以上四員均擬請以千總儘先補用並請賞加守備銜

五品頂戴宣化鎮獨石口協君子堡新鎮樓口經制外委吳莖擬請以把總儘先補用

藍翎五品頂戴山西大同鎮裁缺河曲營儘先千總把總馬根義擬請

賞換四品頂戴

該員弁均係直隸山西五年班滿換防人員守護倉庫禁暴詰奸屯田衛商咸能奮勉均屬

實在出力

花翎五品頂戴儘先千總張順清

藍翎五品頂戴儘先把總陳炳魁

以上二員均擬請免補千把以守備補用並請

賞加都司銜

該二員帶隊分防不辭艱險安輯蒙哈保護商貨均屬異常出力

六品軍功宣化鎮標中營候補經制外委呂明義擬請免補千把以守備儘先補用並請

賞戴花翎

該員當邊防喫緊時因與俄人習熟派令聯絡洋商力任保護並馳赴蒙旗查辦團練緝獲哈匪多名辦理城防徼巡無間邊情賴以安定實屬異常尤爲出力

六品軍功呂效忠六品軍功翟廣俊均擬請免補把總以千總儘先補用並均請

賞戴藍翎

該二員派赴蒙古各旗查辦清野帶隊梭巡邊要緝獲哈匪多名並於保護洋商防守城池尤著勤勞均屬異常尤爲出力

五品頂戴宣化鎮標中營候補經制外委程兆雲擬請以把總即補並請

賞加守備銜

五品頂戴宣化鎮張家口營儘先經制外委張發擬請以把總儘先補用

六品頂戴宣化鎮標左營候補經制外委張印擬請以把總遇缺即補並請

賞換五品頂戴

六品頂戴大同鎮標右營儘先即補經制外委邢掄元擬請以把總補用並請

賞換五品頂戴

五品軍功陳作忠擬請以把總補用

該員等分防要隘偵探軍情駐守台卡經年之久備嘗艱苦程兆雲當軍務喫緊之際派赴

陝西

行在呈遞奏摺不避險阻異常出力

以上均三品委員弁

查前准行奏定嚴覈保獎章程內開凡各項異常勞績並未建功者如係實在尤爲出力者一案內准保免補儘先者不得過一二人准保免補者不得過三四人准保儘先者

不得過六七人准保翎支者不得過三人等語茲所擬請各員弁免補儘先及翎支均未有逾限制合併聲明

綠營換防官兵到防日期暨回營官兵照案由台行走摺

奏爲具報綠營換防官兵先後到防日期暨回營官兵照案由台站行走以示體恤恭摺仰祈

聖鑒事竊科布多綠營換防一案前准直隸總督袁世凱咨開奏派遊擊榮厚一員並由宣化鎮揀派千總唐義王錫三把總張天錫庫正邦馮得昌丁慶丁禎經制外委王廷喜管帶馬步兵丁五十一名派赴科布多換防等因茲於本年六月中旬該官兵陸續到營臣正在假內輕幫辦英秀於六月二十六日親赴教場點驗即於七月初一日分派屯田及各衙門當差其應行換回之官兵除參將祥祐千總傅鎮海把總張存德盧慶雲等四員暨馬步兵八名均尚有差遣應俟事竣飭回並先經咨回之兵五名外現計應遣回千總馬成英把總趙金鼇丁喜經制外委吳埜四員飭令管帶馬步兵三十八名分起啓程援照成案仍由台站行走以示體恤至在差官兵月支鹽菜銀糧爲數無多擬俟住差之日再行停支又據游擊榮厚呈稱把總丁慶因病懇請回營把總丁恩仍請留防當差各情另片

奏明辦理理合恭摺具陳伏祈

皇太后

皇上聖鑒再幫辦秀英現赴阿爾泰山未經列銜合併聲明謹

奏 光緒二十九年九月初二日拜發

本年十月二十一日遞回奉

硃批該部知道欽此 九月三十日

防兵互相對調片

再據換防屯田遊擊榮厚呈稱新到換防把總丁慶不服水土患病恐致誤差應遣回營把
總丁恩請與對調留防當差懇祈察覈等情由軍營兵部印務處呈請覈辦前來臣當經飭
查所請覈與光緒十二年十一月新到外委庫成邦因病回營與應換回營之外委姚富對
調一案情事相同似可照准除由臣照會宣化鎮總兵查照辦理外理合附片具陳伏祈

聖鑒謹

奏 光緒二十九年九月初二日拜發

本年十月二十一日遞回奉

硃批該部知道欽此 九月三十日

額外驍騎校文普再留三年片

再科布多戍守滿員原設額外驍騎校二缺向由軍營揀補三年期滿茲查補驍騎校後以防禦即補先換頂戴額外驍騎校文普自光緒二十六年四月二十三日奉

旨補缺之日起扣至本年四月二十三日已屆期滿臣覆查該員通曉滿蒙當差勤苦現在

昌吉斯台代辦卡倫侍衛事務尙無貽誤合無籲懇

天恩准將額外驍騎校文普再行留駐三年除分咨外理合附片具陳伏乞

聖鑒訓示謹

奏 光緒二十九年九月初二日拜發

本年十月二十一日遞回奉

硃批著照所請兵部知道欽此 九月三十日

請動倉糧放賑片

再臣前因科布多城附近窮苦蒙民老弱廢疾無所存恤不能自食曾於光緒二十七年十

恩准於每屆冬令提用倉糧小麥大麥各五十石按人散放先期具奏奉

旨俞允欽遵辦理在案查去年原奏查明窮苦蒙古人等二百四十餘名口迨至散放之時各旗及烏城蒙民聞風而集竟及四百餘人當由臣添購大小麥百餘石以補不足本年五月間久雨傷稼八月中又連次狂風麥穗強半吹落現查窮民已較上年爲多將來遠道就食更必不少應請循照舊章動支倉糧小麥大麥各五十石交磨房碾磨俟十月初一日起至十二月底止仍每月分作六次以米麪按人放給俾霑實惠而廣皇仁並再由臣捐資採買隨同散放理合附片陳明伏祈

聖鑒謹

奏 光緒二十九年九月初二日拜發

本年十月二十一日遞回奉

硃批知道了欽此 九月三十日

電陳阿勒台收安現定從緩摺

新疆巡撫轉北京外務部鈞鑒幫辦英秀辦理阿勒台山借地交收一案並未違

旨僅執一二儘可商量之末節輒行定議從緩另籌辦法未知已否由電奏明瑞洵事後始據咨知無從商阻憂憤萬狀查英秀向不以收地爲然曾有將阿勒台山借地不如割歸塔城樂得無事之語全未計及烏梁海萬餘戶口夫此膏腴不能帖服科哈無此曠土難以安插於阿勒台山邊防扼要更未籌及人隨地歸尤不以爲然於迭奉

諭旨竟不料其不顧也守土安民皆邊吏分內應辦之事並非瑞洵好大喜功況上而歷次諭旨下而將軍督撫奏覆豈盡一無是處有何窒碍長庚去冬親查亦極覈實乃英秀膠執成見陽託慎重實則欲藉推展以陰圖翻案在英秀恐收地之後便事繁責重考成隨之不知大臣謀邊亦當統顧全局若明知禍患必概推於鄰境似亦非公忠之道反不如塔城此次尙知

朝旨爲重也科城蒙哈望恩待撫有同望歲今仍將化爲烏有能無携貳現在烏蒙科哈漸已譁然惶駭咸抱不平瑞洵恐邊患不在塔城而將先起科境也查科城原因無閑地安哈是以索還借地今仍以冬牧之地認籌雖云回科籌商已同默許又英秀接圖瓦強阿文稱請人地兩收明春雪消再各遷徙英秀即覆咨商將哈民暫從緩交先行交還借地是明將人地分辨圖瓦強阿駁以既不收哈亦不便還地英秀即以惟有將借地哈民均從緩議另

籌辦法咨覆且於

諭旨人隨地歸上加雖字商請交地文用可否交還借地語氣抑揚可見意指瑞洵前派參將祥祐赴新收哈時閱年餘始招徠十分之九約四千餘人漸次押至南台一帶以待安輯曾先咨英秀督催哈官往接乃據南台委員稟稱哈官未到若不速收回牧仍必譁散不特瑞洵與潘效蘇枉費年餘經營且恐羣哈聞風解體大碍邊局蓋因委員溥湧前在卡倫滋鬧歸哈均致驚疑若再激成哈變邊界毘連亦難不竄入彼境外人有詞更難收拾此等重咎瑞洵不能當也伏查阿勒台山係烏梁海自有游牧不能不索此項哈衆又係早年科城舊撫不能不安人隨地歸乃長庚等所議疊奉

諭旨飭遵並非全係瑞洵之私見地哈兩事即有須稍通融總難出此範圍無論何人前來恐未必別有辦法英秀欽奉妥慎籌辦至爲切要之

旨極應與圖瓦強阿磋商詳議有應變通亦當據實由塔電奏請

旨何得擅專乃抵哈巴河纔半月與圖瓦強阿晤面次數無多行文三次僅空文相持於緊要關鍵轉未開誠布公以實情彼此商有歸宿率以均從緩議另籌辦法暫結圖瓦強阿遂即回塔英秀聞亦起程如此草率實出意外況此案膠葛多年至今始有成議似未便據英

秀一人之見復翻定案失信啓爭自應請

旨定奪瑞洵病雖未痊傷已見好刻因地事復緩蒙古缺望哈衆聳動邊情岌岌不容無人前往收籠附循祇好俟英秀回城後瑞洵仍即力疾前往確查實在情形務得究竟並遵前旨將哈薩克認真彈壓俟得確情即詳奏現在北道已爲雪阻須由札哈沁南台設法繞道寒天病體不敢顧惜至收安已緩至明年應派何人辦理仍請
欽定瑞洵不敢擅便謹請

代奏候

旨科布多瑞 九月二十二日咨新疆代 奏

十月十九日奉到十月初八日電

旨瑞洵電奏具悉著該大臣即行前往彈壓拊循查明確情詳晰具奏所有明年接收事宜仍著瑞洵經理並會商春滿等妥爲籌辦務於守土安邊均有裨益欽此

阿勒台收安議緩謹陳可疑可慮情形摺

奏爲幫辦英秀辦理收安現已議定從緩另籌辦法敬陳可疑可慮情形恭摺馳

奏仰祈

聖鑒事竊幫辦英秀辦理收安擅定從緩各情業於本年九月二十三日飛咨新疆代爲電奏詞句甚多然意猶有未盡且臣疑慮交繁亦有不能再詳陳者臣查閱英秀鈔來文件其塔城領隊圖瓦強阿初咨議將總管巴依巴克副總管加開兩屬哈衆歸於河南隸塔城將哈薩克公徵斯罕率台吉札雅爾札達克總管邁敦鄂斯班額敦爾台等所屬歸河北隸科城無論冬夏均不准再越界限惟值此秋深邊地早寒哈民等已歸冬窩自難令其遷移俟明年春暖該哈薩克頭目等再行各將所屬人衆互相遷徙以示體恤英秀隨據該哈公徵斯罕等稟稱歸科之哈非在河南賽里山過冬牲畜不能牧養歸塔之哈非在阿勒台山一帶過夏牲畜不能存留稟請英秀轉商英秀即據呈咨行有不敢冒爲接收之語圖瓦強阿復以哈薩克公台吉總管大小頭目人等均在此間守候當此正移冬窩未便令其廢業失時仍咨請英秀遵照兩次

諭旨先將人地兩收俟明年春暖雪消後再爲籌地安插英秀覆駁以仍難接收請先將交哈一節暫從緩議應俟明年籌定冬季牧畜地方再爲接收圖瓦強阿遂以既不收哈亦不便還地咨覆於是英秀始願從定議此英秀等往返咨文及哈呈所稱大略情形也惟英秀亟致臣謂由承化寺前往哈巴河時沿途密詢即經查悉潛住借地之塔哈僅於四五六七

月間在阿勒台山一帶住牧是爲夏窩迨由八月以至次年三月除在額爾齊斯河南北兩岸過冬外其餘均行移入塔境賽里山一帶地方過冬各項牲畜皆在該處牧放是爲冬窩年年如是及到哈巴河訪詢所言皆同是英秀於塔哈情形知之不爲不詳籌之卽不當不盡商之更不可不力勢必須逐一辨論不憚筆舌必無憾而後即安而函中轉謂若必逐一辨論徒煩文牘以應與圖瓦強阿反復辨論者竟以告知臣爲了事此臣之未解一也臣夏間未往阿勒台山之先屢與英秀議及上年所奉

硃批著將哈薩克清查酌度情形妥籌安插務令各得其所以順輿情而重邊要之

旨至爲明允卽應欽遵辦理其中節目或有應變通之處儘可彼此商量歸於至當惟潛住之塔哈不能令其紛紛遷徙祇當擇其不安者措之而使之安至於如何立法約束自應酌宜安定能行章程乃英秀習聞此說並不將不能遷之所以然與圖瓦強阿熟商且來文仍以一遷卽變爲言此臣之未解二也查科布多難籌塔哈冬牧之地英秀與圖瓦強阿文一再申明然一咨之內旣云現在科屬各處亦無妥地安插該哈住牧過冬繼又云應俟明年籌有該哈牧畜地方夫旣云該哈冬牧科屬所無何以又自認籌豈一到明年便可籌定乎此臣之未解三也塔哈不收英秀旣託詞冬牧之地須籌矣此猶可謂鄰疆之子民不必攘

歸於我也阿勒台山哈巴河借地爲烏梁海游牧不當汲汲商定收回以安藩屬乎此臣之未解四也英秀來文謂塔哈自擬歸科後人心惶惶總未相安此與臣平日所聞所知情形大異然英秀正宜詰其不願歸科之故詳加開導告以旣住科境即應歸科布多管轄若不歸科便應離科百餘年久佔之阿勒台山果能捨去耶如此明白曉諭彼亦自可釋然而英秀竟不及此英秀來函又謂該哈每年在阿勒台山不過四箇月餘仍移於塔境不知英秀將令悉數遷回塔境耶抑任其不歸地方官管轄耶此臣之未解五也英秀來函謂圖瓦強阿咨文強詞奪理不足與較實則臣查閱圖瓦強阿兩次咨商之文咸稱遵

旨先將人地兩交俟明年春融再互遷徙情理尙順不過互遷辦法尙欠斟酌又與塔哈呈詞不無殊異耳此何不執哈呈與來文所稱不符之處與圖瓦強阿詳悉計議且英秀覆文於

諭旨則以爲窒碍難行於哈呈反云係屬實情何其視煌煌

天語不足當哈夷頭人之一呈此臣之未解六也夫交地與哈者塔城也收地與哈者科城也塔哈若有不便應向塔城圖瓦強阿控訴懇求乃不之圖瓦強阿而之英秀此臣之未解七也哈夷忿驚梗頑行盜侵毆直如恒業收之難可制伏似以不收便顧烏梁海之地將因

議割科布多之哈益以滋不安羣知奉有定期交收之

旨而英秀獨議展緩適足以疑種族促爭端慮其遠而忽其近此臣之未解八也大員出差隨員弁兵輿馬僕從勢不能少台站供應烏拉視爲苦累今英秀往辦收安即使一時難決正可多需時日以期辨有歸宿夫一次辨結與兩番往來其勞費爲何如乃空行空返反以將來再行接辦爲示體恤此臣之未解九也而臣猶有說者則以索還借地始自清安沙克都林扎布魁福繼之及已奉

諭旨復准展限三年交還屆期春滿尙圖反汗迨臣復申前請經長庚等覆查會奏始定人地歸隨

朝廷俯採羣言折衷一是迭

飭和商妥辦臣下宜如何懷遵況此案膠葛多年至今始經查明荷蒙

欽定實亦不便再翻乃英秀未能仰體倡改緩收適償塔城之初願不與臣同心轉似爲塔城助臂此臣之未解十也查哈族人衆性悍易難邊疆臣非不知之然溯自嚮化以來從未爲患同治年間西域猖匪作亂該哈非但未嘗附逆並且幫助軍需是其心尙知有

天朝直可謂之急公好義世篤忠貞若概視爲異類深閉固拒萬一鋌而走險爲害尤烈蓋

塔哈不收則借地難歸借地不歸則烏梁海悉索之餘又失膏沃靡以起彫弊錯處之哈終無安插且將致繹騷緩則患釀腹心急則變生肘腋儻再闖入俄界猝有不虞更難收拾此地與哈不容不收且萬不容緩收者也且英秀口銜

天詔宜如何殫心竭慮剴切籌商期底成績即曠日彌久亦自無妨總須有實在辦法一日即爲百年之計假如確有窒碍不能通融上而

朝廷既當請

旨下而僚佐亦可諮諏英秀乃皆不出此以奉

旨迅即交收始竟以從緩辦理終達之

九重必增

聖慮傳之諸部必撼人心英秀小心持重蕃夷情數具所夙知孰意其輕率專輒之至於斯也臣細繹英秀咨函不過爲科無冬牧地以容塔哈必須仍准過賽里山歸塔之哈亦須仍准過阿勒台山照舊牧放初非大有爲難竟不能互相商榷查上年長庚等覆奏原有應如何安插約束由各該大臣自行妥爲經理之語蓋統籌安插本非一二空文便能蔽事此等大致尤非從容擘畫詳細推求不能周妥也臣伏思西路北路莫非

皇朝疆土歸科歸塔皆是

國家子民似難畛域過分限其不通來往據理而爭圖瓦強阿諛亦不能固執至應如何約束稽查自應另具科條亦不得漫無限制要不離乎重邊要順輿情期於兩有裨益惟究竟如何情形容臣到彼查實具奏但事原重大萬不敢挾一己之見遽謂鐵案如山況臣係原奏索地安哈之人更不能不格外虛心集思廣益可否再請

另派大員會辦此事並應否將英秀傳

旨申飭令其毋庸預聞以免掣動全局出自

聖裁所有幫辦英秀辦理收安已議從緩另籌辦法敬陳可疑可慮情形各緣由謹恭摺馳奏伏乞

皇太后

皇上聖鑒

訓示不勝惶恐待

命之至謹

奏 光緒二十九年十月初五日拜發

本年十一月二十六日遞回奉

硃批著仍遵前旨會商春滿等妥籌辦理務於守土安邊均有裨益欽此 十一月初三日

散木居奏稿卷之十九

門人鈴木吉武校字

散木居奏稿卷之二十

幹難 端洵

微管集 光緒癸卯

前議練兵畜牧事宜擬請停辦毋庸再行撥款摺

阿勒台設官分治仍應稍假財力片

筆帖式當差得力擬請酌獎摺

仍照舊放折以符成例片

調補筆帖式各員缺摺

委員溥湧被參詐索已得梗概應由幫辦奏辦片

把總領餉玩誤請 敕部斥革片

謝 恩准抵銷處分摺

收地暫緩附報到科日期摺

收地暫緩撫哈不便並停摺

先赴南台鄂倫布拉克撫綏歸哈片

無從籌撥冬牧摺

前議練兵畜牧事宜擬請停辦毋庸再行撥款摺

奏爲經費難籌科布多前議練兵畜牧事宜擬請停辦期省財力而體時艱恭摺仰祈

聖鑒事竊臣前於光緒二十八年二月間遵

旨覆陳應辦事宜嗣復奏估經費約數請以三年爲期歲撥二十四萬兩擬辦練兵墾田畜牧收地四事皆奉戶部議奏照准聲明俟各省屯田價稅籌有的款再爲分撥開辦等因臣當時復經片奏以籌邊各事臣才望不足取信應請

另簡大員督辦臣隨同經理欽奉

批旨著勉力籌辦毋庸推諉欽此臣愧以弱才猥蒙

委任敢不勉殫駑鈍少效涓埃故於索地開屯兩事萬不能不辦者奮迅圖成不遺餘力第查現在

國用浩穰度支不繼大農旣窮點金之術疆吏彌懷竭澤之憂值此時艱自無餘帑可供邊費即以練兵而論蒙兵向不可恃哈薩克生性梗頑不宜再教戰鬪旗卒復難遠調若由內地招募漢勇望礮較多易滋後患且軍火器械概屬闕如將裨尤不易求實苦無從舉辦畜

牧一事又非得精於此道者不行此事既恃人力尤賴天時一遭瘟災即紛紛倒斃經理不得法亦難冀其蕃滋蒙古雖仗游牧爲生然皆懶惰漫不加意是規立孳廠亦有難言者矣況臣本無幹略近年病未脫體氣力實不從心若復強任不辭竭蹶從事必致上負

聖明下乖衆望臣近接戶部來文深知籌款不易夫使部臣獨任其難而臣竟不爲之諒臣亦不忍出此也且借地總須收回阿勒台額爾齊斯山河要區防務自宜偏重科布多便爲後路但能安靜不擾即可無事移步換形未可仍拘前議所有練兵畜牧事宜熟慮再三似以不輕舉爲便可否停辦並經費亦毋庸再撥期省財力而體時艱相應請旨祇遵抑懇

敕部臣覈議之處伏候

上裁臣愚昧之見是否有當謹恭摺具陳伏祈

皇太后

皇上聖鑒訓示謹

奏 光緒二十九年十月初五日拜發

本年十一月二十六日遞回奉

硃批戶部知道欽此 十一月初三日

阿勒台設官分治仍應稍假財力片

再名山大川國家之寶阿勒台額爾齊斯借地迭奉

寄諭飭令定期交收妥爲經運茲雖小有阻滯終須遵

旨收還侵疆既歸亟宜就近設官及時圖治彼處田牧肥美種落錯居兼有魚鹽林木之饒南控赫色勒巴斯淖爾即布倫托海東達新疆瑪納斯又瑪呢圖噶圖勒幹昌吉斯台各卡倫均在左右輔車相依且據俄齋桑斯科之上游險固形便實爲漠北襟要拊巡填守尤貴得人未便仍由科布多參贊遙領致有鞭長不及之慮長庚前與臣函商原有擬遷幫辦於額爾齊斯之議科布多治所本不當衝已成後路無須多置官長惟幫辦仍須秉承參贊似不如將參贊移節駐劄更爲相宜第事權尙宜加重方足以資統率而備非常布倫托海地屬中權並宜增設一官督辦兵屯俾脈絡貫通聯爲一氣至應如何布置尙容逐細察勘規畫全局詳悉具

奏巖疆鎖鑰經營締造需欸必繁臣正摺所稱停辦練兵孳廠毋庸再撥經費係專指科布多而言若阿勒台邊防喫重似不能不稍假財力臣謬竊虛聲未諳遠略久爲病困難可支

持實係不能辦事將來自應請

旨另簡練習邊情文武兼資之大員前來詳籌妥辦應需經費即由彼覈實估請臣萬不堪膺此重任區區愚歎不得不預爲陳明理合附片具奏伏祈

聖鑒訓示謹

奏 光緒二十九年十月初五日拜發

本年十一月二十六日遞回奉

硃批知道了欽此 十一月初三日

筆帖式當差得力擬請酌獎摺

奏爲筆帖式當差得力擬請酌獎恭摺仰祈

聖鑒事竊查北路軍營章京筆帖式各員遇有人去得當差得力者向由臣等隨時

奏請鼓勵現當整飭之際懲惰獎勤尤爲先務茲查有俟年滿回綏遠城後改武照例以防禦補用補方樂後以佐領即補先換頂戴科布多暫署軍營兵部幫辦章京筆帖式清林謹飭安詳才堪造就辦事亦甚得力自應量予加獎臣擬請將該員開去筆帖式以章京候補

昔才月考和卷二
現已派充洋務局委員應令暫照防禦例支給鹽菜銀糧如此則該員既當益加感奮力圖報效即圖營文武各員亦必共知勸勉似於戍防公事不無裨益該員所遺筆帖式之缺另行揀補所有筆帖式當差得力擬請酌獎緣由理合恭摺具陳伏祈
皇太后

皇上聖鑒訓示再幫辦英秀現赴阿爾泰山未經列銜合併聲明謹

奏 光緒二十九年十月初五日拜發

本年十一月二十六日遞回奉

硃批著照所請該衙門知道欽此 十一月初三日

仍照舊放折以符成例片

再科布多所管台站屯田駐班官學明阿特額魯特兩部落各項蒙古官兵等每年應領糧折銀兩向由常年經費項下按半開放前因庚子之變山西協餉停解邊費支絀經臣奏請暫放本色並聲明一俟經費照常撥解再當察酌情形

奏明辦理奉

旨允准欽遵辦理在案時及兩年蒙情亦尚允洽惟查現在常年經費山西省已照常協解

本年屯田又因夏間久雨傷稼繼以風災秋收不免減色臣悉心體察應請自光緒三十年春季仍照舊放折以符成例理合附片具陳伏祈

聖鑒謹

奏 光緒二十九年十月初五日拜發

本年十一月二十六日遞回奉

硃批知道了欽此十一月初三日

調補筆帖式各員缺摺

奏爲調補筆帖式各員缺以資辦公恭摺仰祈

聖鑒事竊查科布多糧餉處筆帖式景善前經

奏請充補主事職銜蒙古處幫辦章京業奉

批旨允准其所遺糧餉處筆帖式一缺查得四品頂戴即補驍騎校蒙古處筆帖式吉林樸訥廉謹惟才欠開展辦理蒙古事務稍覺竭蹶該員原在糧餉處當差應請以之調補糧餉處筆帖式以期人地相宜所遺蒙古處筆帖式一缺查有候補筆帖式興文材幹明強堪以擬補又印務處筆帖式清林另摺奏請開去筆帖式以章京候補所遺印務處筆帖式一缺

查有候補筆帖式景貴年富才明堪以擬補又前因事多人少不敷差委曾經

奏准添設官缺茲值整頓之際此項添缺歲支鹽菜銀糧計筆帖式每員七十二兩加增銀四十八兩糧九石七升二合爲數甚微近來事益紛繁體察情形尙難遽行裁撤仍應揀員充補以裨公務查有候補筆帖式依罕明敏勤能堪以擬補印務處添設筆帖式之缺又查有儘先補用驍騎校候補筆帖式金奇暹通曉繙譯堪以擬補蒙古處添設筆帖式之缺以上五員應俟五年期滿如願就武回綏遠城後均俟補驍騎校後以防禦補用先換頂戴伏候

命下照章遇有差便給咨送部引

見至該員等所遺候補筆帖式之缺另行揀員咨部辦理所有調補筆帖式各員缺以資辦公緣由理合恭摺具陳伏祈

皇太后

皇上聖鑒訓示再幫辦英秀現赴阿爾泰山未經列銜合併聲明謹

奏 光緒二十九年十月初五日拜發

本年十一月二十六日遞回奉

硃批著照所請該衙門知道欽此 十一月初三日

委員溥湧被參詐索已得梗概應由幫辦奏辦片

再委員溥湧被參詐索一案臣前已遵

旨奏參查辦現在有由瑪呢圖噶圖勒幹卡倫來人臣皆詳加詰問已得梗概並隨時密咨英秀復加查訪以備參酌該委員與侍衛英紱此次滋鬧竟至驚動新疆歸哈不敢回牧有礙安撫情節似屬匪輕臣愚謂屬員被參內省常有口外則向少舉發將來擬結不但不應迴護並且難再敷衍蓋能嚴懲一二人卽可以儆尤效服人心第恐查覆需時臣不能久待自當由英秀

奏辦謹附片陳明伏祈

聖鑒謹

奏 光緒二十九年十月初五日拜發

本年十一月二十六日遞回奉

硃批知道了欽此 十一月初三日

把總領餉玩誤請 敕部斥革片

再科布多換防六品頂戴直隸宣化鎮右營把總盧慶雲上年十一月委令前往山西催提餉項今年正月復札飭就便提領科城本年前一半經費閱時已久杳無消息前准山西來文知此項經費已於六月二十二日由省解到歸綏道衙門存儲待領乃迄今未見該弁報解起程正深詫異又接烏里雅蘇台咨稱現經綏遠城將軍咨催領解竟不知該弁何往刻下已屆冬初而上半年經費尙未解到庫儲單竭待帑尤亟該弁止圖一己之安逸罔顧萬衆之飢寒殊爲可惡查直晉換防弁兵巧踰疲壞積習太深臣到任後甘爲怨府時加懲創無如絕不悛改視爲故常自經臣病後無人更爲管束不免益形懈弛似此弁髦法令玩誤軍需若不嚴參何以儆衆相應請

旨將六品頂戴直隸宣化鎮右營把總盧慶雲

敕部將頂戴弁缺均行斥革並不准再來北路軍營以昭明罰至經費銀兩另行派員催解除咨兵部查照外理合附片具陳伏祈

聖鑒訓示謹

奏 光緒二十九年十月初五日拜發

本年十一月二十六日遞回奉

硃批著照所請該部知道欽此 十一月初三日

謝 恩准抵銷處分摺

奏爲叩謝

天恩仰祈

聖鑒事竊臣前因往辦收安墜馬折回自効請罪奉

硃批瑞洵著交部議處欽此現准兵部咨議以罰俸六箇月具奏奉

旨准其抵銷欽此恭錄咨行欽遵到城臣當即恭設香案望

闕叩頭謝

恩伏念臣宣力無聞責躬多疚茲復以應得處分

許以抵銷如此

寬恩何能報稱臣惟有益懍靖共不忘思省將現辦事宜和衷籌商悉心經理不敢稍存諉卸再蹈愆尤冀仰答

高厚生成於萬一理合繕摺叩謝

天恩伏祈

皇太后

皇上聖鑒謹

奏 光緒二十九年十一月初六日拜發

本年十二月二十九日遞回奉

硃批知道了欽此 十二月初五日

收地暫緩附報到科日期摺

奏爲隨地歸科哈民冬牧無地同商辦法暫緩接收附報到科日期繕摺馳陳仰祈

聖鑒事竊臣前往阿勒台辦理接收已於七月初六日一面具

奏一面攜帶關防啓程前已

奏明在案嗣於七月十七日馳抵阿勒台山承化寺駐紮靜候塔城派員前來以便接收辦理旋准塔爾巴哈台派來交割借地領隊大臣圖瓦強阿咨擬在哈巴河地方會辦臣即於八月初九日由承化寺啓程十六日馳抵哈巴河當與該領隊大臣晤商交收借地哈民各辦法於本月二十四日接准領隊大臣來咨擬將哈薩克總管巴依巴克副總管加開兩屬哈衆歸額爾齊斯河南隸塔在賽里山那拉哈拉山等處住牧過冬過夏將哈薩克公徵斯

罕台吉札雅爾札達克總管邁牧鄂斯班額牧爾台等所屬歸額爾齊斯河北隸科在阿勒台山額爾齊斯沿河一帶住牧過冬過夏此後無論過冬過夏均不准再越界限等語臣正擬覈辦間卽據哈薩克公台吉總管等稟稱歸科之哈非在河南賽里山過冬牲畜不能牧養歸塔之哈非在阿勒台山一帶過夏牲畜亦不能牧養卽世代墳墓俱在阿勒台山陽賽里山北若如領隊大臣所定辦法勢所難行祈請轉行辦理等情查所稟各節情形急迫因卽據情咨商該領隊大臣務須欽遵

諭旨和衷會商悉心經理以順哈情而裨邊局去後旋准該領隊大臣覆咨現在該哈衆正當移歸冬牧之序實未便令其廢業失時仍請人地兩收俟明年春暖雪消後再爲籌地安插庶使哈衆回牧以免廢業失時等語臣卽將該哈薩克公台吉總管等傳集明白曉諭勿滋惶恐仍各安心住牧明春始行遷徙該哈衆仍紛紛呈訴哈薩克等無論歸科歸塔同是朝廷子民但無賽里山地方天暖草好住牧過冬必將牲畜倒盡何以謀生縱今冬不遷明冬仍是無地住牧臣復用好言勸慰暫令散去聽候辦理因復與該領隊大臣咨商哈衆既有爲難應請先將借地遵

旨交還應俟明年籌有該哈冬牧之地再將哈衆收回疊經面商迄無成議九月初一日准

該領隊大臣咨收哈一節既請從緩借地亦可暫從緩交俟明春籌有該哈冬牧之地再行兩爲交收庶昭慎重籌商至再總難兩全因經擬定借地哈民暫緩交收各先回城妥籌辦法據實覆

奏請

旨遵行該領隊大臣已卽於九月初二日啓程回塔臣正擬啓程間於是月初四日接准塔爾巴哈台參贊大臣春滿八月初七日由塔城咨到公文內開光緒二十九年八月初六日承准伊犁將軍馬亮電開准軍機處電稱伊犁將軍飛遞科布多幫辦大臣並轉電塔爾巴哈台參贊大臣奉

旨瑞洵前往阿勒台山辦理接收事宜中途墜馬傷重折回現經英秀往辦一摺昨據春滿電奏各情已諭令瑞洵迅即馳往妥爲辦理現在英秀旣已啓程卽著該幫辦大臣將收地安哈事宜妥慎籌辦至爲切要委員溥湧一案並著查明據實具奏毋稍徇飾欽此跪讀之下不勝悚惶伏思該領隊大臣圖瓦強阿業已啓程回塔追之已屬不及即使追回仍無辦法且塔爾巴哈台管理借地三十餘年深知阿勒台山冬季雪大人畜不能棲止該哈薩克等無賽里山草廠住牧過冬牲畜不能存活故以遷移後彼此不准越界爲詞致使不能卽

時接收體察哈情若無賽里山過冬牧畜萬不能行臣復將借地周歷僅有額爾齊斯河北岸並哈巴河博勒錦河奇林河等處住人尙恐不敷實無餘地可以牧畜再四籌思阿勒台山借地既無該哈衆過冬牧地自應設法通融辦理臣愚見此項哈民隸科隸塔同係朝廷赤子阿勒台山賽里山皆是

皇上疆土自未可顯分畛域擬與春滿和衷咨商明年交收借地後其歸科之哈仍在賽里山等處照常住牧過冬其歸塔之哈仍在阿勒台山一帶照常住牧過夏彼此毋庸遷移以順哈情而免滋釁臣回城後與瑞洵會商意見相同容俟臣等與春滿商有成議再行奏明請

旨至辦理接收借地一帶疊奉

諭旨人隨地歸

飭令和衷會商悉心經理茲又

飭令妥慎籌辦至爲切要臣曷敢操切從事實因該哈薩克公台吉總管等既無賽里山過冬牲畜不能存活臣自不敢絕其生機迫之外向又值移歸冬牧之際若持之日久恐該哈衆生疑彼處接近俄界儻被人煽惑更恐別生枝節兼以圖瓦強阿屢以現正該哈衆移歸

昔才片奏和光緒二十一年
冬窩之序未便令其廢業失時爲言所稱亦係實情臣默念摺報往復至速亦須兩月有餘
時已隆冬哈衆久候實恐妨其生計是以未敢拘牽未曾請

旨遽定暫緩接收實爲惶恐且事無端倪虛勞往返負咎殊深臣已於九月十六日由哈巴
河啓程十月十五日到科任事除委員溥湧一案臣謹當欽遵

諭旨認真查明另摺據實

奏明外所有隨地歸科哈民冬牧無地同商辦法暫緩接收附報到科日期各緣由理合繕
摺

奏陳是否有當伏祈

皇太后

皇上聖鑒訓示不勝惶恐待

命之至謹

奏 光緒二十九年十一月初六日拜發

本年十二月二十九日遞回奉

硃批知道了欽此 十二月初五日

收地暫緩撫哈不便並停摺

奏爲收地暫緩科哈撫恤不便並停現已派員分往覈實察辦並擬由臣瑞洵前往督率藉資拊循恭摺仰祈

聖鑒事竊科布多舊撫之哈薩克因無準地住牧定章約束以致四出紛竄潛入新疆腹地前經臣瑞洵奏委屯防參將祥祐帶領筆帖式兵丁及哈薩克通事等前往各該處查收並由新疆撫臣潘效蘇派員會辦本年五月間據該參將等報稱已收有四千餘名口陸續押至札哈沁鄂倫布拉克台一帶地方因該哈衆竄入新疆後屢遭災歉牲畜倒斃垂盡流離困苦不堪言狀請飭哈官備帶氈房駝馬前往接收經由臣英秀督催該哈目總管等遵照辦理祇因科哈多貧牲畜氈房未能剋期集事現在收回之哈復將潰散若不亟以撫恤爲收籠一朝譁變必至大擾邊疆殊爲可慮臣等伏查此項收回哈衆與接收借地原屬兩事自未便概行停緩況安哈經費止銀五萬兩現除歸糧餉處墊銀三千兩臣英秀往辦收安隨帶員弁盤費蒙兵月餉犒賞及添僱烏拉駝馬等用銀四千餘兩又購買賞件等項約一千餘兩共已用去銀八千餘兩茲查將來隨地應歸塔哈尙能自贍但不加以需索便可無庸議撫即此四萬餘兩以振科哈之窮乏者已難徧及悉心商酌惟有先儘歸哈極困者按

昔乃片多希外「八二一」
照臣瑞洵去年預籌布置摺內所陳每二人牛一隻每一人羊五隻甄茶二塊章程給發其
不敷銀兩容臣等設法挪墊不敢再另請欸刻經派員分投清查戶口察看情形並採運牛
羊甄茶臣英秀現已回城臣瑞洵即擬日內前往督率辦理並催令該哈目總管等各率歸
牧俟明年借地收回後再爲定地安插藉示拊循如此寓彈壓於羈縻又得臣瑞洵親往似
較委員更爲得力所有收地暫緩科哈撫恤不便並停現已派員分往覈實察辦並擬由臣
瑞洵前往督率藉資拊循各緣由理合恭摺具
奏伏祈

皇太后

皇上聖鑒訓示再據參將祥祐等稟稱古城西北山內尙有逃哈二百餘戶多有槍械時出
搶掠狂悖異常前聞地方文武曾擬請兵驅逐經新疆撫臣駁斥然非得大員前往彈壓仍
恐不能懾服其心懔然歸牧臣瑞洵擬先至鄂倫布拉克暫駐督辦其古城一帶潛哈如果
必須親往察辦亦應前赴該處督同委員認真招收並一律給予茶畜宣布
恩意俾期柔附總以審察機宜妥辦爲主不敢執定合併預陳謹

奏 光緒二十九年十一月初六日拜發

本年十二月二十九日遞回奉

硃批知道了欽此 十二月初五日

先赴南台鄂倫布拉克撫綏歸哈片

再臣瑞洵於光緒二十九年十月十九日奉到新疆轉遞十月初八日外務部密電奉

旨瑞洵電奏具悉著該大臣即行前往彈壓拊循查明確情詳晰具奏所有明年接收事宜仍著瑞洵經理並會商春滿等妥爲籌辦等因欽此臣仰維

聖意重在彈壓拊循臣自應就有哈之處前往辦理臣正摺所陳擬將新疆歸哈撫恤由臣馳往札哈沁南台鄂倫布拉克一帶督辦即因該哈現均在該處等候接收也臣此行不能不帶文武隨員以資差遣需用烏拉駝馬較多台站艱於支應現已飭傳並加僱覓期速就道惟刻已節逾冬至時方盛寒蒙古多入山過冬調集不易且臣與英秀尙有會商要件一俟商有就緒台站備齊即行啓程先赴南台鄂倫布拉克一帶暫駐切實察辦至明年接收事宜自應由臣妥爲經理謹附片陳明伏祈

聖鑒謹

奏 光緒二十九年十一月初六日拜發

本年十二月二十九日遞回奉

硃批知道了欽此 十二月初五日

無從籌撥冬牧摺

奏爲隨地歸哈冬牧地方科布多無從撥給繕摺覆陳仰祈

聖鑒事竊於光緒二十九年十月十九日准伊犁將軍馬亮咨開光緒二十九年九月二十五日承准軍機處電開伊犁將軍轉科布多大臣奉

旨春滿電奏悉著暫緩交割仍著瑞洵等詳細妥籌如何撥給該哈薩克過冬牧地再行會商春滿奏明辦理欽此臣等伏查科布多所統蒙部東北則爲杜爾伯特十六旗明阿特一旗北則爲額魯特一旗南則爲札哈沁二旗西南則爲新霍碩特一旗新土爾扈特二旗西北阿勒台山前後則爲烏梁海七旗除霍碩特札哈沁額魯特明阿特游牧瘠苦不計外其杜爾伯特新土爾扈特各旗所屬游牧本旗居住已形擁擠實無餘地可以旁及近年杜爾伯特新土爾扈特各旗常以哈衆闖入呈請驅逐蓋以哈薩克性多强悍往往搶奪牲畜霸佔草場羣皆目爲盜賊不願與之錯居兼亦由地窄人稠不能相安也昨歲潛入新疆之哈正以科屬無地可容故四出竄逸且杜爾伯特游牧接畛喀爾喀札薩克圖汗部落若爲弭

患安邊久遠之謀尤不宜於容納現查烏梁海之允其雜處者亦實出於萬不得已惟是烏梁海游牧自同治八年光緒九年兩次與俄勘界捐棄膏腴十之大半以致牧地偏隘日益困窮刻計新疆逃哈漸已陸續收回攬住各旗哈衆亦均待地安插其阿拉克別克地方居住哈民前奉外務部函商仍令遷移現均遵照辦理合之科屬舊管各鄂拓克哈衆其名口約在四萬以內全須分別夏牧冬牧擇地安插別旗蒙古旣不能容自卡更強令同牧致啓爭端仍須安插烏梁海境內現計哈衆名數轉比烏梁海蒙古多至二萬有餘地面日蹙丁口日繁殊有人滿之慮故臣瑞洵屢有索還阿勒台山借地之

奏目今安插科哈尙且籌辦維艱實無從更籌塔哈牧地若使有地可以自籌早將科哈妥爲安置自無事汲汲索地上瀆

宸聰臣等伏念安邊之道不擾爲先旣據哈薩克公台吉總管等呈稱該哈衆等向在額爾齊斯河南賽里山等處過冬額爾齊斯河北阿勒台山一帶過夏自可准其照常住牧似無須以分隸科塔限其不通往來況塔城領隊圖瓦強阿覆咨亦有賽里山本屬窮山戈壁並非肥美惟較他處稍暖故人畜皆樂棲止之語則塔城之視賽里山亦在無關緊要之數如能彼此安定互相約束稽查章程切實奉行即可杜膠葛而安主客臣等悉心斟酌此項哈

衆既經跨牧有年若遽使其分別部居不相雜厠殊覺行之惟艱詳細妥籌與其互遷而在勞權力何若仍舊而無拂輿情臣等愚昧之見如將此節許以通融似尙無大窒礙容臣等與春滿和衷咨商俟有成議再行

奏明請

旨辦理所有隨地歸哈冬牧地方科布多無從撥給緣由理合繕摺覆陳伏祈

皇太后

皇上聖鑒訓示謹

奏 光緒二十九年十一月初六日拜發

本年十二月二十九日遞回奉

硃批仍著與春滿妥籌辦理欽此 十二月初五日

散木居奏稿卷之二十

門人鈴木吉武校字

散木居奏稿卷之二十一

幹難 瑞洵

彌節集 光緒癸卯

布倫托海渠屯各工告藏請將用款開單報銷摺

布屯秋收擬提一成撥給烏梁海預用片

前往南台督辦撫哈具報啓程日期片

奏調知縣隨辦收安片

阿拉克別克河口交界擬請 派員會勘摺

電陳籌議阿勒台接收事宜請 旨切諭春滿速議勿延摺

布倫托海渠屯各工告藏請將用款開單報銷摺

奏爲具報布倫托海渠屯各工早經告藏暨農田約收分數似有成效請將用款開單報銷

恭摺仰祈

聖鑒事竊布倫托海開渠布屯辦理情形疊經

奏明在案臣瑞洵前經奏候派選州同崔象侯馳往烏梁海部落布倫托海安設總局調集

兵工辦理一切令其先修渠道祇以邊地早寒去年未及完工今年三月初四日復行接修四月十一日大渠支渠一律告蒧先經臣札飭一面工作一面乘時播種現已據報秋收均在八分以上等情臣瑞洵以工程必須驗收墾務尤當查看爰屬臣英秀由哈巴河回城之便繞赴屯所詳細察勘查得工程甚屬覈實蒙兵尤爲出力今年開屯本屬趕辦惟以遭灾稍覺減色然尚可稱中稔茲將辦理詳細情形敬陳如左西北田畝多資山水渠流潤沃水利之修農耕爲亟邊荒之域灌溉尤先故必就濱河之區始能墾種布倫托海即赫色勒巴斯淖爾前元名爲乞則里巴失海子凡阿勒台山東南烏龍古河布爾干河青吉斯河諸水皆匯於此淖爾東西廣七十里南北袤三十里田所在淖爾之東北地高河下必須設法挽水使之上激又須束水使之分流是非堅築堰壩多穿支渠不可惟是河流湍悍徧地荆榛從前李雲麟所修渠堰衝決淹沒遺址無存雖不乏可墾之地而實尠易墾之地加以河寬溜急中流深逾二丈底係流沙施工不易直是無從措手該員以疊經臣嚴札知事關欽奉不得不勉爲其難隨由古城一再招雇當年曾修堰壩之工匠四十名又幸有熟悉工作之蒙古昆都巴圖瓦齊爾與阿比二人督催教導當率同烏梁海蒙兵及哈薩克等相度地理分任承修於阿布達爾烏梁蘇及相隔三十里之普爾罕埃勒克地方各開大渠修築龍口

安滾水壩攔水壩各一道以資畜洩又各濬分渠四道以便股引復多疏畎澮使之脈絡流通得以隨時消長渠工之要首在堰壩必築堰障水開壩進水而渠流始暢其築壩之法因無內地之條石係用柳條葦索捲成大梢底襯氈絮中實沙土石子以木椿密排堅釘並用粗木做成三尖式木架以護壩根用梢之多寡視河之淺深溜之緩急爲度有用至十餘層七八層不等者務期水土融結經久便可堅固去歲夏秋河流盛漲儘先伐運木料就兩岸偪入河心迎溜處層層排釘壩椿迨交冬令河冰凝合仍在上游督率兵工編捆大梢高及丈餘長則百數十丈一一堆列以備冰化沉底水勢較淺則在上工作者稍易計雖近拙尙稱得力今年三月中河冰渙釋卽選熟諳水性者百數十人借水力以推梢兩旁緊拴巨纆使兩岸兵工一齊拉繫俾梢不致爲水衝走送至壩椿逐層偪壓到底一面仍急用木椿釘固兩旁挨次運料填築並又築埽鑲護大致多用長庚修築伊犁特古斯塔柳渠工辦法計自上年三月二十二日開工至九月初二日停工又自今年三月初四日接修迨四月十一日完工凡七閱月大小各渠次第告成放水入田足供屯用並經夏秋盛漲堰壩一律平穩但使歲修無缺似可持久無虞此築渠工作情形也至農田種植隨處不同氣候有寒燠之殊土性有宜忌之別原未可鹵莽從事亦非盡人皆能蒙古向以游牧爲生罕諳耕種而北

路漢民絕少工匠尤稀科布多屯防兵丁各有專差未宜遠役於是至古城瑪納斯一帶訪覓農工計口授食其費倍蓰乃爲權宜之計僅酌量雇到十名使之督同蒙兵工作隨時指點種植各法並督令蒙兵將地中草根石子芟除淨盡其農具則購自古城牛馬則買諸蒙部籽種則由城運往米麪煙茶廩羊則視價值之廉否隨處採辦並擇兩渠適中之地建立局所各屯分築農舍以及建倉廩以免露積安磨房以供碾磨購牲畜以利轉運設台站以通文報練民勇以資防護煩費百端一時並舉而尤以兵餉工資爲大宗應接不暇右絀左支此開屯布置情形也至工作艱難實有非內地可相提並論者緣地不產石取木在二三百里以外採取駄運厥費尤多止就築壩一項計之用大木已六千餘根其餘柳條草垛土方則盡由蒙兵就近置辦繩索氈塊則分向各蒙部價買且有購自新疆者竭蹶經營實屬不遺餘力此次修工蒙古官兵最爲奮勇塞外早見霜雪又在冰上水中工作苦異常祁寒無怨兵丁中溼氣者多至三十餘人其餘官兵亦無不手足皸瘃苦難言喻良以農工緊要立待灌輸若少遲延即妨田稼故不得不同力合作以期無誤農期此又工費艱鉅情形也統計闢地約三萬畝令以豐年爲瑞四字分爲四屯共發小麥五百石青稞一百二十石稻米八十石於五月初旬一律試種完畢厥田上中土脈尙好兼以荒廢已久一經開墾良

苗勃興纔及月餘桿高二尺遲者亦及尺餘一本十莖八九結穗方共相慶豐收不期六月中旬連經暴雨莖間禾際驟見黃埃沾著如塵土人呼爲黃丹謂由地氣鬱蒸所致農田經此稿可立待幸是月下旬連得好風熱氣稍疏黃丹漸落得有轉機然經此之後麥已受傷青稞稻米更屬無望現在刈穫已畢除青稞稻子外計收小麥四千一百二十石零六斗四升已在八分以上例應獎賞且覈與戶部則例內載科布多屯田十分歲額四千餘石無殊卽稽諸舊案雍正二年振武將軍傅爾丹疏報科布多烏闌古木處屯田穫麥四千一百七十石有奇亦復相埒是地之有利已見明徵屯之可興非無成效該員弁等年餘從事誠亦不無微勞惟本年原係試種尙未擬定考成應請俟明年秋收後再行酌予保獎其蒙古官兵倍極辛苦尙須常資其力已由臣將昆都兩員覈給三品頂翎各兵分賞五六品頂戴功牌至屯倉現已蓋成四廠計二十間磨房蓋成十二間並按四屯各蓋農舍三間局所蓋成二十四間統計渠屯倉磨局舍各工共用實銀三萬九千八百五十六兩零現在秋收已畢應卽截止造銷惟地處邊荒百物昂貴工料求諸遠方輓運難於行省且事期急就犒賞旣不能不優招雇匠夫工值尤未便過減故所支用有比定例加多者亦有比定例大省者以採買牛馬農器均非照市價無從辦理而運腳一項則變通借駝卻又節省五千餘兩但求

昔フ月ヲ考テ名ニハニ一
務歸實際即不能牽合成規若必一一悉準部章轉失廬山眞面惟有仰懇

天恩俯准免造細冊當由臣等飭令該局總辦與籌邊支發處委員詳晰覈算開具簡明清單分咨戶兵工三部查照覈銷惟發軔伊始用度不貲嗣後常年決算自當損之又損必期有實效無虛糜乃爲長冊現已飭將工匠大加裁減護勇遣撤四十名所收糧石儲倉並准搭放兵糈用節財力容再悉心精覈參訂章程另行具

奏抑臣等更有言者天下大利在農籌邊上策曰墾阿勒台地屬巖疆田多沃衍果能本此意以廣興樹藝徧立兵屯事以漸而易行費以省而可久二十年後當可化荒漠爲膏腴變門戶爲堂奧此則遠大之效固未可遽責諸目前而懈弛之萌所宜預防於今日者也所有具報布倫托海渠屯各工早經告蒧暨農田約收分數並請將用欸開單報銷各緣由謹恭摺馳陳伏祈

皇太后

皇上聖鑒訓示施行謹

奏 光緒二十九年十一月十二日拜發

光緒三十年正月初九日遞回奉

硃批著照所請該部知道欽此 十二月十五日

布屯秋收擬提一成撥給烏梁海預用片

再蒙古游牧最怕官辦開墾以不便於己且擾累也此次布倫托海築渠開田烏梁海不但並未攔阻該官兵於工作尤甚出力實屬急公可嘉查該部落生計日窘今又於其地屯種自未便獨專其利擬每年秋收之後覈計分數應提一成撥給該蒙古分領食用以推上恩而濟蕃艱是否可行伏祈

聖鑒訓示謹

奏 光緒二十九年十一月十二日拜發

光緒三十年正月初九日遞回奉

硃批著照所請欽此 十二月十五日

前往南台督辦撫哈具報啓程日期片

再臣瑞洵擬前往鄂倫布拉克暫駐撫恤歸哈藉資彈壓台站備齊卽行啓程等情當於十一月初六日附片

奏明在案旋據管理南台札蘭昆都來城訴稱現在沿途堅冰積雪山嶺崎嶇平路亦土凍

石滑人馬不能插足絕少行蹤玉音齊台之那林溝二百餘里全是大小石塊艱險尤甚且天寒日短烏拉駝馬均畏冷不能速行台路遠則二百餘里近亦百數十里安台處所均須曲折遶避更形迂遠每台道里不啻加倍殊多不便懇請緩俟春暖等語臣亦知所稟自屬實情而事爲邊局所關詎容畏難苟安重煩

聖慮況新疆歸哈驚疑未定深恐復行潰散不但更增勞費且將大致驛騷一再躊躇仍不能不迅赴事機設法前往現於拜發報匣後攜帶行營關防即日啓程已將參贊大臣印鑰移文幫辦英秀暫行護理惟臣前因墜馬兩骹受傷此際一經觸寒卽異常疼痛不能騎馬南路尙可乘車只好隨帶蒙古包相時進止恐未能按站行走若遇狂風大雪且須住宿以期稍示體恤何時能到實難預定約計振撫事竣當在明年二月間矣至阿勒台接收一事當與春滿和衷咨商如能彼此均許通融則收地之期似亦不遠所有臣啓程日期理合附片陳明伏祈

聖鑒謹

奏 光緒二十九年十一月十二日拜發

光緒三十年正月初九日遞回奉

硃批知道了欽此 十二月十五日

奏調知縣隨辦收安片

再明年阿勒台辦理接收及清查安插事端繁要在在需人差委北路軍營辦事司員筆帖式向由綏遠城戍防滿兵積資洊陞但通曉滿蒙文字語言即爲上選又狃於積習以因循敷衍爲衣鉢遇事多不能了惟若由內地調員多因道遠天寒視爲畏途函商往復動經年月而其人願來與否尙未可必實屬緩不濟急自可於就近鄰省中擇妥實人員調用茲查有同知銜甘肅新疆候補知縣王服昱老練精明性情忼爽久莅西陲曩爲左宗棠劉錦棠金順諸臣所任使上年十一月經伊犁將軍馬亮等委勘界務前來科布多謁見正值隆冬盛寒六十之年騎馬奔馳不憚風雪其能耐勞苦已可概見且於阿勒台情形具所夙知又由該省往來亦便可否請

旨准由臣瑞洵咨行新疆巡撫轉飭該員暫來科布多隨同辦理收安俾資指臂之助似於邊事有所裨益仍俟事竣酌量再令回省理合附片

奏請伏祈

聖鑒訓示謹

奏 光緒二十九年十一月十二日拜發

光緒三十年正月初九日遞回奉

硃批著照所請欽此 十二月十五日

阿拉克別克河口交界擬請派員會勘摺

奏爲阿拉克別克河口交界前經臣與俄官商擬會勘現在俄人竟在該處蓋房丈地自立鄂博並擬築城經已力爭詰阻議允暫停候查請

敕外務部照會俄使催辦勘界並懇

簡派大員前來與俄官定期會辦以重疆索而折狡謀繕摺密陳仰祈

聖鑒事竊阿拉克別克河克色勒烏雍克地方俄人要索太甚殊難因應等情經臣於光緒二十八年四月初四日密摺馳奏欽奉

硃批著外務部妥爲商辦欽此嗣承准王大臣來函仍屬臣由外辦理臣當即遵照上年六月十六日旋據該國駐庫倫匡索勒官施什瑪勒福前來科布多城與臣會辦商界各案直至七月底始回其於阿拉克別克克色勒烏雍克地方千方詐賴斷斷相爭臣抱定主見竭力抵拒既引證圖約以爲之據復講論情理以暢其詞辨說百端唇焦舌敝彼意總以爲但

經臣一言即同成事且云邊界小事儘可通融無須拘泥臣告以職守所在何能擅許況此界圖約燦然原應無庸再議但既屢啓爭端兩國邦交方睦亦無不可商量特一面之詞均難據爲定論幸有界牌鄂博可以爲準自非彼此從新查勘無從證誤不爲持平計會晤十餘次往復辨駁數千言該匡索勒始猶支吾繼以臣執意甚堅方勉從議定應由兩國各派大員訂期齊往該河口地方確切履勘查明實在情形從新劃定以爲一勞永逸之計該匡索勒又商將在彼原住之哈薩克先令遷徙臣以既擬各請派員重勘應俟查勘之後自有辦法且若先令哈衆遷移須由匡索勒具文擔保遷出之後該地方不致有人因而佔踞即可允許飭即徙往他處該匡索勒見臣不肯遷就遂仍就各派大員重勘之議訂定各報外部請

旨辦理臣當即據咨外務部覈示不料波瀾復起俄使又以卡官應撤向外務部迫促不已臣迭接王大臣來電斟酌再三此等小節難盡拒絕然究不願授柄於彼適該卡侍衛常陞染患目疾具稟告假借此撤差意謂可以已矣詎知彼更投文外部謂臣暗助卡兵護哈打俄爲不遵俄國訓條彼當用兵力保護已權臣接王大臣密函謂相持過久恐釀事端如將此項哈薩克移置相離較遠地方亦未始非息事安人之道一面照催匡索勒派員會勘以

清界限等因臣以遷哈防變勘地息爭原可相提並論隨即派員將該處附近住牧之哈薩克四百九十餘戶悉數遷至畢里子克河東岸該處離阿拉克別克河已及七十餘里之遙並密致外務部以所擬會勘界務科布多屬員中無人能了應仍照該臣索勒原議兩國各請

簡派大員定期會辦庶免相形見絀且明年適屆會查牌博之期若得大員前來更昭慎重惟該臣索勒近月於科布多照會每置不答應請就近照會俄使方能得力各等情函商外務部道途遼遠尙未奉有復示乃臣於八月底接據署瑪呢圖噶圖勒幹卡倫侍衛英絃稟報七月初一日聞得阿拉克別克河上游有俄員在我界內自立鄂博丈量地址勢將大興土木侍衛隨即往查見有新豎四方房基一間尙未上頂有氈房二頂內住俄屬哈薩克名俊麻拉拜詢稱俄官派當此差事完仍即移回俄官八員本日已往阿拉克別克卡倫侍衛即馳抵該處詰問又值俄官均已潛逸詢據駐卡俄兵言齊赴杜瓦城別無他語侍衛隨向洋稅局索取路照跟踵而往及抵該城又俱未見候至次日聞姜達朗已於夜間回署因即投刺通謁該姜達朗乃賢得各言稱阿拉克別克河以東至洋稅局東小河名爲阿拉克別克河去年所燒房間地址即現築房基處係歸俄國界內業已接見洋文派洋員前來查收

此地要修城五座第一阿拉克別克河卡倫處第二即燒燬房基第三阿拉克呼巴噶卡倫處第四噶資勒什卡倫處第五薩斯卡倫處待衛忖度若仍據理詰問彼亦絕不聽從惟有飛稟請示辦法等情前來臣即派明幹員弁馳往查問與之辨論大費氣力現幸辦到今年阿拉克別克河地方兩國所屬哈薩克均不准居住過冬各報大員請明年前赴阿拉克別克河查明地界互換條約俄人刻下已將工作暫停此阿拉克別克界務擬定另勘辦法現在俄人狡展力籌抵制之情形也臣伏查各國通例分界爲常守不渝之約阿拉克別克河口交界光緒九年經分界大臣額爾慶額與俄國分界大員彼此勘定議立專約會建牌博定期每屆三年會查一次條議分明原應循守勿替乃當光緒二十一年會勘牌博之際俄員狡焉思啓發端圖賴自是每屆會查之年必議論繁滋各不相讓以至於今延宕既久枝節叢生茲竟丈量地址自立鄂博擬築城垣一味恃強霸佔愈出愈奇漸逼漸緊揣其貪地無厭之心勢不使西北方域不盡折入於俄不止若仍專恃辨阻則彼方實行其政策我乃空爭以口舌竊恐雖以蘇張才辯亦慮無能爲役該處爲額爾齊斯河北門戶若竟爲所割據則彼氣勢益厚我之邊界及阿勒台各地皆必岌岌不安關繫綦重故臣默籌熟慮以爲欲杜俄人狡謀只有重勘一議尙屬穩著上年與該匡索勒竭力磋磨費盡心力始將互相

重勘之議商定儻得明白曉事大員臨境履勘和平商權辦理得宜當不至大受虧損蓋派員勘定則出入利害在我猶有操縱之權在彼亦難大肆矯強之術縱不敢望將早年失地全行收回似尙可以清積歲之葛藤杜方來之侵佔若再不妥籌辦法恐俄且視爲已得利益又以邊吏之言爲不足信竟行布置至彼時再議補苴譬如障川流而挽旣逝之波探虎口而索已投之食事之難就無待於言且前接外務部來函亦有一面照催之語是亦並無異議特是斯事體大關係中外大局自須

簡派大員方不乖夫原議亦有裨於巖疆若由臣派員則科布多現在不惟諳悉交涉講求邊務有心計口才者難得其人即於俄國語言文字及測繪輿圖等事亦無一解者羣策羣力均實乏才斷不敢輕加委用致誤機宜臣旣在差次又在病中近來又添心疾自揣精力亦萬不能勝任惟有據實

奏明請

旨敕下外務部照會俄使催辦勘界並請

簡派忠正明強大員隨帶熟習洋務及精通繙譯測繪之員迅速前來俾與俄官定期會辦以重疆索而折狡謀如當事者尙以此舉爲可緩則請

敕外務部諸臣再加覈議另籌萬全辦法尤爲感幸臣以邊界鉅要洋人貪急不圖了結後患方長謹就愚昧之見繕摺密陳是否有當伏乞

皇太后

皇上聖鑒訓示施行謹

奏 光緒二十九年十二月二十七日拜發

光緒三十年二月十六日遞回奉

硃批外務部迅速查覈辦理欽此 正月二十二日

電陳籌議阿勒台接收事宜請 旨切諭春滿速議勿延摺

外務部洪密阿勒台事去冬奉電

旨明年接收事宜仍著瑞洵經理並會商春滿等妥爲籌辦遵將擬議情形具奏並詳悉咨商春滿事非更張能否通融不難卽決乃自上年仲冬行文迄今尙未見復若仍藉展交收又不知何年不僅蒙哈惶惑無以慰安外人耽視邊界情尤可慮查阿勒台山在科西阿拉克別克卡倫又在山西聲氣隔閡形勢孤懸上年俄竟來度地蓋房狡謀不已實由我鞭長莫及卡倫侍衛不能鎮攝所致地再緩收仍同甌脫邊事勢必日棘長庚奏擬設官實爲安

邊久計現遵

寄諭會議准潘效蘇咨阿勒台與俄連界甘肅伊犁相距過遠塔城新省亦非切近自應由科主辦設官治理不宜延宕此案閱十七年之久經長庚親往履勘始定還科今建置若不速商定仍恐久無成議等語誠爲明切事機瑞洵愚謂事關大局共應仰體時艱泯成見重邊要況已議畫疆分治是爲烏部收舊牧非爲科城索借地無所用其爭執若復有意搪塞其力亦止能制科終難禦俄鷸蚌相持恐爲漁人之利瑞洵因此憂病日深實難久待應請旨切諭春滿速議定局交割勿再推延至爲切要瑞洵係特派辦理接收不敢徇情亦不敢固執總期急就藏事庶

朝廷得早簡大員整理俾定衆志而杜窺伺邊事幸甚謹請代奏瑞洵鄂倫布拉克辰采光緒三十年四月初六日在鄂倫布拉克台接到古城電局交奇台縣加封飛遞南台行次科布多參贊大臣瑞洵奉

旨瑞洵電奏悉接收事宜著春滿會同瑞洵即行定議妥爲辦理外務部養印

散木居奏稿卷之二十一

門人鈴木吉武校字

散木居奏稿卷之二十二

幹難 瑞洵

西征集 光緒甲辰三月起六月訖

遵 旨加意布置懇 敕部撥給庫欸摺

安哈經費不敷派員分向商家挪借茶畜應急尙須竭力籌措片

現收哈數及願歸塔哈隸科暫收片

哈目總管頂翎懇 准照舊戴用片

奉 旨賞假叩謝 天恩並力疾辦事就近前赴古城摺

懇將崧華仍留任所片

請將糧餉章京榮泰仍歸班先引 見片

山西布政使吳廷斌力願時艱請 賞軍功加二級片

電陳行抵古城日期並督辦哈事各情摺

電陳呈進馬匹求 恩准予展限摺

招收逃哈分押歸牧不久當可告竣摺

附陳收哈索地情形並懇 恩續假片

電陳現擬派員先將人地兩收切望 迅簡大員督辦摺

電陳借地現經索還應請均歸錫恆管理所有派員接收應作罷論摺

具奏卡倫增兵現尙得力未便遽撤摺

借地允還不必由科接收應俟錫恆到彼即行管理片

差委人員材堪器使現據事竣銷差可否送部引 見候 旨錄用摺

違 旨加意布置懇 敕部撥給庫款摺

奏爲俄情叵測邊備宜嚴遵

旨加意布置情形緊要辦理竭蹶懇

敕戶部速籌接濟撥給庫款俾重邊要而免疏虞繕摺馳陳仰祈

聖鑒事竊臣於光緒三十年正月十六日接奉

諭旨現在日俄兩國失和非與中國開衅京外各處地方均應照常安堵本日業經明降諭旨按照局外中立之例辦理所有各省及沿邊各地方著該將軍督撫等加意嚴防慎固封守凡有通商口岸及各國人民財產教堂一體認真保護隨時防範等因欽此並先後准外

務部密電以西北一帶處處毘連俄界俄人往來境內蒙漢錯雜恐滋事端應嚴密防維隨時稽查彈壓務令照常相安勿稍生事總期邊界靖謐毋使外人乘機藉口致生他變是爲切要又各省及沿邊內外蒙古均按照局外中立例辦理兩國兵隊勿少侵越儻闖入疆內中國自當攔阻各等因臣於未經奉

旨之先查閱中外報章知日俄相持甚急勢將交綏盱衡時局控揣鄰交實已默籌防範及恭奉

諭旨臣已在行次隨經飛咨幫辦英秀轉飭蒙古各旗盟長札薩克散秩大臣總管及哈薩克頭目總管等各飭所屬凡遇外人前來無論經商游歷務須照常相待加意保護毋稍滋事並嚴札各卡倫侍衛督率卡兵密事巡邏勿得稍露張皇轉駭衆聽以冀稍紓朝廷北顧之憂勉副部臣綏邊至計顧無米之炊巧婦所難空拳徒張志士興慨現有迫不及待請業已舉辦及必須舉辦應請

敕下部臣迅籌的款接濟者擇其要端敬爲

皇太后

皇上觀縷陳之科布多轄境自昌吉斯台至瑪呢圖噶圖勒幹八卡倫及兼管烏里雅蘇台

昔才片考年一六二二
之索果克罕達蓋圖等十六卡倫統計與俄接壤不下三千餘里沿邊苦寒蒙部相率內徙每卡倫守兵多不過四十名少止十名此外絕野人踪轉視彼界則隨在屯防設備整嚴疏密相形大相懸絕況彼在我各游牧內收販駝絨羊毛以營生者踵趾相錯其於我之虛實久已瞭若指掌至纖至悉藩籬薄弱易啓戎心儻有數十騎託故涉境我即無方阻禁凡此情形

聖慈明燭萬里無待喋陳惟強鄰偏處邊境縣延彼則窺伺已深我實鞭長莫及徹桑之計何可再涉緩圖不得已將科布多所管八卡倫每各添派蒙兵馬隊一百五十名扼要填紮密加巡防以杜侵軼明知械敝兵單難當大敵要未便視若無睹不備不虞然約計月需員弁兵丁薪公口分軍火氈房等項每月已需銀五千餘兩此不得不勞部巨力籌接濟者也阿勒台山額爾齊斯河凡山之陰面水之下游悉爲俄境其地土脈衍沃水草豐饒材木魚鹽甲於西北諸部久爲彼族所歆羨現在貿易往來業已走成熟路河內時有小輪游弋前年俄人在克色勒烏雍克地方潛來燒房割草派隊駐紮上年復來度地建房並擬築城雖經行文派員詰阻暫允停工待勘究其大欲有加無已彼國之齋桑斯克距阿勒台之哈巴河僅百數十里其斜米省距齋桑亦止七日程形勢岌岌萬不容再有袖視現正促辦交收

且議設官分治刻已咨商會奏山河襟帶自宜羅設大防徐圖整理然當接收以後未經設官以前何可不謀暫時防守之策儻仍稍存得過且過之心互相推諉必有如長庚所言恐一置之度外後將補救無及者現擬酌委文武人員權令暫駐該處管理蒙哈及營務交涉事宜此次卽由新疆招練壯勇二百名遴員管帶擇要屯紮少張聲勢以待後圖庶不致留此大窾大卻致生覬覦計採購馬匹槍枝藥彈約需銀一萬八千餘兩其營務文案營哨各員弁薪水辦公經費勇丁口糧製辦氈房操衣韉袴等項每月約需銀二千餘兩此更不得不勞部巨力籌接濟者也以上兩端一爲現今阻截設謀一爲將來布置張本要皆盡我修備之實以禦外侮不爲敷衍不尙鋪張本屬邊方應辦之事即日俄未嘗開釁亦應及早舉行今則時異事殊稍縱即逝更不能再事稽緩說者謂北路邊防相安已久或無意外之虞不知自同治八年分界將阿勒台山西北數千里地劃入俄界光緒九年重訂阿拉克別克界約則浸淫又及山南矣現方薦食未已烏可以乾隆嘉慶軍威正盛時相提並論或又謂此次戰務中國方自居局外中立若遽添兵防卡似涉張皇恐貽外人口實不知中國得設兵防堵本國疆界不得視爲失和此條久經宣示況此次日俄交戰歐洲各國尙且整軍經武以備非常而我壤地與之相連且素爲彼所注意者詎可轉忘戒備查伊犁塔爾巴哈台

昔才居多利之二十一
均歲撥鉅款悉力經營而科布多形勝實爲新疆鎖鑰本不宜視同甌脫第常年經費止五萬餘兩毫無餘蓄閑款可以騰挪往者內省撥解偶延輒須向市商通融告貸臣到任適逢庚子辦防復經借墊商款迄今尙欠銀四萬九千餘兩無力籌還近因開辦屯田收撫哈衆又疊向挪借銀兩茶畜科布多城商鋪無多一再籌借已同悉索該商等雖尙曉急公然每以成本有限難資周轉爲言自係實情此後不但無法再借並須設法歸還方足以昭大信而示體恤臣忝竊邊符愧無績效連年抱病心力已虧極應早干罷斥以免貽誤茲復蒙恩賞假實荷

逾格優容然疆場之事曠息萬變一日當爲百年之計何敢偷安視息冀省事而墮狡謀惟兵械餉糈不能應手雖有智者亦將坐以待困況臣才力淺短百不如人此所以激切征營不得不呼

天請

命也查防卡蒙兵應俟時局大定卽當遣撤所支口分等項須按一年覈算阿勒台暫防經費則應先以一年計但止權顧一隅尙容通籌詳擬會摺陳奏凡此皆一定機宜刻不容緩之需科布多財殫力竭迴與鄰省他城不同實已無從籌措伏求

聖慈俯念邊鎖重要

敕下部臣統籌接濟無論如何爲難即行撥給庫欸十萬兩電知臣派員星馳赴領速解濟急邊局幸甚臣幸甚臣志切憂時非並不知惜費顧念方域綦廣蕃扞太疏我不預防彼將乘隙實不能不稍爲規畫聊固吾圉當與英秀往返函商意見相同謹將俄情叵測邊備宜嚴遵

旨加意布置情形緊要辦理竭蹶懇

敕戶部速籌接濟撥給庫欸俾重邊要而免疏虞各緣由繕摺馳陳是否有當伏祈皇太后

皇上聖鑒訓示敕部施行謹

奏 光緒三十年三月二十一日拜發

本年五月二十二日遞回奉

硃批另有旨欽此 四月二十四日

安哈經費不敷派員分向商家挪借茶畜應急尙須竭力籌措片

再安哈經費前經部撥銀五萬兩內歸墊及支付各欸已用銀八千餘兩臣前擬即將所餘

昔才居考希先「二二二」
銀四萬餘兩先儘歸哈之極困者給予撫恤不敷銀兩由臣等設法挪墊不再請部撥款等情均經奏明奉

旨知道了欽此現經查明歸哈人數計科布多屬二千九百六十名口又塔屬願歸科布多者二千零六十四名口實已共收回五千餘名口皆以蕩析離居幾成流冗業飭普加振贍其續由新疆收回之哈約猶有二千餘人困苦相同並當一體施惠以廣

皇仁而昭公溥然統覈採買茶畜價值已需銀九萬餘兩所短仍鉅而英秀暨臣兩番往返及官弁兵丁盤費蒙哈賞件支銀已近萬兩實不得已復派員分向本城及古城商家挪借甄茶牛羊以應急需此外尚須竭力籌措臣深知帑藏支絀何敢稍任糜費第事機所迫欲罷未能但以此次振濟哈衆實惠均霑則羈縻勿絕其隱裨於邊疆者卽已匪細固不宜吝此區區致妨大局也除咨部查照外伏祈

聖鑒訓示謹

奏 光緒三十年三月二十一日拜發

本年五月二十二日遞回奉

硃批戶部知道欽此 四月二十四日

現收哈數及願歸塔哈隸科暫收片

再科布多竄往新疆之哈薩克自光緒二十八年八月經臣奏派換防參將祥祐帶領員弁往收並飭先赴新疆省城稟商撫臣聽候調遣時值饒應祺卸事在即因循月餘迄無就緒逮潘效蘇履任後始妥議辦法令該委員等會同該省文武印委先就新疆東北一帶查辦並於迪化縣之蔣家灣阜康縣之高貨郎廟孚遠縣之三台及大坑沿奇台縣之北道橋木壘河大石頭三箇泉鎮西廳之臥雲磯花兒茨等地方分設卡座以杜遠越因哈衆隨畜薦居山僻徑歧往往此招彼逸該委員等分投勸導惕之以威歆之以利先將迪化東山暨奇台孚遠阜康鎮西廳各境內潛住之哈衆頭目十三名加意拊循帶至省城經潘效蘇當堂發落分飭各歸各屬並將哈目等暫行拘留責令將該管哈衆速遷歸牧奈竄新之哈已極貧乏遷延觀望未肯即回復經該委員等酌量周恤帶同哈目仍四出搜尋日事督催及聞軍親往鄂倫布拉克督辦振撫始幡然來歸現計收回科布多所屬已逾十之七八此外有塔城哈衆二千六十四名口因世居阿勒台堅稱願回舊地歸科布多管轄潘效蘇以該地已奉

旨還科自應人隨地歸面飭委員等先行收回以順輿情疊據該委員等呈報辦理情形該

頭目等旋亦齊來臣行營謁見臣分別賞給頂翎令權隸於科布多哈部內暫時同牧責令各哈目總管等協同約束毋滋紛擾仍諭俟借地收回再爲分部定地安插哈衆尙皆悅服差堪仰慰

宸廑謹附片具

奏 光緒三十年三月二十一日拜發

本年五月二十二日遞回奉

硃批知道了欽此 四月二十四日

哈目總管頂翎懇准照舊戴用片

再莫羅霍哈拉哈斯車流布齊章達蓋盧等四鄂拓克哈薩克自光緒八年歸隸科布多時即經前任大臣清安額爾慶額飭令珠旺幹博特木齊蘇喀爾拜莫鸞達克等四員名戴用三品頂戴花翎分充總管各管所部又派章嘎爾爲頭目總理各鄂拓克游牧事務戴二品頂戴花翎凡此情形科布多年久司員類能言之臣詳悉檢查實無奏請案據詢之章京等均云未曾奏過現在該哈官等亦俱知底蘊深憾各大臣翫視欺給踉蹌不安臣竊念此事已閱多年由於前任大臣之疎漏與私自擅用者有別若此際遽行撤銷旣太操切而刻值

辦理安撫方資鈴束更不能不稍示羈縻惟

朝廷名器非臣下所得擅專自應據實

奏明仰懇

天恩賞准照舊戴用又查伊犁現辦哈部章程阿哈拉克齊係用三品頂戴花翎並無總管名目亦無頭目二品者茲事屬既往暫可勿改應俟將來收撫事竣再行察照舊章酌加釐訂期歸畫一俾資遵守理合附片具陳是否有當伏祈聖鑒訓示謹

奏 光緒三十年三月二十一日拜發

本年五月二十二日遞回奉

硃批知道了欽此 四月二十四日

奉 旨賞假叩謝 天恩並力疾辦事就近前赴古城摺
奏爲奉

旨賞假叩謝

天恩並力疾辦事擬就近前赴古城緣由具摺馳陳仰祈

聖鑒事竊臣前往鄂倫布拉克督辦撫哈啓程日期業經附片

奏明至上年十二月初九日始勉強行抵該處維時收哈委員分押哈衆先已馳至沙窩地方去鄂倫布拉克止兩日程在彼等候接收之哈官分別交代臣已飭查明此起歸哈統科塔兩屬共有五千餘名口以困苦情形並無殊異不得不一視同仁普加振贍自未便拘牽初議致有偏枯惟採買牛羊有在阿勒台布倫托海各處者不宜驅之遠來致滋拖累尤慮哈性無恒飽則颺去體察再三遂改定在阿勒台散放以非眞歸牧地不能承領也先由行營按名發給印票一張寫明哈名及牛羊甄茶隻塊數目如此覈實辦理藉寓牽制計亦良便適該管哈目總管等接奉臣檄傳相率來見聽候調遣臣宣示

朝廷德意責令將哈衆分領歸牧其在新疆續收未到之哈尙約有二千餘人具報光景皆極窮蹙臣令該委員等仍在台守候催趲並札飭新疆委員於啓行時先行酌給麪布茶塊俾無飢寒以免擾及地方現聞新疆巡撫飭用車輛運送更爲妥協特是前項茶畜僅數頭起撫案之用刻仍設法借墊空籌獨持支絀萬狀差幸臣平日稍繫蒙哈之望尙不至遽滋事端但臣近來於收安哈衆一事因才具短絀踴躍經營實已煞費心血若待哈部救安臣氣力更不知何似頃接英秀咨稱已將臣疾狀奏明奉

闕碰頭恭謝

優容

國有心衛生無術事繁身弱顛越實在意中加以阿勒台借地迭經咨商春滿直不答復並不還二字亦且不提臣但有接收之責並無勒交之權卽屢奉

綸音夫倒持太阿授人以柄英秀旣貽誤於前臣何可不挽回於後况現以阿勒台建官置

奏徒以歸地展期尙多膠葛究不知春滿是何意見儻竟因挾私而致撓大計恐益非大臣

籌邊體國之用心茲既文牘頻煩曠日持久自須另擬辦法且臣病勢反復羈留沙漠醫藥
彌難幸過鄂倫布拉克爲漢三塘卽接新疆轄界由彼達古城計四百二十里路雖艱難尙
非寥遠該處上年接設電局綫路四通商量公事最稱便捷若將地事改爲電商大可以速
補遲臣今又蒙

恩賞假亦不可拋荒日月上負

生成並當廣訪良醫安心調理現因哈事大致就緒擬四月初旬即起身前往容到古城再
爲由電奏報所有奉

旨賞假叩謝

天恩並力疾辦事擬就近前赴古城各緣由謹具摺馳陳伏祈

皇太后

皇上聖鑒謹

奏 光緒三十年三月二十一日拜發

本年五月二十二日遞回奉

殊批知道了欽此 四月二十四日

懇將崧華仍留任所片

再臣長子貢生崧華前隨臣出口在任讀書今年已十八歲例應回旗且現蒙

恩賞給廕生亦應以崧華承廕引

見當差惟臣現在病中不但家務需其料理且須侍奉藥餌刻不能離崧華於滿蒙文字語言均尚練習有伊隨侍臣稍可省心臣於經手事件刻係力疾辦理應懇

天恩俯准將崧華仍留任所除咨部旗查照外謹附片陳請伏祈

聖鑒訓示謹

奏 光緒三十年三月二十一日拜發

本年五月二十二日遞回奉

硃批著照所請欽此 四月二十四日

請將糧餉章京榮泰仍歸班先引見片

再前年五月初一日准吏部咨開本年三月補議正月分滿洲月官出有

盛京刑部主事一缺將年滿科布多糧餉章京卽選主事榮泰擬選行查該員有無事故出具考語給咨赴部帶領引

見等因咨行前來伏查前糧餉章京榮泰於光緒二十七年十一月間經臣以辦理邊防出力專片保

奏請將該員仍歸

京察一等

記名理事同知遇有缺出仍歸班先帶領引

見俟得缺後在任以知府用先換頂戴欽奉

硃批著照所請吏部知道欽此欽遵在案旋准吏部來咨以該員擬選

盛京刑部主事自係照例辦理應即給咨送部引

見惟查該前章京榮泰在邊五年經管糧餉任勞任怨實心辦事其於庚子籌防尤著勞勩實係章京中不可多得之員茲選升主事則該員從前在筆帖式任內

京察得保一等恐不能帶於新任即不能仍選理事同知之缺是臣原因其著績而加獎者乃不啻明保暗劾似乎未爲持平且自兵燹後京師旗族家產多遭掠失十室九空久困部曹實亦無力賠墊當在

聖明洞鑒之中查主事外用不過五品勞績保舉人員部章又本有准其註銷保案仍歸原

班叙補之文今擬請將該員仍遇有理事同知缺出歸於班先由吏部帶領引見庶不致有虛獎叙而於部章亦尙相符並足以慰前勞而昭公允可否籲懇聖恩俯准所請如蒙

俞允伏候

命下臣即欽遵咨行吏部查照辦理臣因北路近年餉艱差苦人皆視爲畏途將來阿勒台建置定局用人尤極迫切若不求

朝廷格外體恤則以後更恐無人問津邊事何所措手用敢不揣冒昧附片具陳伏祈

聖鑒訓示謹

奏 光緒三十年三月二十一日拜發

本年五月二十二日遞回奉

硃批吏部議奏欽此 四月二十四日

山西布政使吳廷斌力顧時艱請 賞軍功加二級片

再山西省積欠科布多軍需台費銀三萬四千兩久束高閣臣庚子年蒞任屢咨商撥迄無以應迨布政使吳廷斌受事始陸續籌還先後共解過銀二萬兩近經該省撫臣張曾敭督

飭該司竭力騰挪復撥給銀四千兩雖爲數無多然當司庫支絀之秋仍能設法協濟實屬不分畛域力顧時艱查該司老成宿望幹濟宏深夙以治河著績本屬方面之才茲復體念邊垂公忠篤棐之忱尤堪嘉尚科布多係北路軍營可否仰懇天恩將山西布政使吳廷斌

賞給軍功加二級以昭激勸出自

鴻慈逾格如蒙

俞允於塞垣餉需實多裨益理合附片具陳伏乞

聖鑒訓示謹

奏 光緒三十年三月二十一日拜發

本年五月二十二日遞回奉

硃批吏部議奏欽此 四月二十四日

電陳行抵古城日期並督辦哈事各情摺

北京外務部洪密瑞洵四月初八日自鄂倫布拉克啓程十五日抵古城哈事節經督催據潘效蘇函稱東西兩路已無哈迹惟南路羅布淖爾屈莽山等處及北路巴里坤尙未遷動

地方掣肘十分爲難現委員紛來行營請示容瑞洵與潘效蘇隨時會商竭力妥籌查驅哈非地方官切實查辦委員勢孤力弱無能爲役瑞洵雖已駐古城督辦奈係客官於地方呼應不靈自非奏明嚴定功過難期得力潘效蘇前於瑞洵商定以收哈委員艱苦出力事竣應會摺請獎茲擬增地方文武考成如實力協助應併覈保如不認真或反有意容留卽行撤參委員亦同一律如此勸懲冀可稍儆疲玩事關邊局不敢引嫌避怨潘效蘇覆文意見相同應懇俯准潘效蘇會同瑞洵秉公查覈辦理至接收借地已電催春滿俟得復再奏謹請代奏候 旨瑞洵已豔 古城瑞大臣鑒准軍機大臣電催光緒三十年五月初三日奉旨瑞洵電奏收哈事宜須地方官切實查辦非嚴定功過難期得力等語著潘效蘇體察情形妥議具奏欽此外務部東印

電陳呈進馬匹求 恩准予展限摺

北京軍機處王爺中堂大人鈞鑒科布多參贊每年呈進馬匹向於五六月間派員護送到京由定邊左副將軍聯銜會摺奏進瑞洵去冬起身離科時卽託英秀代爲物色務求上選茲聞科布多來員面稱馬尙一匹無有瑞洵深恐遲誤可否求 恩准予展限容俟回科再親自選擇專摺派員補進以昭敬慎出自 鴻慈謹乞代奏請 旨瑞洵午董

昔フ月多希光二二二一
招收逃哈分押歸牧不久當可告竣摺

奏爲新疆潛哈招收漸次就緒並將早年舊竄之戶全行摻查分起管押回牧止餘北路巴里坤一股人數較多辦理爲難刻正切實查催並力驅收不久當可告竣恭摺馳陳仰祈聖鑒事竊臣於本年四月初八日自鄂倫布拉克台啓程十五日馳抵古城當將哈事節經督催據潘效蘇函稱東西兩路已無哈迹惟南路羅布淖爾屈莽山等處及北路巴里坤尙未遷動及地方掣肘十分爲難各情於四月二十九日由電

奏明在案查哈薩克潛住新疆境內事已多年初不始於前歲該省幅員遼闊哈自潛牧大澤深林與民纏莊園田畝各不相涉故初亦無人過問近年民齒益增汙萊漸闢而哈亦日聚日衆地方胥隸之需索與哈衆顛越爭佔之事卽相因而至獄訟糾紛日形捍格於是始議驅哈誠亦不得已之舉否則哈衆積至五六千之多其廬帳牲畜計不下數十萬決非旦夕所能麤集地方官吏豈盡矇瞶何以絕無見聞從不一請驅逐其故蓋可思已光緒二十八年饒應祺原奏僅稱科塔哈衆逃入新疆奇台昌吉綏來及哈喇峽一帶或二百餘戶或百數十戶惟喀喇沙爾一股四千餘人爲最多亦最悍黠其流入焉耆府境一股二千餘人染患時疫人畜傷亡殆盡爲最窮此外各屬雖亦間有呈報其實卽此哈衆東奔西竄並非

別有所增也臣前准饒應祺咨請派員會收隨經查據該管開呈戶口清單潛入新疆之哈實有九百餘戶臣卽派委換防屯田參將祥祐帶同委員哈官通事前赴新疆會同地方文武印委竭力查收並經陸續加派員弁前往督催適潘效蘇蒞任幸與臣同心卽飭該員等先往沿邊一帶會同扼要設卡以杜回竄再行分投查辦臣復派員率同哈目傳集氈房駝馬備帶餱糧沿途催趲押送歸牧時閱兩年辦理漸有歸宿前據查報收回科哈二千九百六十名口塔哈二千零六十四名口業由臣附片陳明茲續據該員等稟報現又收回奇台縣東北境內哈民男女三百十三名口業經押交各該總管查收又羅布淖爾可克淖爾等處計歸哈四起亦已起解在途尙不悉其確數此外則巴里坤一股人多衆悍地方官復挾私袖視一味因循臣查譯哈結內有在此出有水草銀兩且應官差之語地方官不肯認真或反有意容留當由於此如現署鎮西廳同知黃廷珍初委會辦哈事亦嘗太息地方官不肯出力協助經潘效蘇派署是缺俾重事權詎意缺既到手卽亦變心且不以潘效蘇派隊驅逐爲然致哈恃爲護符旣行復止委員孤掌難鳴紛來行營請示辦法故臣前有電請嚴定地方官考成之奏良以委員勢單力薄哈性侮弱畏強非假官勢軍隊以壯聲威則違抗遷延事所必致蓋哈薩克狼性野心良言開導則置罔聞實力剿辦又嫌太過非同潢池盜

弄可以用兵剷除故辦理招收比臨陣禦敵尤爲艱棘饒應祺原奏謂縱之不可迫之生變可見處置之不易矣潘效蘇來咨亦云此事費盡年餘之力功在垂成而墮之一旦皆由該文武始勤終怠所致蓋亦痛恨地方官之不力而深恐前功之將棄也查科布多此次辦理收哈實屬不遺餘力煞費經營不特已收之數溢於原逃並將早年竄哈一併收回復收塔哈願歸者二千餘衆直如招尋數千出柙走險之兇虎毆使歸閑就勒其勞烈殊常洵非臣始願所及卽新疆印委營員亦有肯爲出力者該撫前商擬俟事竣優保誠不爲過至巴里坤之哈現經潘效蘇嚴飭地方文武勒限催遷並由臣加派委員再行前往合力會辦除塔哈外務將屬科布多者全數收回更檄諭哈日宣布

聖朝威德並准委員隨招戶兵按給銀糧俾助勢力如此寬嚴並用或冀易於得手現當功虧一簣之際臣未敢鬆勁仍力疾督飭切實辦理務收浮圖合尖之效期稍副

朝廷綏戢邊蒸之至意理合恭摺馳陳伏祈

皇太后

皇上聖鑒訓示謹

奏 光緒三十年五月初九日拜發

本年七月十五日遞回奉

硃批著督飭認真辦理欽此 六月十七日

附陳收哈索地情形並懇 恩續假片

再臣暫駐古城督辦收哈催索借地並就近調治病症公事尙屬順手較未來時頓覺精神一振惟此處亦無眞明醫理之人未敢嘗試又以乍換水土營中多患霍亂臣所染亦劇舊恙未痊新症又續頗形狼狽四月十五日抵此潘效蘇卽派員來接函電敦促謂省垣醫藥方便且可會籌邊要近在咫尺堅約前往臣以此商量公事正在喫緊病體不耐酬應暫辭炎暑奔馳人情所憚況臣病未稍減疲憊不支行止亦殊難自主臣前於四月初八日由鄂倫布拉克起身行走漢三塘站程加倍三四百里戈壁全無水草隨員兵役及蒙哈駝馬觸熱痛瘡逐處僵仆日恒數起人有戒心幸臣夜行又霽微雨得以無恙然亦三日不食臣刻擬派員帶領工匠前往相泉鑿井以濟行旅現臣經手事將告竣實應再請解職而英秀適有回京之

命錫恒到任需時臣一息尙存卽不應棄邊疆於不顧然已成勞瘁旣不能任重致遠則亦何可以病軀敷衍貽誤大局再四焦思臣無足爲重邊疆所關匪輕前蒙寬期

賞假曠將屆滿惟有仰懇

鴻恩俯准續假一箇月仍力疾辦事俟地哈兩件均有成畫當再欽遵前

旨瀝陳下情籲求

高厚伏候

聖主如天之仁臣之病北路西域人所共知斷不敢捏飾以圖規避伏祈

聖鑒訓示謹

奏 光緒三十年五月初九日拜發

本年七月十五日遞回奉

硃批著再賞假一箇月欽此 六月十七日

電陳現擬派員先將人地兩收切望 迅簡大員督辦摺

北京外務部洪密接收事瑞洵連電催商初多艱阻值春滿病劇急請開缺方勉允交割已得復電此案忽翻忽覆迭起波瀾瑞洵奔馳沙漠二千餘里文牘辯駁數千百言至今始有定局自應即往接收惟由瑪納斯取道庫克辛倉山一路並無官站戈壁尤大炎暑泥淖人馬直不能行若折向沙札蓋由南路進須過大河數道漲發溜急水深輒逾一二丈無可繞

避此兩道皆須待九十月方能行茲查由迪化直赴塔城再抵哈巴河設有蒙哈台站尙可假道但太艱遠計程往返總在六千里外曠日持久瑞洵痼疾未痊勞即喘汗增劇右身腰骹抽痛亦將成不遂本已不堪跋涉現擬派員速往先將人地兩收以清膠葛瑞洵仍當力疾移赴科塔適中地方安營駐紮督辦期於本任要差均能兼顧至塔哈如何安插旣云人隨地歸即應照常住牧假如窒礙或於形勢豪情實有不便亦宜詳細體察徐圖整理不動聲色而措邊圉於乂安方爲長策急切紛擾恐非正辦阿勒台現擬設官切望奏上時朝廷迅簡明練清强大員前往督辦則大局一定保疆安人邊治自興矣謹請代奏瑞洵午阮

塔城轉科布多參贊大臣 光緒三十年五月十八日奉

旨瑞洵電奏悉已有旨派錫恆爲科布多辦事大臣駐紮阿爾泰山矣欽此外部巧印

電陳借地現經索還應請均歸錫恆管理所有派員接收應作罷論摺

外務部洪密午養奉巧電 旨欽遵仰見體恤臣工慎重邊疆感激欽佩瑞洵前奏擬派員接收原因收回後尙有事在必須暫駐俟請簡大員統籌布置今蒙 朝廷燭照萬里已先特派錫恆駐辦諒北來必速又恰值借地現經索還瑞洵愚見塔已認還即爲定局原不必

仍由科收應請均歸錫恆到彼即行管理塔自不能違阻所有派員接收應作罷論其哈衆如何管轄須定章程一時尤難率議瑞洵前電陳明新哈大股均收回僅餘零起亦催遷卽藏業商由潘效蘇奏報撫事應俟委員稟齊奏銷瑞洵守邊四年愧無報稱但於收安地哈尙知盡心其間波瀾疊起倍費經營茲幸均就竣惟病轉劇左半肢體中風煩重日益掣痛行動需人即坐草上飛亦不敢速走前又附奏續假一月夏日戈壁酷熱人馬難行容秋初稍涼旋科餘詳疏除飭遵外謹請代奏瑞洵午有具奏卡倫增兵現尙得力未便遽撤摺

奏爲卡倫增兵現尙得力未便遽撤致啓戎心而懈士氣應俟議覆遵辦恭摺具陳仰祈聖鑒事竊臣前以日俄失和欽奉

諭旨飭令加意嚴防慎固封守又接外務部密電俄人往來境內蒙漢錯雜恐滋事端應嚴密防維隨時稽查彈壓又沿邊內外蒙古均按照局外中立例辦理兩國兵隊勿少侵越儻闌入境內中國自當攔阻各等因臣當以

綸音訓敕及外務部電示各辦法俱係緊要關鍵而切實奉行斷宜借資兵力無可空言塞責之理況科布多迤北一帶處處與俄接壤蒙哈雜處回纏往來劫掠早成恒事儻有事端

無法彈壓必致不能相安滋人口實或致外兵闖入無力攔阻均爲有背中立之條動妨大局必須先事綢繆豫防後患俾知早有守備方足以戢拚飛杜窺伺是必吾實力充足確有以自立而後可保中立爰將所屬昌吉斯台瑪呢圖噶圖勒幹等八卡趕緊加派蒙兵扼要川駐因經費無著一面借挪墊辦隨經奏請戶部接濟現奉

寄諭知已

敕交馬亮潘效蘇等籌議仰維

聖明垂廛邊要不厭求詳曷勝欽佩惟臣前摺所陳尙有非鄰省所盡明者查科布多境內統計二十四卡倫內有十六卡倫隸烏里雅蘇台管轄每卡倫兵數尙有四五十名惟科布多所管八卡倫前因分界俄人倡逐移卡續經內徙每卡倫因陋就簡僅止設兵十名且烏里雅蘇台之十六卡地尙次衝而科布多所管八卡則偏近彼疆且有與齋桑斯克爲鄰者屢年爭執克色勒烏雍克之地至今覬覦未已而俄人每以越界侵佔爲能得步進步已成慣技彼又設備謹嚴鄰柝相聞而我猶鼾睡似乎不可東方戰事未艾邊警宜戒不虞故烏卡尙可照常而科卡萬不能不添兵防堵但限於財力不能大加布置爲可愧耳蒙兵生長其地山徑熟習查察易周雖云難當大敵然庚子辦防按卡增戍俄止對壘相持究未深入

是已著有明效現在添紮將及半年烽燧不驚邊塵安堵若竟遽行議撤恐不免啓戎心而懈士氣似非計之得者自應俟馬亮等議覆及察酌日俄戰事如何再行

奏明辦理至預請阿勒台防費原爲接收以後未經派員以前暫支一時之需今該處已蒙特簡大員駐辦臣前經電

奏應俟錫恆到彼徑行管理科城無庸再辦接收其防費自應由錫恆查照長庚原奏歸於全案估請惟錫恆到任需時該處防務不可間斷究應如何辦理該將軍等永練邊情統籌全局自有嘉謨入

告其臣前擬於新疆招募壯勇二百名派員管帶暫駐阿勒台一節刻以無款尚未舉辦既蒙

飭議自應候

旨遵行臣忝司邊寄責無可辭不敢稍涉張皇亦不敢竟疏防範總期疆圉靜謐戎馬不來上紓

聖主宵旰之塵下保北路安全之福抑臣更有言者天下事言之匪艱行之惟艱凡說者愈覺動聽卽辦者愈益棘手科布多形單勢弱自守尙且不足更何敢謂有恃無恐欺飾

聖明區區愚誠諒蒙

昭鑒所有卡倫增兵現尙得力未便遽撤應俟議覆遵辦緣由理合恭摺具陳伏祈
皇太后

皇上聖鑒訓示謹

奏 光緒三十年六月十三日拜發

本年八月初十日遞回奉

硃批另有旨欽此 七月十七日

借地允還不必由科接收應俟錫恆到彼即行管理片

再臣前以阿勒台已議請設大員畫疆分治是爲烏部收舊牧非爲科城索借地無所用其
爭執總期急就藏事庶

朝廷得早簡大員整理請

飭春滿速議交割勿再推延等情曾於三月初十日在鄂倫布拉克台轉由古城電
奏奉

旨敕催嗣在途次展轉籌思此事業經授柄恐一時未易轉圜儻春滿仍欲一舉則惟有速

請

簡派大員徑往駐劄辦理即足藉杜牽制迨行抵古城節次與春滿電商催索經臣切實辯駁始據覆電定議交割有派員何日起程候電等語臣當又以此案翻覆有年至此始有歸宿自應即往接收以清膠葛阿勒台現擬設官切望

迅簡明練清強大員前往督辦則大局一定保疆安人邊治自興等情於五月十八日電陳旋奉電

旨敬悉已蒙

欽派大員駐辦一得之見不期默契

天心曷勝慶幸同日臣另有擬派員往辦接收一

奏臣伏查阿勒台借地前擬必須派員往收者原以塔哈人隨地歸向有事在茲既

簡放有人錫恒年力正強膺茲重任自當勇於從事北來必速臣悉心酌度借地一節既經臣與春滿電商業允交還即爲定議原不必仍由科布多再辦接收應俟錫恒到彼即行管理塔城自不能阻擬將派員接收毋庸置議除由電

奏明外理合附片具陳伏祈

聖鑒謹

奏 光緒三十年六月十三日拜發

本年八月初十日遞回奉

硃批知道了欽此 七月十七日

差委人員材堪器使現據事竣銷差可否送部引 見候 旨錄用摺

奏爲調營差委人員材堪器使現據事竣稟懇銷差籲求
恩施可否

俯准由臣給咨送部帶領引

見候

旨錄用以昭激勸恭摺具

奏仰祈

聖鑒事竊臣前因奉

旨派辦接收安輯各事胥關重要必須得力可靠之員方資佐助當於光緒二十八年十一月奏調候選運判徐鄂來營派充洋務局總辦兼設籌邊處責令綜理一切事宜上年八月

復派往阿勒台隨辦接收均經附片

奏明嗣因地事議緩該員中道折回復來新疆經理哈務隨在行營辦事茲據稟稱自到北路即不服水土恆患腹疾經久未痊殊形委頓初因收安地哈公務殷繁既蒙奏調專辦是事而來未敢率行請假茲幸均經告竣洋務局一差業經暫護參贊大臣派員接署籌邊處現議裁撤此外並無經手未完事件稟請銷差給咨俾得赴部候選就便延醫調治等情前來並據該員疊次面求詞意懇切查該員向在奉天黑龍江直隸山東等省襄理戎幕頗著能聲迨經臣奏調來營畀以洋務籌邊各事均能鉅細兼綜深得體要毫無貽誤於索地收哈尤盡心力惟係南人不服北邊水土所稱確係實情今事已告竣自應准其銷差由臣發給離營咨文並准循例仍由北路台站晉京以示體恤臣覆查該員聰敏勤能饒有智略辦事亦頗認真年逾強仕磨鍊已深現當用人理財之際艱務爲

國課大宗如該員者儻假以尺寸之柄使得有所藉手必能於場產引銷切實討求及時自效若任其浮沈需次日久賦閒未免可惜且科布多地處極邊著名瘠苦人皆裹足臣奏調各員尙有補用都司緒齡候補知縣王服昱雖經均奉

批准尙皆託故趑趄至今未至獨該員不憚艱遠應調前來其勇於從事即可概見惟是萬

里馳驅載更寒暑辦理洋務邊務悉協機宜深資臂助論功行賞本應從優議保以獎其勤況見在阿勒台建官置戍草昧經營若不於邊荒開用人之途其奚以延攬才賢毗益庶務可否籲求

恩施俯念北路軍營差苦事艱

准將奏調來營候選運判徐鄂由臣出具切實考語咨送吏部帶領引見候

旨錄用之處出自

鴻慈逾格如蒙

俞允不特該員此役不爲徒勞卽嗣後奉調人員亦庶幾有所激勸免致多方規避觀望不前似於邊疆有裨所有調營差委人員材堪器使現據事竣稟請銷差籲求

恩施可否

俯准由臣給咨送部帶領引

見候

旨錄用以昭激勸各緣由理合恭摺具

奏伏乞

皇太后

皇上聖鑒訓示謹

奏 光緒三十年六月十三日拜發

本年八月初十日遞回奉

硃批所請著毋庸議欽此 七月十七日

散木居奏稿卷之二十二

門人鈴木吉武校字

散木居奏稿卷之二十三

幹難 瑞洵

藏弓集 光緒甲辰七月起十二月訖

電陳病勢直難望愈應請速擇替人摺

電陳白塔山潛哈出巢抗拒擬回駐鄂倫布拉克台相機查辦摺

電陳收哈竣事起程回抵科城摺

經手事竣欽遵請 旨摺

回營任事日期摺

收哈告竣繕單馳報摺

塔哈應歸塔員查收片

銷毀關防片

照章酌保換防員弁摺

請還溥湧頂戴片

動支倉糧散放窮蒙片

缺回旗調理以便自訪中西醫士診治實感
鴻慈謹乞代奏瑞洵佳

電陳白塔山潛哈出巢抗拒擬回駐鄂倫布拉克台相機查辦摺

北京外務部洪密哈事現辦頗有端緒惟新界白塔山近有早年潛哈因新疆偏遷出巢抗拒人衆勢悍現潘效蘇調隊防逐並會派大員前往開導事體較大恐釀鉅變瑞洵擬回駐鄂倫布拉克台督率相機查辦定七月念四日由古城起身再昨接馬亮潘效蘇電稱春滿先是病重訛傳出缺應報明更正謹乞代奏瑞洵漾

光緒三十年八月二十四日接

軍機處電迪巡撫古轉科布多參贊大臣奉

旨瑞洵電奏悉據稱白塔山有早年潛哈因新疆偏遷抗拒人衆勢悍現潘效蘇調隊防逐並派員前往開導等語歸哈一事不宜操切著潘效蘇瑞洵等務當體察情形善爲開導隨時妥慎辦理切勿稍事孟浪致釀變端是爲至要欽此感印

電陳收哈竣事事起程回抵科城摺

北京外務部感電奉 旨欽遵白塔山哈衆前因新疆驅逐巴里坤濟哈正在伏暑人馬不耐太失體恤哈情憤激致委員解送歸哈過山被其出巢抗拒偏脅入夥旋據該哈目等投

文行營要求挾制經瑞洵分別准駁先令展緩一面與潘效蘇函商辦法一面遴派委員前往相機開導並加檄勸現均遵依坤哈仍陸續押還歸牧山中舊哈並已解散向阿勒台去訖多年積患竟得掃除地方安定蒙民同惑至瑞洵前奏新疆南北各哈均已收回據報還牧現在一律竣事無可再辦瑞洵即於八月十四日由鄂倫布拉克台起身念六日回抵科城知系 宸廑先電 聞容再詳奏謹請代奏瑞洵西範

經手事竣欽遵請 旨摺

奏爲臣假期又滿病益增劇經手事竣欽遵請

旨恭摺陳

奏仰祈

聖鑒事竊臣前因假又屆滿病勢直難望愈擬仍具摺乞

恩准開差缺回旗調理以便自訪中西醫士診治等情於七月初九日由電

奏明繼以白塔山潛哈出巢抗拒官兵派員前往開導回駐鄂倫布拉克台相機辦理抵台後就近督飭尙幸山內各哈均遵遷歸牧新疆南北各哈招收一律告竣臣已於八月二十六日回抵科城等情又經由電馳

奏伏查臣自光緒二十九年六月初二日

奏明銷假前往阿勒台一帶辦理收安各事宜當經聲請俟差竣之後入都

陛見奉

硃批著俟事竣後再行請旨欽此仰見

聖慈慎重疆事

俯體下情至意莫名欽感嗣緣中途墜馬傷重折回詎料歸地竟又議緩蒙哈惶惑比時已交冬令復奉

旨著該大臣即行前往彈壓拊循查明確情詳晰具奏等因欽此臣以事關重大不敢顧惜微軀即於上年十一月十二日起程馳往鄂倫布拉克台駐辦一切旋又移劄古城商索借地督催收哈力疾馳驅閱時十月衝寒冒暑備歷艱辛雖中間疊起波瀾幾生枝節茲幸均皆就緒阿勒台鎖鑰巖疆宜謀防守長庚倡議於前臣復以專設大員畫疆分治再三陳請仰邀

採察

特簡錫恆駐劄籌辦臣經手之事俱已告竣並無未完要件六月十七日續

賞一月之假又經屆滿惟心腎痼疾迄未輕減在新疆時經潘效蘇吳引孫公薦名醫診治亦無大效轉因勞碌過甚牽觸左體舊傷半身筋脈抽縮骨節疼痛手足動履全須仗人扶持竟成偏痺氣力疲沓已極實在難再枝拄計自抱恙以來過荷

鴻施屢予寬假將理已逾十箇月之久原冀強起辦公勉殫駑鈍不意事雖告蒞病乃無已有加且近月辦事乖方動勞

聖慮再不解任其錯謬更不知何似此尤臣慄慄危懼寢饋不安者也臣竊自維念資材剛拙學術迂拘既無樞密之繫援更少公卿之保薦獨以戇直上結

主知

拔自常僚

畀之重任非凡

殊遇卽鞠躬盡瘁未足云酬豈宜貪戀身家輒圖引退無如負薪之疾積有歲年勿藥之占難期旦夕若再委蛇尸素措置難免失宜屬茲籌防喫緊之時萬一猝有疏虞則臣之辜

思溺職必有甚於今日者展轉焦思欲求不負

聖明不誤邊要竟無兩全之術現幸經手事竣自應欽遵請

旨合無籲懇

慈恩准如前請

特賜成全俾臣得於枯朽之餘仰瞻

天日之表然後安心休息設法治療庶幾可起沈疴仍圖效用臣不勝感激待
命之至所有臣假期又滿病益增劇經手事竣欽遵請

旨緣由謹恭摺陳

奏伏祈

皇太后

皇上聖鑒訓示遵行謹

奏 光緒三十年九月二十四日拜發

本年十二月二十六日遞回奉

硃批另有旨欽此

回營任事日期摺

奏爲臣回營勉力任事日期恭摺仰祈

聖鑒事竊臣於八月二十六日由鄂倫布拉克台回抵科布多城到營後適臣左邊肢體筋骨疼痛太甚動履不使未能即時視事現雖並未少愈而臣假期又滿不敢再行續請英秀又急求交卸於十月初三日經將參贊大臣印信暨鑰匙等件派員移交臣當卽望

闕叩頭謝

恩敬謹接受伏念臣忝膺邊鑠已及五年措施乖方動多隕越深以

聖明委寄弗克負荷爲懼茲回本任益切冰兢惟有勉竭庸庸將地方一應事宜愈加持重妥慎經理不敢爲一事求一事之效祇期在一日盡一日之心用圖稍酬

國恩不負所學而已所有臣回營勉力任事日期緣由謹恭摺

奏報伏祈

皇太后

皇上聖鑒謹

奏 光緒三十年十月十五日拜發

本年十二月初五日遞回奉

硃批知道了欽此 十一月十三日

收哈告竣繕單馳報摺

奏爲臣辦理收哈事宜一律告竣恭摺繕單馳報仰祈

聖鑒事竊臣前以新疆潛哈招收漸次就緒並將早年舊竄之戶全行搜查分起管押回收止餘北路巴里坤一股人數較多辦理爲難等情曾於五月間由古城行營具摺

奏明本謂不久當可竣事不意六月初旬新疆及科布多委員催解巴里坤境內潛哈三百餘戶由紙坊度戈壁行抵白塔山口突有哈衆蜂擁而來執械放槍致傷勇丁並搶奪馬匹等件要截去路將歸哈倡脅入夥該員等以事出意外攜帶兵勇不及二百旣慮衆寡不敵又恐猝釀鉅變未敢冒昧從事因將被傷營勇槍斃駝馬及被劫去槍枝馬匹糧石各情電報新疆巡撫並齊來臣行營請示辦法該處哈目等亦投文聲稱伏暑人馬不耐新疆營員倡令速徙不稍體恤心實不甘復要求住牧鄂倫布拉克台語多挾制臣細加體察該處之哈有自光緒十一二年時遷往者潛牧年久安土重遷此衆以時當盛夏戈壁旱乾深恐牲畜倒斃有礙生機因率衆鋌而先險該委員等又但顧考成一味威逼遂致激成事端因即函致潘效蘇妥商辦法旋准函覆謂哈事已辦至此地步未便功虧一簣況有率衆抗拒情事尤不能再事姑容若不趁此稍示懲創將來恐更肆行無忌即今日辦理棘手未始非從

前過於寬縱有以釀成臣以哈衆如此猖獗勢難禁人剿逐臣又庸弱無能遂亦附和當經商定會派提督易盛富參將祥祐前往相機辦理並議調隊遙助聲威臣即一面檄飭哈目准其緩俟秋涼再進爲釜底抽薪之計一面密派邊務處總辦徐鄂隨帶員弁舌人譯給哈文諭帖刻期馳往勸以大義隨宜體察設法辦理並仍責令前派委員等入山分任開導詳查會辦務將原收者悉數押還歸牧以竟前功因事無把握未便宣露且古城與白塔山相距十有餘站聲息遲鈍臣遂回駐鄂倫布拉克台就近查辦指授機宜以期策應便捷即經由電馳

奏略陳梗概迨七月底行抵台次認真督率又派員弁往探隨據徐鄂等報稱奉派勸導白塔山哈衆曉夜趨行沿途探知該哈等方號召同類負隅自固深恐日久勢衆滋蔓難圖因冒險馳入該哈等猝不及防羣焉思逞繼見並未帶有兵隊知係科員卽亦不甚畏懼爰設法招徠將譯就哈文諭帖令其捧讀爲之詳明講解反復譬喻從權許以自新不究前罪並告以若能幡然改計科布多大臣必爲庇護該哈等初猶心存疑懼從違莫決復經多方開導陳說利害始咸知感戴

天恩並稱遵依願回阿勒台原牧但求展限現已一律西遷復據續派各員先後呈稱被阻

之哈亦經陸續招回派哈官分起送歸舊牧自六月二十日起至八月初十日止所有前收巴里坤歸哈三百餘戶又均招齊自白塔山東至鄂倫布拉克台一帶之哈婦數還回並無遺漏等情呈報到營並據辦撫委員稟報收哈陸續還集查撫情形臣覈閱各稟甚爲放心隨即函致潘效蘇將派隊防剿一節屬其斟酌停緩臣即於八月十四日起程二十六日回抵科城途次恭奉七月二十七日電

旨歸哈一事不宜操切著潘效蘇瑞洵等務當體察情形善爲開導隨時妥慎辦理等因欽此竊幸臣辦法尙能仰符

上意臣伏查白塔山之哈卽有坤股在內特衆據險早知辦理爲難此次杜遏亂萌收功迅速皆由仰賴

朝廷威德因應尙合機宜實非臣始願所及當於八月二十九日將白塔山潛哈遵導歸牧及臣回抵科布多城日期由電謹先

奏明旋據易盛富祥祐等稟稱派隊四處搜查復由古城之趙家莊沙窩暨巴里坤之紙坊等地方查出潛哈一百二十二戶亦均由科暫收解至鄂倫布拉克台由駐台委員差派蒙官押送歸阿勒台舊牧在新科哈一律收回等情臣伏查光緒二十八年八月派員會收新

疆濟哈時逾兩載該員等不畏艱難力顧大局實心從事統計收回科哈六千四百八十二名口其數已溢原逃復收隨地歸哈二千六十四名口今並將白塔山早年潛哈六百餘名口悉數催遷歸牧此外新疆再無大股科哈自應即行報竣縱尚有零星潛住之哈自係塔屬難保必無是在地方官之隨時查察非鄰境委員力所能及至科屬之哈實已全收兼及隨地歸哈其塔屬者應歸塔城委員查收乃是定理前奉

寄諭其潛入新疆之哈民著潘效蘇趕緊設卡查禁並另派委員會同科塔兩城派來之員分別收回各歸各牧以免紛擾等因欽此仰見

聖明酌中示則極應懷遵惟接潘效蘇迭次咨函意欲趁勢併驅歸科且有令科布多代收之語自爲一勞永逸起見但各有主者難以越俎代謀若竟聽從恐以不分畛域之公心疑爲廣攬事權之私意且臣業已力盡筋疲實亦不能再辦仍應請

旨敕下潘效蘇春滿自行查辦

奏報以清界限至屈莽山竄往青海邊界之哈應如潘效蘇原奏另案辦理所有收哈事宜一律告竣緣由謹恭摺馳報並繕單祇呈

御覽伏祈

皇太后

皇上聖鑒

訓示謹

奏 光緒三十年十月十五日拜發

本年十二月初五日遞回奉

硃批著潘效蘇札拉豐阿錫恒妥籌辦理單片併發欽此 十一月十三日

謹將由新疆境內收回科布多哈薩克及早年潛哈隨地歸哈戶口數目繕具簡明清單恭
呈

御覽

計開

一收由新疆迪化縣東山等處回牧和家阿布賴巴彥巴特哈拉喬拉克等四起一百四十
一戶共七百十三名口

一由迪化縣南山等收回登色拜等處十二戶共六十二名口

一由奇台縣大坑沿等處收回色勒哥太敖特斯巴依等五十三戶共三百十三名口

一由阜康孚遠等縣境內收回哈拉木薩克哈烏肯等四十九戶共二百五十六名口

一由精河庫爾喀喇烏蘇綏來呼圖壁昌吉等廳縣境內收回別克拜等五十八戶共三百三十三名口

一由可克賽地方收回他爾達拜等八起三百六戶共一千四百六十八名口

一由焉耆于闐等府縣境內收回色拉克拜色達克等六十三戶共三百二十七名口

一由吐魯番鄯善等廳縣境內收回托拉托拜木斯克等六十一戶共三百十四名口

一由羅布淖爾等處收回呢牙子等一百六十三戶共八百二十九名口

一由喀喇沙爾托克遜等處收回阿坦八梭羅蒲沙益長波和起等三起一百八十二戶共九百十四名口

一由白塔山等處收回斯旺等一百五十八戶共九百五十三名口

一由巴里坤鎮西廳之紙坊奇台縣之趙家莊沙窩及白塔山等處收回早年濟哈的里得拜鄂托斯拜哈里伯克畢依奇等四起一百二十二戶共六百五十六名口此起哈衆係光緒十一年十二年間潛往該處者同牧已久無從分析科塔合併聲明

一收隨地歸哈哈力他乙蓋西根他呢巴依江南維等三起共四百戶計二千六十四名口

以上計收科哈一千二百四十六戶共六千四百八十二名口

計收早年潛哈一百二十二戶共六百五十六名口

計收隨地歸哈四百戶共二千六十四名口

統計收回哈薩克一千七百六十八戶共九千二百零二名口

塔哈應歸塔員查收片

再科布多現管之哈本自塔爾巴哈台而來前任大臣恐其闖入外界因奏請由科布多收撫迨後查知內多不逞之徒祇以意存迴護未敢再議更張長庚原奏指爲誤收誠屬確論哈性狡黠不易拊循流竄滋擾勢所必至若無兵隊鎮懾實不足以資彈壓應俟錫恆抵任後屬其體察情形妥籌商辦至長庚所議人隨地歸辦法原屬權宜之策然亦僅指在阿勒台借牧者而言並非漫無限制今若一味濫收則異族錯居奪主喧賓終難免不貽後患臣此次查收科哈十分認真原期一氣呵成還定安集爲久遠計潘效蘇見臣辦理切實遂並力驅納又以人隨地歸並不分別科塔來文至有代收字樣且因春滿久在病中乃亦不復催塔城派員會收查新疆潛哈並非盡隸科布多塔城屬哈亦非全住阿勒台上年欽奉寄諭潛入新疆南北路等處之哈民著潘效蘇另派委員會同科塔兩城派來之員分別收

回各歸各牧以免紛擾等因欽此仰維

宸訓至公至明本是一定不易之理若依潘效蘇而行自系統顧大局不分畛域然似涉以鄰爲壑之嫌雖可省事一時究恐佔牧滋爭轉煩安輯臣仍以欽遵

諭旨辦理爲主現在查收科布多逃哈既已竣事其塔哈不在阿勒台舊牧者應仍歸塔城委員查收不便再由科布多代收致令錫恒後來爲難臣愚昧之見是否有當理合附片再行陳明伏祈

聖鑒謹

奏 光緒三十年十月十五日拜發

本年十二月初五日遞回奉

硃批覽欽此 十一月十三日

銷毀關防片

再新疆潛哈業均清查陸續收歸科布多阿勒台一帶辦理已越兩年實屬不遺餘力此後如何約束以期久安應由辦事大臣錫恒就近管理臣情形較悉苟有所見亦必隨時參議不敢稍存推諉顯分畛域惟前因奉

旨派令臣辦理安輯事宜當經另刊行營關防於光緒二十九年六月初二日開用
奏明在案臣現在回任接印已將關防於十月初三日銷毀除分咨查照外理合附片陳明
伏祈

聖鑒謹

奏 光緒三十年十月初五日拜發

本年十二月初五日遞回奉

硃批知道了欽此 十一月十三日

照章酌保換防員弁摺

奏爲綏遠城換防員弁三年班滿照章酌保繕摺具

奏仰祈

聖鑒事竊查光緒十四年間因換防員弁遠戍寒邊異常勞苦經前大臣沙克都林札布
援照烏里雅蘇台奏案擬於屆滿班期擇尤酌保一次以示鼓勵奏奉兵部議覆准將三部
院候補筆帖式及委署筆帖式並委驍騎校各員令於班滿時擇其尤爲出力者酌保數員
均以驍騎校補用等因節經照辦在案茲查換防委驍騎校廕監魁連候補筆帖式特合春

鹿壽恒貴連瑞成秀卓麟委署筆帖式惠陞瑞秀自到防之日起扣至本年十月二十日均屆三年班滿該員弁等遠戍極邊備嘗艱苦又值整頓之際派充各項差使均能矢慎矢勤不辭劬瘁自未便沒其微勞臣伏查前此每屆期滿請獎俱蒙特旨批准仰見

聖明不薄邊勞至意臣此次循章辦理未敢從優合無籲懇天恩

俯准將委驍騎校魁連等照案給獎均以驍騎校儘先補用以資鼓勵出自

鴻慈除飭取該員弁等履歷咨部外所有照章酌保換防員弁緣由理合繕摺具

奏伏祈

皇太后

皇上聖鑒訓示謹

奏 光緒三十年十月十五日拜發

本年十二月初五日遞回奉

硃批著照所請該部知道欽此 十一月十三日

請還溥湧頂戴片

再查四品頂戴補用防禦卽補驍騎校溥湧前因塔爾巴哈台

奏參詐索一案奉

旨交臣與英秀查奏嗣經該大臣英秀覆

奏陳明按照所參各節逐一詳細查質對毫無實據該員溥湧前已

奏參摘頂撤差擬俟一年無過再將頂戴給還等情奉

硃批依議欽此欽遵在案茲查該員自摘頂後跟隨臣辦理行營事件現在已屆一年奮勉從公力圖自贖邊荒乏人似難求備合無仰懇

天恩將該員溥湧頂戴

准予賞還以示懲勸之公理合附片具陳伏祈

聖鑒訓示謹

奏 光緒三十年十月十五日拜發

本年十二月初五日遞回奉

硃批著照所請欽此 十一月十三日

勳支倉糧散放窮蒙片

再現交冬令已由臣飭令糧餉處遵照前上兩年奏案動支倉糧大麥小麥各五十石交磨房碾磨按期散放窮苦蒙古人等仍自十月起至十二月底止謹附片具

奏 光緒三十年十月十五日拜發

本年十二月初五日遞回奉

硃批知道了欽此 十一月十三日

開缺回旗叩謝 天恩摺

奏爲叩謝

天恩仰祈

聖鑒事竊臣前因假期又滿病益增劇經手事竣拜摺請

旨嗣於本年十二月初五日遞回十月十五日臣拜發報匣欽奉

上諭瑞洵奏因病懇請開缺一摺科布多參贊大臣瑞洵著准其開缺回旗調理欽此承准軍機大臣知照前來臣當即恭設香案望

闕叩頭謝

恩伏念臣奉節典邊連年痼病務殷寄重幾無日不以負乘爲虞光緒二十九年二月曾瀝情懇請開缺奉

硃批著再賞假三箇月毋庸開缺欽此是年九月復以恐誤大局密片籲請

酌量撤回蒙

諭以杜患安邊爲重不得意圖諉卸等因欽此本年三月又據英秀咨稱於上年十二月代奏病狀奉到

硃批瑞洵著再賞假兩箇月欽此臣媿以弱才猥荷

聖明不棄屢沐

寬假深恩未答涓埃每滋悚疚故前此具奏經手事竣雖病體有加未敢顯言歸職迺承

俯察隱衷

特准開缺回旗調理仰維

聖主如天之仁臣何人膺斯

優眷昔漢西域都護定遠侯班超以久在絕域年老思土上疏自陳至有但願生入玉門關之言而踰望三年未蒙省錄逮超妹昭亦爲書請始得徵還以臣資材庸碌略無勛建可比

前賢而

聖朝軫恤邊臣實已超越炎漢凡此

天恩殊絕誠非臣捐糜頂踵所報萬一臣惟有強自支厲督率清釐俟將一應事宜交代清楚即於春融輿疾回旗延醫調理儻蒙

宏慈覆護所患幸獲全瘳則此後有生之年莫非

朝廷所賜臣自當勉策疲驚仍效馳驅報

國惴忱固不敢一息少懈也所有臣叩謝

天恩緣由謹繕摺具

奏伏祈

皇太后

皇上聖鑒謹

奏 光緒三十年十二月二十六日拜發

光緒三十一年二月二十八日遞回奉

硃批知道了欽此 正月二十三日

此疏篤雅有節傳世之作 久注

請交英秀暫護印鑰片

再臣奉

旨開缺回旗調理自應靜俟壽勳到任面加交代惟臣恐懼下情有不得不據實直陳者臣自到科布多已閱五年而竟有四年之病迄今諸證踵增尤以心腎交虧爲最甚雖力疾辦事實無時不憂貽誤誠以邊鎖務殷斷非久病之軀所能勝任茲已邀恩放還若猶因循戀棧則上負

生成下虧職守臣之罪更大臣之心奚安臣反復思維英秀雖蒙

賞假急欲起程而冰雪在途一時尙難就道若將印鑰仍暫交其護理當不至遽滋隕越該大臣俟交卸再行回旗省親亦無不可仍應請

旨飭令壽勳迅速前來至爲感幸臣又聞春滿病請開缺奉

旨後不出五日卽將參贊印務交所屬章京忠瑞暫護自係病不能支而臣氣力羸憊所患較春滿彌劇知必同荷

天恩體恤也臣因疾疾太深

委寄至重切切以辜

恩曠官爲慮用敢不揣冒昧附片瀝陳伏祈

聖鑒訓示臣不敢擅便謹

奏請

旨 光緒三十年十二月二十六日拜發

光緒三十一年二月二十八日遞回奉

硃批已有旨著英秀暫署矣欽此 正月二十三日

撫卹俄商摺

奏爲俄商查無下落一案懸宕過久現已酌給卹銀議結具陳辦理情形請將此項銀兩

敕部撥給以清墊欸繕摺馳陳仰祈

聖鑒事竊查光緒二十六年俄商阿克索諾福即密錫克隨帶蒙古工人由科布多烏梁海游牧撥什庫吉齊納克家前往阿勒台住牧塔爾巴哈台所屬哈薩克酋長巴蘭赤克處收討帳目失去無蹤一案疊經臣派員認真查訪嗣准外務部咨二十八年正月俄使照請派員會同俄員查辦等因復由臣遴委幹員會同俄駐庫倫匡索勒施什瑪勒福所派俄官及

塔城委員逐細查勘並無實跡旋據該匡索勒照稱此案顯係塔屬哈薩克所害應行咨部請示抑或由塔屬哈薩克賠償銀二萬兩儻有謀害之人即由中國照例治罪等語而春滿來咨則謂失去俄商似仍在科城所屬地界並未管借地尙未交還仍歸塔轄臣未便與之計較徒費筆舌遂經飭查昌吉斯台卡倫有無該俄商阿克索諾福過卡折回俄國之事隨據該處駐卡侍衛英紱呈復光緒二十六年三月曾有俄商阿克索諾福進卡呈驗執照報明往科屬烏梁海游牧經商後惟未見該俄商出卡等語臣詳加籌度該俄商由吉齊納克寓所出門曾否行抵巴蘭赤克處不得而知而並未旋回俄國似無疑義祇以地介兩城哈係塔屬事無左證難成信讞遂致閱時五年案懸未結本年八月二十八日新任俄駐庫倫匡索勒哩約巴特來科布多商辦此事值臣甫由新疆馳回論者多謂此人太是精悍不易商量且有以臣不久即請開缺樂得推到後任相勸者臣則以該俄商人貨並失係屬_事無論其地爲科爲塔均是中國境內臣等同爲邊吏未便過分畛域若仍彼此推宕深恐日久更難收拾似非維持大局之道且旣不能置之不問則此際未查確實尙可相機辨難惟若必根究實在萬一果有謀害情形則轉圜益覺爲難至推諉辦法臣絕不肯爲因與該匡索勒和衷商辦期斷葛藤該匡索勒初猶堅執賠償銀二萬兩之說經臣再三辯駁不認賠

償極力磋磨始經議定以銀三千兩撫卹該俄商阿克索諾福家屬完案其銀科塔各認一半由科先行墊給當與該匡索勒彼此行文照會並經暫挪庫欸付給取具收條作據仍議明此係通融辦理不得作爲定章臣伏查中外交涉往往因遷延諉卸枝節橫生以致尋常細故釀成鉅釁此案膠葛已久俄人屢以爲言初以索償過多猝難置議今由二萬而減至三千實已煞費說詞竟得就此和平了結殊非始願所及若臣亦如塔城仍復推延則曠日彌久愈難清理臣慎重邦交願全

國體苦心必蒙

聖明垂察即外部王大臣亦當鑒諒惟科布多常年經費皆有定額一經挪用即成虧欠此項墊欸應如何酌量撥還之處請

敕戶部覈議遵行除咨呈外務部暨分行外所有俄商查無下落一案懸宕過久現已酌給卹銀議結具陳辦理情形請將此項銀兩

敕部撥給以清墊欸緣由理合繕摺馳陳伏祈

皇太后

皇上聖鑒訓示謹

奏 光緒三十年十二月二十六日拜發

光緒三十一年二月二十八日遞回奉

硃批著照所請該部知道欽此 正月二十三日

擬保收哈出力人員先行請 旨摺

奏爲科布多辦理招收逃哈人員異常出力籲懇

天恩俯准擇尤從優分別保獎以慰成勞而昭鼓勵繕摺具陳仰祈

聖鑒事竊臣自光緒二十八年八月派委員弁前往新疆招收逃哈二十九年十一月復親赴鄂倫布拉克台駐劄相機彈壓本年四月又馳往古城督率催遷至八月底始將潛新科哈隨地歸哈及早年竄往之哈一律收回業經繕具摺單

奏報臣伏查新疆潛哈隨畜薦居閱二十餘年延數千百里男女丁口數逾萬計平日恃其驕捷工竄侵佔蒙回收場動輒糾衆逞兇日聚日多隱爲民患至辦理之難急之既虞走險緩之又類養癰操縱之間殊非容易本年六月間潘效蘇遵 旨議定功過摺內已陳大概臣亦會

奏明謂比臨陳禦敵尤爲艱棘直如招尋數千出柙走險之虎兇毆使歸閑就勒並非過語

即如前此白塔山潛哈率衆抗官勢已岌岌若辦理稍失機宜則嘯聚日固解散彌難其時正值伏暑戈壁酷熱該委員等盡瘁馳驅蹈不測之機遇已張之逆以十許員弁開導千百強橫負固之哈夷不費一兵一矢卒能使離積年巢穴帖然西遷此其勞烈殊常尤屬難能可貴各該員弁等無分冬夏始終其事寒暑奔馳餐風履雪巴里坤一役往返何止再三上年潘效蘇來函有該哈始則以暑熱乏水爲詞繼又以寒凍缺草爲抵該地方文武派隊驅逐竟敢排列槍礮抗拒嗣飭各回原牧該哈復敢將地方官所派弁役肆行細縛鐐鑕實屬怙惡已極又謂此次會查科塔逃哈該哈等散處各城遊牧盤踞已久勢甚蔓延得委員參將祥祐等會同結實清查寬猛相濟始獲辦有端緒該哈等素稱頑梗屢次持械抵拒不遵約束經委員等多方勸導咸願仍還舊牧不復逞刁實屬異常出力事竣之後自應會銜從優保

奏以示鼓勵而策將來等語則哈衆兇悍辦理爲難情形可見一斑潘效蘇擬以優保蓋亦實見該員弁等之功不可泯也臣查前此科布多辦理籌防出力人員臣於光緒二十七年十一月具摺奏保欽奉

特旨照准上年三月臣復將出力之州同職銜崔象侯附片奏保以州同不論雙單月遇缺

儘先即選欽奉

硃批吏部議奏欽此旋接部咨亦照異常勞績議准蓋北路軍營著名苦寒額餉支絀原與內省情形迥異差遣每苦乏材一人恒兼數役彼既無實利可冀不得不藉此虛名以爲奔走羣才之柄凡此情形知己早邀

聖明垂鑒竊維

朝廷論功行賞必視地之夷險事之難易以爲衡但使列保之人皆著績之人即略予從優亦足示勸況此次辦理收哈科布多文武員弁兵役跋涉鄰疆再更寒暑弊於行役者多至十餘員名其在事之艱苦卓絕委非尋常出力可以並論自不能拘牽例文苛繩尺寸致令勇任往事之人廢然自沮且臣世受

國恩身膺重寄不避艱險尙係分所應爲獨此微末員弁奮勉從公勤劬罔恤辦理垂及三年茲幸事已告蒞若不優加保獎殊無以資策勵而勸方來合無仰懇天恩俯念邊遠軍營餉絀事艱用人不易

准由臣將尤爲出力之文武員弁從優各保數員餘仍核其功績按照尋常開保以慰成勞出自

鴻慈逾格臣係爲鼓勵人材起見如蒙

特允實於籌邊用人毗益匪淺所有科布多辦理招收逃哈人員異常出力籲懇

俯准擇尤從優分別保獎緣由理合繕摺具陳伏乞

皇太后

皇上聖鑒訓示謹

奏 光緒三十年十二月二十六日拜發

光緒三十一年二月二十八日遞回奉

硃批准其擇尤酌保數員毋許冒濫欽此 正月二十三日

阿勒台分撥專管事宜請俟壽勳酌議片

再阿勒台山現已奉

旨移駐辦事大臣管理該處蒙哈事務敬繹

諭旨該處二字實已扼其大綱則科布多一切公事卽屬無須兼顧且亦不能遙制若欲互相牽掣必至均歸貽誤所有阿勒台山應行管理各項事宜自當分晰條欸明定章程以專責成而資遵守惟權勢所在易啓競爭臣久病謀慮既多疏失而事關久遠亦實不可草率

定議且計錫恒明春繞道新疆抵任必更需時擬俟新任參贊大臣壽勳到後審察機宜其如何酌量分撥專管之處應由該大臣悉心覈擬

奏明辦理庶歸穩慎臣愚謂新政自須詳籌舊制究不當輕廢總以泯除意見期裨大局爲主是否有當理合附片具陳伏祈

聖鑒謹

奏 光緒三十年十二月二十六日拜發

光緒三十一年二月二十八日遞回奉

硃批著錫恒等會商辦理欽此 正月二十三日

滿兵到防日期片

再前准綏遠城將軍貽穀咨照派科布多換防戍守滿兵赴科除內有清安一名俟屯局經手事件完竣即令起程外現派委署驍騎校恩騎尉瑞廣帶領前鋒瑞壽五品頂戴領催清泰領催松林五品頂戴馬甲胡圖凌額馬甲官凌薩畢屯就便分解科布多本年前一半經費銀兩於本年七月十二日自綏遠城起程等因茲查該委驍騎校瑞廣帶同滿兵六名均於十月二十五日到防內松林一名據報抵城後旋即病故現在到防滿兵實止五名缺額

尙多容另具

奏調補臣當將該兵等面加考驗清蒙文義分撥各衙門局處當差例開支銀糧仍俟三月後照章均作爲委署筆帖式除分咨查照外理合附片陳明伏祈

聖鑒謹

奏 光緒三十年十二月二十六日拜發

光緒三十一年二月二十八日遞回奉

硃批該衙門知道欽此 正月二十三日

具報官廠駝馬數目片

再查科布多官廠牧放牛馬駝隻三項牲畜前遵部議整頓馬政章程飭令該管蒙古員弁認真經理秋季派員稽查年底奏報一次節經循辦在案本年八月間業經派員查驗該廠舊管馬二百一十九匹新收無項共馬二百一十九匹舊管駝八百八十六隻牛隻無存除動用並例倒外實存馬一百六十九匹駝八百一十八隻尙無缺額情弊當飭逐一烙印仍責成該管協理台吉等妥爲牧放以備應用除咨部查照外理合附片

奏報伏祈

聖鑒謹

奏 光緒三十年十二月二十六日拜發

光緒三十一年二月二十八日遞回奉

硃批該衙門知道欽此 正月二十三日

散木居奏稿卷之二十三

門人鈴木吉武校字

散木居奏稿卷之二十四

幹難 瑞洵

棄肋集

敬抒管見摺

循案酌保人員摺

請 賞給希凌阿頂戴片

保舉將才片

留營差委履歷查明聲覆片

揀補章京及委署主事員缺摺

布倫托海渠屯各工無法墊辦片

更正筆誤片

籌台站通融體恤辦法片

具報交卸印務起程日期摺

代奏丁憂片

請留文案處片

辦理收安委員斟酌去留片

敬抒管見摺

奏爲新疆辦理南路屈莽山驅哈一役宜加慎重嚴防後患敬抒管見具摺密

奏仰祈

聖鑒事竊臣前於具報收哈一律告竣摺內聲明屈莽山一役應如原奏另案辦理已蒙垂察嗣於上年十二月二十四日接新疆撫臣潘效蘇咨錄具奏屈莽山尾股逃哈不服驅收傷害弁兵團丁現籌辦理情形摺稿內稱屈莽山哈衆三起惟尾股哈目布克即伯克一起毆房三十餘頂踞昆瑪可利地方八月十九日把總王得勝張鳳生經制張人壽等分帶馬勇團丁馳往勸諭布克應允出山不意是夜五鼓忽率百餘人掩至槍棒齊施該兩把總均登時殞命陣亡馬勇團丁二十四名帶傷十五名等語臣查哈薩克狡悍成習操之過急即詭計百出罔遵法紀此起尾股哈衆僅百餘人而派往馬勇團丁亦有八十餘員名爲數不甚懸殊乃以本處兵團辦本地之事尙致誤墮危機傷亡過半則前此科布多數十員弁招收新疆全境萬數之哈其如何慘澹經營心力並殫可資借證臣前摺

奏懇

恩准從優保獎蓋亦以邊遠軍營事艱餉絀該員弁等跋涉鄰疆履蹈危險其辛勤勞苦實有倍異尋常者也臣查閱潘效蘇原奏於此起哈衆初未分析科塔並有續收之二起逃哈已飭解交科布多委員接收之語辦理未竟朦朧查哈薩克向不准闌入科布多卡倫自光緒七年胡圖克圖棍噶札拉參帶兵收哈擅殺哈目柯伯史之子哈衆驚竄奔至科布多河源前大臣清安額爾慶額等奉

諭收撫科布多始有哈迹卽同治十二年間借地安插該胡圖克圖徒衆其時亦未聞有哈衆逃亡情事查布克之入新疆係在光緒初年是則此起哈衆不但並非科屬且不得指爲舊牧阿勒台山故當光緒二十八年春滿派員至新疆收解之際科布多即未曾派員貿然往收今若竟以阿勒台爲逋逃淵藪併力驅納似乎尙欠斟酌臣伏查光緒二十八年新新疆巡撫饒應祺

奏請將逃往南疆之科塔哈衆設法羈縻以防外出生事一摺奉

硃批著將該哈衆就地設法安插毋任出境生事等因欽此比時臣亦以爲民哈雜處恐難總和不無總總過慮泊上年親履新疆詳察民情始知該哈潛牧有年本已相安無事若聽

其遊泳樂郊尙不至卽爲民害潘效蘇到任後保衛地方不遺餘力確見此等哈夷本非孝子順孫習爲侵擾遂卞一律肅清之議而該地方文武印委未能默體寬猛相濟之義但顧考成遂致有不分良莠概被毆逐情事激變之端率由於此竊念新疆現當裁撤營旗改招土著之際事甫更張難言訓練該哈雖人數無多已成困獸猶鬪之勢是處界近英俄萬一圍剿未能得力偏之外竄則走胡走越其患益張外務部之筆舌且將應接而不暇新疆土曠民稀豐草長林田牧饒衍若如饒應祺原奏雖非上策尙是息事安邊之道茲旣釀成鉅案自不能不嚴懲首惡以戢梟風然必盡殺無赦不特勞師動衆耗帑殊多且亦無此辦法此股哈衆旣非盡屬科布多亦非舊牧阿勒台又貪戀水草安土重遷與其勢迫刑驅徒滋驚擾似又不如以欽遵前

旨辦理爲是臣現已蒙

恩開缺亦知事有主者原不必越俎而代第以邊局攸關臣復稍悉哈夷情形管見所及不忍不言用敢竭其愚慮具摺密

奏伏祈

皇太后

皇上聖鑒謹

奏

循案酌保人員摺

奏爲循案酌保科布多軍營章京筆帖式各員懇

恩照擬給獎以昭激勸專摺繕單具陳仰祈

聖鑒事竊臣前奏請將部院額缺章京筆帖式等按照邊省軍營勞績擇尤保獎並定三年爲期數員爲度等情於光緒二十七年正月奉

硃批著照所請該衙門知道欽此當經臣於是年十一月將軍營部院章京委署主事筆帖式各員遵

旨保獎均蒙

恩特予照准欽遵在案臣伏查近年以來科布多邊務殷繁索地收哈興屯增防在在胥關緊要論經費則支用浩穰籌措孔棘論案牘則簿書填委因應不遑而管理台卡屯牧綏戢蒙哈纏民事尤艱劇該章京等殫心區畫竭力維持昕夕從公實皆奮勉出力即如上年日俄開釁邊垂僻遠肆起訛言臣時方駐紮鄂倫布拉克台督辦收哈深慮蒙情惶惑致有疏

虞疊諭軍營部院各員督飭邊官嚴守中立鎮靜勿擾該章京等均能聽受領會防患幾先疆圉克臻安堵臣亦倖免愆尤本年適屆三載開保之期臣秉公察覈該章京筆帖式等勤事赴功始終罔懈洵屬有勞可錄自應循案

奏保獎成勞以策後效雖邊營著績甄叙本許從優第值嚴覈保舉之時宜防冒竊功名之漸臣不敢稍涉寬濫仍按尋常出力列請均未有逾限制謹繕清單祇呈

御覽合無仰懇

天恩俯准照擬給獎以昭激勸出自

鴻施逾格除飭取履歷咨部外所有循案酌保科布多軍營章京筆帖式各員懇

恩照擬給獎緣由理合專摺繕單具陳伏祈

皇太后

皇上聖鑒訓示謹

奏

謹將循案酌保科布多軍營章京筆帖式各員擬請獎叙敬繕清單祇呈

御覽

計開

補佐領後以協領即補先換頂戴補用防禦印務處承辦章京主事職銜崇文

首先補用防禦後以佐領補用先換頂戴蒙古處幫辦章京主事職銜景藩

以上二員均擬請俟歸佐領班後

賞給二品頂戴

缺即補佐領先換頂戴糧餉處幫辦章京主事職銜雲秀

首先坐補防禦後以佐領即補先換頂戴印務處幫辦章京主事職銜錫齡阿

以上二員均擬請

賞給三品頂戴

補驍騎校後以防禦補用先換頂戴糧餉處筆帖式春普

藍翎五品頂戴補驍騎校後以防禦補用印務處筆帖式景貴

五品頂戴補驍騎校後以防禦補用印務處筆帖式依罕

五品頂戴補驍騎校後以防禦補用蒙古處筆帖式興文

儘先補用驍騎校後以防禦補用先換頂戴蒙古處筆帖式金奇暹

以上五員均擬請

賞給四品頂戴

查加銜定章四品不得逾二品六品不得逾四品以上所請均未有逾限制合併聲明
請 賞給希凌阿頂戴片

再查

記名理事同知通判科布多軍營糧餉章京委署主事希凌阿到營以來正值辦防之後墊發藥庫空如洗支應益較平日爲難而常年額支及屯哈邊防皆屬萬緊要需勢難延緩每經該員百計維持向市商應鋪設法借貸賴以集事其兼籌並顧委屬煞費苦心至綜理糧餉雖爲該員專責第北路軍營人少事多恆至料理不遑輒有積壓該員認真督飭將光緒六年起至二十六年止閱六七任未經辦結之報銷悉心稽覈一律造冊繕單咨部覈銷在案塵牘一清亦實不無微績查內省清釐積案向有鼓勵之章獨茲邊遠苦寒無可調劑自不得不假獎敘爲激厲前章京

記名理事同知現任主事榮泰曾因清釐欠餉經前參贊大臣寶昌附片

奏保請歸班先帶領引

見欽奉

特旨照准足見

聖明俯體遐荒雖在微勞且蒙

記錄況該員來營當差在苒已及三年現當額缺章京等循案請保之際似未便獨令向隅致失公允合無籲懇

天恩俯准將同知銜

記名理事同知通判科布多軍營糧餉章京委署主事希凌阿

賞給四品頂戴出自

鴻慈理合附片具陳伏祈

聖鑒

訓示

奏

保舉將才片

再科布多換防補用副將直隸昌平營參將世襲騎都尉祥祐自光緒二十三年十一月到

防扣至光緒二十八年十一月早經五年班滿嗣以派赴新疆查收逃哈又越三年茲因招收一律歲事稟請給咨回省等情臣查該參將現在已無經手未完事件自應發給咨文准其銷差離營仍回直隸原省惟查該參將祥祐廉幹有爲結實可靠當光緒二十六年辦理城防該參將督練蒙團巡緝奸宄夙夜匪懈地方賴以敕安辛勤較著及派往新疆收哈跋涉山川履危蹈險迭更寒暑艱阻備嘗從前塔爾巴哈台收哈委員往往私受銀兩捏報肅清至目此差爲利藪該參將獨能潔清自勵不染一塵其深得哈心尙受約束即由於是故閱時三年收哈逾萬未嘗稍有齟齬而科布多辦理此事遂得及早平安告竣即以屯務而論該參將班期之內每歲收成總在十分以上爲近數十年所未有其任事勇往克盡厥職可以概見統計該參將在邊已及九年兩經軍政若論資序即在本省亦當早得升補乃以塞微換防轉致遲其遷陟未免向隅臣以爲似應量予體恤擬請

敕下直隸督臣袁世凱提臣馬玉崑俟該參將回省後察其資勞酌予升擢以獎勤事而爲後來之勸現值振拔旗才之際臣知督提二臣必能秉公辦理也臣爲不掩邊勞起見是否有當謹附片具陳伏祈

聖鑒訓示謹

奏

留營差委履歷查明聲覆片

再留營差委遇缺儘先卽選州同崔象侯前因光緒二十六年籌防出力經臣附片請獎於光緒二十九年

奏奉

硃批吏部議奏欽此旋經吏部按照異常勞績由該員州同職銜議以州同不論雙單月遇缺儘先卽選令將該員州同職銜之案查明聲覆具奏再行註冊等因覆奏奉

旨依議欽此恭錄咨行到營比卽札飭遵照嗣據該員造具出身履歷呈送前來臣以久在差次未及覈辦今查該員係直隸永平府昌黎縣人光緒十四年考取永平府府學附生光緒二十七年八月在秦晉賑捐案內報捐監生加州同職銜領有

行在戶部發給執照並據呈驗屬實除將履歷咨部外理合附片具陳伏祈

聖鑒

敕部查照謹

奏

揀補章京及委署主事員缺摺

奏爲揀補章京及委署主事員缺恭摺仰祈

聖鑒事竊查署科布多蒙古處承辦章京分省補用直隸州知州穆騰武前因接算期滿請咨回旗業由前護大臣英秀咨部辦理所遺蒙古處承辦章京一缺管理蒙古各旗暨台站卡倫官廠諸務加有哈部錯牧俄商交涉職事均屬重要亟應揀員充補以專責成臣悉心遴選查有儘先補用佐領即補防禦先換頂戴現充蒙古處幫辦章京主事職銜景善熟悉邊務資勞最深堪以陞補遞遺蒙古處幫辦章京主事職銜一缺查有三品銜補用佐遇缺即補防禦委署主事文惠年力富強差使勤奮堪以擬補該員等均俟章京報滿回旗仍照原保官階補用其遞遺委署主事查有藍翎五品頂戴補曉一校後以防禦補用印務處筆帖式景貴才識明練辦事細心堪以委令兼充其應支鹽菜銀兩按照向章辦理如蒙俞允俟遇差便分別給咨該員等赴部帶領引

見所有揀補章京及委署主事員缺緣由理合恭摺具陳伏祈

皇太后

皇上聖鑒

訓示謹

奏

布倫托海渠屯各工無法墊辦片

再布倫托海渠屯各工辦理告竣試種有效等情臣曾於光緒二十九年十一月

奏明在案查該處屯田辦理之始布置一切用款業由臣開單咨部報銷其自三十年起常年局用及添補牛具等項與夫員弁薪糧兵工口分計授所需爲費不貲尙未請有專欸上年英秀護任以科布多經費皆有定額無可騰挪又未敢率爾籲帑僅就本地竭力設法酌量減數播種臣回城後詢悉止發籽種三百二十石現據該局呈報收穫新糧二千零一十七石六斗有奇覈計分數已在六分以上較科布多城舊屯上年收數已至加倍是該地之宜禾已有明證惟借墊之欸亟須補償現除應提一成津貼烏梁海外飭將所餘新糧悉數變價歸還墊欸覈計尙有不敷徒以窘於財力致地利不克大興爲可愧耳臣愚謂邊要屯田若無專欸濟用誠恐難以持久至本年該處屯種轉曠又屆農時臣交卸在邇呼應不靈亦實無法墊辦竊計壽勳若能早來尙不致誤擬請由該大臣到任後察酌情形定議接辦除咨部查照外是否有當理合附片具陳伏祈

聖鑒訓示謹

奏

更正筆誤片

再臣於光緒三十年十二月二十六日具奏動款撫卹俄商該商原名密海勒阿克索諾福又名阿克索諾福又名密錫克本無一定惟前與外部行文係云密海勒阿克索諾福則前奏自應一律茲查摺內均將密海勒三字脫漏臣當時未經看出理合

奏明伏祈

聖鑒敕部查照謹

奏

籌台站通融體恤辦法片

再臣於上年十二月間據錫恆面商前赴阿勒台山駐紮現擬由新疆紆道前往並咨請督飭速將沿途台站應用烏拉駝馬氈房廩羊等項早爲預備定於今年二月間起身等因臣查由科布多城前往新疆必須取道鄂倫布拉克台原設八台每台祇兵十名氈房駝馬稱是僅供傳遞文報及零星差使不能支應大差至由鄂倫布拉克台之古城所經漢三塘則

是新疆轄境數百里沙山戈壁遼無人煙尤鮮水草且須由科布多派調烏拉駝馬等項權設數台長途傳送更非易從前遇有大員出差過境咸須發給幫欸即臣前年冬由城馳往鄂倫布拉克台與去年四月由台進駐古城亦均優給僱價賞需始克敷衍集事所費甚多上年十月間迭據札哈沁土爾扈特各旗呈報秋間陡遭旱蝗野無青草牲畜倒斃垂盡求加撫恤比以度支虛竭未能如其所願今錫恒繞由新疆攜眷赴任行李而外隨帶文武員弁兵役家丁爲數衆多經過各台蒙旗窮困委實無力承應若僅以空文督責旣失體恤且恐多延時日必致遲誤況當茲草盡馬疲之際如仍按舊設台路行走道里過遠駝馬久飢勢難一氣直達儻中途有失更虞阻滯溯查同治年間故將軍榮全由烏里雅蘇台前赴伊犁會由斯道抵納林即馬乏雪深不能前進往事可徵堪爲車鑒刻因派員籌設台站分飭蒙古各旗酌出烏拉牲畜各項人文甫行即據札哈沁暨烏梁海杜爾伯特土爾扈特各部呈報大雪屢降人馬直不能行傳僱烏拉多不肯應均恐受累耽咎懇求改緩日期拯救蒙艱等情臣反復籌商所呈自係實情此等重要差使本非恒有斷無勢迫刑驅之理然亦不便因之過展行期蓋取道新疆已覺迂遠再一遲緩今年便不能到阿勒台矣夫以錫恒啓行如此之急蒙情如彼之苦若不妥籌通融辦法俾供差者不生沮力于役者無慮稽程

殊非正辦臣現擬自科布多城頭台起至新疆奇台縣止暫爲勻設十六台每台添設氈房三十頂烏拉齊一百五十名馬一百八十匹馱駝一百五十隻均照近日市價發給實銀僱賃食羊若干如數應付亦一律給價期利遄行業飭承辦人員細加覈算需銀約在四千兩內外支差既畢即便全撤錫恒所帶餉銀既未便商動科布多雖庫帑極絀臣適承其乏即當力任其難祇好於經費項下暫且挪墊先應急需除此實無從設措此項銀兩應請准其作正開銷至將來如何撥補當俟新任參贊大臣壽勳酌辦惟頃據台員及派往傳調烏拉員弁稟稱刻下南八台一帶山雪仍未消釋路徑難於辨認月內恐難成行臣復加嚴催屆時能否全齊尙難預定除仍督飭趕辦暨咨部查照外所有籌安台站通融體恤辦法理合附片陳明伏祈

聖鑒飭部立案謹

奏

具報交卸印務起程日期摺

奏爲臣交卸參贊大臣印務起程日期繕摺馳報仰祈

聖鑒事竊臣於光緒三十一年二月二十八日奉到前奏請交英秀暫護一片欽奉

硃批已有旨著英秀暫署矣欽此先是英秀接新疆遞到電

旨經臣商請宣示敬悉正月二十日奉

旨壽勳尙未到任科布多參贊大臣著英秀暫行署理欽此跪聆之下感激無極臣當於三月十七日派委署印務章京糧餉處幫辦章京主事職銜即補佐領雲秀屯防遊擊榮厚將科布多參贊大臣銀印一顆暨令箭鑰匙

御押報匣文卷各件齎送英秀接受倉庫銀糧等項亦交代清楚並由承辦章京具結臣即於是日交卸因台站蒙員以天氣尙寒青草未長駝馬飢罷懇求緩俟夏初起身臣乃徇其請以示體恤今定於四月初八日由科布多啓程遵

旨回旗所有臣交卸參贊大臣印務起程日期謹繕摺馳報伏祈

皇太后

皇上聖鑒再臣長子二品廕生崧華前曾奏明暫留任所今亦隨臣回

京合併陳明謹

奏

代奏丁憂片

再據暫署參贊大臣三等侍衛英秀遣丁呈稱具呈家丁陳慎武竊家主現署參贊大臣英秀於本年三月二十九日接到家信家主之母臧佳氏於光緒三十年十二月十八日因病身故家主係屬長子自應循例丁憂回旗穿孝理合呈報懇祈據情代奏爲此謹呈等情臣伏維北路現在僅止籌防非軍務喫緊可比自不應在奪情之例惟該大臣已經接印無人可代祇可俟參贊大臣壽勳到任再行交卸回旗補行穿孝臣現已卸事此事本可毋庸干預第英秀疊懇代

奏臣亦未便諉謝謹附片據情具陳是否可行伏祈

聖鑒訓示謹

奏

請留文案處片

再臣前因辦理公事須防漏洩當於光緒二十六年冬間

奏設文案處凡遇重大事件文牘均由承辦以昭慎重嗣因奉

派收地安哈邊務填委不得不另設局處遴派專員經理以重其事復於光緒二十九年特立籌邊處卽委奏調來營洋務局總辦運判徐鄂兼理該處一切事宜並經附片聲明辦理

漸及兩年機要幸無貽誤現在收哈竣事阿勒台已

欽派大臣駐劄科布多事務頓減籌邊處應即裁撤其新公各項並於三月底住支惟文案處自設立後臣就近朝夕督飭委員筆帖式等辦理緊要公事隨時教令加意練習數年來頗見實效因循壓閣諸弊一掃而空各員等於撰擬繕寫皆能自爲甚見出色此次錫恒調用四員即由此選拔是文案處之設不獨裨益公務兼可培養人材廣需津貼心紅不過四百餘金但能有益要公即亦不爲浮費若竟一律全裁必至仍復舊轍枉費整頓苦心當與英秀商酌應將文案處照舊辦理津貼心紅銀兩仍准支給以資整飭除咨部外理合附片具陳伏祈

聖鑒謹

奏

辦理收安委員斟酌去留片

再臣前因辦理收安需人委用曾於換防班滿人員內奏請暫留委驍騎校吉拉敏千總馬成英把總張存德盧慶雲四員續又奏調同知銜新疆候補知縣王服昱用資指臂均蒙俞允現在臣經手事竣奉

旨開缺該員等亦均陸續銷差千總馬成英前因患病已准管帶防兵先回直隸把總盧慶雲緣事參革臣在古城時並飭知縣王服昱就近仍回新疆候補把總張存德上年派赴布倫托海辦理屯田尙資得力臣屬由英秀斟酌去留委驍騎校吉拉敏應飭即回綏遠城滿營當差理合附片陳明伏祈

聖鑒敕部查照謹

奏

散木居奏稿卷之二十四

門人銓木吉武校字

散木居奏稿卷之二十五

幹難 瑞洵

熱歇集

遵 旨酌保收哈出力開單請獎摺

參將祥祐運判徐鄂請量予優保片

酌保蒙哈漢文書手通事片

總兵易盛富請交軍機處存記片

請將札哈沁台吉 賞給戴頂片

從優議卹片

換防積習仍宜整頓摺

遵 旨酌保收哈出力開單請獎摺

奏爲科布多招收新疆竄哈在事出力人員遵

旨擇尤酌保籲懇

天恩照擬給獎以示鼓勵開單繕摺具陳仰祈

聖鑒事竊查科布多辦理收哈始自光緒二十八年其時新疆撫臣饒應祺以哈薩克人衆在新疆地面強佔蒙牧貽害地方咨請臣派員會收當經臣奏委屯防參將世襲騎都尉祥祐帶領員弁兵丁通事等往辦並奏調候選判徐鄂來營設立籌邊處責令綜理索地收哈一應要公復派員馳往哈薩克各游牧催調氈房駝馬迎投接收迨光緒十九年夏間因瑪呢圖噶圖勒幹卡倫滋事驚擾歸哈幾至駭竄是年十月臣欽奉電

旨前往彈壓拊循比時臣因委員不敷分布復於察哈爾新疆各處就近函調數員隨赴鄂倫布拉克台分任差遣光緒三十年四月臣進劄古城督辦收撫正待報竣詎意六月間突有白塔山潛哈旅拒官兵之事爾時逆燄已張勢將滋蔓經潘效蘇與臣會派現署巴里坤鎮總兵易盛富會同參將祥祐督帶隊伍柏機防剿臣一面密飭運判徐鄂隨帶員弁舌人星馳勸導哈衆始知感畏陸續西遷至八月底一律還牧以上各情均經隨時

奏報是役也溯自始事以訖藏功前後垂及三年招收數實逾萬該員弁等盡瘁馳驅幾更寒暑餐風臥雪辛苦備嘗俾茲出柙走嶮之虎兇歸閑就勒辦理煞費苦心洵屬勉奮赴功異常出力前經臣以援照光緒二十六年籌防保案擬將尤爲出力文武員弁從優各保數員餘仍覈其勞績按照尋常開保等情奏請欽奉

殊批准其擇尤酌保數員毋許冒濫欽此臣跪聆之下仰見

朝廷不薄邊功有勞必錄宣示闔營同聲感頌臣伏查哈性悍黠操縱皆難羈縻稍一失宜則豕突狼奔禍機立致光緒二十八年塔爾巴哈台收哈武弁李源翰行抵新疆昌吉縣地方曾被哈衆戕害上年八月屈莽山之變竟敢乘夜掩襲將新疆收哈把總王得勝張鳳生同時槍斃並陣亡兵團二十四名受傷者十五名此其辦理棘手確有明徵科布多以數十員弁約束萬衆罔知法紀之哈夷使之帖然回牧殊非容易名爲收撫實比斬馘擒渠尤爲艱險論功行賞即悉予優叙初不爲過惟現值整齊庶政之際

聖明慎重名器臣何可瞻徇私情應仍實事求是認真刪減茲覈照軍營異常勞績文武併計僅保十七員餘俱存記俟續著功效再行

奏保謹繕清單祇呈

御覽合無籲懇

天恩俯念萬里招收有裨大局

特准照擬給獎以示鼓勵出自

高厚鴻施除將最爲出力之參將祥祐運判徐鄂另片

奏保並飭取各員履歷咨部暨千總以下應獎各弁與蒙哈員弁彙咨部院覈辦外謹開單繕摺具陳伏祈

皇太后

皇上聖鑒訓示謹

奏

硃批該部議奏單一件片二件併發

謹將辦理新疆各處收哈尤爲出力文武員弁酌擬獎叙敬繕清單祇呈

御覽

謹開

記名理事同知通判四品頂戴科布多糧餉章京委署主事希凌阿擬請俟選同知後在任以知府不論雙單月遇缺儘先選用

遇缺儘先即選州同崔象侯擬請免選州同以知州不論雙單月遇缺儘先即選

同知銜新疆候補知縣王服昱擬請俟補知縣後以直隸州知州補用並請

賞換四品頂戴

藍翎贊禮郎銜工部筆帖式耆昌擬請以同知分省補用並請

賞加四品銜

候補筆帖式舉人英順擬請以知縣分省補用候補筆帖式增祿擬請俟得缺後以知縣選用新疆試用府經歷曾壽鈞擬請免補府經歷以知縣仍留原省歸候補班補用並請賞加同知銜

縣丞銜徐中盛擬請以縣丞不論雙單月遇缺儘先即選

以上文職八員

已保三品頂戴遇缺卽補佐領糧餉處幫辦章京主事職銜雲秀擬請

賞換二品頂戴

藍翎五品頂戴補驍騎校後以防禦補用已補委署主事印務處筆帖式景貴擬請以防禦遇缺卽補並請

賞換四品頂戴

五品頂戴儘先補用驍騎校候補筆帖式恒貴連瑞二員擬請免補驍騎校以防禦卽補並

請

賞換四品頂戴

儘先補用驍騎校已補額外驍騎校瑞秀儘先補用驍騎校候補筆帖式成秀卓麟三員均擬請免補驍騎校以防禦補用先換頂戴

補用守備後以都司補用儘先卽補守備宣化鎮懷來路岔道營千總馬成英擬請俟補守備後仍以都司儘先補用並請

賞加四品頂戴

五品頂戴已補把總程兆雲擬請在任以守備升用並請

賞加四品頂戴

以上武職九員

以上文武十七員經派新疆南北各路摺查潛哈馳驅萬里之程勞苦三年之久不避艱難屢經危險皆能開誠勸導設計誘擒督率哈官按起押解送往阿爾台安置並將撫恤茶畜糧布各項覈實散放窮哈均霑實惠用俾萬衆生靈還定安集不致轉徙流亡十餘萬駝馬牛羊牧養蕃滋漸基富庶煞費經營克收實邊安民之效較之軍務戰功殊有過之無不及並屬有益大局異常出力勞績相同難分次第是以未經強爲分註合併聲明

參將祥祐運判徐鄂請量予優保片

再新疆土曠民稀草場豐茂最宜畜牧故哈薩克駱驛奔赴視爲樂郊莫肯他適查從前塔爾巴哈台委員招收該哈等恒以賄求邀免迄今西路人員輒目此差爲利孔每年但有委員收哈之具文並無哈衆回牧之實事而哈乃日益滋蔓害遂隱中於地方此次科布多派往收哈員弁皆知以循拊爲懷守法奉公罔敢尤效實賴參將祥祐督率有方本身作則隨時戒勉之力又白塔山潛哈因伏暑催遷恃強拒槍傷六馬負隅自固其勢甚張臣雖與潘效蘇會商剿逐默揣哈夷非族異心官法難可制服並囑兵力有限防堵難周萬一紛竄蒙古游牧爲害茲大縱能制其死命而勞師動衆煩費騷然不惟有傷天和且恐轉堅外向維時新疆文武及隨營各員咸以爲非用兵不可獨運判徐鄂力排衆議毅然以開導自任奮袂請行該員方因病請假乃不虞危險迅赴事機慰諭百端卒使哈衆悟其執迷投戈效順杜遏甯萌丕彰

德化其膽識亦有大過人者至於窮搜蕙雪遠涉龍沙頻歲馳驅百方綏輯則該參將運判實同艱苦收哈之役自應以該二員勞動爲賞首臣覆查該參將祥祐前接潘效蘇來函屢稱其能臣以爲現在旗族彫零苟得明白曉事之員利示一塲亦足以資振奮如該參將之

昔才居考卷卷二二一
勤廉強幹器局開張即膺專閫亦無愧色至運判徐鄂經良於上年六月間明保在先比因
邊遠軍營文報遲滯尙未奉讀光緒二十九年十一月

申戒不得指請送部引見

諭旨以致誤有冒瀆惟查該運判徐鄂本擅才能夙明吏治自蒞邊方益深諳練辦事大臣
錫恒甚見賞異第權鹽職事稀簡若使改官州郡當可展其驥足方今人材消乏培植爲先
臣世受

國恩宜盡以人事君之誼況行邊萬里勞烈備臻但期甄叙公平似難拘牽資序合無仰懇
聖慈俯准將補用副將直隸昌平營參將世襲騎都尉祥祐仍在任以副將遇缺儘先補用
先換頂戴並請

賞戴花翎候選運判徐鄂免選本班以直隸州知州不論雙單月儘先選用量予

優異以爲實心任事者勸出自

特恩臣以該二員勞績卓著爲振拔人材起見謹附片陳請伏乞

聖鑒訓示謹

奏

酌保蒙哈漢文書手通事片

再辦理收哈一役出力人員臣已遵

旨擇尤酌保其隨帶蒙哈員弁及蒙哈漢文書手通事等從役萬程譚譯傳詞宣

上德而通下情且均能守法赴公毫無需勒並屬勞苦相同非尋常出力可比未便以差使微末致慨向隅自應一併擇尤給獎縣丞銜邵整擬請以縣丞不論雙單月儘先選用文章左銘請以巡檢不論雙單月儘先選用貢主連奎文章連泰忠旭請以七品筆帖式儘先選用廩生許寶麟請以訓導不論雙單月儘先選用以上六員均請

賞加六品銜烏梁海左翼管旗驍騎校巴圖擬請以佐領儘先補用五品軍功托利請以驍騎校即補並加五品頂戴哈薩克總管珠旺幹之子塔拉幹請以副千戶長補用章蓋阿密哈哩將南維他呢拜均請

賞給三品頂戴昆都恩博特綽和拉拜該二員擬請

賞給四品頂戴其餘出力較次者另由臣覈給六七品頂戴功牌分飭承領謹附片具陳代

聖鑒訓示謹

奏

總兵易盛富請交軍機處片

再臣前據

記名提督儀勇巴圖魯現署巴里坤總兵易盛富直隸昌平營參將祥祐申稱新疆自鎮西廳至阜康縣東西縣互數千百里北與科布多緊相接壤南連天山正幹草場甚廣凡哈薩克遠貿前來者貪戀此間水草不願回牧以至日引月長視爲故土已成牢不可拔之基兩年以來各營將士及收哈委員奔走於冰天雪地之中馳騁於烈日炎風之下忍飢受渴露宿風餐實屬艱苦備嘗不辭勞瘁可否仰懇給獎並聲叙鎮西哈衆羣推胖哈薩卽塔哈的里得拜爲頭目哈衆遷匿聽其指揮嗣經巴里坤鎮標中營中軍守備劉書質稟經易盛富祥祐設計誘擒設法羈縻始得將該哈目所管氈房一律交出其大石頭及穆家地溝一帶匿哈每遇兵民查到即偷越山南及探知摻查已過仍復潛來此次經古城營中馬隊守備孔福堂越境在西鹽池蘆草溝躡獲哈目霍他巴依到營始得將南山各起匿哈一律收淨又迪化城守協左旗都司劉清和在四五廠湖一帶督催南路歸哈逐起押趨至沙拉套海回牧天寒人衆約束尤難均屬有功足錄等情懇請覈獎前來臣覆查新疆辦理查驅潛

哈地方文官固多因循畏蕙其武職中尙有實心任事之人自經臣奏請嚴定功過該員弁等益知奮勉此次臣與潘效蘇會派易盛富祥祐等帶隊防剿遙壯聲威用得及早肅事有裨邊垂匪細除祥祐另片保獎外查該署總兵易盛富本係故大學士左宗棠湘軍舊部久蒞戎旃聲績卓著茲復和衷共濟督率有方臣隨事體察易盛富秉性廉勇馭兵整嚴實堪勝專閫之任可否請以提督總兵施恩仍交軍機處存記遇有缺出請

旨簡放出自

聖裁又新疆迪化城守協左旗都司劉清和巴里坤鎮標中營中軍守備劉書質古城營中旗馬隊守備孔福堂悉屬異常出力應請由新疆撫臣潘效蘇酌予

奏獎用昭激勸是否有當理合附片具

奏伏祈

聖鑒訓示謹

奏

硃批易盛富著仍交軍機處存記

請將札哈沁台吉 賞給頂戴片

再科布多所轄南八台係往來新疆孔道而札哈沁供應之五台尤爲大雪封壩後前赴阿勒台必由之途差使絡繹地當其衝查札哈沁游牧共二旗最爲瘠苦札哈沁公所屬一旗更形積弱戶口甚稀光緒二十九年十月英秀由哈巴河回科布多及臣馳赴新疆督辦收哈往返均經該台札哈沁貝子銜三等信勇公策林多爾濟深明大義調集烏拉駝馬奔走恐後並率其子二等台吉棍佈瓦齊爾遠道送迎招呼一切頗爲出力伏維北路比壤強鄰兵備單薄惟賴蒙古以爲藩蔽自有彼族交涉每虞誘惑潛滋所恃

朝廷恩澤龐洪羈縻勿絕臣愚以爲宜隨事隨時量加鼓勵俾益堅其翼戴之誠方足收扞禦之效合無仰懇

天恩俯准將札哈沁豫保二等台吉棍佈瓦齊爾

賞給二品頂戴以示獎勵如蒙

俞允實於維繫蒙部大有裨益除飭取履歷咨送理藩院查照外理合附片陳請是否有當

伏祈

聖鑒訓示謹

奏

硃批著照所請該衙門知道

從優議卹片

再軍營人員積勞身故例准給卹從前即補協領補用佐領印務處承辦章京主事職銜王善驍騎校崇凌在營病故疊經臣附片

奏請優卹均奉

硃批照准欽遵在案茲查有科布多候補章京洋務局委員補缺後以佐領補用綏遠城即補防禦清林自光緒二十四年換防來科練習公事當差甚資得力本擬保以協領補用光緒三十年五月派赴綏遠城催提經費餉項因恐有誤軍需兼程前進積勞故於差次又洋務局委員鹽大使銜朱壽嵩自光緒二十八年派辦招收逃哈執掌馳驅艱辛罔懈本擬以鹽大使加五品銜俟事竣彙案請獎上年五月十四日由鄂倫布拉克台前赴古城行營因戈壁無水冒暑邁征馳抵霍萊鄂博受暈傷生以上二員平日供差皆能不辭勞瘁居心亦極樸誠原應同予獎敘茲收哈幸已告竣在事出力人員仰蒙

恩准澤保獨惜該員等獎於行役未觀成功迹其從公勇往不顧軀命之苦心實足風勵薄

世宗憲皇帝實錄卷一百一十五
一
俗覈與前章京玉善等議卹之案勞績固屬相同情形尤爲可憫合無籲懇

天恩俯准飭部將已故擬保協領清林擬保五品銜鹽大使朱壽嵩均照軍營人員因公殞命例按擬保銜階從優議卹出自

鴻慈此外尙有應卹兵丁另行咨部覈辦理合附片具陳伏祈

聖鑒訓示謹

奏

硃批著照所請該部知道

換防積習仍宜整頓摺

奏爲科布多軍營換防滿綠官兵積習太深仍宜大加整頓以挽頹風而飭綱紀期免貽誤邊局繕摺據實具陳仰祈

聖鑒事竊查科布多軍營額設換防滿兵十七名綠兵二百二十四名滿營防兵向由綏遠城駐防內調派到營三月後即作爲委署筆帖式分撥軍營部院各衙門當差遇有章京筆帖式缺出循資洊升章京以七年爲班滿筆帖式以五年爲班滿送京當差之外願回旗就武者章京以防禦補用筆帖式以驍騎校補用如未補缺之候補委署筆帖式三年無過亦

准保以驍騎校補用其綠營防兵則向由直隸宣化鎮山西大同鎮兩處調撥今山西省綠營已裁其換防兵額二十名奏由科布多就近募補直隸現尙仍舊派換該兵等到防後分撥屯田正副犁頭差使暨充當參贊幫辦兩衙門巡捕戈什軍營部院字識看守倉庫監獄分應各項匠役遞送文報押解餉銀各差向以五年爲班滿屆期由直隸山西挑換五成派撥前來科布多於新兵到防後卽將當差不得力之兵照額遣歸此科布多軍營滿綠換防官兵定章之大較也立制之初本甚周密祇以世變風漓日趨苟且舊時良法美意蕩焉無存軍營部院司員但知習常蹈故緩慢偷安每辦一事必執成章老例以相持難百計阻撓動成掣肘卽如科哈潛竄新疆多至九百餘戶當時臣飭查承辦司員猶諉爲並無其事又如布倫托海屯田報辦之始僉謂該處地同石田十年難遇一穫迄今收回竄哈戶口數已溢於原逃上年布倫托海收成分數幾倍於科域舊屯而羣言猶未能息迹其因循畏怯之初心無非識見淺陋而卽茲籲預敷衍已隱釀異時之患壞邊事於無形至綠營官兵則原爲屯田而設舊制有大班小班之分本不重操練之事僅知索擾蒙古欺侮商民其中尤有一最壞惡習專好無風鼓浪造謠生事就臣所耳聞目睹者言之如前任參贊寶昌幫辦祿祥互參之案事本細微由於巡捕張喜史永貴挾嫌挑唆遂致交章攻訐上瀆

聖聰又臣到任之始喧傳前烏里雅蘇台將軍連順已將臣登諸白簡而連順亦聞臣有奏効將軍之事幸臣內省不疚置若罔聞而連順亦不之信馳書慰問始共釋然錫恒到後人言尤多要不外錫恒參臣與臣參錫恒而已互相構煽期遂其報復之私惟臣辦事向尙認真以力懲伊等朋比把持之習又嚴於約束官兵因而蓄恨比歲時在病中部卒頗涉懈弛頓復舊轍前年春英秀由旗赴任甫離綏遠數台即傳言英秀途次病亟致英秀之母傷慟失明上年冬錫恒赴任過科布多暫駐因臣臥病簡出錫恒亦體諒過從不密該官兵等復竊竊私議指爲意見不和錫恒曾因臣病不能支欲代臣詣各廟宇拈香令巡捕陳作忠來告臣回答甚好可感卽請偏勞該巡捕陳作忠竟敢捏稱臣已允委派以激錫恒之怒凡若此類不勝枚舉幸錫恒於臣相知已深初未經信查陳作忠本一馬兵前年冬間英秀派令赴布倫托海接辦屯務因抗諭不遵責懲拘禁去夏臣奉差古城英秀遽令監修廟工乃甫經開釋故態復萌似此性非安靜怙惡不悛若不及時斥逐勢將無所不爲阿勒台蒙哈十餘萬其奚以堪其魚肉揣其無端簧鼓之意無非獻勤討好希冀就中取利耳而不知誣讟官長淆亂是非已足大干法紀查滿營之習在畏事其故由於未嘗學問以一甲兵進身不事詩書其上者僅粗通文義其次者並漢字亦所識無多到防後學繕文牘間習蒙古文字

語言已爲上選除奉行文書外即無所知其不學遂懵無遠識馴至一語不敢輕發一步不敢多行遇上官稍有交辦事件即相顧愕眙故歷任大臣苟有心整理莫不借材異地遠道調員然口外與內省風氣不齊情形亦多扞格臣前以科布多部院章京筆帖式員缺已已與烏里雅蘇台相埒而兵額僅及其半官多兵少有到防未及三年已補筆帖式者不免啓躁進之端擬添調若干名俾敷指使且備阿勒台山徵取嗣因借地議緩遷延至今至綠營之習在喜事其故由於不明紀律以直晉之兵遠離本轄雖有實缺參遊千把爲之管帶然官與兵不相習甚至兵得美差優保駕官而上則官且畏兵由其無律遂愍不畏法馴致驕蹇放恣不遵約束偶有過失卽欲懲革而塞外民人罕至卽有來者祇知牽牛服賈不願屯戍荷戈挑補無人不得不曲從寬貸而若輩遂益肆無忌憚矣卽臣數年抱恙不痊有竊議由於詛呪者邪說固不足信然臣憤氣習之媮薄心計之嶮巖鬱懣不能自伸疢疾卽相因而至是亦理之或然者窮其弊害之所極必使大臣捐王法弛軍令一聽客之所爲而後已是豈國家建闢設戍之本意哉臣上年駐劄古城時曾向潘效蘇借到槍枝二百餘桿原期就地招募小隊親加訓練帶回科布多將驕惰孱弱之兵陸續汰遣會以餉需難籌未及果行以上兩端皆切要之圖凡事待人而行人才不强政務奚理人心不正禍亂踵生此皆

臣切切私憂而愧未能施其補救者臣竊謂取材於臨時宜先育材於平日綏遠城將軍貽穀銳意振興旗務建設學堂宜可特立邊務一門專壹培植換防人才庶冀以學力擴充聞見教習材能頽敗痼習亦可望潛移默化似屬當務之急擬請

敕下將軍貽穀就近體察妥訂規程加意訓養並擬嗣後北路換防非由學堂出身者不得調派以杜情面而收實用其直隸綠營久必全裁將來必至無兵換防應如何更定辦法當由新任大臣咨商直隸總督悉心籌圖

奏明辦理抑臣更有進者北路軍營之設初爲拊綏蕃部今且控制強鄰事既繁簡攸殊勢亦輕重迥異僅恃此不明大義不安本分之官兵摺拄其間誠恐非徒無益物極必反窮變通久正在斯時惟望

朝廷深加之意而已臣經營慘淡措畫有年今雖解職回旗而心繫邊陲不能自己用敢專達

上聞尚冀

聖明俯憐臣之愚

敕交新任大臣壽勳錫恒熟察情僞大加整頓以挽頽風而飭綱紀期免貽誤邊局實爲北

路之幸臣不避嫌怨謹繕摺據實具陳伏祈

皇太后

皇上聖鑒訓示謹

奏

旨留中

散木居奏稿卷之二十五終

門人鈴木吉武校字

跋

天城山人爲瑞景蘇世丈排印奏艸懿涑編摩讐校益增
悽敬當光宣之際用人行政彼時髮未燥即已麤知其失
當於戲家國盛衰人每歸之運數豈其然哉興化李審言
徵君嘗述蒯禮卿京卿之言曰朝著忠讜之士半皆流宕
江海縱使騰達有所建樹勢亦不能安于其位行見斗筲
泄沓厠九列膺重寄非吾儕之不幸乃朝局消長一大關
鍵何其言之悲也丈以喬木世臣早歷華選若循默平進
可以自容顧素性鯁直敢于言事遂令時流側目久居邊
徼復爲忌者所中及沈寃甫白而大局已不可爲矣天留

老壽坐閱滄桑萬物皆流而金石獨止卒之抑鬱誰語齋
志以沒幸有海外門生料理刊行其志事得以流傳百一
將使後之人尙友論世得所取資匪獨風義敦竺之爲可
欽挹也已卯秋日遼陽楊懿涑謹識于椿蔭堂

散木居奏稿校勘記

卷	葉	行	正	誤
三	二十四	末	項	十
三	二十五	二十二	重字下漏寄字	
三	三十二	七	十	衍
四	五	五	校	枝
四	十二	五	理合	合理
四	十八	二十六	母	母
四	二十二	末	國	國
六	十七	二十一	譯	釋
七	二	二十四	日	月
九	六	二十二	未	來
九	十三	二十三	脈	脈
十	二	十	末	未
十一	九	九	鳥	鳥

改卡号案高交功己

一
登
菊
軒

十二	十一	三	烏	烏
十四	七	八	慨	概
十四	十一	十	逐	遂
十四	十六	十二	迴	迴
十四	十六	十三	護	議
十六	六	十九	驥	饒
十八	一	末	因	衍
十八	十	四	咨	資
十八	十	十九	批	祈
十八	十一	二十三	摺字下應添代字旁注	
十九	一	二十四	迴	迴
十九	三	二十二	意	竟
十九	十四	八	隨地歸	地隨歸
二十一	二	四	緩	綬
二十二	十四	二十	久	永
二十三	三	二十七	思	思